

NAIRAELOUTA

قصص قصيرة

# الثانية عشر بتوقيت شوكي

شهيبة عبد الحميد

الكتاب :- الثانية عشر بتوقيت شاكي

التصنيف :- أدب الرعب ( مجموعة قصصية )

المؤلف :- شهيرة عبد الحميد

تصميم الغلاف :- نيرة اللوتة

الطبعة :- الأولى

تاريخ الإصدار :- 2024

جميع الحقوق محفوظة للكاتبة

بتصريف من

رشحلي رواية

إهداء

إلى الصغيرة " شين " تلك الفتاة التي لاتزال صاحبة السبعة أعوام ، لا تكبر أبدًا، ولا تُهزم أبدًا.

سلام الله على قلبك حتى يطمئن

من صغيرة جبر الحمير

## توأم روحي

المواقف اللي بتحصل بين الأخوات التوأم دايماً مريبة، خصوصاً اللي حصل معايا من بعد موت أخويا "رشاد" توأمي .

أنا رشيد الأسبوطي، اللي حكايته ملهش معنى مفهوم ولا نهاية؛ بسبب موت أخويا الوحيد اللي مات في ظروف غامضة عيشت أعاني منها لوحدي.

أنا ورشاد أخين توأم طول عمرنا مبنفارقش بعض لحظة ومفيش مكان بنروحه غير وأيدي في أيده، ده غير نسبة التشابه الكبيرة اللي كفيلة تخلي مفيش حد قادر يفرق ما بينا.

من آخر خروجة بعد الإبتدائية واللي كانت بالتحديد في القناطر الخيرية اتبدل كل شيء.

أنا فاكور كويس أوي أنا ورشاد كنا منتظرين الخروجة دي إزاي.. فاكور حماسنا واجتهادنا وقت الإمتحانات علشان نوصل ل أعلى درجة وبابا يكافئنا بزيارة القناطر اللي عمرنا ما شوفناها في حياتنا، وياريتنا ما شوفناها

لما روحنا القناطر مع بابا وماما الفرحة مكنتش سيعانا وفضلنا نجري ونتشاقى هنا وهناك

لكن في مكان معين كان كله أشجار عالية ومش باين من كثافة الأشجار فيه، لما جينا نجري ناحيته "بابا منعنا وقالنا بالنص "محدث يروح هناك كده، خليكوا قدام عيني هنا

أنا حسيت بالجوع وقعدت علشان أكل لكن رشاد قال إنه هيروح يجيب حاجة حلوة ويرجع على طول ومحدث ركز هو رايح فين.

رشاد أتأخر ساعة وساعتين وبقينا نلف عليه القناطر كلها والناس اتجمعوا على صوتنا وصريخ والدتي باعتقادها أنه تاه

لكن رشاد متاهش لأ

رشاد رجع هدومه غرقانة دم وبيتر عش وبيمشي بالعافية كأنه مش قادر يصلب طولہ..؟

أول ما شوفناه سايح في دمه افكرنا أنه متصاب أو حصله مكروه، لكن رشاد كان سليم ومفيهوش خربوش.

بس للأسف.. رشاد فقد النطق.

حاولت كتير اتكلم معاه بعد الحادثة علشان يحكي لي ويفهمني اللي جراه، لكنه طول الوقت ثابت لما سألنا الدكتور قال إنه في حالة عصبية من حاجة مخوفاه، وباصص قدامه مبيرمش بجفونه حتى ومحتاج بس شوية راحة وهدوء لحد ما يخرج منها

لحد الليلة المشؤومة اللي صحيت فيها من نومي لقيت رشاد قاعد على مكتبه وعمال يقطع في الورق بعصبية غريبة ويكسر في الأقلام بتاعته

رشاد عمره ما كان انفعالي ولا متهور بالشكل ده، قومت وحاولت امنعه لكن قوته كانت غريبة وقتها.. زقني وقعت على ضهري اتالمت من قوة دفعته ولقيته مسك اقلام كتير في أيده وجاي ناحيتي كأنه عايز.. عايز يقتلني.

"صرخت بأعلى صوتي "رشااااا لااااا، رشااااا أبعد عني.

كان مغيب وشكله مرعب وكأنه مش سامعني وبيقرب عليا وانا بزحف على الأرض وبترعش من الخوف، لحد ما فتح بابا علينا الأوضة وقيده بالعافية وخده بعيد عني.

مكنتش في مبرر اللي حصل، ولما والدتي طلبت نشوف شيخ يكشف على رشاد ربما يكون ممسوس بابا رفض واستكفى بأنه يفصلنا عن بعض وياخدني في اوضتهم بعيد عن رشاد.

والدي دكتور جامعي مثقف؛ فكان طبيعي أنه ميقبلش بدخول مشعوذين ودجالين البيت وميامنش بالخرافات دي.

وفي أول ليلة بعدت فيها عن توأمي ونمت في غرفة منفصلة سمعت صوت جاي من أوضة رشاد؟؟ صوت صراخ مكتوم وبعيد.

قومت اتسحب علشان افهم اللي بيحصل ووقفت قدام غرفة رشاد اللي الصوت فيها كان واضح اكثر واكثر.

كان صوت غريب خارج بتنهيده كأن حد بيطلع في الروح، لكن الصدمة الحقيقة مكنتش في الصوت لأ.

الصدمة كانت في كمية الدم اللي خرجت من تحت الباب وانا واقف؟

صرخت بعلو صوتي وجريت على غرفة أهلي وأنا بقولهم "أحقووووا رشاد، أأحقووووه دم، دم كتير."

قام بابا مفزوع وهو بيجري وبيفتح الباب اللي كان صعب فتحه بسبب الكتلة الثقيلة اللي واقفة وراه

الكتلة الثقيلة دي كانت جثة رشاد.

رشاد اللي لقيناه قاتل نفسه والاقلام كلها مخترقة رقبتة ومتحاطط بالدم.

كانت صدمة شنيعة لطفل في سني دخلتني في دوامة اكتئاب شديد مخرجتني منه غير على هلاوس سمعية وبصرية.

بقيت اشوف خيالات على السقف وحاجات بتتحرك لوحدها في الاوضة بليل ولساني مشلول مش قادر حتى اعبر عن شعوري بالخوف واصرخ.

اتهلكت لدرجة أنني اعتدت خلاص مبقتش أخاف من الأصوات اللي بسمعها ومن تغيير حركة الأشياء عن مكانها الطبيعي.

اعتقدت إنني بهلوس لشدة حبي لآخويا مش أكثر زي ما اهلي بيقولوا، لكن مكنتش اعرف أن روحه موجودة بالفعل واناكدت أكثر لما كنت سهران في يوم قدام التلفزيون وبحاول أخرج من كومة أفكار واطلعي في أي فيلم أجنبي، وشوفت بعيني مفتاح باب أوضة رشاد بيتحرك؟

كأن حد من جوا بيحاول يفتحه ومش عارف فضلت مركز جايز اكون بهلوس لكن الحركة واضحة ومسموعة، فقررت أقوم افتح بنفسي وأشوف مين فيها ولما فتحت الباب لقيتة .

رشاد قاعد على مكتبه بيضحك لكن بهيئة مرعبة زي المسخ بالظبط.

"وقفت وقولتله "رشاد؟ أنت... انت.. حي؟؟"

بص ناحيتي بنفس الإبتسامة الغربية اللي على وشه ومسك قلم رصاص وحده عليا بقوة

القلم كان هيدخل في عيني وخربشني في خدي خلاني صرخت ووقعت ع الأرض منهار لحد ما "خرجوا اهلى على صوتي وهما بيقولولي "رشاد مالك يا رشاد، رشاد حصل ايه؟"

"بصيتلهم بصدمة وأنا بقولهم "أنا رشيد مش رشاد، رشاد مات وعايز يأذيني

اترسمت على ملامحهم علامات القلق وهما بياخدوني على قد عقلي وماما بتقولي "ماشي يحبيبي  
"انت رشيد ماشي، بس علشان خاطري متعملش في نفسك كده كفايا اللي راح.

مش دي المرة الأولى اللي يندهولي اهلي بـ "رشاد" مش رشيد، لدرجة اني كنت بدخل في نوبة  
صراخ كل ما يغلطوا في إسمي ويعاملوني معاملة المجانين.

كانت فترة صعبة بكل اللي فيها، طفولتي ضاعت في علاج نفسي وجسدي وعزلة وفشل دراسي  
 واجتماعي.. ادمرت.

لكن بعد عشر سنين من المعاناة وبعد موت والدي وشدة المرض على والدتي اللي راحت معاه في  
نفس السنة.

لقيت جواب موجود تحت مخدتها مكتوب بخط أيديها، وده اللي قضى عليا وكان فيه هلاكي.

اكتشفت وجود الجواب بعد حوالي شهرين من موت أمي لما حبيت انضف اوضتها وارتبها بنفسي  
واشيل من عليها التراب.

مسكته وأيدي بتترعش وقلبي مخلوع وخايف من اللي هقراه من قبل ما أشوفه، وفتحته وابتديت اقرأ

عزيزي رشاد.. وارجوك متتعصبش وترمي الورقة قبل ما تكملها"

أيوا انت يا حبيبي تبقى رشاد مش رشيد.

رشيد اللي يوم القناطر تاه وحصلتله الحادثة ومات ولقيناها سايح في دمه على الطريق

عقلك رفض يستوعب موت أخوك في القناطر، وللأسف انت صممت أنه عايش في البيت معنا  
وفضلت تهلوس بيه وبوجوده.

ولما خفيت شوية واقتنعت أنه مش موجود فعلاً، ابتديت تتقمص شخصيته وتأخذ اسمه وتلغي نفسك  
واسمك

أنا عارفة أنك بتحبه للدرجة اللي تخليه عايش جواك زي ماهو عاش جوانا كلنا، لكن ده مش هيغير  
شئ في كونك رشاد مش رشيد.

أنا وباباك تعبنا كتير معاك، ولما فشلنا وبقيت تدخل في نوبات الصراخ والهلع، كان الحل إننا  
نعتبرك رشيد زي مانت عايز.

لو بتحبني وبتثق فيا، خذ فرصة واحدة وراجع الأحداث ومتخليش عقلك يخدعك بالاوهم يا رشاد.

إمضاء/

أمك التي حملتك في قلبها انت واخيك للابد .

راسي كانت هتنفجر وقتها من كتر الذكريات المتناقضة اللي بتتسارع جوايا، حطيت ايدي على  
"دماغي وأنا بلف حولين نفسي وبصرخ من شدة الألم وأنا بصرخ ويقول "كفاياااااااا.. كفاياااااااا

ومحستش بنفسي غير والباب بيدق بصوت عالي

معرفش إزاي لقيت نور ربنا ضارب في الشقة وأنا كنت من شوية بقرأ الجواب بليل، وده معناه أن  
بقالي عدد ساعات في اغماء ومحدث حاسس بيا

قومت فتحت الباب لقيته "عامر" ابن عمي، والوحيد اللي بيسأل عني باستمرار وبيتصل بيا من بعد  
موت أهلي كنوع من أنواع الدعم النفسي وصلة الرحم

"إيه ياعم كل ده نوم، بقالي ساعة بخبط عليك لما قلاقتني"

كنت هلكان وبابن عليا التعب ومقدرتش أشيل الحمل كله لوحدي وقولتله "مكنتش نايم، أنا كنت في غيبوبة"

عامر اتصدم وبقا يحط أيده على دماغه ويفتش فيا بخوف وهو بيقولي "انت كويس؟ حصل ايه؟  
"طب كشفت؟ يلا ننزل المستشفى حالاً"

عامر إنسان خلوق ونقي قدر يخليني في وقت بسيط أحس أن ربنا عوضني بيه عن توأمي اللي راح  
ولقيتني بوريله الجواب اللي سابته امي وبقوله "أنا تايه.. أنا مبقنش عارف أنا مين؟ أنا رشاد ولا  
رشيد؟ طب أخويا مات في القناطر فعلاً ولا مات في البيت زي ما شوفته؟ كل دي هلاوس ولا  
"حقيقة؟ أنا ضايع يا عامر ساعدني"

غلبنى ضعفي وانهارت من البكى، شريط حياتي كله مشوش والذكريات مختلطة في بعضها

عامر كان بيحاول يهديني بكل الطرق وهو بيقولي "اهدا أرجوك يا رشيد، أكيد هنلاقي حل ونفكر  
"سوا حتى لو وصلت إننا نروح لطبيب نفسي"

..لكن

لكن أنا مش مجنون علشان اتعالج عند دكاترة، انفعلت عليه وانا بقله "أنا مش عايز مساعدتك،  
سبوني في حالي أنا مجرد مسخ لا عايش ولا ميت ولا حد هيفهمني ولا يحس بالنار اللي فيا من  
"بداية موت أخويا الوحيد لاهلي كلهم"

مكنتش أعرف أن بكلامي ممكن اجرح عامر اللي معرفش أي تفصيلة عن حياته غير أنه متزوج  
وشغال محاسب في بنك وبس

حسيت أن ملامح وشه اتغيرت وفضل قاعد باصص في الأرض وقالي بصوت حزين ومهزوم  
"طب ع الأقل يا رشيد انت عارف اهلك فين وتقدر كل ما تفتكرهم تترحم عليهم، لكن أنا طلعت

لقيت نفسي مش فاهم حاجة وأمي وأختي اختفوا وكل ما كنت بسأل عليهم والدي كان بيرد بطريقة مختلفة عن اللي قبلها.. زي أنه طلقها وهربت، أو جالها فرصة سفر ومشيت، أو اتجوزت واحد تاني وعاشت بعيد.. وردود كلها أغرب من بعض

وحتى لما اتجوزت وقررت استقر وانسى الماضي باللي فيه وخلفت بنت شالت أسمى وبقت كل حياتي، ضاعت مني واتخطفنت وقلبت عليها الدنيا، ومازلت كل فترة بروح القسم والمستشفيات اشوف في جثث المفقودين والبلاغات لعلها ترجعلي، وع الحال ده بقالي سنتين بدور على بنتي ومش لاقيتها، تقدر تقولي مين فينا موجوع اكرر دلوقتي؟ كلنا مبتلين يابن عمي لكن في فرق بين "واحد راضي ببلاء ربه، وواحد بيعترض على قضائه.

لما سمعت مشكلة عامر حسيت بمدى صغر ازمتي جنبه، أنا فعلاً عمري ما خدت فرصة إني أكون اجتماعي واسمع للي حواليا.

طول الوقت حاسس أن محدش بيعاني بقدر ما عانيت وأن مصيبيتي تفوق العقول، لكن اللي قاله عامر هو فعلاً الموجع والمفجع اكرر واكرر.

حطيت ايدي على كتفه وحسيت اني محتاج اسمعه اكرر بالتفصيل خصوصاً عن حكاية بنته وسألته "هي ضاعت منك إزاي؟ اتخطفنت ولا تاهت

"رد وقال الكلمة اللي متخيلتش سماعها "ضاعت في القناطر الخيرية

حسيت أن نبضات قلبي اتسارعت والدم ضرب في نافوخي وأنا بقوله "انت بتقول إيه؟؟ حصل إزاي وأمته، اشرحلي كل حاجة ارجوك؟

بدأ يحكي وصوته ضعيف وباين عليه الكسرة وقال "من حوالي سنتين كده الحضانة بتاعت بنتي أعلنت عن رحلة للقناطر، وبنتي كانت متمسكة جداً انها تروح معاهم لأنها مراحتهاش قبل كده، ومن خوفي عليها رفضت وقولتلها اني هوديها بنفسي ونفسح سوا أنا وهي ومامتها

لكن لسوء الحظ نفس اليوم اللي حددناه علشان نروح القناطر مراتي مرضت وخذت برد قوي، ومكنتش قادر أرجع في وعدي مع "ملاك" بنتي اللي كانت مبسوطه ومنتظرة الرحلة دي بفارغ الصبر

وخذتها لوحدي وروحنا القناطر الخيري

كانت بتلعب قدام عيني ومبسوطه واتفرفت على أطفال العائلات الموجودين وكنت متابعتها لحظة بلحظة، لولا جالي تليفون من الشغل ضروري ومحتاج تركيز في غلطة عملتها

"وقصاد الغلطة دي، ضاعت "ملاك"

كنت زي المجنون، بجري وبصرخ باسمها وبسأل عليها كل الأطفال لكن ملقيتهاش

اختفت وانا مش عارف هي عايشة ولا ميتة ولا عند مين، لكني عايش على أمل أن ربنا يجمعني "بيها دنيا أو أخرة"

إقصة عامر مشابهة لقصتي بنفس التفاصيل، معرفش ليه شكيت أن عنده نفس الهلاوس اللي عندي؟

أو أن اللغز كله في القناطر!؟

"وقمت بسرعة قولتله "يلا قوم احنا لازم نتحرك دلوقتي"

"ولما سألني على فين قولتله "القناطر الخيرية"

كان ضروري أنا وعامر نواجه مخاوفنا وماضينا جايز زي ما كانت العقدة هناك، بردو الحل يكون هناك

وصلت لنفس المكان اللي كنت فيه مع اهلي زمان ولقيت عامر بيقولي "ايوا أنا كنت قاعد قريب من هنا بردو، ها ده المكان اللي كانت بتلعب فيه ملاك.

كل حاجة كانت زي مهي متغيرتش من الماضي، نفس الأجواء ونفس زحمة الاطفال ودوشتهم، حتى ريحة الشلال وصوت الطيور، كلهم ثابتين

قعدت مع عامر وطلبت منه إننا نقعد في هدوء ونحاول نفتكر الحقيقة ومنخلش عقلنا يهيا لنا أي تكذيب وخرافات

لكن للأسف

مفيش جديد.. لا أنا قدرت افتكر حقيقة موت أخويا، ولا عامر قدر يفكر حقيقة اختفاء بنته

الإحباط اتملك مننا ولقيت نفسي بعذرله وبقوله "أنت كان معاك حق لما طلبت مني ارواح لدكتور نفسي، أنا أسف إني رجعتك لنقطة الصفر معايا

وقبل ما نتحرك علشان نغادر المكان، عيني راحت لسور عالي مليون بالاشجار.. ده نفس السور اللي حذرنا والدي وقتها وقال محدش يروح هناك

وقفت افتكر كويس ولقيتني بقول لعامر "السور ده وراه سر عجيب، حذرني منه والدي زمان، "تيجي نروح هناك؟

عامر بص ناحية السور شوية في صمت وقال "أنا بردو حاسس إني عايز ارواح هناك ومعرفش "السبب

الاحساس كان متبادل بينا وبالفعل روحنا.. كان سور عالي وله بوابة جديدة الصدا أكلها

المكان كله هادي على عكس باقي القناطر، وكان كل الموجودين عارفين أنه منطقة خطر

قبل ما ندخل لقينا راجل جاي بيجري من بعيد وبيشاورلنا "رايحين فين يا افندية، رايحين فين الله يهديكوا"

"رد عامر وقاله "هو ممنوع ندخل هنا؟"

جاوبنا وهو بياخذ أنفاسه بصعوبة من الجري وقالنا "لا مش ممنوع، بس بلاش دي منطقة ملعونة.. اللي بيدخلها يا بيموت يا بيتنحر يا بيتجنن، دي مقابر قديمة ومقفولة على أسرارها، الله يهديكوا" ارجعوا وبلاش تدخلوا

أنا وعمار بصينا لبعض وأحنا متأكدين أن كل اللي حصلنا بسبب المقابر والمكان ده، ودخلنا رغم محاولة الراجل البسيط في منعنا

وأنا ماشي حسيت بهمس وصوت ضعيف بيناديلي.. صوت من طفولتي انا عارفه كويس بيقولي "رشاد"

رشاد مش رشيد؟

كملت مشي تجاه الصوت وأنا مش حاسس بأي مشاعر للخوف وكل اللي يهمني إني ألاقي الحقيقة وافهم

وصلني الصوت وخدني عند بحيرة لونها اخضر وكلها زباله وملتوسة وفيها سمك اسود كثير

المكان مكنش شبه المقابر ولا في معالم تدل على وجود اموات، لكن طاقة المكان كانت مريبة وقوية

"وقفت قدام البحيرة وأنا بقوله "انت مين؟ أنت رشاد ولا رشيد؟ طب أنا مين؟"

## الصوت اختفى

بقيت امشي على سور البحيرة وادور عليه ونسيت عامر اللي اختفى من جنبي

بصيت لانعكاس صورتي في البحيرة لقيت وشي مبتسم؟! رغم اني ثابت وملامي جامدة

ركزت في نفسي اكثر لقيته ببشاورلي

وهمس بصوت ضعيف وهو بيقولي "أنا رشيد اللي عايش جواك.. أنا اللي محبوس في سجن عقلك ورافض تعفي عني يا رشاد.. أنا مموتش في حادثة زي مقالوك، ولا مت مقتول زي ما شوفتني.. أنا انتحرت يا رشاد.. انتحرت بعد ما دخلت المكان ده واتملك مني شيطان سلب إرادتي وخلاني اجري على الطريق من غير ما اتحكم في جسمي.. انت من حبك ليا قدرت توصل لنص الحقيقة، وهو اني انتحرت في اوضتي وعملت تصرفات تخالف طبيعتي.. سامحني يا رشاد اني فلت ايدك "وبعدت عنك"

كلام رشيد كان بيتردد في راسي كأنني بكلم نفسي وحسيت اني محتاج أرمي جسمي في البحيرة واتخلص من ألم راسي وقلبي دلوقتي

جريت بسرعة اشوف عامر علشان يلحقني قبل ما اخلص على نفسي وتتملك مني قوة المكان

لقيت عامر واقف بعيد وثابت مبيتحركش ولا بيبص ناحيتي رغم صراخي بإسمه

اول ما وصلت مسكت فيه وانا بقوله بخوف "لقيته.. لقيته يا عامر.. أنا رشاد مش رشيد.. رشيد "انتحر يا عامر انتحر بسبب المكان الملعون ده، يلا نهرب بسرعة قبل ما يتملك منا

"شاورلي عامر على شجرة عالية وقالني "أنا كمان لقيت ملاك.. فستانها أهو

بصيت لفوق لقيت فستان طفلة متعلق على الشجرة، وده اللي بياكد كلام رشيد

قوة المكان بتتملك في الأطفال لضعف نفوسهم

مسكت أيد عامر وبقيت اسحبه برا المكان بالقوة، كان لازم نهرب من الموت.. لموت أبطأ

شدة الصدمة علينا مكنتش هينة، وده سبب تواجدنا دلوقتي في مصحة نفسية.. مش عارفين احنا بنتعالج فيها، ولا بنهرب من جحيم العالم الخارجي.

**تمت**

## أبو رجل مسلوخة " شالم "

"أبو رجل مسلوخة ده مش أسطورة طفولية سمعنا عنها وخلص.. لأ، أنا شوقته بجد وطاردني"

معرفش ليه محدش كان مصدق اللي بقوله، وفضلوا يبصوا لبعضهم باستغراب وكأني مجنون أو كداب وباخترع حكاية عشان أبان قوي وشجاع زيهم

أعرفكم بنفسي الأول.. أنا شالم

لأ، انت مقرأتش غلط، أنا فعلاً اسمي شالم، واتكتب اسمي في السجل غلط بدل سالم.. شالم وده لأن والدي كان بينطق أغلب الحروف غلط.. عموماً مش موضوعنا

مش بس دي الحاجة الغريبة في شخصيتي اللي زائدة أو ناقصة، يعني مثلاً عندي ست صواب في اليد الواحدة مش خمسة زيكم وده شيء شايفه عادي مش محتاج كل اللي يشوفني يعتبرني شلبي سلوفان ويضحك

في مرة اتعرفت على صديق من خلال العمل، كان شاب ريفي من محافظة الشرقية، وعزم عليّ أجي أقضي معاه يومين في البلد نغير جو حبتين وكانت فكرة جميلة ومحتاج لها، خصوصاً أن معنديش قرابب ولا علاقات في الأرياف، وأهي تكون تجربة وحيدة ومختلفة في حياتي اللي مش مفهومة

رحت معاه بالفعل، وطلع ساكن في قرية بسيطة جميلة أغلبها أراضٍ زراعية ترد الروح للبني آدم وتنسيه زحمة وصداع المحافظات لكن بطبيعة عبد التواب، صديقي، أنه شخص ريفي معتاد ينام في مواعيد مبكرة حبتين، فالساعة أول ما جت سبعة كان هو نايم وأنا قاعد لوحدي في الدار

حاولت أبطل نكش وأقعد مكاني، لكن الملل وفرط الحركة منعوني، ولقيت نفسي لبست جلابية من بتوع عبد التواب علشان محدش يحس إنني غريب عن البلد وخرجت وسط الهدوء والظلام أتمشى شوية في الغيط وأشم شوية هوا

غريبة أوي البلد دي، كل سكانها بيناموا بدري ويقوموا بدري، بيحببوا الاستقرار وراحة البال دي "منين"

كنت ماشي أكلم نفسي ومستمتع بالأجواء الهادئة من حوالي لحد ما لمحت ضي بيلمع جاي من بعيد  
حبتين جوه في الأرض.  
مشيت ناحية الضوء ده وكنت قلقان لتكون عملية احتيال ولا حد جاي يولع في أرض التاني ك انتقام  
زي ما بنسمع في الأفلام.

وبالفعل لما قربت أكثر، اكتشفت أنها نار.. لكن بدأ يتضح لي أصوات لرجالة فلاحين بيضحكوا  
وبيتكلموا بصوت عالي.

حسيت بسعادة رهيبة أن أخيراً لقيت حد سهران أقعد معاه قربت وأنا بقولهم "السلام عليكم يا  
"رجالة"

"و عليكم السلام ورحمة الله، اتفضل يا زعيم"

كلهم ردوا عليّ في نفس الوقت، وكان واضح على نظراتهم أنهم بيتفحصوني من فوق لتحت  
وبيعملولي كتشف هيئة وفيش وتشبيه وربما سونار، ومستعجبين شكلي كأنني فضائي مر عليهم

كان بديهني أوي أعرف أنني هتففس بسهولة من لهجتي ومن شكلي، مهو بردو مفيش فلاح لابس  
جلابية ومصفف شعره ودفنه وبالوجهة دي كلها إلا لو فلاح من سيتي ستارز.

أنا أخوكم شالم من القاهرة، ضيف عند عبد التواب السنوسي في البيت اللي هناك ده، بس هو نام "  
"وأنا قلت أتمشى شوية هنا، تسمحولي أشارككم القعدة الراقية دي

قلت أعترف على نفسي بدري بدري قبل ما أدخل في سين وجيم، لكن المشكلة أنهم هم كمان سابوا  
كل اللي قولته ومسكوا في "شالم"

مخليتش من شوية إيفهات وضحك اعتدت عليهم خلاص، لكن بصراحة مكنش قدامي غيرهم علشان  
أتسلى شوية وألاقي حد أرغي معاه بدون تكليف

كانوا أربع أشخاص مولعين شوية خشب وبيعملوا عليه شاي.. عرفت أنهم عمال الأرض وبيغيروا  
محصولها، وقالوا يطبقوا فيها بدل ما كل واحد يروح، وأهو ينجزوا شغلهم أول ما الصبح يطلع  
علشان ده آخر يوم ليهم في الأرض خلاص

اتعرفنا على بعض وسلامات لمصر، وكل واحد بقا يحكي مغامراته في القاهرة لما زارها ومنهم  
اللي مشفهاش خالص

مكنتش فاهم هما ليه بييسموها مصر رغم أنهم في مصر بردو، وبيتكلموا عن القاهرة كأنها المالديف بتاعت الأغنيا والناس المرفهة فقط.

فجأة الموضوع اتحول من الكلام على مصر "القاهرة" لـ العفاريات والجن ومواقف مرعبة حصلت معاهم

وبصراحة دي السيرة المفضلة عندي، قعدت أسمع لهم بإنصات فبدأ أول واحد واللي فتح السيرة اسمه حسني، وقال

\_من قيمة سنتين كنت قاعد في الدار بعد ما العيال والجماعة ناموا، ومفيش غيري صاحي.. "-  
وسمعت لكوا قطة ع الباب بتقول: حوووووسني

أنا كنت فاكّر نفسي بيتهياً لي، ومكذبش عليكوا خوفت مانا بشر بردو، قمت فتحت الباب عشان أتأكد من اللي سمعته، ومجرد ما فتحت الباب القطة نطت عليا وهاجمتني بشكل ميقولش أنها حيوان أبدأ، كأنها شيطان وبيتحداني اتخلصت منها بالعافية وقلت الباب وأنا باخد نفسي وما صدقت هربت منها، ومن يومها القطة دي عمري ما شفتها في القرية كلها

رد واحد تاني وده كان اسمه إسماعيل وقاله:-

يا جدع خايف من قطة، أو مال أنا أعمل إيه اللي لقيت عيلة صغيرة قاعدة على قعدة الحمام "-  
عندنا، ولما سألت مراتي هو عندنا ضيوف في الدار قالت لي ضيوف مين؟ ودخلت تاني الحمام "ملقيتهاش"

دخل التالت بتاعهم بقصته وده يبقى مرسي وقال:-

أنا بقا شوفت حاجة غريبة أوي.. في مرة وأنا قاعد لقيت الستارة بتتحرك جامد وأنا أصلاً بخاف "-  
من الستائر، قومت أمسكها علشان أثبت لنفسي أنه مجرد تيار هوا، قامت الستارة ملفوفة عليا "وخنفاني وفضلت أصرخ لحد ما مراتي خرجت فكنتي منها

كلنا بصينا لإبراهيم الرابع علشان يحكي، لكن قال:-

"لا بجماعة أنا معنديش حاجة أقولها، أنا بخاف من خيالي أصلاً"

فبدأت العيون تتحول عليّ ودي اللحظة اللي كنت منتظرها، وقلت لهم بكل فخر:-

"أنا بقا شوفت أبو رجل مسلوخة"

كلهم قعدوا يضحكوا وفكروني بهزر، وقالوا دي حواديت أطفال صغار، لكن صممت على كلامي وشرحت لهم أكثر لاني مش بكذب فعلاً، وقلت لهم

أبو رجل مسلوخة ده مش أسطورة طفولية سمعنا عنها وخلص.. لأ، أنا شوفته بجد وطاردني"-  
كنت عارف أنهم صعب يصدقوني زي ما كل ما بحكي لحد مبيصدقنيش، لكن صممت المرة دي،  
وقلت لهم:-

أنا هفهمكوا.. أبو رجل مسلوخة ده شبح موجود فعلاً.. وبيقال أنه لو لمس الضحية بتاعته هي -  
كمان بتتحول شبيهه.

أنا زيكم كده مكنتش مصدق، وفي يوم وأنا راجع من الشغل متأخر قابلني راجل بجلابية قاعد على  
"جنب في الضلمة وبيقول لي: "ممكّن مساعدة يا بني  
وأنا طبعا مترددتش إنني أساعده وروحت له لحد عنده، وأول ما مسكني اتحول لهيئته الحقيقية كشبح  
"ورفع لي رجله من تحت الجلابية اللي كانت رجل معيز للأسف وبشعة

ضحك حسني على حكايتي وقال لي:-

"طب وهو لو حقيقي يعني أنت كمان متحولتش لسه لما لمسك"

:وعلشان يتأكدوا رفعت لهم الجلابية وطلعت رجل المعيز اللي عندي وقلت له

"لأ مانا اتحولت أهووو"

وكالعادة كلهم صرخوا وطلعوا يجروا زي أي حد بيسمع قصتي ولا كاني عفريت

**ت م ت**

## صحفي الإربع

"بكرا عندي حصة عملي في المشرحة اللي فيها الفنانة المشهورة داليا شاهين "

الخبر ده لما قالته مريم خطيبتي بالصدفة واحنا بندردش آخر اليوم سوا كان بمثابة كنز جالي لحد عندي، وده لأنني صحفي وجريمة داليا تريند ومفيش حد مبيتكلمش عنها.

أعرفكوا بنفسي الأول، أنا محمد فكري

صحفي في بداية حياته لكن حظي شبه معدوم في كل شيء؛ إلا مريم خطيبتي اللي ربنا كرمنا بيها واتقابلنا صدفة من شهرين في المستشفى اللي بتتدرب فيها وكنت بغطي هناك واقعة ومعرفش إزاي اتخطبنا في أقل من أسبوع.

الصحافة مش شغلانة سهلة ولا ممتعة بقدر إنها حرفياً ممكن توقعك في مصايب وبلاوي كبيرة زي ما حصل معايا أنا ومريم بسبب الفنانة داليا شاهين.

داليا فنانة استعراضية مشهورة جداً ظهرت من حوالي سنتين لكن حققت نجاحات عجيبة في وقت قليل للدرجة أن حتى اللي ملهمش في الميديا عرفوها وسمعوا عنها.

لكنها ماتت بشكل عجيب جداً وغامض.

كانت في إحدى حفلاتها وفجأة وقعت على المسرح وفضل جسمها يسيح ويتقطع بدون ما حد يمسهأ نهائي وكأن في نار خفية بتنهش فيها لكنها غير مرئية.

والأغرب من ده كله أن كاميرات الحفلة والجمهور كلها اتعطلت في وقت موتها ومفيش ولا صورة أو فيديو اتسرب للحدث وده اللي خلاها حديث المدينة آخر فترة.

لما عرفت من مريم أنها هتقدر تدخل المشرحة اللي فيها داليا شاهين حسيت أن الحياة ضحككتلي لأنني لو قدرت اجيب صورة واحدة ده هيخلي أسمى يلمع ويسمع جداً وهتكون ضربة صحفية ممتازة.

مترددتش لحظة وقولت لمريم وانا مفعم بالحماس والطاقة "طب ينفع اجيلك وتدخليني أو تاخديلي حتى صورتين للجثة؟ خطيبك شغله واقع وده هينفعني جامد ويمكن يجيلي مكافأة من الشغل."

مريم كانت البنات الجدة اللي عمرها ما رفضتلي طلب ولا خذلتني فيها وقالتلي "أي حاجة فيها مصلحتك اكيد هشاركك، لكن بالنص فيفتي فيفتي."

مريم مكنتش جدعة أوي يعني واضطريت أوافق على شرطها وقولتها "موافق والله لو جالي مكافأة ليكي 50% بس تدخليني علشان أحاول اعمل فيديو بسيط كده على السريع وهرج على طول. "

ولأسف روحت للجحيم بنفسي.

تاني ليلة نزلت الصبح بدري ومعايا الكاميرا ومعداتي في الشنطة ونطيت في أقرب اتوبيس ومعتبر نفسي رايح للعالمية برجلي.

أول ما وصلت لقيت مريم منتظراني على باب المستشفى ولابسة البلطو الأبيض اللي مخليها تشبه الدب القطبي وقالتلي "يلا بسرعة قبل ما الدكتور يوصل."

وخذتني على المشرحة ووقفت تبلغ صحبتها أنها تدينا تنبيه لو حد وصل وتخبطنا على الباب علشان نلحق نخرج قبل ما حد يمسكنا.

لبست بالطو زي مريم بحيث يعتبروني طالب في المستشفى زيهم، ودخلت ووقفت في أوضة التلاجات اللي رهبتها مش محتاجة وصف فيها.

سألت مريم بصوت واطي "هي في انه في انهي درج بسرعة؟"

ردت مريم وقالتلي "وانا ايشعر فني دور معايا في الإدراج ولما تلاقي حاجة محروقة يبقى أكيد هي."

بدأت مريم تفتح الإدراج بدون ذرة خوف منها وكأنها بتفتش في تموين البيت على باكو شاي، وعلشان مظهرش جبان قدامها حاولت اعمل زيها وفتحت أول درج بكل ثقة واعصاب رجلي سابت مني أول ما لقيت راس ست مفصولة عن جسمها وعيونها مفتوحين ولونها شاحب أبيض زي الثلج.

مريم بصت ناحيتي بلا مبالاة وهي بتقولي "كمل كمل هنتعود، هو في الأول كلنا بنخاف بعدين مشاعرك هتبقى بنفس برودة التلاجات دي."

ويادوب لسه بقوم من مكاني لقيتها بتصرخ وبتسقف بحماس وهي بتقولي "ههيببي لقيتها لقيتها."

في اللحظة دي أنا كنت جريت وخلص على وشك الهروب وفتح الباب لولا أنني استوعبت أنها بتصرخ من الفرحة مش من الخوف.

قلعت الشنطة اللي على ضهري وطلعت الكاميرا اللي فيها وخليت مريم تمسكها وتوجهها عليا

ووقفت جنب جنب جثة داليا اللي مازالت متغطية ومشوفتهاش وقولتها "عدي واحد اتنين تلاتة وأول ما تبدأ تصوير شاوريلي علشان ابدأ.."

وبدأ صوت الكاميرا في العد التنازلي وشاورتلي مريم بحماس لأنها أول مرة تصور وكانت سعيدة بشكل مبالغ والضحكة مرسومة على وشها كأنها في رحلة مش في مشرحة وسط اموات .

"السلام عليكم ورحمه الله وبركاته، أنا الصحفي محمد فكري ودلوقتي جايلكم ع السريع بخبر حصري قالب السوشيال ميديا وهو حكاية الفنانة "داليا شاهين" وموتها الغامض اللي متسجلش لأسباب مجهولة لكن دلوقتي أنا جاي علشان نشوف مع بعض الحقيقة وهل فعلاً ماتت محترقة زي ما بيقلوا، ولا في سبب تاني.."

ويادوب بمد أيدي على المشمع اللي فوق الجثة علشان اكشفها.. حاجة مسكت في أيدي بقوة وسحبنتي جوا التلاجة زي الدوامة اللي بقيت أصرخ فيها بأسم مريم اللي اختفت هي والمشرحة كلها ولقيت نفسي فجأة واقف في مكان شبه القرى الزراعية القديمة وواحدة ماسكة في رجلي وبتصرخ..

ببص لقيتها واحدة ست قاعدة تحت شجرة ومتكفة وبتقولي "فكني بسرعة، فكني هيقتلوني.

في البداية اتخضيت وصرخت معاها وسألتها "مين دول اللي هيقتلوكي، واحنا فين اصلا وايه اللي جابني هنا. "

شاورتلي قدامها وقالتلي "دول" بصيت مكان ما بتشاور لقيت رجالة كثير وشهم ممسوخ بدون ملامح وبدون شعر وشكلهم مفزع ومرعب .

ماسكين حجارة كثير في أيديهم وبدأوا يحدفوا بيها الست المربوطة في الشجرة وبدأت الحجارة تيجي عليا معاها.

طلعت اجري وأنا بتفادى الحجارة وسبتها تصرخ ومبقتش فاهم أنا رايح فين ولا بعمل إيه هنا، وازاي الدنيا ضلمة أوي كده كأننا الفجر وأنا من شوية كنت الصبح في المشرحة.

دمي كان هربان من الخوف وفضلت أجري لحد ما لقيت بيت قديم وسط أرض زراعية فاضية وبابه مفتوح!

وقفت برا حاولت انده على أي حد ينجدي ويفهمني أي حاجة "يا أهل الله ياللي هنا.. في حد هنا؟"

سمعت صوت ضعيف جدًا بيقلولي "اتفضل يا بني".

كان صوت لست عجوزة أول ما دخلت لقيتها قاعدة على كرسي ماسكة في خيوط بنشبكةها في بعضها وضهرها محني ووشها في الأرض ونازل على وشها طرحة سودا.

وقفت قولتلها بخوف من هيئتها "لو سمحتي أحنا هنا فين؟"

ردت وقالتلي "في الدنيا".

مكنش ده وقت فلسفة نهائي وابتديت اتوتر اكرت وقولتلها "مانا فاهم يا حجة إننا في الدنيا مش الأخرة، بس فين بالظبط يعني؟ أنا عايز ارجع القاهرة فيصل تعرفيها؟"

الست مكنتش بتبص تجاهي ومستمرة في تشبيك الخيوط وقالتلي "معرفش يابني أنت عايز إيه بالظبط، عندك أكل في التلاجة لو جعان خش كل متكسفش.

في البداية كنت شاكك فيها وخايف لكن بعد كلامها اتأكدت أنها ست عجوزة زي أجدادنا ومفيش داعي للخوف .

قعدت على الكنبه اللي قصادها أخذ أنفاسي وقولتلها "طب سيبك من القاهرة يا حجة، أنا كنت برا دلوقتي ولقيت ست مربوطة في شجرة والناس بيرموها بالحجارة وشكلهم مرعب مش بني ادمين زينا وملهمش ملامح.

خرج منها صوت كأنها بتضحك وبتتهز وقالتلي "دي تلاقيا داليا"

اتصدمت من سماع إسم الممثلة وسألتها "داليا شاهين الممثلة؟"

ردت وقالتلي "لأ.. داليا سمير الطيبية هنا في القرية".

احترت من كلامها ونسيت كل اللي حصلي وسألتها "ودي الناس بيرجموها ليه بالشكل ده؟ أكيد أخطأت في عملها أو عملت مصيبة"

ردت وقالتلي كلام غريب أوي "أخطأت ولا مأخطاتش يابني هو أحنا اللي هنحاسب العباد؟ داليا مجرد طبيبة شاطرة ومشهورة وده سبب رجمها.. أصل الناجح بيكون عقبة في حياة الفشلة، وعلشان كده في قريتنا اللي بينجح بيرجموه ودي طقوس طبيعية يعني متحطش في بالك.. احطلك تاكل؟".

حسيت إنني دخلت فيلم عربي قديم وكنت بالفعل حاسس بهبوط ووافقت أنها تحطلي اكل.

سابت ادوات الخياطة اللي في ايديها على جنب وقامت اتحركت بصعوبة للمطبخ وهي منحنية بنفس الشكل ورجعتلي بطبق محطوط عليه أيد بني آدم مقطوعة!؟

صرخت واتففت مكاني وانا بقولها "إيه اللي بيحصل ده، أنتي بتاكلي أعضاء بني ادمين.

رفعتلي وشها من تحت الطرحة اللي كانت متخفية فيها وظهر وشها الممسوخ زي اللي شوفتهم قبلها وقالتلي "مهو ده غذانا يابني، بناكل في لحم اللي بينجح ودي أخر وجبة عندي يارب حد يفكرني بحتة من الطيبة"

ومسكت اليد اللي في الطبق وبدأت تاكلها وهي بتقولي "شكلك جديد هنا، بكرات تعود.

بوقها كان بينزف دم وهي بتاكل بشراسة زي الحيوانات.

اعصابي متحملتش اللي بيحصل وفقدت الوعي في نفس اللحظة اللي حسيت بأيد بتتحرك على صدري وقومت أصرخ لقيتني نايم على سرير التشريح والطلاب كلهم حواليا مصدومين ومنهم اللي بيصرخ وخايفين والدكتور واقف في أيده المشرط وبيقولهم بهدوء "وعلشان الجثة ممكن تصحى زي ما حصل دلوقتي، بنذب فيها المشرط مرتين وتأكد هتحس ولا مش هتحس".

وبالفعل كان جاي تجاهي بالمشرط قومت من السرير وانا بقوله "أنا حي والله حي مش جثة.. أنا إيه جابني هنا".

لقيت مريم خطيبي واقفة وعاملة نفسها مش عرفاني وبتقوله "ده تقريباً عامل المستشفى يا دكتور.. شكله كان فاقد الوعي وافتكروه ميت".

وعمزتلي بعنيها الشمال وهي بتكمل "يحرام ده شكله اتجنن من الصدمة ولا إيه.. أنت كويس يا استاذ؟"

فهمت مريم بتلمح لأيه وقومت عملت نفسي مجنون فعلاً علشان أهرب قبل ما حد يمسكني وبقيت اقولهم "أبلة احلام بتولد، أبلة احلام بتولد.. العنكبوت جاب نونو راكب توكتوك."

وبقيت اقول في أي كلام عبثي وخرجت أجري من الأوضة كلها ورجعت البيت وأنا في قمة تعبني ومش فاهم لحظة من كل اللي جرابي.

لقيت مريم بتتصل عليا، ما صدقت أنها خلصت وفتحت قولتها "مريم، كويس انك اتصلتي أنا مش فاهم حاجة خالص.. إيه اللي حصل؟ أنا أخر حاجة كنت بسجل الفيديو وفجأة دخلت في دوامة وتخاريف غريبة."

ردت وقالتلي "يامحمد وأنا بصورك النور بتاع المشرحة قفل علينا ويادوب روحك اشغله لقيتك فاقد الوعي وواقع في الأرض.. وفي نفس الوقت لقيت تسنيم صحبتي دخلت وبتقولي أن الدكتور خلاص في الطريقة، ملقتش حل غير أني اخبي الكاميرا وحطيناك على سرير التشريح كأنك الجثة اللي هنتشغل عليها بدل ما كنا كلنا هنروح في داهية، بس الحمد لله انت فوقت بسرعة ومتأخرتش.. مكنتش أعرف أنك جبان اوي كده ياخي.

أنا كنت حاسس أن كل المسوخ اللي شوفتهم والقريبة اللي وقعت فيها فعلاً تخاريف، وبدأت احكي لمريم كل اللي حصلي في خلال الوقت اللي فقدت فيه الوعي واللي شوفته لقيتها متوترة وبتقولي.

"اللي بتقوله ده كارثة يا محمد مش مجرد تخاريف، اللي انت بتحكيه ده متسجل في كتاب قديم اسمه "حلم طنجار" والكاتب بيحكي فيه نفس اللي جراك ويمكن ده فعلاً مربوط بحادثة داليا شاهين الممثلة والسر كله في الكتاب، لأن محدش دخل العالم ده غيرك انت والكاتب."

كلامها زاد فضولي وحسيت أن الموضوع بقا مربوط بيا بشكل شخصي أكثر من كوني مجرد صحفي عايز يكشف حقيقة غامضة.. وبقيت متردد، هل اشتري الكتاب وأغامر؟ ولا أبعد وكفايا اللي جرافي؟

كلامها ثار فضولي وحسيت أن الموضوع بقا مربوط بيا بشكل شخصي أكثر من كوني مجرد صحفي عايز يكشف حقيقة غامضة.. وبقيت متردد، هل اشتري الكتاب وأغامر؟ ولا أبعد وكفايا اللي جرافي.

في النهاية حسيت إنني مش الشخص المناسب اللي ممكن يغامر في حاجة زي دي وقررت أبعد نهائي عن موضوع داليا شاهين للأبد وكأنه حصلش من البداية.

اتفقت مع مريم نتقابل ثاني يوم علشان تسلمني الشنطة والكاميرا وبعد ما خلصت هي يومها في المستشفى اتقابلنا على كورنيش الجيزة وقعدنا في الإستراحة.

مريم كانت قاعدة بتاكل ترمس وبتتفرج على النيل وانا فتحت شنطتي أفتش فيها واتأكد أن مفيش حاجة منها ضاعت والحمد لله كل شيء كان مكتمل وزى ماهو.

مسكت الكاميرا اراجع وأشوف إيه اللي اتسجل عليها وبقلب في الجاليري لقيت فعلاً الفيديو اللي صورناه متحذفش ولا ضاع!

فتحت الفيديو وانا بقول لمريم "ألحقي ده في فيديو تلت دقايق متسجل.. هو مش المفروض أننا سجلنا حوالي نص دقيقة والنور فصل؟"

ردت وقالتلي "معرفش أنا أول ما لقيتك وقعت مني قومت قفلتها وحطيتها في الشنطة تاني قبل ما الدكتور يشوفها.. افتح كده وريني الفيديو جواه إيه ليكون سجل وأنا بشتم فيك وبقول كانت ليلة غبرة يوم ما اتخطبتله"

اشتغل الفيديو زي ما حصل بالظبط وفجأة الكاميرا شوشت بأصوات صراخ متعددة وصوت بيهمس من وسط الصرخات و بيردد "طنجار"

بصيت لمريم بصدمة وأنا بقولها "سمعتي اللي أنا سمعته؟".

لكن للأسف مريم كانت مركزة في تليفونها وبرقتلي مرة واحدة وهي بتقوللي "اتقبلت في المنحة يا محمد، هيسفروني اكمل تعليم برا زي ما حلمت"

أنا عارف كويس الخبر ده مهم إزاي عند مريم وقد ابيه هي خطوة ممتازة لبنت متفوقة زيها، لكن قلبي فجأة اتقبض

معرفش من اللي شوفته في الفيديو ولا خوفًا عليها من السفر ولا مجرد مشاعر مختلطة

فضلت طول اليوم سرحان وتايه ومش فاهم حاجة، وكل اللي في دماغي بقول لنفسي "يعني إيه طنجار أصلاً؟"

هل هو إسم بني ادم ولا اسم القرية اللي وقعت فيها ولا حاجة تبع العالم السفلي؟

كنت عارف إنني مش هقدر أنسى الموضوع بسهولة وتراجعت عن قراري ودخلت مكتبة مع مريم علشان اشتري الكتاب، وبالمرة اهاديها بشئ تذكاري للحدث والخبر المفرح اللي بتمر بيه

لحسن حظي لقيت آخر نسخة من الكتاب موجودة لكن كانت في ايد واحدة واقفة بتحاسب عليه!

وقفت وسألت صاحب المكتبة "لو سمحت مفيش نسخ تانية من كتاب حلم طنجار؟ أو هتنزل نسخ تاني امته؟"

رد وقالني "للأسف دي آخر نسخة وطلعت، والكتاب ده نادرًا لو لقيته في السوق لأن أتوقفت طباعته من بدري"

خلصت مع مريم اللي كانت مشغولة بين ارفف المكتبة وبتدور على قصص أطفال لأن دي الحاجة اللي بتقدر تخليها تفصل من حياة الكبار وتهرب بيها

ورجعت البيت وأنا مهموم وحاسس إنني لوحدي وغرقان في هموم أكبر مني والنحس مازال ملازمي في كل شيء

دخلت اوضتي اترميت على سريري من كتر التعب ومجرد ما غمضت عيني ابتديت اسمع صوت همس بسيط بيقولي "مريم ضحية طنجار الجديدة"

قومت مفزوع بتلقت حواليا ومش قادر احدد ده همس فعلاً ولا دماغي اللي بدأت تهلوس من اللي جرافي؟

شباك الاوضة اتفتح فجأة بقوة ودخلت منه عاصفة هوا غريبة رغم أننا في سبتمبر ومدخلناش في الشتا اللي تجيب عواصف زي دي

قومت بصعوبة قفلت الشباك وانا حاسس ان الليلة دي مش هتعيدي على خير، وبالفعل معدتش

حاجة بتتكش تحت السرير

مجرد ما قفلت الشباك سمعت حاجة بتتحرك تحت سريري، صوت زي الورق اللي بيطير بسرعة

خدت حذري بمسافة ونزلت على الأرض بجسمي وفتحت الكشاف سلطته تحت السرير

ولقيته

كانت صدمة أبشع وابشع لما مديت أيدي وخرجت كتاب "حلم طنجار" اللي أنا مشتريتهوش أصلاً... لكنه

لكنه جالي لحد البيت عندي!

خلاص أنا اتأكدت بالشكل ده أن لعنة "داليا شاهين" والمسوخ اللي شوفتهم في القرية مش مجرد تخاريف ولا حظ سئ لأ

في حاجة ضروري اكتشفها في الكتاب ده، ويمكن الحاجة دي ليا دور فيها

خدت الكتاب وقعدت على سريري وفتحت النور وابتديت اقرأ فيه، ورغم أنه عبارة عن ٢٠٢ صفحة إلا إنني محستش بالوقت ولا بنفسني إلا لما خلصته

وللأسف فهمت يعني إيه "طنجار"

ملخص الكتاب بيحكي فيه الكاتب عن حلم طويل سقط فيه وعاش في قرية مسوخ زي اللي شوقتها بالظبط

لكنه وقع فيها قبل ما يتحولوا لمسوخ، وسبب تحويلهم كلهم لمسوخ هو ظلم فتاة صالحة من فتيات القرية واللي حلت لعنتها على الكل

الكاتب حاول يدافع عنها، لكنه كان عبارة عن شاهد فقط زي السراب ملوش أي دور في النفع أو الضرر.

البننت دي كان إسمها داليا سمير

نفس البننت اللي شوقتها أنا كمان بتترجم وبتستغيث بيا

وفي نهاية الكتاب جملة مكتوبة باللون الأحمر كأنها تحذير من الكاتب بيقول "طنجار ليست لعنة، إنما عهد يُبني بالخفاء بين المرء وشيطانه، ولا يفسده سوى النور

واللي فهمته أن طنجار بمثابة العقد عندنا في الدنيا، لكنه عهد بالشر بيتم في لحظة شيطان بيخلي الإنسان يأذي اللي قدامه بمجرد النوايا الخبيثة اللي بيحملها وشيطانه بينفذها، لكن مقدرتش أفهم يعني إيه بيفسده النور؟

وده تقريباً نفس اللي حصل للفنانة "داليا شاهين" .. ولأنها حد ناجح ومعروف ففي فئة كبيرة من الناس عهدوا طنجار وعلشان كده ماتت على المسرح بتعذيب خفي محدش قدر يكتشفه

دماغي هلكت من كثر الأفكار وغبت في النوم مكاني وأنا حاضن الكتاب، وصحيت على صوت تليفوني بيرن ثاني يوم من مريم

أول ما فتحت سمعتها بتعيط وبتقول كلام مش مفهوم، اتفرعت وقولتها "اصبري أنا جايلك دلوقتي يا مريم أهدي ارجوكي"

قومت لبست وجريت روحتها في بيتها فتحتلي وهي وشها منفوخ وهلكانة من البكى، قلبي اتقبض وسألتها "حصل إيه، مالك يا مريم اتكلمي"

ردت وقالتلي " كل حاجة حلمت بيها راحت يا محمد، كل حاجة باظت خلاص ومش هسافر"

حاولت أفهم منها أكثر اللي حصل وبدأت تحكي لي "المنحة دي أنا قدمت فيها مع مجموعة من صحابي، وامبارح نزلت منشور على حسابي وبقول إنني أخيراً حققت حلمي واتقبلت في المنحة وناس كتير باركولي، بس فجأة بابا أعترض وقعد يزعق وقال لا انتي بنتي ولا اعرفك لو سافرتي رغم أنه هو اللي شجعني اقدم في المنحة.. وساب البيت ومشيت"

فضلت قاعد مركز لكل كلمة بتقولها، وحسيت إنها إشارة لوجود "طنجار" زي ما قرأت

مريم علشان نجحت ومسمعتش حديث الرسول لما قال "استعينوا على قضاء حوائجكم بالكتمان فإن كل ذي نعمة محسود" للأسف وقعت في لعنة طنجان من صحاب النوايا الخبيثة

حاولت اهدي مريم ووعدتها بأني هكلم والدها وأقنعه بسفرها

ورجعت البيت وأنا عازم أمري أحل اللعنة دي وانهيها، وقبل ما اكلم والد مريم لازم أوصل لجنورها

رجعت مسكت الكتاب من ثاني وفضلت اراجعه وأركز في تفاصيله لفت نظري جملة بتقول "اعلم أن محبين الكتب وقراءه عدد ضئيل، لكن ليس لدي إمكانية أخرى لفساد طنجان في النور، يمكن أن يأتي اليوم ويتسع النور بشكل مختلف من شخص أقوى مني في عالم آخر"

راجعت الجملة اكثر من مرة وأنا حاسس بفكرة بتتولد في راسي، ولقيتني بقوم أحضر لوكيشن التصوير في اوضتي وأنا مش مجهز أي حاجة نهائي وبقول:-

"السلام عليكم ورحمه الله وبركاته، لو الكل محتار في موت الفنانة داليا شاهين، فأنا جاي اقولكم أن مش داليا بس اللي هتموت في ظروف غامضة.. داليا مجرد ضحية متتالية لو محدش ركز في كلامي وفهم اللي هقوله.. المشكلة مش في موت داليا.. المشكلة الحقيقية في عهد طنجان، اللي اغلبوا يمكن بياخده بدون ما يحس واللي لازم كلنا نحذر من لحظات غضبنا علشان نكون سبب في هلاك بعضنا"

وسردت كل اللي عرفته من كتاب "حلم طنجان" ورفعت الفيديو على السوشيال وأنا بطمن نفسي إنني عملت اللي أقدر عليه بطريقتي

يمكن زمان كان سلاحهم الكتابة، لكن سلاحي دلوقتي مختلف وهو "السوشيال ميديا"

وقفلت النت واتصلت بوالد مريم اتفقت معاه نتقابل علشان نتناقش في مشكلة مريم اللي مزعلاه وبعد حوالي خمس ساعات انشغلت فيهم بمقابلة والد مريم ورجعت البيت لقيت مكالمات كتير على تليفوني منهم حوالي عشرين مكالمة من مريم

فتحت النت أشوف عدد الرسائل الغريب اللي احتل تليفوني فجأة، لقيت الفيديو رائج الآن وعمل خمسة مليون مشاهدة وعدد تعليقات غريب أغلبها ناس ندمانيين وبيعتروا أنهم حاسين بالذنب في مواقف تشبه اللي قولتها، وبيتبرئوا من عهد الشيطان لو كانوا منه

وهنا فهمت معنى "لا يفسده سوى النور"

يمكن أحياناً بنحس إننا بذلنا مجهود أكبر من شخص تاني والحظ محالفناش قد ما حالف الشخص ده اللي هو مبدلش ربع مجهودنا، ومن هنا الشيطان بيزرع جوانا نقطة سودا خفية بتخلينا منتظرين سقوط الشخص ده بأي طريقة.. رغم أننا متيقنين أنه لو وقع مش هناخد مكانه، وهنعمل نفسنا زعلانين عليه

لكن مبنكونش فاهمين أن دي بداية عهد الشيطان، اللي بيوصلنا من أصغر نقطة فينا وينميها علشان يوم ما ربنا يحاسبنا يتبرأ منا ويقول أنا عملت نيابة عن غرض فلان، وهنا بيتحول الشيطان من فاعل، لمأمور نوايا الإنسان الخبيثة

احذروا لحظات غضبكم، وثغرات الشيطان

**تمت**

## حارس المقبرة

أنا حارس المقابر هنا، وبقولك محدش هيفتح التربة ولا هياخد حاجة منها دي أمانة.

أنا زينهم مصيلحي التربي، عمري أربعين سنة، حارس مقابر وعيشت طول عمري هنا في التراب وورثت الشغلانة عن والدي الله يرحمه .

طول عمري بقابل مواقف غريبة وأسرار محدش بيشفوها ولا بيحس بيها غيري، مجرد ما بيدخل الليل بيجي ومعه أسرار اللي علمني والدي أنها مينفعش تخرج نهائي وإلا الجثث ممكن تأذيني .

اتأقلمت طول عمري وفعلاً عمري ما اتأذيت منهم، إلا الجثة اللي جتلي من أسبوع دي!؟..

اتعودت أن الجنازة ومراسم الدفن دايمًا ليها شكل مختلف ومعين، لكن من أسبوع حصل حدث غريب في الحوش اللي جنبي مقدرتش أفهمه مطلقًا.

لما وصل راجل كبير ومعه راجلين فتحوا العريية وطلعوا التابوت ودخلوا الحوش دفنوا الجثة وخرجوا في اقل من ربع ساعة .

الأمر كان غريب جدًا خصوصًا أن مفيش أهل إطلاقًا للميت، جريت وقتها علشان أساعد الرجالة في شيل التابوت ويمكن الباشا يراضيني بأي حاجة مقابل مساعدتي .

لكن لقيته فجأة بيزعق وبيعلي صوته وبيقولي بغضب "محدش طلب مساعدتك يا بابا، أمشي من هنا يلا امشي ."

كان راجل اوبهة وباين عليه غني، لكن أسلوبه صعب متعالي ومتكبر .

وقفت اتابعهم من بعيد وانا بقول لنفسي "إيه اللي يخلي قتيل أو ميت يتدفن بالشكل الصامت ده؟ معقول يكون الخدام عنده مثلًا وملوش أهل!"

وبعدها بيومين حوالي الساعة اتنين بليل سمعت صوت بنت بتعيط بصوت عالي جاي من برا .

في البداية افنكرت أنه صوت من الأحواش المجاورة واللي معتاد اسمع منهم اصوات زي دي، لكن سمعت صوت شاب بيقولها "يلا يا اميرة الناس هتسمعا."

قومت من مكاني فتحت باب الحوش لقيتهم بيبصولي ومخضوضين، ولد وبنيت في سن العشرينات

كده، قربت وقولتلهم "أي خدمة يا بشوات؟ واقفين كده ليه."

أرتبك الشاب بشكل غريب وهو بيشد البنت اللي بتبكي وبيقولي "لا لا مفيش مفيش شكرًا" وخذها وركبوا العربية وهربوا من قدامي .

وقفت ابص في اتجاههم وابص على الحوش اللي اتدفنت فيه آخر جثة واللي قلبي حاسس ان المشاكل هتيجي منها كتير الفترة الجاية .

كنت يادوب راجع حوشي من ثاني وسمعت صوت خروشة جاي من نفس المكان .

اتلفت فجأة وانا حاسس برهبة وسمعت صوت خبط واضح.. خبط بيقول أن في حد حي جوا الحوش ده، أو روح مأدية .

استعدت م الشيطان وقولت أدخل أكمل نومي بدل ما اتأذي وأركز اليومين دول على زوار الحوش ده بالتحديد، واللي اساسًا يعتبر كان مهجور من مدة كبيرة وعمرى ما شوفت له أصحاب قبل كده .

الجو كان فيه لسعة هوا شديدة، شديت الغطا عليا لحد وشي واتدفيت وانا كل تفكيرى في اللي بيحصل في الحوش المُرِيب اللي اتفتح فجأة ده!

عيني كانت لسه بتغفل، وحسيت بالغطا بيتسحب من عليا واحدة واحدة ببطئ؟!!

فتحت عيني بصدمة وأنا جسمى بيترعش وبردد "اعوذ بكلمات الله التامات من شر ما خلق".

بصيت حواليا الغرفة كانت ضلّمة ومفيش غير ضي القمر اللي داخل من الشباك المفتوح قصادي وصوت الهوا والأشجار مُسِيطر ع المكان .

قولت جايز من شدة الهوا الغطا بيتحرك من عليا، قومت علشان اقله ومجرد ما قومت حسيت بضل بيهرب من تحت الشباك بسرعة!

-الليلة دي مش هتعدى على خير.

قولتلها لنفسي وانا بقفل الشباك كويس وبتمنى لو في روح مأدية متجيش ناحيتي ولا تفضل تزاولني بالشكل المرعب ده .

رجعت رميت جسمى على السرير وصرخت من اللي حسيت بيه!!

أنا نمت على هيكل عظمى؟؟

قومت بسرعة وانا بتثقل قلب وبقع على الأرض بفرع وبدور بأيدي على مفتاح النور علشان اشوف  
إيه اللي على سريري واللي استغل الدقيقة اللي قومت فيها اقفل الشباك ونام مكاني!

لمبة الاوضة كانت ضعيفة وقربت تنتهي، أول ما شغلتها فرقعت ومشتغلتنش .

فتحت باب الاوضة وحسيت إنني بتخفق ومحاط بالارواح ولازم أهرب قبل ما يعتبروا خوفي  
كراهية .

خرجت قعدت قدام الحوش وكانت الساعة حوالي ثلاثة ومازالت الدنيا ضلمة والأصوات مش احسن  
حاجة والهمس جاي من كل مكان .

-زينهم .

صوت همس بينادي بأسمي جاي من مكان مش قادر احده!

وقفت أبص حواليا وانا بقول بصوت عالي وبحاول أبان شجاع في نبرتي "مين؟ مين بينادي؟".

\_زينهم، يا زينهم .

الصوت بيتضح أكثر واكثر كل مرة، حسيت إنه جاي من الحوش اللي جنبني! نفس الحوش بردو .

وملحقتش اتأكد من ظنوني وسمعت صفير الباب الحديد بيتفتح، ويخرج منه دخان أبيض ملى  
المكان زي شبورة الشتا .

فضولي بيقولي اخش الحوش بنفسي اللي أكيد اتفتح علشاني دلوقتي، وصوت ثاني جوايا بيقولي  
أرجع وأبعد عن الشر احسنلك .

رجلي مشالتنيش إنني أروح للحوش بنفسي، ولقيت نفسي بارجع لأوضتي وبقلل الباب عليا وكأني  
مشوفتنش ولا سمعت حاجة .

ثاني يوم الصبح صحيت على صوت خبط على شباك اوضتي! قومت مفزوع فاكرهم أصحاب  
الحوش عندي عندهم دفنة جديدة، لكن أول ما فتحت لقيته نفس الشاب بتاع ليلة امبارح بيقولي  
"عايزك في موضوع مهم، ممكن نتكلم؟".  
خرجتله برا بسرعة وانا مستغرب رجوعه ليا أنا بالذات وسألته "مش أنت الاستاذ اللي كان معاك  
الأنسة اللي بتعيط بليل؟"

رد وقالى "ايوا، مش هينفع نتكلم برا كده ممكن ندخل الاوضة؟".

رحبت بيه ودخلنا وانا قلبي مقبوض ومنتظر أفهم السر اللي وراهم إيه بالظبط !

قعد الشاب ع الكنبه قصادي وقالى "أعرفك بنفسى، أنا هيثم اسماعيل الشامى، واللى كانت معايا امبارح دي تبقى أميرة منصور الشامى بنت عمى، وأنا قاصدك في موضوع مهم يمكن محدش غيرك اللي هيقدر يساعدنا فيه بما أنك تُربي المكان وبتشوف كل اللي بيحصل هنا ."

طلع سيجارة من جيبه، حاول يعزم عليا لكن شكرته وكمل كلامه "أنا عايزك تحكيلى شوفت إيه يوم ما الحوش ده اتفتح ومين فتحه وحصل إيه بالظبط."

طلع من جيبه شوية فلوس وحطها قدامى علشان أتكلم، وقولتله "مفيش يا بيه، مشوفتش غير راجل كبير ابن ناس كده جه بالعربية ومعاه شابين شكلهم خُراس شالوا التابوت ودفنوه، ولما حاولت أتدخل واساعدهم منعونى."

كان واضح ان الموضوع كبير ووراه لغز، سألتنى الشاب وقالى "يعنى محصلش حاجة تاني ولا حصل مشاكل أو حاجات غريبة هنا؟".

افتكرت وقتها اللي حصلي ليلة امبارح، لكن مقدرتش أتكلم لأنى لو فشيت سرهم مش هيسبونى في حالى وانكرت .

قام الشاب مشى وقالى أنه ممكن يحتاجنى ويرجعلى من تانى، وأن عيني تكون على الحوش ده الفترة دي وسابلى رقمه بحيث لو حصل حاجة أبلغه .

ودخل عليا الليل اللي لأول مرة بقيت بخاف منه .

كنت متعود كل ليلة أطيب التراب بالمائة وانضف المكان قدام الأحواش كويس .

في اليوم ده كنت طول اليوم حاسس بتكسير في جسمى ومقدرتش أعمل حاجة طول اليوم .

شجعت نفسى قبل ما ادخل أنام لأنى قلقان حتى من النوم وقولت انضف شوية جايز في أذى مدفون هنا ولا هنا وهو السبب في اللي بيحصل .

مسكت خرطوم الماية وابتديت اتابع كل ركن جنب الأحواش والأشجار وانضفهم كويس بأيدي وأتأكد أن الأرض متساوية من كل مكان مفيهاش شئ غريب .

لحد ما وصلت جنب الحوش اليها .

قلبي كان مقبوض وخائف، لكن حاولت على قد ما أقدر مظهرش ده، وقربت وأنا بنصف الزرع حواليه وتغاضيت عن الهمس والكركمة اللي بتحصل جواه كأني مش سامعهم .

وزي ما توقعت، حصل .

لقيت شئ مدفون جنب زرعة الصبار، تراب متكوم فوق بعضه ومش متساوي مع الأرض اطلاقاً .

مديت أيدي انبش في التراب وأشوف إيه اللي موجود هنا!؟

كنت حاسس بوجود حاجة كبيرة تحت كومة التراب دي، يمكن عروسة من بتاعت الأعمال أو حد مخبي أي داهية من دواهيهم .

واتصدمت لما لقيت صوابع طويلة بضوافر شياطين بتخرج من تحت التراب وكلبشت في أيدي .

الصراخ هنا ممنوع .

دي الجملة اللي كان بيرردها والدي دايمًا عليا وبيحفظهاني، مهما حصل ممنوع أصرخ وازعج باقي الأرواح وإلا المصيبة هتكون مصيبتين .

اترميت بجسمي لورا وبقيت أشد أيدي منها بكل قوتي وهي غارزة ضوافرها فيا والألم شديد مش قادر اتحملة .

لكن الخوف كان أشد من الألم .

جلد دراعي اللي بيتفتح وبينزف كل ما يحاول أهرب منها مَكنتش حاسس بيه من كتر الخوف .

فكيت من قبضتها بصعوبة، وأترميت على ضهري وانا بسحف وبيبعد عنها ومش قادر أبعد عيني عنها .

رجعت ايديها تختفي جوا الحفرة وتنسحب .

كأنها كانت عايزة تسحبني لتحت الأرض معاها.. مين هي؟ وليه بتعمل كده، مَيقتش عارف!

رجعت اوضتي بسرعة وقعدت لفيت دراعي بشريط أبيض علشان اوقف نزيف الدم اللي حصلني بسبب ضوافرها .

وبالصدفة جت عيني على كارت الشاب اللي جالي الصبح وسأل عنها؟؟! فكرت أتصل بيه واسأله عن قصتهم بالظبط بدون ما أقوله على الأسرار اللي بتحصل هنا، لكن .

لكن ده هيحصل إزاي وأنا معنديش سبب صريح علشان يحكي لي! وجايز يفهمني غلط ولا يفتكرني متطفل ويحسلي مشكلة .

فشلت كل الأفكار عندي، لحد ما نمت.

تاني يوم الصبح سمعت دوشة على باب الحوش وحد بيسأل عن حارس المقابر بصوت عالي وببزعق .

خرجت جري وانا لسه يادوب بفوق من النوم لقيت عربيتين نص نقل مليونين شباب وستات شعبيين الغضب مرسوم على وشوشهم كلهم، وراجل برجل واحدة في سن الخمسينات كده على عكاز يقرب مني بغضب وبيقولي "أنت الحارس هنا؟".

رديت وقولته "ابوا يا بيه، أي خدمة ."

شاورلي على الحوش اللي جنبي وقال "أحنا جاين نفتح التربة اللي هنا ونشوف اخر جثة نزلت فيها، هتفتحها بنفسك ولا أخلي الرجالة يشوفوا شغلهم؟".

حاولت أتكلم معاه بأدب وقولته "يا باشا فتح التربة محتاج تصريح مش أي حد هيعدي يدخل أي حوش ويكشف حُرمة مينفعش، دي أمانة، هاتلي تصريح وأنا افتحكك".

استخدم معايا أسلوب العنف والتهديد وقال "وأنا أخو القتيلة وبقولك هفتح التربة دلوقتي ومن غير تصاريح يعني هفتحها".

انفعلت من أسلوبه ورديت عليه وقولته "وأنا حارس المقابر هنا، وبقولك محدش هيفتح التربة ولا هياخذ حاجة منها دي أمانة، وإلا هطلبلكوا البوليس وهنتاخذوا كللكوا".

الراجل لما سمع سيرة البوليس اتوتر خصوصًا أن نقطة الشرطة جنبنا بمسافة قصيرة وسهل يتمسكوا.

بص للناس اللي معاه بقلق وقال "ماشى.. ماشى.. أنا هعرف أتصرف كويس".

وخدوا بعضهم ومشبوا كلهم .

حسيت أن موقف زي اللي حصل ده حجة وسبب كبير في إني أطلب الشاب اللي جالي واحكيه عن اللي حصل ويمكن أفهم منه أصل الحكاية، خصوصًا قبل ما يجي عليا الليل وأشوفها تاني .

مجرد ما أتصلت بيه وعرفته أن في اخبار جديدة عن الحوش قالي خمس دقائق وهكون عندك.

وبالفعل، وصل بسرعة البرق وهو متلهف للأخبار اللي هيسمعها .

خدته ودخلت الأوضة وابتديت احكيه و اوصفله الحوار اللي دار بيني وبين الناس دي واشكالهم والشر اللي ناويين عليه، وفي نهاية كلامي قولتله "ما تقولي يا بيه الحكاية كلها علشان أكون فاهم وأقدر اتعامل مع اللي بيحصل هنا."

كان باين على الشاب أنه ابن ناس وملوش في المشاكل وقالي "أنا كنت عارف أنهم مش هيسكتوا وأن الموضوع مش هينتهي، غلطة قديمة هنفضل طول عمرنا ندفع تمنها ومربوطين بيهم."

سألته بفضول "غلطة إيه طيب فهمني يمكن أساعدك."

بدأ يحكي وقالي "من كام سنة عمي الكبير منصور الشامي كان معزوم في مولد شعبي من صحابه بتوع زمان، ولسوء الحظ وهو في المولد ده أعجب ببنت من العجر الموجودين في المكان، كانت أصغر منه بكتير لكن هي كمان أعجبت بيه علشان شكله راجل غني ومقدر، وقد يارها من المولد من غير ما حد يحس وهربت معاه لبيته واتجوزها.. كان أسمها ذهبية .

عمي مراته كانت ميتة بقالها فترة كبيرة ومحش غير ذهبية دي وحتى أميرة بنته في البداية كانت معترضة وبعدين حبتها هي كمان وكانت حياتهم مستقرة .

لحد ما أهل ذهبية من المولد قدروا يوصلوا لمكانها وعرفوا أنها عايشة في فيلا منصور الشامي .

الكلام ده من حوالي سنة، حاولوا يوصلولها بكل الطرق وبيعتلوا تهديدات لحد ما ذهبية تعبت وخافت وحبست نفسها في الفيلا لا بقت تخرج ولا تتحرك من اوضتها من كتر الخوف .

ذهبية كانت خايفة أنهم ينتقموا في مريم أو في عمي منصور بدالها، لما الخوف والقلق النفسي أكلوها لحد ما لقاها عمي منتحرة في يوم على سريرها وشرابها بتنزف .

ولأسف هما دلوقتي بيحاولوا يوصلوا لجنتها علشان يقولوا أنها ماتت مقتولة مش منتحرة ويأذوا عمي منصور."

فهمت دلوقتي كل الحكاية، لكن فضلت حاجة واحدة بس غامضة ومش مفهومة بالنسبالي، ليه ذهبية بتطلعلي كل ليلة؟! .

فسألت الشاب وقولتله " طب معلى سؤال أخير، مفيش تصرفات غريبة كانت بتعملها ست ذهبية

قبل ما تموت مثلاً؟ يمكن مماتش منتحرة فعلاً وحد سلط عليها جن مثلاً خلاها تعمل كده."

رد عليا وقال " لا لا إطلاقاً، ذهبية كانت طبيعية جداً جداً لآخر يوم في عمرها، مشوفناش منها غير كل خير وطيبة وحنية، لا أدت حد ولا كانت بتقبل بأذى اللي حوالها ."

احترت اكثر واكثر وأنا حاسس بشئ ناقص في كلامه ووعدته لو الناس دول حاولوا تاني يتعرضوا للحوش ويوصلوها إني هبلغ عنهم ومش هسمح لحد بالدخول .

معرفش ليه الليلة دي بالتحديد أنا كنت منتظر الليل يدخل عليا علشان أشوفها .

والمرادي أنا متأكد من ظهورها وحاسس إني هعرف سر جديد عنها محدش هيكتشفه غيري .

فضلت قاعد على المصطبة قدام الحوش بتاعي لحد الساعة ما جت اتنين بليل، وده نفس الميعاد اللي بتبدأ هي تتحرك فيه وتظهرلي .

عيني كانت ثابتة على حوشها اللي بدأ الباب الحديد بتاعه يتهز مع شدة الهوا ويعمل صوت مُوتر في الجو .

لكن ذهبية مظهرتش .

مليت من الإنتظار وقومت علشان أدخل اوضتي، ومجرد ما لفيت ضهري سمعت همسها بينادي "زينهم ."

قلبي وقع وانا المرادي حاسس أن صوتها ورايا بدون مسافات، لفيت أشوفها وشوفت أبشع منظر ظهرلي على مرور عمري .

هيكل عظمي متأكّل واقفة على ايديها ورجليها وشعرها اللي لونه أبيض منكوش حوالها وعيونها كلها دم وبتضحك ضحكة غريبة بصوت مكتوم .

روحي انسحبت من منظرها ورجعت خطوة وأنا بقولها ولساني مشلول "قولي سرك متخافيش، أنا هنا أمين عليكموا ."

شقلبت راسها لتحت بشكل عجيب وقالتلي "التربة يا زينهم ."

ورجعت تسحف لكن مش ناحيتي، ناحية حوشها وكأنها بتقولي "تعالى ورايا" وعايزة تشاورلي على حاجة هناك .

كان لازم أدخل وراها وأشوف هي عايزة توصلني فين وأيه مشكلتها في التربة، خدت لمبة الجاز من قدام حوشي و مشيت وراها وانا رجلي بترعش لكني مضطر .

باب الحوش عندها كان مفتوح لوحده، ودي إشارة أن المكان ببسحلي بالدخول .

كانت أول مرة في حياتي أدخل الحوش ده بالتحديد، لأنه مهجور من سنين وعمرى ما شوفت حد من عيلة الشامي فيه .

اختفت ذهبية بمجرد دخولي والمكان كان فاضي وضلمة من حواليا، قربت على التربة الموجودة اكتشفت أن باب التربة متزحزح عن مكانه ومش مقبول كويس .

عرفت السبب اللي مخلي ذهبية خايفة وبتظهرلي، وده لأن رجاله منصور الشامي مقفلوش عليها التربة كويس.

حطيت لمبة الجاز ع الأرض جنبى علشان تنورلي، ورفعت جلبيتي علشان أقدر أتحرك وأبتديت أشيل التراب وأعدل غطا التربة كويس على قفلته الحقيقية. خلصت وردمت فوقيه بالتراب وساويته كويس وكنت خارج علشان أجيب شوية مائة ارطب بيها المكان .

لكن مجرد ما لفيت ضهري علشان أخرج سمعتها بتنادي من تاني لكن بصوت منزعج أكثر كآني ضايقتها ومصلحتش الغلطة الموجودة "زينهم".

رجعت تاني مسكت لمبة الجاز وأنا المرادي مش فاهم حاجة، ولا فاهم سر غضبها .

مشيت بأيدي أفتش حولين التربة وأنبش في التراب جايز في حاجة مدفونة في المكان .

لحد ما وقعت عيني على ركن متكوم فيه تراب فوق بعضه مخدتش بالي منه من وقت ما دخلت .

كومة تراب كبيرة .

حطيت لمبة الجاز جنبى وبقيت أزيح في التراب ده، لحد ما اكتشفت أنه مردوم على جثة تانية خالص!!

بدأ يظهر عضم صغير متكسر بين التراب، ريحة التراب كانت بشعة وواضح انها جريمة قديمة حد استغل أن الحوش مهجور ودخل دفن فيه بالشكل العشوائي ده .

خرجت العضم كله من التراب بالجمجمة اللي صدمتني أنها جثة لطفل يعتبر رضيع وحجمه قليل .

قلعت جلايبيتي وخطيت عليها العضم كله ولفيته براحة، ورجعت فتحت تربة ذهبية ونزلت بنفسني في عتمة الليل أدفن الروح اللني محدش رحمها ولا حد يعرف قصتها غير اللني خالقها.

شوفت جئة ذهبية ملفوفة قدامي وثابتة، خطيت جنبها عضم الطفل وطلعت قفلت عليهم .

رغم كل التعب والخوف والرعب اللني حصلي لما شوفت ذهبية، دلوقتي عرفت هي ليه مرتاحتش في الحوش وروحها كانت متعلقة .

وزي ما قال الشاب، ذهبية كانت بنت طيبة لا بتأذي حد، ولا بتقبل بأذى اللني حواليتها، وعلشان كده ذهبية مرتاحتش غير ما استخدمتني وسيلة أريح بيها روح طفل متعلقة في الحوش، ومش بعيد تكون هي اللني فتحتلي التربة وحركتها من مكانها علشان تديني إشارة أن في جئة كمان محتاجة تتدفن.

**ت م ت**

## كارثة الماضي

من بعد موت ماما كل حاجة اتحولت للأسوء، خصوصًا الحاجات المُريبة اللي بدأت تظهرلي وأنا لوحدي كل ليلة .

أنا ياسمين المُرشدي، عمري تسعة وعشرين سنة من حي بسيط في السيدة زينب.

كنت عايشة مع والدتي ووالدي في بيت عيلة مكون من تلت أدوار .

وبسبب بيت العيلة حصل مشاكل عائلية كثير بين والدتي وأعمامي بعد وفاة بابا، فماما وقتها قررت أنها تاخذني في سكن إيجار بعيد عنهم وعيشنا لوحدها .

وقتها كان عمري عشر سنين بس .

كانت حياة روتينية مملة بكل تفاصيلها، والدتي عاشت مريضة على المهدئات ومن دكتور للتاني بدون ما أفهم سبب مرضها .

وفي آخر أيامها وهي على فراش الموت كانت بتهلوس بكلام غريب جدًا، وتعمل أصوات مُريبة وهي نائمة كأنها بتحلم بحيوانات وبتقلدهم وبتفضل تعافر وتردد "لا لا لا" كأن حد بيحاول يقربها أو ينتقم منها.

كنت بقعد جنبها اقرالها قرآن يمكن تهدى وترتاح، لحد ما صعدت روحها للي خالقها، وبدأت أنا استلم مسيرتها وأعاني .

في البداية كنت فاكرة أن ماما مجرد مريضة نفسية وعلشان كده كانت تصرفاتها كلها غريبة طول الوقت، مَكنتش أعرف أن الموضوع أخطر من كده بمراحل .

بعد موتها، بدأ يظهر لي أشياء غريبة جدًا في الشقة وأصوات واضحة مش مجرد وهم .

بدأت بعد أول أسبوع من وفاتها لما كنت في غرفتها الساعة اتنين بعد منتصف الليل، نائمة على سريرها وبستشعر وجودها اللي افتقدته وبفكر في وحدتي من بعدها، صحيح هي مَكنتش حنينة عليا ولا بيينا ذكريات حلوة، لكن كنت مطمئة بوجودها.

قطع حبل أفكاري صوت خطوات رجلين وحد ماشي جوا الشقة!

باب الاوضة كان مقفول عليا والدنيا ضلمة، لكني كنت سايبية نور الصالة شغال والضي بتاعه

داخلي من تحت الباب .

قومت قعدت مكاني وانا مبرقة ناحية الباب وقلبي بيدق بقوة، جسمي انتفض لما لقبت فجأة رجلين  
ظهرت من تحت الباب وواقفة ثابتة مبتحركش!

كنت محتاجة أصرخ وأهرب لكن...! لكن أوضة ماما مفيهاش حتى شباك ولا بلكونة أقدر أهرب  
منهم .

ضميت رجلي على صدري وأنا بتمنى اللي بشوفه ده يكون مجرد أوهام من التعب والارهاق  
وهيختفي، لكن اوكرة الباب بدأت تتحرك!

حد بيحاول يفتح الباب عليا ويدخل .

صوت الاوكرة وهو بيتحرك ببطئ كان بيسحب روعي معاه، وبتخيل أن في حرامي أو جايز  
عفريت هيدخل عليا يقتلني حالاً .

غطيت وشي بسرعة وجسمي بيتنفض وبيترعش بشكل صعب لدرجة أن السرير نفسه بدأ يتهز بيا .

حسيت بصوت الاوكرة بطلت تتحرك، شيلت الغطا بشويش وكشفت عيني بخوف وبالفعل ملقتش  
حد قدام الباب.

أعصابي سابيت ودموعي بدأت تنزل في صمت من الخوف، حتى الصوت مش قادرة أطلعاه حرصاً  
من رجوعه.

لو كان ليا أهل وسند، مكنش ده بقا حالي .

دي كانت الفكرة الوحيدة اللي وجعاني دلوقتي في كل اللي بيحصلي ومُسيطرة عليا، أنا بطبعي  
خوافة لكن عمري ما خوفت في وجود والدتي .

شكيت إنني ابتديت اعاني من نفس الحالة النفسية اللي مرت بيها والدتي، وعلشان أتأكد كان لازم  
اغامر وأقوم أخرج اشوف هل في حد في الشقة معايا ولا دي بداية الهلوس الحقيقية .

قومت ورجلي بتترعش وانا بثبتها في الأرض بصعوبة، وفتحت الباب بهدوء وأيدي بتتهز عليه  
وقولت بصوت ضعيف "مين برا؟؟ حد هنا؟".

خرجت أمي من طرقة المطبخ ماسكة في أيديها جلد حيوان بينقط في دم وعيونها بتضوي نور  
ولابسة جلابية بيضا كلها بقع دم كبيرة وقالتلي "أنا هنا يا ياسمين، بطبخلك أهو."

اعصابي متحملتش اللي شيفاه ووقعت من طولي، مفوقتش غير على جرس الباب المستمر ورا بعضه والخبط الشديد عليه .

قومت مفزوعة لقيتني نائمة على سرير ماما!؟..

يعني موقعتش على الأرض امبارح ولا فقدت الوعي! يعني تقريبًا كل اللي شوفته ليلة امبارح كانت مجرد كوابيس مش أكثر ؟! .

فتحت الباب وعيني مزغللة وكلها سواد من التعب، كانت اللي برا واحدة ست وواقف وراها شاب أطول منها وقالتلي "ياسمين يا حبيبتى البقاء لله يا غالية، أنا مرات عمك انتي فكراني؟ وده إبراهيم ابن عمك." .

صوتها كان مألوف بالنسبالي لأنني كنت بكلمها في التليفون لما كانت بتتصل بماما كل سنة مرة تظمن علينا، لكنها قطعت السؤال من حوالي تلت سنين بدون سبب.

دخلوا قعدوا يواسوني شوية وكانت مختصر القعدة بينا أنهم بيطلبوا مني أرجع بيت العيلة لأن شقننا مقفولة زي ماهي وكلهم منتظريني هناك .

الفكرة بالنسبالي كانت غريبة وموترة، بيت العيلة اللي مرجعتوش من صغري وشقننا اللي قربت أنسى ملامحها أصلًا .

وعدتهم إنني هفكر في الموضوع وأرد عليهم .

لكن مرات عمي رفضت أنها تسبني لوحدي تاني خصوصًا أن باين على ملامحي التعب، وصممت أنها تقعد معايا اليومين دول لحد ما تاخذني بنفسها وترجعني بيت العيلة من تاني .

في الحقيقة مقاوحتش معاها لأنني كنت في أشد الاحتياج لمرافق معايا في البيت يكونلي ونس من بعد اللي شوفته ليلة امبارح والخوف اللي واجهته لوحدي .

ورغم أنني أول مرة أتعامل مع مرات عمي واعرفها إلا أنها كانت ست طيبة خوفها عليا باين في عينيها، ألتمست فيها شئ من ريحة أمي، أو...  
أو يمكن تكون هي أمي ومتخفية فيها؟! .

ابتدت الشوك تتسرب جوايا من تصرفات مرات عمي في البيت اللي كانت بتتحرك وكأنها حافظة بيتنا بنفاصيله مش أول مرة تدخله، واللي صدمني أكثر لما لقيتها خارجة من أوضة أمي ولايسه جلابيتها اللي كانت على مقاسها بالطبط وتقریبًا ..

تقريبًا نفس جسم أمي كمان؟؟!

خوفت منها وحسيت إنني متورطة في شيء أكبر، وعلشان أتأكد منها قعدت اسألها في حاجات كتير تخص الماضي جايز تتلغبط في حاجة واكشف سرها .

كلامها كله كان منطقي وطبيعي وميدلش على الشر إطلاقًا، لكن قلبي مازال مش مرتاح لها .

أو يمكن أنا اللي تعبي النفسي بدأ يسيطر عليا ويشككني في كل اللي حواليا!..

خليتها تدخل ترتاح هي في اوضتي وقولت أنام أنا في أوضة أمي علشان محدش ياخذ مكانها أبدًا .

ولأني كنت هلكانة من التفكير وما صدقت اطمن أن في حد معايا في الشقة خلاص، نمت نوم عميق .

صحيت منه على صوت خبط الحلل في المطبخ!

كانت الساعة حوالي أربعة الفجر؟! استغربت أن مرات عمي قامت تطبخ في وقت زي ده!..

قومت وأنا بدعك في عيني بكسل ودماعي متدمرة من الصداع اللي ملازمي أكثر من ضلي علشان أشوفها بتعمل إيه دلوقتي في نص الليل .

لقيت أمي قاعدة في أرضية المطبخ وقصاها مرات عمي بضرها وبينهم حلة كبيرة كلها دم ويطلعوا منها أرجل حيوانات رفيعة ولحم بني ادمين وبياكلوا فيهم زي الوحوش المفترسة!؟؟.

كنت محتاجة أصرخ وأهرب من بشاعة المنظر اللي قدام عيني، لكن مكنش عندي القوة الكافية وسندت على الحيطه ووقعت مكاني في صمت.

فوقت عيوني مزغللة وبجمع الرؤية بالعافية على صوت مرات عمي اللي كانت قاعدة جنبني على الأرض وواحدة راسي على رجلها وبتحاول تفوقني وبتبكي وهي بتقولي "ياسمين يا ضنايا مالك يا غالية، مالك يحببتي جراك ايه قومي طمنييني عليكي."

اتعدلت بصعوبة لقيت نفسي مازلت قدام المطبخ، لكنه دلوقتي فاضي .

بصيتها بتعب وقولتها ودموعي بتسبقني "هنا.. كنتوا هنا ودم كتير في الحلة."

ملاح مرات عمي اترسم عليها الخوف، وتقريبًا افكرتني بهلوس وقالتلي "طب قومي يا حبيبتي،

قومي ادخلك على سريرك وهنام جنبك أنتي تعبانة وصدمة موت الغالية مش قليلة بردو، الله يقطع المشاكل اللي وصلتنا لكل ده."

اتسندت عليها ودخلت على سريري وسألتها وهي بتطبطب على شعري وبتهديني "هو إيه اللي حصل زمان خلى ماما تمشي من البيت؟ ولية محدش سأل عليا من أهلي غيرك؟ مش أنا لحمهم بردو."

ردت مرات عمي بحزن وهي بتمحي دموعها وبتقولي "كلها مشاكل عبيطة وصغيرة والله يابنتي مش عارفة اقولك إيه، بس دايمًا البلاوي كده بتبدأ من الصفر وتفضل تكبر وتكبر وتأخذ أكبر من حجمها."

أصريت إني أعرف بداية المشاكل واللي حصل زمان وبدأت تحكي لي، وقالت "أمك كانت ست عنيدة حبتين، على قد طيابتها وأن الكل كان بيشهدلها بحنية قلبها لكن مكنتش تحب حد يمشي كلمته عليها، حتي جوزها."

وهي كانت مربية قطة سودا في الشقة عندكوا لو تفنكريها كنتي انتي صغيرة وقتها وبتحبيها أوي بردو."

ابتديت افتكرك وذاكرتي تشتغل كأني بفتكر لأول مرة في حياتي وقولتلها "أيوا ايوا، كيتي.. أنا... أنا فكراها كويس."

طبطبت على أيدي وقالتي "عليكي نور، هي كيتي دي بقا كانت بداية المشاكل واللعة كلها .

لأن عمك حسين كان عنده فوبيا من القطط، وانتي وامك طالعين نازلين بيها والقطة بترخم عليه، وابوكي كان راجل عصبي وقاسي لما حسين اشتكاله من القطة وأمك طلع ضربها و..."

وقفت كلام فجأة كأنها خائفة على مشاعري من حاجة معينة، وسألتها "و إيه؟ إيه اللي حصل ارجوكي كمي."

كملت كلامها وقالتي "وبصراحة كده بينتي قننل القطة قدام عين امك و دببحها، أمك وقتها من الصدمة فضلت تصرخ تصرخ ولما أنا سمعت صوتها من تحت حاولت أطلع علشان احوش عنها قام عمك حسين ضربني أنا كمان ومنعني أتدخل، ابوكي وعمك كانوا رجالة شداد أوي وقلوبهم جامدة علينا .

وأمك من وقتها دخلت في نوبة اكتئاب وصدمة عصبية وتصرفاتها اتشقلبت .

كنت كل ليلة أطلع أشقر عليها ونقعد نبكي في حضن بعض على اللي بيجرالنا والضرب اللي بناخده

من اجوازتنا كل ما نعترض على شئ .

ابوكي متحملش جنان أمك وصراخها وفرجة الجيران عليهم كل ليلة والثانية، قام طفش وسابلكوا البيت خالص .

عمك بقا فضل يتصل على ابوكي ومعرفش يوصله، قام أتهم امك في موت أخوه وأنها قتلته، وعلشان كده خدتك وهربت قبل ما يسجنها ولا يدخلها في مشاكل .

أنا كنت بدافع عن امك طول الوقت وبقوله يتقي الله ويسببها في حالها، وكل مرة كنت بضرب بسببها .

ودلوقتي عمك الله يرحمه من تلت سنين، ومن وقتها يابنتي وشفتكوا مقفولة زي الشفق المهجورة في البيت، لا حد دخلها ولا جينا جنبها، وعلشان كده انا جيت ارجعك تنوري بيتك لأن أكيد امك مش هتكون مرتاحة وانتي في الدنيا لوحدك كده يلزمك سند وونس والشر اللي كان هناك خلاص مات وانتهى.

سمعت كلامها للأخر، وحضنت مخدتي ونمت بدون ما أرد حتى عليها، حسيت بنفسي في دوامة وصوت أمي بيهمسلي من بعيد وسط الضلمة "ارجعي يا ياسمين، ارجعي، وسامحيني، ومترعليش مني."

تاني يوم صحيت من نومي وأنا واخدة قراري بالرجوع خلاص، أول ما بلغت مرات عمي إني قررت ارجع معاها بيت العيلة النهاردة فرحت جدًا وقاتلي "ربنا يكملك بعقلك يابنتي ويهديكي."

حضرنا حاجتنا وخذت مفتاح الشقة اللي كان في صندوق محتويات أمي .

قدام الباب وقبل ما نتحرك خطوة أدتني مرات عمي ورقة مكتوب فيها العنوان بالتفصيل وقاتلي أنها هتروح المقابر تزور عمي وترجعلي على بيت العيلة .

وروحت أنا لوحدي بيتي القديم والحي اللي مدخلتوش من تسعناشر سنة، حي السيدة زينب .

لقيت إبراهيم ابن عمي واقف قدام البيت ومرسوم على وشه إبتسامة فرحة وانتصار أول ما شافني، جري عليا خد مني الشنطة وقال "كنت متأكد أنك هترجعي، نورتي بيتك يا بنت عمي."

فتحنا باب الشقة اللي كان مش باين من عش العنكبوت والتراب اللي متراكمين عليه .

لكن ريحة بشعة هبت علينا أول ما فتحنا الباب، وكأننا فتحنا تربة مش بيت!!..

فضلت اكح وسألت إبراهيم "إيه الريحة الصعبة دي، في حاجة ميتة جوا أكيد."

رد وقال "متقلقيش أُمي الله يرحمها قبل ما تموت قالتلي لما ياسمين ترجع خليها تجيب حد ينضفها الشقة لأنها هتكون بالمنظر ده من الركنة."

حسيت فجأة أن قلبي وقف والدم اتجمد في عروقي وقولته "قبل ما تموت إزاي؟ هي مرات عمي ماتت؟"

رد وقال اللي صدمني "ايوا من تلت سنين ماتت هي وبابا الله يرحمهم، كانت جريمة بشعة ملهاش تفسير."

لساني اتشل وانا بقوله "أنت.. اومال انت جيت امبارح البيت عندي مع مين؟ وجريمة إيه اللي بشعة؟!"

استعجب من كلامي وقال "جيتك لوحدي!.."

أنتي نسيتي اللي حصل؟؟

أنا يادوب قولتك أني إبراهيم ابن عمك وجاي علشان ارجعك بيت العيلة قومتي زعتي فيا واديتك العنوان في ورقة رميتها في وشي قدام الباب وقفتي، بس أنا كنت حاسس أنك هتراجعي نفسك وتيجي .

أما عن موضوع الجريمة دي هقولهولك بعدين، بس يعني عموماً المختصر أن أبويا وأمي لقيتهم محروقين في الشقة بعد خناقة قامت ما بينهم فجأة ومعرفش مين قتل الثاني ولا إيه اللي حصل بالظبط في البداية لأنني كنت نايم وقتها ومحستش."

حسيت بدوخة شديدة وصداع خلاني على وشك إني أقع تاني، لولا أنه سندن وقعدني على أقرب كرسي .

من جوايا بصرخ وجسمي بيتجمد ومش قادرة اتكلم، يعني اللي كانت معايا امبارح دي كانت روح مش أكثر؟؟ !يعني شكوكي فيها طلعت صحيحة؟؟

طب ليه عملت كل ده علشان أرجع البيت، وليه امي كانت بتظهرلي بالمواقف البشعة دي علشان اطفش من البيت هناك؟

صوت إبراهيم كان مستمر وهو بيسألني بتكرار "ياسمين أنتي كويسة؟ حصل حاجة ضايفتك طيب؟"

هزيت راسي بصعوبة وقولته "محتاجه بس أرتاح شوية."

فهم كلامي واستأذن بعد ما قالي "طب لو احتجتي حاجة أنا موجود، اندهيلي من السلم في أي وقت هتلاقيني تحت في الشارع."

أتلقت حواليا شوية وأنا بتفرج على الشقة المتغطية بتراب الزمن ومقفولة على كوارث شهدتها  
الحيطان دي من ظلم وإهانة ووجع عانت منهم والدتي لوحدها .

قومت وأنا رجلي مش شيلاني أدخل المطبخ بعد ما حسيت بعطش شديد بسبب الصدمة اللي خدتها .  
فتحت حنفية الحوض نزلت مائة صفرا وده كان طبيعي من ركنة المواسير .

لقيت ورايا تلاجة موجودة في الركن على جنب، والغريبة أن التلاجة دي شغالة والفيشة متوصلة  
في الكهريا عادي...!!؟

التراب مغطياها زي كل حاجة في الشقة، فتحتها وأنا مستعجبة هي إزاي شغالة بعد السنين دي كلها  
ومتحرقتش ولا جرالها حاجة .

حسيت بريحة بشعة خارجة منها واللي كنت متأكدة إني هلاقي فيها حل اتعفتت من زمان وهي اللي  
عاملة كل ده في الشقة .

مكنتش أعرف إني هلاقي أعضاء بشرية مرصوفة في كل رف ومتعفنة !

الاعضاء دي كانت جسم والدي، اللي منتقطع ومفصول عن بعضه في كل رف جزء منه .

وقعت على الأرض من كتر ما سابت اعصابي ورجعت ازحف على باب الشقة وأنا بنادي على  
إبراهيم يلحقني .

دلوقتي عرفت ليه امي خدنتي وهربت، ولية كانت مريضة نفسية وبتعاني طول عمرها .

القسوة والجحود بتوع والدي عليها وصلوها لأخر مرحلة من عقلها، وخلوها تنتقم فيه زي ما انتقم  
هو في قطنها .

أمي كانت ضحية لزوج قاسي وجاحد، وعاشت شايلة حمل اتقل منها، وعلشان كده كانت بتقولي  
سامحيني ومنتز عيش مني.

فضلت أصرخ وانا دي بأعلى صوتي على إبراهيم اللي للأسف مسمعينش .

نزلت على السلم جري وأنا بتسند بصعوبة على السور اللي كله كان عبارة عن هباب أسود

وتراب .

نزلت الشارع وأنا مازلت بنادي على إبراهيم وبدور عليه زي المجنونة "إبراهيم، يا إبراهيم."

الشارع بدأ يتفرج عليا كأني مجنونة، قربت مني ست مليانة واضح انها من الجيران وهي قلقانة وقالتلي "أنتي بتدوري على مين يابنتي، وايه اللي جابك هنا."

سندت عليها وانا بقولها "إبراهيم، إبراهيم ابن عمي فين، كان لسه معايا هنا." جاوبتني بأخر شيء توقعت إنني أسمعاه وهدمتلي كل أفكاري وقالتلي "معاكي إزاي بينتني، البيت ده ولع بكل اللي فيه ومات إبراهيم وأمه وعم حسين وكلهم اتحرقوا والنار اكلتهم، انتي تعرفيهم بينتني؟؟...!"

بعدت عنها بخوف وأنا ببص للبيت اللي كان بالفعل كله أسود وواضح أن النار مسابتش حته فيه مأكلتهاش، لكن ده مكنش شكله وأنا دخلاه!..

بعدت وبعدت وقلبي بيتعصر من كمية الصدمات اللي خدتها ورا بعض، واللي عرفت وقتها أن والدتي كانت عيزاني اكتشف سر البيت وكل اللي فيه علشان يكونلي إجابات على كل اللي عيشتها معاها .

المشاكل فعلاً بتتولد من العدم، وبتضخم واحدة واحدة من خلال الشيطان اللي بيخلي كل طرف يشوف نفسه على حق، وبيعمي القلوب ويجمدها لحد ما بيوصلهم لاسوء نقطة، زي ما وصلت عيلتي بالظبط .

**ت م ت**



لما كبرت ووصلت الثانوية كنت دائماً من الأوائل ومتفوقين الدفعة. كان معايا شلة بنات أربع بنات وأنا الخامسة بتاعتهم .

كلهم كانوا عارفين بقصتي مع سمر في الطفولة وصورتلهم العروسة اللي عاشت معايا عمري كله ومستغنتش عنها .

لكن طبعاً مَكنتش بلعب بيها وأنا شحطة كده لأ، الدراسة خدنتي واتلهيت وسمر بقت مجرد دمية في رف مكتبتي وجودها بس بيخليني اترحم على صحبتي لما افكرها.

لما نجحنا أنا وصحابي وربنا كررنا ندخل نفس الجامعة اللي هنتغرب فيها ونسافرلها لأننا من الصعيد .

كان افضل خبر سمعناه في حياتنا، هو ده فعلاً حلم حياتنا اللي تعبنا وانتظرناه بفارغ الصبر وسهرناله الليالي الصعبة .

وأنا بجمع شنطتي اللي هسافر بيها لقيت نفسي واقفة قدام سمر وقلبي واجعني.. يعني معقول هسيبها بعد العشرة دي كلها؟ ومش هشوفها كل يوم في نهاية يومي؟؟

مقدرتش أمنع نفسي ولقيتني باخذها في شنطتي وجمعت عليها باقي الأشياء واتحركنا .

نزلنا جامعة القاهرة، حلمي.. وحلمنا كلنا .

أنا والبنات خدنا سكن مشترك قريب من الجامعة وده اللي جابهولنا قريب واحدة زميلتنا عايش في القاهرة .

الحياة كانت مستقرة جداً واللهم بارك مستوانا أحنا الخمسة يعتبر واحد وفي تقدم ملحوظ وكل الدفعة حبانا وعرفونا في وقت قليل.

محدث من صحابي كان متنمر نهائي ولا استعجبوا وجود سمر اللي موجودة على تسريحة الاوضة عادي .

كان بيحصل حوارات بايخة احياناً من شباب الجامعة ومنهم موقف مش قادرة أنساه... لما صحبتي اعجبت بشخص معين وهو لاحظ ده بنفسه، واتجرأ وقالها محتاج اتكلم معاكي برا الجامعة .

كلنا حاولنا نمنعها أنها تعمل كده لكن للأسف هي كانت موهومة بيه ومنتظرة الحدث ده من بدري .



بصراحة أنا ابتديت أشك فعلاً في سمر، وقولتلهم "خلاص يا جماعة أنا هاخذها معايا الاجازة اللي الجاية ارجعها البيت مكانها."

تاني يوم روحنا الجامعة ومن حزني خدت ركن شوية من صحابي لأنني صعبان عليا نفسي وصعبان عليا سمر .

فروحت الكورنيش قعدت لوحدي شوية أفكر في كل اللي بيحصل وأشوف مخرج انفي بيه أن سمر هي السبب، وأن جايز الشقة تكون ملبوسة أصلاً وفيها روح من الأول.

رجعت البيت ولقيت فجأة صحابي كلهم واخدين وضع الهجوم وبيسألوني "فين سمر يا لميس؟.."

اتصدمت من اسلوبهم وقولتلهم "يعني إيه؟ مهني موجودة في الاوضة."

ردت رغبة وقالتي بخوف "لو خدتها قولي يا لميس حرام عليك انا مش حمل الرعب بتاعك ده."

أنا فعلاً مخدثش سمر ولا أعرف راحت فين، سمر اختفت.

اختفاء سمر أكد لصحابي أكثر أنها فعلاً ملبوسة واختفت علشان تنتقم منهم لأنهم السبب في إني كنت هرجعها البلد.

وبسبب اللي حصل ده صحابي كلهم قاطعوني خوفاً من أن سمر تظهر ليهم تاني لو قربولي، وابتدت الإشاعات تنتشر في الجامعة من صحابي عليا.

وبدل ما كنا شلة واحدة مترابطة ومحترمين بقا الكل يتكلم على لميس بتاعت العروسة اللي بنتنقم من أي حد يقربلها .

ومحدش بقا يقربلي، وشبه بقيت منبوذة وسطهم .

جت الإجازة ورجعت بلدي لوحدي وانا خاطري مكسور وفي شدة حزني وضيقتي .

بلغت أهلي اني مش عايزة ارجع الجامعة تاني وعايزة اسيب التعليم كله .

لكنهم منعوني من لحظة التهور خصوصاً أنهم عرفوا مشاكلي مع صحابي المقربين، وماما قالتلي معلش بينتي حاولي تصالحهم وتعملي حساب للعشرة اللي ما بينكوا .

قولت هاخذ فرصة أخيرة أرجع فيها وأحاول اصلح علاقتنا جايز شيطان ودخل مابينا واتحسدنا على لمتنا وشطارتنا.

رجعت السكن وكالعادة كلهم ميكلمونيش، إلا رغد كانت بتكلمني كلام بسيط جداً زي "عندك الاكل في التلاجة.. خدنا محاضرات كذا وكذا" وهكذا مجرد كلام قليل .

في ليلة وانا نائمة في اوضتي سمعت صوت همس غريب جاي من أوضة صحابي اللي جنبني؟

احنا كنا بنستخدم اوضتين، واحدة فيها تلت بنات وأنا منهم، والثانية فيها رغبة وليلي .

أول ما سمعت الاصوات دي مخطرش في بالي غير أن سمر رجعت تاني لما عرفت إنني بحاول اصالح صحابي .

قومت وأنا مرعوبة وبترعش لأنني كل ما بقرب من الأوضة الصوت بيعلى ويوضح أكثر .

لكن أول ما وصلت قدام باب الاوضة اتصدمت باللي عمري ما تخيلته في حياتي.

رغبة كانت مايلة على ليلي اللي رايحة في سابع نومة وعماله تعمل أصوات مخيفة جداً وتهمس جنبها، وأول ما ليلي جت تتقلب بسبب الصوت راحت رغبة عامله نفسها نائمة بسرعة قبل ما تشوفها.

مبقتش فاهمة ليه رغبة أصلاً عملت كده وبتخض في صحبتها اللي قامت تصرخ واتفزعت من اللي سمعته؟؟؟

دخلت بسرعة نورت النور ولقيت رغبة عامله نفسها بتقوم من النوم وبتقولنا "في اييه، ايه اللي حصل.. مالك يا ليلي فيكي إيه؟"

ليلي كانت بتاخذ أنفاسها بالعافية وقالتها "سمعتها.. سمعتها تاني.. اصوات مرعبة.. سمر رجعت تاني.. حرام عليك يا لميس.. عروستك هتموتنا كلنا بسببك."

باقي البنات قاموا وصحيوا على صوت الزعيق، مقدرتش أمنع نفسي واصبر لحد ما أعرف ليه رغبة بتعمل كل ده؟ وبتتهمني في سمر .

قولتلهم كل اللي شوفته بعيني وان رغبة ماكنتش نائمة أصلاً وهي اللي عملت كل ده .

محدثش كان هيصدقني بسهولة لولا توتر رغبة الزايد عن حده هو اللي كشفها .

بدأت تترعرع وتفولهم "دي كدابة.. دي دي.. دي اكيد عروستها مش أنا.. أنا مالي.. سبوني في حالي."

كان واضح ان في سر كبير جداً وراها، ولما كلنا ضغطنا عليها بدأت تتكلم وتحكي بأنيهار وقالتلنا:

"ايوا أنا اللي عملت كل ده، علشان بكرهك يا لميس"

"الراجل الوحيد اللي حبيته في حياتي واتمنيت أنه يعترفلي بحبه هو كمان، طلب يخرج معايا علشان يقولي إنه معجب بيكي أنتي يا لميس مش أنا"

"كسرتيني وبقيت بكرهك ونفسي كل اللي حواليني يكرهوكي هما كمان علشان يعرف أنني أحب عنك وأنت متستاهليش الحب ده كله"

كلنا اتصدمنا من كلامها ومن أسلوبها اللي أتغير ١٨٠ درجة .

قولتلها "طب كنتي قوليلي يا رغبة وانا اهزقهولك في الجامعة كلها واجباك حقك، ليه تكرهيني وتعملي فيا كل ده؟ أنا مليش غيركوا طول عمري.. وختليني أخاف من عروستي واشك فيها.. طب ايه ذنبها هي كمان قوليلي."

ردت وقالتلني كلام خلاني فقدت السيطرة على اعصابي لما سمعتها قالت:

"سامحيني يا لميس.. أنا كان لازم أخذ اغلى حاجة عندك واكثر حاجة بتحبها.. علشان اعملك عليها عمل."

الحكاية مخلصتش لحد هنا مع رغبة، أنا ادمرت بسبب اعز الناس وبسبب العمل اللي عملته ليا وقلب حياتنا كلنا.

خذت صدمتي وحاولت اتماسك وباقي أصحابي فضلوا يلوموا في رغبة وفي اللي عملته ويحضنونني .

رغبة حست بالندم وفاقت، لكن فاقت متأخر للأسف .

قالتلي "صدقيني أنا هروح بكرا الصبح اخليها تبطل العمل وارجعلك سمر، أنا ضعفت في لحظة شيطان غصب عني يا لميس."

محببتش أكون القاضي والجلاد عليها وقولت كفايا لوم صحابي وز علمهم منها وقولتلها "ماشى يا رغبة، أنا هنتظرك لحد الصبح ترجعيلي سمر ويارب الأزمة دي نقدر نتخطاها كلنا ومنخسرش بعض."

تاني يوم محدش فينا راح الجامعة ونزلت رغبة لوحدها علشان تفك السحر اللي عملته.

كلنا كنا قاعدين منتظرينها ترجع على اعصابنا وخافين عليها بردو، في النهاية هي صحبتنا وراحت للشر برجليها، ويمكن يحصلها سوء هناك.

بعد حوالي أربع ساعات من غيابها وأحنا بنتصل بيها وخلص اعصابنا باظت، رجعت رغبة.

رجعت وباين على وشها الخوف وماسكة في أيديها شنطة سودا .

وقفت قدامها وسألتها "جبتي سمر؟".

مدتلي أيديها بالشنطة وقالتلي "جبته".

خدت منها الشنطة بلهفة وبطلع عروستي منها وإذ فجأةً كلنا صرخنا لما رميتها من أيدي أول ما شوفتها.

سمر كان شكلها بشع وملفوف عليها حاجات غريبة ومرعبة واتشوهت نهائي لدرجة أنني خوفت أمسكها.

أنا طول عمري بسمع عن الأعمال لكن عمري ما شوفتها في الحقيقة .

قلبي اتقبض من العروسة خلاص ومقدرتش اجي ناحيتها ورميت سمر في الزبالة، لأن للأسف ملامح سمر اللي كنت بحبها اتشوهت ومش حابة افكر صحبتي أو اشبهها تاني بالهيئة دي.

حزنت في الليلة دي جدًا من كل قلبي وفضلت في الاوضة لوحدي أبكي بحرقة على كل اللي جوالي من بداية ما جيت السكن والجامعة .

كنا متعودين نسيب باسكت الزبالة قدام الباب وننزل الجامعة، فقبل ما ننزل الصبح طلعت الباسكت بأيدي وبصيت نظرة أخيرة على سمر اللي كنت فاكرة إني خلاص مش هشوفها تاني.

حسيت بالتعب الشديد والدوخة وأنا في المدرج فقررت محضرش آخر محاضرة وامشي بدري، لكن ليلي صحبتي صممت أنها متسبنيش لوحدي وتروحي بنفسها وباقي البنات كملوا اليوم.

رجعت البيت وأنا وشي بهتان واصفر وباين عليا التعب بدون سبب وفضلت استفرغ كل الفطار اللي كلته الصبح مع البنات .

ليلي قفقت عليا وقالتلي "أنا هنزل اجبلك حاجة من الصيدلية وأسأل الدكتور على حالتك."

وجريت نزلت وانا اترميت على سريري وحاسة أن روحي مسحوبة مني.

ميقتش فاهمة اللي بيحصلي ده من العمل اللي اتفك ولا من حزني على سمر مثلاً ومن اللي عملته  
رغدة؟

كنت باصة للسقف ودموعي بتنزل غصب عني لحد ما سمعتها.. "لميس.. أنا جيت يا  
لميس.. أنا سمر صحبتك."

قومت منفضة من مكاني وأنا فاكرة أنها تهيئات.. لكن... لكن لأ... العروسة سمر واقفالي على  
باب الأوضة وفيها الروح بتتحرك؟؟

واقفة متكنتة بالحاجات اللي مربوطة عليها وبتميل براسها على جنب وبتقولي بابتسامة "لميس..  
فكيني يا لميس متخافيش مني أنا صحبتك."

فضلت أبصلها وانا بحاول أتأكد إني مبلمش وبقولها "مستحيل.. مستحيل.. مستحيل."

كانت بتبتسملي بشكل مرعب وبشع وعيونها البلاستيك بتغمض وتفتح وكأنها إنسانة على حجم  
عروسة لعبة.

فضلت أصرخ أصرخ جايز أقوم من كابوسي، لحد ما فقدت الوعي ومحستش بحاجة غير وليلي  
بترمي مائة ساقعة على وشي وبتفوقني وحواليا باقي البنات.

أول ما فوقت اتفرعت وقولتلهم زي المجنونة "أنا شوفتها.. سمر هنا أنا شوفتها.. سمر رجعت  
وحية."

كنت متأكدة أنهم مش هيصدقوني وهيفنكرونني بهلوس من التعب، لكن اتصدمت لما ليلي قالتلي  
"أهدي يا لميس ارجوكي.. كلنا شوفناها؟؟."

صرخت وانا بقولها "شوفتوها بتتحرك؟؟ شوفتوها بتتكلم.. هي فين وحصل إيه."

جاوبتني ليلي وقالتلي "أنا رجعت من الصيدلية لقيت سمر واقعة قدام باب اوضتك على الأرض..  
ولقيتك فاقدة الوعي.. وقعدت أحاول افوقك بقالي أكثر من ساعة وقرأ عليك قرآن لحد ما البنات  
رجعوا وشافوا العروسة وحطيناها في شنطة علشان لازم ترجع للدجالة وتقولنا نتصرف إزاي لأن  
سمر رجعتلنا رغم أننا رميناها واتخلصنا منها، فأكيد في حاجة غلط."

فضلت أبكي واقولهم "أنا تعبت.. خلاص تعبت ليه يحصل فيا كل ده ليه.. كرهتوني في اغلى حاجة عندي وبقيت بتأدي دلوقتي من غير ما أذي حد فيكوا ليه كده ليه.. لو الصحاب بيعملوا في بعض كده فأنا خلاص مش عايزة صحاب تاني ومش عايزة الجامعة ومش عايزة حاجة خالص."

رغدة كانت واخدة ركن وواقفة تبكي في زاوية الباب وقالتلنا "اوعدكوا هخلصكوا من الورطة اللي عملتها دي، وخرج من حياتكوا للأبد.. انتي يا لميس كنتي خير صاحبة والاخت لينا كلنا، لكن أنا اللي الحب عماني وغيرني لنسخة مقرفة."

البنات احتاروا بينا، يواسوني ولا يواسوا رغدة، أحنا الاتنين حالتنا صعبة وصعبانين عليهم .

قومت جهزت واتحركنا كلنا وقولنا هنروح للدجالة مع رغدة علشان نتأكد بنفسنا أن العمل اتفك وسمر مش هترجع تخوفني من تاني .

وصلنا لبيت مريب في منطقة شعبية ودخلت مع رغدة للدجالة وفي أيدي الشنطة اللي جواها سمر. رغدة قالت للست على اللي حصل لقيناها بتضحك وهي بتقولنا "مانا قولتلك يا رغدة، العمل علشان يتفك اغلى من أنه يتعمل أصلا.. الاسياد مبيهزروش معنا.. أنتي اللي صممتي تاخديها زي ماهي وترميها وفكرة الموضوع سهل."

سألتها "طب محتاجة كام ونجمعك الفلوس وتفكي لنا العمل؟"

ردت وقالتلي "علشان انتوا قطاقيط صغيرين هاخذ ٨ آلاف بس."

المبلغ كان كبير وصعب علينا فلقيت رغدة بتبصلي وبتقولي "متخافيش.. أنا هتصرف."

وخرجنا برا لقيتها بتطلع تليفونها اللي يعتبر لسه جيباه جديد وبتقلع الخاتم الذهب اللي جاييهولها والداها هدية النجاح وقالتلنا "استنوني هنا؟".

غابت رغدة ساعة ورجعت وهي معاها فلوس كتير وخذتني ودخلنا تاني للدجالة اللي عيونها لمعت بالفلوس وما صدقت تستغلنا وفكت من على سمر السحر وكل الحاجات المربوطة فيها بشوية تعاويد وبخور.

انتهت اللعنة والدجالة رمت سمر في الفحم اللي قدامها وانتهت سمر بالحكاية اللي وراها وخرجنا كلنا نقعد على الكورنيش نهدي اعصابنا من الضغط اللي عيشناه خلال الفترة اللي فاتت.

كنا قاعدين في ركنة خشبية كده كلنا جنب بعض وباصين على النيل بهدوء وسمعنا رغدة بتقولنا "أنا كنت صاحبة وحشة اوي ليكوا.."

أنا فشلت في الحب وفشلت في الصحوبية وفشلت اكون بنت مؤدبة زيكوا لما منعوني من مقابلة الشاب.. أنا حاسة إنني محتاجة اتغسل من ذنوبي."

كنا كلنا باصين قدامنا زي محنا وسابينا تفضفض لأنها أكيد حاسة بالذنب، لكن من جوايا كنت سامحتها لأنها ضحت بحاجات غالية عليها لأجل أنها تنقذني وتصلح غلطتها.

مَكناش نعرف أن رعدة هتقوم تجري فجأة وتنط في النيل من الكورنيش قدام عيوننا في لحظة بدون ما واحدة فينا تلحق حتى تجري عليها .

رعدة انتحرت في النيل وسابتنا أربعة ..

ومن بعد حادثة رعدة بخمس شهور ويادوب بنفوق من كابوس فراقها .

نزلنا في مرة نشترى احتياجات الجامعة علشان نرجع من تاني للدراسة وحياتنا اللي لازم نرفع راس أهالينا فيها، سمعنا ليلي بتصرخ بأسمها في الشارع ويتقول "رعدة."

جرينا كلنا على صوتها لقيناها واقفة قدام مكتبة قديمة محطوط فيها عروسة نسخة من ملامح صحبتنا "رعدة."

**تت**

## خلف الستار

\_يعني الرجلين اللي مستخبية ورا الستارة دي مش رجلك؟

\_رجلي إزاي يسطا مانا واقف قدامك أهو؟!..!

ده كان الموقف اللي كلنا كنا هنموت وقلوبنا على وشك أنها تقف من كتر الخوف والرعب اللي شوفناه بعيونا.. ومش بس مجرد رجل غريبة واقفة ورا ستارة ده كمان أتحركت و.....

هحكيلكوا الموضوع بدأ معنا إزاي.. أنا إسمي رويدنا طالبة في كلية العلوم بجامعة القاهرة .

عايشة أنا وأخواتي التوأم اللي أكبر مني بأربع سنين لوحدنا وهما ( يزن وياسين ) بعد ما والدي ووالدتي اتوفوا في حادث إنقلاب سيارة من سنتين.

كل واحد من أخواتي هوياته مختلفة وحتى درجة النضج متغيرة رغم أنهم نفس العمر لكن كل واحد فيهم شكل وشخصية مختلفة ودايمًا في تناقض مستمر.

يزن شاب طائش ويحب يبحث ويجرب في أي مجال جديد لحد ما يزهدق ويجرب غيره وده سبب أنه فاشل في حياته العملية.

أما ياسين يختلف عنه تمامًا.. شاب طموح ومركز على هدف معين وشغال مبرمج في شركة بيرجع كل يوم بليل هلكان وبينام مبنحسش بوجوده غير يوم الاجازة .

الحكاية بدأت لما ابتديت ألاحظ أن يزن بيدخل اوضته كثير وبيقفل عليه الباب وبعدين يفضل يخبط جامد من جوه وأول ما أفتح عليه الاقيه قاعد ع الأرض وبيضحك.. وكالعادة كنت واخدة منه ع المقالب اللي زي دي.

لكن الموضوع كان بيتكرر لدرجة اني بطلت أفتح عليه الباب وبسيهه يخبط براحته وأدخل اوضتي اكمل مذاكرة أو أنام.

وفي يوم يزن دخل اوضته على الساعة سبعة وفضل حوالي ربع ساعة متتالية يخبط على الباب جامد لدرجة أنني قلقت وقتها بجد واتصلت على ياسين في الشغل قولتله قول لأخوك يبطل صداع أنا بجد زهقت من شغل العيال بتاعه ده، أنا مبقنش عارفة اذاكر بسببه.

رد ياسين كالعادة "حاضر لما أرجع هشوف الموضوع ده" لكن كان بيرجع ينام وبينسى كل حاجة.

وعلى الساعة 8 خرج يزن من اوضته وهو متبهدل و عرقان وكأنه كان بيتخانىق مع حد جوه..  
بصلي بنظرة خوف كده وفتح الباب ومشى بسرعة بدون أي كلام!..

أنا قلقت وحسيت اني مش مرتاحة لأفعاله فأتصلت على مجموعة من أصحابي البنات فيديو ماسنجر  
وقعدت احكيلهم اللي بيحصل من يزن وكلهم كانوا بيضحكوا من أفعاله الفوضوية وبيقولولي طايش  
ومعلش لحد ما فجأة لقيت اللي بتصرخ فيهم وكلهم متتحين ورايا في الشاشة!...

أنا مفهمتش مالهم وبقولهم " في أي مالكو ؟"

لقيت واحدة منهم بتقولي " هو انتي لوحدك في البيت؟" فقولتلها "ايوا ياسين في الشغل ويزن لسه  
نازل من شوية اومال أنا بكلمكوا ليه"

فردت واحدة غيرها وقالتلي "أومال مين اللي مشي من وراكي ده؟"

اتلفت ورايا بسرعة وانا مخضوضة لكن ملقتش حاجة.. رجعت زعقتلهم وقولتلهم " أي الهزار  
البايخ ده يجماعة أنا قاعدة لوحدتي بطلوا الحركات دي مش وقته"

لكن ملامح الصدمة اللي على وشوشهم متغيرتش وواحدة ردت وقالت "رودينا احنا مش بنهزر،  
والله في حد عدى من وراكي جسمه كبير وأسود وفتح الباب اللي وراكي ده ودخل وقفل الباب  
تاني"

بصيت ورايا مكنش في غير باب أوضة يزن.. لكن الباب مفتوح محدش قفله.. فرجعت قولتلهم  
عشان أتأكد "يعني انتوا دلوقتي شايفين الباب مفتوح ولا مقفول؟؟!"

فردوا كلهم وقالوا "مقفول"

بقيت ادعك في عيني واتأكد وابص على الباب.. لكن ده مفتوح قدامي؟! شكيت أنه مقلب وكلهم  
منفقين على نفس الكلام وقولتلهم طب خدولي اسكرين كده وحد بيعتهولي دلوقتي حالاً...

وكانت الصدمة لما جالي اسكرين فعلاً والباب فيه مقفول على عكس اللي شيفاه بعيني؟! !

قفلت معاهم بسرعة وانا قلبي هيتخلع من مكانه واتصلت بياسين استنجد بيه واقوله "ياسين ألقني..  
تعالى بسرعة"

وفتحت باب الشقة ووقفت قدامه أنتظر ياسين أو يزن أي حد يلحقني ..

بعد ربع ساعة لقيت ياسين وصل شافني واقفة قدام الباب خدني ودخلنا وهو قلقان وببسالني "في أي

يابنتي قاتنتيني.. واي اللي كان موقفك قدام الباب بالشكل ده انتي اتخانقتي مع يزن؟"

اعصابي كانت متوترة ورجلي بنتهز غصب عني وقولته على اللي حصل ووريته الاسكرين اللي صحابي بعتهولي من شوية..

حسيت على ملامحه الخوف بردو وفي نفس اللحظة خبط باب الشقة فجأة من خوفي صرخت ولقيت ياسين انتفض هو كمان...

قام فتح الباب بنفسه لقي يزن داخل وهو مستغرب من حالنا وبيقولنا "هو في أي؟ متحيين كده ليه"

ياسين حكاه كل اللي قولته توقعت أنه هيتصدم زينا فقعد يضحك ويقوله "يعم دي جبانة دي متصدقهاش هي واصحابها بتوع مقالب أصلا"

بس ياسين كان مصدقني وحذره وقاله "لو بتعمل اي حاجة يا يزن من التجارب الهيلة بتاعتك انت واصحابك دي أنا مش هسمحك تأذي أختك والبيت"

وخلص الموضوع على كده فتحت شاشة التلفزيون وقعدت أتفرج على كارتون يمكن أنسى شوية اللي حصل... وياسين دخل ياخذ دش ويزن قعد معايا اعتذرلي عن اللي حصل ودخل البلكونة يكلم صحابه في التلفزيون...

خرج يزن من البلكونة ودخل اوضته وبعد خمس دقائق سمعته بيقول بصوت عالي:

\_جدعان بلاش الهزار البايخ ده بقا... يا ست رودينا تعالي شوفي اخوكي العاقل بيعمل اي... أنا مفهمتش حصل اي ودخلته بسرعة الاوضة وانا مخضوضة.. لقيت يزن واقف على باب الاوضة وبيشاورلي ناحية الستارة وبيقولي:

\_اتفضلي اخوكي التافهه واقفلي ورا الستارة إزاي.. يعني هي ناقصة خضة وعفرتة بالله عليكوا.. ما رجلك باينة يا غبي...

اتصدمت من المنظر اللي شيفاه.. ياسين في الحمام وصوت الماية كان لسه شغال من شوية والمفروض أنه مخرجش...وبالفعل لقينا ياسين خارج من الحمام بيتنشف بالفوطة وجه وقف معنا وبيقولنا:

\_في أي تاني.. صوتكوا عالي ليه؟ ..

أنا ويزن بقينا نبص لبعض وبنترعش لحد ما يزن قاله:

\_يعني الرجلين اللي مستخبية ورا الستارة دي مش رجلك؟

بص ياسين من ورا الفوطة ناحية الستارة وشاف الرجلين اللي واقفة وراها ثابتة ورجع بص على رجليه وهو بيتأكد من نفسه وقاله:

\_رجلي إزاي يسطا مانا واقف قدامك أهو؟!..!

ثواني من الصمت مرت ما بينا واحنا بنبرق لبعض وكأننا مستنين حد فينا يعترف بالمقلب عشان نرتاح.

وفي لحظات الصمت دي الرجل اللي واقفنا ورا الستارة خدت خطوة تجاهنا خلت كل واحد فينا مبقاش عارف هو بيجري في اي إتجاه...

ياسين بدل ما يمسكني من أيدي ويهرب مسكني من شعري خلاني وقعت ويزن اتكعبل فيا وهو يحاول يهرب وبقينا عاملين زي السلاحف اللي بتهرب في الحديقة وبيتحركوا الخطوة بأعجوبة...

يزن سبقنا وهرب على البلكونه وكلنا جرينا وراه واحنا مش فاهمين ليه نستخبى في البلكونة لما كان ممكن نهرب من باب الشقة..

قفلنا على نفسنا باب البلكونة واحنا الثلاثة الرعب متملك منا ومش عارفين مين اللي كان في الاوضة ده ..

ياسين سأل يزن بعصية وقاله:

\_اللي بيحصل ده مش طبيعي.. شوية مع اختك وشوية كلنا نشوف واحد ورا الستارة وبقالك فترة بتدخل الاوضة واختك بتسمع اصوات وبتشتكي منك.. انت هببت اي بالظبط؟

حسيت أن يزن خاف يتكلم وقال:

\_معملتش حاجة.. أنا كنت بقل على نفسي عادي.

اترجيته وانا عيني على الباب وخايفة حد يدخل علينا وقولته:

\_بالله عليك يا يزن لو عملت مصيبة عرفنا.. ومحدث هيتشاكل معاك بس لازم نعرف اللي حصل عشان نحل المشكلة وميحصلناش كارثة اكر من اللي احنا فيها دي.

قعد ع الأرض وضم رجليه وهو بيقول بخوف:

\_ انا مكنش قصدي والله.. صحابي هما اللي أدوني الكتاب وقالولي هيساعدك.

ياسين كان هيغضب ويتشاكل معاه بس شاورتله يهدي أعصابه عشان نفهم منه وسألته:

\_ كتاب اي يا يزن؟ احكي متخافش.

بدأ يحكي ويقول بحزن وخوف من ياسين:

\_ من فترة واحد صاحبنا قالنا أنه قدر يسخر ملكة من الجن تساعد في حاجات يقدر يعملها بسهولة وتعمله قيمة وسط الناس ويخافوا منه.

وقالنا هو قدر يعمل ده إزاي وورانا الكتاب والتعاويذ اللي جواه وقال اللي عايز يجرب ده لازم يكون قلبه جامد وميخافش منهم عشان يتحكم فيهم ..

وانا حبيت أعمل زيه واجرب وخذت منه الكتاب كان معلملي فيه على صفح معينة اقراها كل يوم واتحمل عواقبها.

فكنت بدخل الاوضة اخلص الطقوس دي وأشوف حاجات بشعة بتحسلي واستحملها عشان التعويذة متقلبش عليا.. لحد ما شوفتها...

جسم يزن بقا يتهز وبيترعش بشكل ملحوظ.. قعدت جنبه اطبب عليه واقوله:

\_ هي مين دي اللي شوفتها يا يزن.. اتكلم متخافش  
رد وقاللي:

\_ واحدة ست بشعة.. ملفوفة بالقماش الأسود لحد راسها مش باين منها غير وشها اللي تقريباً محروق أو متقطع.. مقدرتش ابصلها كتير من بشاعتها وقالتي بصوت فحيح صعب:

\_ خادمتك بالانتظار.. مستعد للدفع؟!!

مكنتش عارف دفع أي اللي هي عايزاه مني وتلاشيت اني ابصلها من الخوف وقولتها:

\_ مستعد ...

كنت فاكرا أنها هتطلب مني أقول أي تعويذة من الكتاب زي ما صاحبي قالي لكن لقتها بتقولي طلب صعب اوي عليا ...

يزن وقف كلام وهو بيصلي ومتردد يكمل.. حسيت أن ليا دخل بالموضوع فياسين قاله باهتمام:

\_ طلبت منك أي؟ قول

قعد يترعش وهو بيكمل كلامه وبيقول:

\_ قالتلي عايزين روح أختك...

بس والله أنا عارضتها وكان مستحيل أفكر لحظة واحدة بأني أسمع كلامها وقولتها:

\_ دم وأرواح لأ مش هقدر.. وشكراً مش عايز اي خدمات منكوا..

وقفلت الكتاب عشان أخرج من الاوضة وأرجع الكتاب لصاحبي بس اتصدمت لما قالتلي بغضب وهي جاية ناحيتي:

\_ دخولك لعالمنا كان بأرادتك لكن خروجك بأرادتنا نحن يا ابن الإنس...

عافرت معاها وبقت تمنعني أخرج من الاوضة وخذت الكتاب مني وكانت الاوضة عبارة عن دوامة من الرياح بتشيل وتنسف كل حاجة قدامها.. لحد ما اتمكنت وخرجت بسرعة من الاوضة..

ونزلت لصاحبي حكيتله عن اللي حصل وقالني خلاص متقلقش هي هتاخذ منك الكتاب مش أكثر وده انتقامها ومش هتعملك حاجة.. بس مكنتش أعرف أن الأمور هتتصعد للدرجادي ولا كان قصدي كل ده يحصل..

خلص يزن كلامه وانا وياسين في صدمة.. مش عارفين نهون عليه ولا نخاف على نفسنا.. ومش معقول هفضل محبوسين في البلكونة كده طول اليوم وخايفين ندخل الشقة.

\_ هنعمل أي يا ياسين!؟

قولتها لياسين وأنا خايفة أكثر منهم بسبب أن الشيطانة دي طلبت روحي واكيد مستهدفاني دلوقتي..

مسح على وشه بأيده وهو بيقول:

\_ انا مش عارف أفكر.. حرام عليك يا يزن ليه عملت فينا كده؟ من امته واحنا لينا في السكك الحرام دي..

مكنش ده الوقت المناسب إننا نلوم بعض فيه .. كلنا متورطين ومحبوسين سوا ولازم حد فينا يتصرف ...

\_افتكرت حد ممكن يساعدنا...\_

فجأة قال ياسين الجملة دي بحماس فرديت وقولتله:

\_مين هو؟\_

رد وقالني:

\_واحد صاحبي.. هو الوحيد اللي ممكن يقولنا نعمل أي.. بس في أزمة!

رد يزن عليه بعد ما فرح أن ممكن الموضوع يتحل وقاله:

\_أزمة أي طيب؟\_

ياسين:

\_التليفون بتاعي في الصالة بره ..

احنا التلاتة بقينا نبص لبعض بنظرات بتقول "اكيد مش أنا اللي هطلع أجيب التليفون"

وبما أن ياسين جبان في الأمور دي رد وقال ليزن:

\_انت اللي عملت كل ده يبقى تستحمل وتخرج تجبيلي تليفوني عشان أتصل بالواد يلحقنا من المصيبة دي.

فيزن مقدرش يعارضه وفتح باب البلكونة بحذر وهو عمال يبص يمين وشمال بخوف.. وعمال يبصلنا ويوصينا كأنه رايح يموت بصوت واطي "لو حصلي حاجة تفوا على صاحبي بدالي.. واعمولي كولدير مائة ساعة على أول الشارع"

ورغم أن الموقف كان صعب علينا كلنا بس كنا بنضحك على منظره وهو شبه إسماعيل ياسين ماشي بيترعش وركبه بيخبطوا في بعض..

ياسين شاورله على مكان التليفون وفعلاً لقيه ويدوب جاي علينا خلاص قام ياسين حب يرعبه أكثر وقاله:

\_بتجري وراك بتجري وراك.

لقينا يزن بيتشقلب في السجادة وهو يبصرخ ويبسحف ناحيتنا وأحنا مقتولين م الضحك.

وفي وسط ما كانت اعصابنا ارتاحت شوية باب أوضة يزن اتقفل بصوت عالي كلنا اتصدمنا وسحبنا يزن بسرعة وقفلنا على نفسنا تاني.

خد ياسين التليفون وضرب على دماغه بأيده وهو بيقولنا "يلهوي ده فاصل شحن.. معلش يا يزن هاتلي الشا..."

ولسه هيكمل كلامه لقينا يزن بيطلع رجليه من البلكونة وعايز ينط.. ياسين فضل يضحك وقاله "خلاص يعم خلاص بهزر والله.. يعني تجبلنا العفارييت لحد هنا وتنقمص كمان"

أتصل ياسين على صاحبه وقاله:

\_معلش يا صاحبي أنا في مشكلة كبيرة لو ينفع تجيلي البيت دلوقتي تعالى ضروري.

مكننش أعرف هو بيكلم مين بالضبط لأنني معرفش اغلب علاقاته.. وانتظرنا حوالي نص ساعة لحد ما رن تليفون ياسين وصاحبه قاله "أنا تحت البيت اهو"

قام ياسين مشاورله من البلكونة وهو بيقوله "أطلع أطلع عايزك فوق"

فطلع صاحب ياسين وفضل يرن الجرس واحنا واقفين بنبص لبعض مين هيخرج ويفتحه؟

وطبعاً مكنش في ضحية قدامنا نرمي عليها الأسباب غير يزن.. فتح ياسين باب البلكونة وزق يزن جوه الشقة وقفل تاني علينا..

جري يزن على باب الشقة لأن مفيش مفر تاني قدامه وفتح لصاحب ياسين..

أول ما فتحه الباب الولد لسه ببسلم عليه طبيعي قام يزن مستخبي في ظهره وهو بيقوله "وصلني البلكونة وحيات ابوك"

الولد مكنش فاهم حاجة ومستعجب من تصرفات يزن وياسين واقف هلكان من الضحك وهو بيشاور لصاحبه وبيقوله "تعالى يا عمر أنا هنا"

دخل يزن وعمر معنا البلكونة وبدأ ياسين يعرفنا عليه:

\_ اقدملكم ده عمر الشيخ صاحبي من فترة قريبة ورغم أن شكله بيان عليه شاب عادي وكده بس أبن  
لذينا في حوارات الجن دي وبيعرف يسلك فيها.

رد صاحبه باحترام وقاله:

\_ الله يعزك يا ياسين والله أنا شخص بسيط وعلى قدي انتوا اللي مطلعين عليا اشاعات.. بس قولي  
خير اي اللي حابسكوا بالشكل ده؟!..!

فقعد ياسين يحكيه ويزن يقوله كل شيء حصل بالتفصيل والشباب بيسمعلمم بأهتمام وانا من جوايا  
بدعي ربنا أنه يقدر يخلصنا من الورطة دي ...

بعد ما خلصوا كلام قالهم عمر:

\_ بسيطة بإذن الله.. هو الموضوع كله في الكتاب واي كتاب زي ما فيه تعويذة في كمان طلاس لفك  
التعويذة دي.. يعني كل اللي مطلوب إننا ندخل دلوقتي الاوضة سوا نجيب الكتاب ونقول الطلاس  
والموضوع هينتهي بكل سهولة متقلقوش ..

\_ يا برودك يا جدع ..

قالها يزن واحنا كلنا مصدومين من أسلوبه لأنه أول مرة يشوف صاحب ياسين وكمل:

\_ هو اي اللي كل اللي مطلوب ندخل الاوضة سوا انت فاكرها ملاهي؟ بقولك في شيطانة وشكلها  
زي الزفت

فضحك عمر وقاله:

\_ طب انت عندك حل تاني؟

فكر يزن شوية وقاله:

\_ مش أنت شيخ وبتاع دجل؟ سلط الشيطان بتاعك يدخل يدبها علقه ولا ارميلك تعويدتين من اللي  
حافظهم كده واحنا هنتفرج عليك من هنا.

ياسين بقا بيكتم الضحك بالعافية وهو بيعتذر لعمر وبيقوله :

\_ معلش يابني أنا نسيت اصارك أن عندي أخ تعبان في دماغه... وكمل كلامه وهو بيوجه ليزن:

\_عمر مش بتاع دجل وشياطين ياعم متفضحناش عمر بس مر بحالات كتير وقلبه جامد عننا وعنده خبرة مش أكثر.

واحنا بنتكلم شوفت باب أوضة يزن اتفتح ببطء واتقفل جامد تاني.. فأتنفضت وانا بقولهم:

\_الباب... الباب اتفتح تاني ...

عمر بص وراه بسرعه وكلهم انتبهوا لكلامي وقالنا بقلق:

\_طب عموما لازم نتحرك دلوقتي وإلا هيستضعفونا والأجواء مش هتكون في صالحنا.. لازم احنا اللي نقربلهم ونبدأ ويعرفوا إننا مش خايفين منهم عشان ميفرضوش قوتهم ويسيطروا علينا ..

كلامه كان منطقي وياسين اتحمس واتكلم بجديّة مع يزن وقاله:

\_مفيش وقت للاعتراض والخوف.. كلنا هندخل مع عمر وهو هيتصرف.. يلا ...

ومكنش ينفع اقعد لوحدي في البلكونة فمسكت في ظهر يزن واتحركنا كلنا ورا عمر اللي وقف قدام باب أوضة يزن بصمود وهو بياشورلنا وبيأكد علينا محدش يصرخ ولا يخاف م اللي هيحصل...

اول ما عمر فتح باب الغرفة كان في رياح قوية باتجاهنا خلتنا كلنا نحط أيدينا على وشنا ومنشوفش حاجة.. وصوت عمر عالي كلنا سامعينه وهو بيقولنا "محدش يتحرك..متخافوش"

شوية والرياح بدأت تهدى وكلنا فتحنا عيوننا وبقينا نبص جوه الاوضة بحذر ..

يزن اتفاجئ بوجود الكتاب مرمي على السرير وقال بصوت عالي لعمر "عمر الكتاب هناك أهو.. هاته بسرعه"

دخل عمر لوحده الاوضة واحنا الثلاثة واقفين على الباب.. وفجأة الباب اتقفل في وشنا بقوة واتحبس عمر لوحده في الاوضة..

ياسين بقا يدبذب على الباب ويحاول يفتحه أو يكسره وهو في قمة غضبه على صاحبه اللي ممكن يضيع بسببه.. لكن للأسف مقدرش يعمل حاجة.

بقينا سامعين اصوات تكسير وصراخ جوه الاوضة ومش فاهمين عمر بيحصل فيه أي دلوقتي؟

لكن اللي متأكدين منه إننا كلنا روحنا في داهية وعمر لو خرج مش هيخرج سليم...

ياسين اشتبك مع يزن في مشكلة وزقه في صدره وهو في قمة غضبه وبيقوله "عجبك كده.. مبسوط

دلوقتي بطيشك وقر فك.. صاحبي بيموت جوه بسببك ومش عارف أنقذه"

يزن كان في صدمة وصمت ومش قادر يدافع عن نفسه لأن غلظه المرادي كبير.. كبير لدرجة أنه أدى كل اللي حواليه.

ووسط المشاحنات اللي بتحصل اتفتح باب الغرفة...

وقف على بابها عمر وهو ثابت مبيرمش حتى وفي أيده ماسك الكتاب.. كلنا خوفنا منه وتأكدنا أنه اتلبس ورجعنا مسكنا في بعض واحنا بنبعد عنه بخوف.

لحد ما فاجئنا وهو بيضحك وبيقول "بقا كده تسبوني مع الولية الحربوقة دي لوحدي يا اندال؟"

وقرب علينا واحنا مازلنا بنبعد عنه لحد ما قعد على كرسي وقالنا "لو محدش طلبلي وجبة دلوقتي بعد كل المعركة اللي شوقتها بسببكوا دي هقوم ارجعهالكوا"

ياسين قرب منه وهو بيلمس وشه وبيقوله "أنت عمر صح.. أحلف أنك مش عفريت يسطا أنا قلبي اتخلع عليك م الخوف"

طبطب على ضهره عمر وهو بيقوله "ياعم متخافش والله أنا بخير.. هي كانت عفية شوية بس البركة في اخوك بقا حضرلنا عفريته من المدبح"

يزن راح قعد جنبه وهو ببسأله بفضول "هي عملت فيك اي؟ وإزاي عرفت تاخذ الكتاب منها.. انت مخاوي ملكة وحراسة صح؟ طب اخاوي إزاي زيك"

أنا وياسين قولنا في نفس اللحظة "تانيبيبي يا يزن"

وبالنهاية طمنا عمر وقالنا أنه قدر يحصن نفسه بالإيات القراءانية اللي حافظها و مقدرتش تقربله ولا تقرب للكتاب وهو متحصن بكلام الله عز وجل كانت كل اللي بتعمله فقط بتغضب وتخوفه وتكسر في الأشياء اللي برده مقدرتش تمسه بضرر وقدر يقول التعويذة اللي تصرفها وتمنعها هي واعوانها من الظهور في البيت تاني.

عمر فعلاً شخص موهوب مش بس بحل المشاكل السفلية لا ده بقا اقرب أخ لينا كلنا واعتبرناه من يومها شخص من أهل البيت بنستشيره في مشاكلنا وقدر يبعد يزن عن صحاب السوء ويشغله معاه "عامل دليقري..."

ت م ت

## سيدة المشرحة

المشرحة ليها حكاوي كتير بتنتقال عنها مع الأموات، كنت فكراهم مجرد خرافات لحد ما شوفتها بعيني!....

أنا نورهان، طالبة في كلية طب وكان الدور عليا في تدريب المشرحة .  
معرفش ايه خلاني اختار التخصص ده وأنا قلبي بيقف لو شوفت فار قدامي.

من حُسن حظي أن دكتور العملي في المشرحة بيقى خالي، فكان بيدربني على أي مرحلة عشان متكسفش قدام صحابي لما أفضل، تقدرروا تقولوا كده واسطة.

أول يوم ليا في المشرحة طلب مني أدخل معاه اشوفه وهو بيخرج الجثث من التلاجة إزاي؟  
وبيتعامل إزاي مع الأطراف المبتورة لما يجي ينقلها من مكانها!..

كل ده كان بغرض أنه يكسر خوفي ورهيتي من الجثث ومن غرفة التلاجات عموماً.

كل مرة كان بيفتح فيها درج كان بيطلع منه جثة مرعبة اكتر من اللي قبلها. إلا الجثة دي.. مقدرتش أتحمل شكلها ولا أطمئن لظهورها..

كانت جثة محروقة بشكل بشع، لدرجة اني مقدرتش أحدد هي راجل ولا ست من كتر ماهي متفحمة. عبارة عن جلد أسود سايح في بعضه وكل اللي ظاهر من ملامحها عينها اللي مفتوحة على اخرها وجفنها محروق ومش موجود فوقها، تحس كده انها بتبصلك مش ميتة!.. على عكس باقي الجثث عيونهم كانت مقفولة عادي.

خالي لما شاف خوفي وعدني إننا كده كده مش هنتشغل عليها ومش ضروري أقرب منها، ولقيته طلع جثة تانية ملفوفة وحطها على السرير قدامي وقال دي سليمة، هنتشغل واعلمك عليها..

مر شوية وقت وكانت رهيتي اتكسرت إلى حد ما وخذت ع الاجواء، قعدت على كرسي اتفرج عليه من بعيد بس وأشوف هيعمل أي؟

بدأ يشيل من عليها الغطا وهو بيذكر الله وبيسبح بصوت مسموع .  
الجثة طلعت لراجل مقتول برصاصة في صدره وشكله عادي ميقلش.

قعد يشرحلي أماكن الفتح وبيبدأ الفحص إزاي قبل ما اشتغل في أي حالة، وضرورة الذكر لأنهم

بيحسوا بينا وبوجدنا معاهم.

وفجأة دخل مريض علينا الغرفة وهو بيندهله ومستعجل ويقول أن في حاجة ضرورية ومحتاجينه بره!...

قام مغطي الجثة بسرعة ورجع القماش الأبيض على وشه من تاني، وقال خليك هنا هشوف في اي بره وأرجعلك، ولو قدرتي تتمرني عليه حاولي لحد ما اجيلك.

فضلت قاعدة متتحة مكاني، أنا مرعوبة أصلا من فكرة وجودي لوحدي في أوضة كلها أموات وقدامي جثة بعد ما خالي مشي وسابني.

ذكرت ربنا في سري كثير وقولت أنا لازم اكسر خوفاي ده وأتلهي في اي حاجة أعملها بدل مانا قاعدة منتظرة حاجة تتحرك عشان أجري وخيالي عمال يرعيني اكثر.

قربت من الجثة اللي ع السرير لحد ما بقيت واقفة قدامها بالظبط ودي كانت شجاعة كبيرة اني اقربلها لوحدي. مبقتش حاسة ان فيا اعصاب تخليني أشيل الغطا من على وشه بنفسي.. بقيت أمد أيدي وارجعها تاني بسرعة، مع أن شكل الراجل مفيهوش اي حاجة تخوف .

اتشجعت وقولت أنا كده كده هتعلم ومسير عقدي تنفك، مديت أيدي وسحبت الغطا من على وشه بسرعة قبل ما ارجع ف كلامي تاني، لكن اتصدمت لما لقيته أتغير واللي قدامي هي الجثة المحروقة مش الراجل!..

ازاي؟؟ أنا متأكدة أنها كانت جثة راجل من شوية ومكنش محروق بالشكل ده.. اتسمرت مكاني وانا عمالة اقول الله اكبر بسم الله الرحمن الرحيم، ورجلي بتترعش من كتر الخوف .

كانت عيونها بارزة وطالعة من الجمجمة وكأنها بصالي بغضب، كنت هصرخ واطلع اجري لكن افكرت خالي لما قال لي أن الجثث بتحس بوجودنا..

قولت أرجع الغطا زي ما شديته من عليها وأخرج بهدوء وبعدين يغم عليا براحتي بره.. مديت أيدي وغطيت وشها تاني بهدوء، ولسه هاخذ أول خطوة واتحرك عشان أهرب، لقتها قامت قعدت ع السرير.. الجثة قامت وقعدت قدامي بجد! ولفت وشها ناحيتي وبصتلي، كأنها بتقول لي انتي خلاص قلقتي منامي ومنيش مخمودة تاني..

أنا وقتها بقيت متتحة وهي عينيها مبرقة كده كده وفضلنا مبرقين لبعض، مش مستوعبة ده بجد ولا فوتوشوب ومقلب من خالي .

رجعت بظهري في صمت وورايا ادراج التلاجات، وانا بقول جوايا يارب تنام تاني او تكون عامية

ولا حول ومش شيفاني، لا قدرة اهرب ولا قدرة يغم عليا حتى.

لزقت ضهري ف ادراج الميتين، ولقيت اللمبة بدأت تترعش وتفتح وتقفل زي أفلام الرعب، والجنّة قاعدة بصالي زي ماهي، كان هالين عليا افتح اي درج من الأدراج دي وأدفن نفسي جواه، لقيت درج منهم بيتفتح جنبي وحد بيخرج أيده وبيحركها ف الهوا...؟

ومن بعدها بدأت الإدراج كلها تتفتح وتتقفل بصوت عالي بنفس الطريقة ويخرجوا أيديهم ويحركوها قدامي كأنهم بيدوروا عليا عشان يمسوني وبنلعب استغماية..

كنت بحاول أبعد عنهم على قد ما اقدر عشان محدش يلمسني، وفجأة خرجت أيد من الباب اللي ورايا ومشوفتوش ومسكني من الباطو، هنا مقدرتش أسكت ولقيت نفسي قلعت الباطو وسبته وقولت أهرب من الكابوس ده بسرعه، لكن الجنّة مسابتنيش في حالي، لما لاحظت اني عايزة اهرب واروح ناحية الباب قامت وقفت ولقتها بتقرب ناحيتي، الخوف خلاني اقف مكاني كالعادة متحركش، ولقتها بتقولني جنب وداني وريحة الدخان ملياها، وصوتها بشع مبوح:-

كفايا رعب كده، يلا نرقص..!

أنا كنت فاكرة اني سمعت غلط وبهلوس من الصدمة، وفجأة لقيت كل الكفوف اللي كانت بتلوح ف الهوا من شوية بدأت تسقف جامد وتشجع الجنّة ع الرقص، وبدأت فعلاً ترقص وتتمايل...؟ اللي استنتجتة وقتها أنها كانت رقاصة واتحرقت ف الكبارية تقريباً..

لقيت الايد اللي سرقت مني الباطو من شوية بيحزمني ويزقني ناحية الجنّة تقريباً عشان اشاركها الرقص، قولت اجاري الموضوع يمكن بالشكل ده اقدر اهرب واخلص من العبط اللي بيعيشه دلوقتي ده.

فكيت الباطو من علي وسطي ووقفت ارقص واندمجت مع المحروقة وانتطط على خيبيتي واز غرط، زاد صوت التسقيف من الأموات وتقريباً يعني كده مبسوطين باللي بعمله معاهم .

ولقيت فجأة الباب بيتفتح وخالي واقف ووراه باقي شلة الجامعة، وبيز عقلي ويقول:-  
\_اي اللي بتهيبه ده؟ بترقصي وتغني في تلاجة الأموات؟ انتي اتجننتي؟

أنا اتصدمت لما بصيت لقيت نفسي لوحدي، ومفيش لا جنّة ولا أموات بيسقفوا؟ بصيت حواليا بخرج وانا هموت من منظري قدام صحابي اللي كاتمين ضحكهم، وقولتله:-

\_والله يا خالو الولية المحروقة دي خرجتلي وخلنتي ارقص معاها بالعافيه، صدقني أنا مكبدش .

وبصيت قدامي لقيت الجنّة متغطية زي مهّي، قولتله عشان تتأكد حتى بص ع الجنّة دي هتلاقيها المحروقة مش الرجل السليم .

جه ورفع الغطا وظهر الراجل الاولاني اللي كان بيدربني عليه! لكن أنا متأكدة كل اللي حصلي ده أنا شوفته مش مجرد خيال، ومش معقول وقت ما أتخيل حاجة رعب اقوم أرقص مع أموات! أنا خيالي متخلف آه بس مش للدرجادي.

طلبت منه اخر حاجة يمكن يصدقني، قولتله خرج الجثة المحروقة وهي هتقوم زي ما قامتلي من شوية وهتشوف بعينك.

قام مخرجها من التلاجة وحطها ع السرير قدامنا ووقفت اقولها قدامهم بكل غباء:-  
\_يلا مش هنرقص؟

قال يعني كده بحفزها واشجعها تقوم، لقيت كل صحابي واقعين ع الأرض من الضحك حتي خالي مقدرش يمسك نفسه وحط أيده على وشه وهو كاتم الضحك بالعافية وقالي ارواح ارتاح، لأن اعصابي شكلها تعبت النهاردة.

روحت البيت وانا بجد مخنوقة واعصابي تعبانة، لأن كلهم افتكروني مجنونة ومش هيبطلوا يجيبوا ف سيرتي ويتمروا عليا، خدت دش ودخلت اوضتي شغلت أغنية حزينة اواسي بيها نفسها، لقيت اللي بيخبط على كتفي وبيقولي:-

\_مش هنرقص؟

تمت

## الساكنة الجديدة

\_صوت الصريخ ده مش طبيعي، وبيتكرر تقريبًا كل يوم، أنا هنزل اشوف في أيه بظبط!!

مكنتش دي المرة الأولى اللي أسمع فيها أصوات غريبة لست بتصرخ وتتعذب جاية من عند الجيران اللي تحتينا واللي لسه ساكنين من حوالي أسبوع مش أكثر.

كان حالهم غريب لدرجة تلفت النظر. كل يوم نسمع صوت أحتفال بعيد ميلاد وناس كتير بتدخل العمارة، وآخر الليل يشتغل صوت الصريخ وكأن في حد بيتعذب وبيكسر في الشقة من كتر الوجع.

وهكذا بيتكرر نفس اليوم بنفس التفاصيل وتقريبًا نفس هدم المعازيم اللي بشوفهم من البلكونة .

أول مرة سمعت صوت أحتفال بعيد الميلاد حبيت أنزل واعمل الواجب واستغلّيت أنها فرصة اتعرف بيها على جيران جداد .

أول ما نزلت كان الباب مفتوح وعاملين ديكور بلالين حمرا وكراسي كتير بطول الصالة وناس كتير قاعدين بياكلوا حلويات وبيضحكوا.

وقفت ع الباب محرّجة أدخل لأنني معرفش حد منهم، لحد ما جتلي ست أربعينية كده لابسة فستان أسود شيك وبشعرها. من الواضح أنها مسيحية تقريبًا، كانت ست جميلة جدًا رحبت بيا بعد مقولتها:-

\_كل سنة وانتي طيبة، أنا سهيلة جارتك اللي فوقكي على طول، سمعت صوت الإحتفال حبيت اتعرف عليك في مناسبة سعيدة زي دي.

\_وانتي طيبة يا حببتي اشكرك على زوقك، أنا مدام رنا وبما انك جيتي ببقى مينفعش متحضرش عيد ميلادي وتاكلي حاجة حلوة.

والحقيقة أنا ست فضولية وكنت عايزة أدخل من البداية ويمكن ده اكثر عيب بيوقعني دايمًا في مشاكل غريبة مع الجيران، لكن اللي حصل في العيد ميلاد ده كان اغرب حاجة أنا شوفتها.

يومها دخلت ومام رنا اهتمت بوجودي جدًا وجابتلي قطعة من التورتة وسابت كل حبايبها وقعدت جنبي ندردش ونتعرف على بعض .

عرفت أنها عايشة لوحدها ومنفصلة عن جوزها من مدة طويلة وحتى عيالها مش عايشين معاها واختاروا يكونوا مع والدهم عشان هي ست متفتحة وبتحب الخروج والسهر والحرية .

والحقيقة كانت ست مُدهشة وطريقة كلامها بنت ناس جداً خلّنتي مبهورة بيها. اللي يشوفها يفتكرها لسه متجوزتش من كتر جمالها.

وفي وسط مانا مركزة مع كلامها وقعت حتة تورتة من الشوكة على هدومي، فشاورتلي على الحمام عشان ادخل أنصف اللي وقع عليا .

دخلت قفلت عليا وبقيت ابص لنفسي في المراية واقول يخسارة شبابك اللي راح وسط عيالك يا سهيلة، رغم اني اصغر من مدام رنا لكن شكلي مش حلو ونضيف زيها، لقيت قدامي على مراية الحمام روج وشوية برفانات ومقص.

الحقيقة مقدرتش امسك نفسي وخذت رشتين كده عشان احس اني ست زيها وخلص، ولسه هخرج لقيت مدام رنا بتخبطني على باب الحمام جامد اوي، لدرجة اني فكرتها شافنتي في كاميرا ولا حاجة.

فتحت الباب وانا مخضوضة، لقيت شعرها منكوش وبتقولي بزعيق "أطلي بره دلوقتي حالاً "

أنا مش فاهمة أنا عملت أي، وليه اتحولت كده رغم أنها كانت زوق جداً معايا، وانا خارجة لقيت البيت كله فاضي والاطباق مرمية على الأرض إلا راجل واحد بس واقف بظهره مقدرتش اشوف وشه.

أنا اتصدمت وقولت اكيد حصل حاجة مش طبيعيه! يمكن ده طليقها وحصلت مشكلة بينهم قدام الناس؟ لكن أنا بردو مخدنتش وقت في الحمام للدرجادي عشان يحصل كل ده ويفوتني!؟

طلعت اجري على شفتي ومقولتش لجوزي حاجة علشان ميز عقليش لو عرف أنني طالعة مطرودة من الجارة الجديدة لانه دايمًا بيحذرني وبيقولي "بلاش جيران يا سهيلة"

وفي نفس الليلة سمعت مدام رنا بتصرخ بصوت بشع خلّاني مش عارفة أنام، وفي صوت تكسير بيحصل حواليتها .

وقتها قولت أكيد هي متعصبة من المشكلة اللي حصلت قدام ضيوفها وعيد ميلادها اللي باظ لسبب أنا لسه معروفش، لكن أكيد هعرفه.

كنت فاكرة أن كل دي أمور عادية لحد ما لقيت تاني يوم العيد ميلاد بيتكرر من تاني!؟ ولما تعمدت انزل ابص من السلم عليها، لقيتها واقفة بتستقبل ضيوفها على الباب بنفس الفستان

ونفس الشعر وكل حاجة .

لكن المرادي لما لقتني واقفة مستخبية وببص عليها من سور السلم، بصتلي نظرة غريبة! كاني كنت السبب امبارح في اللي حصلها.

حسيت بغموض كبير ناحيتها خصوصًا أن يوميا بيتكرر العيد ميلاد وتيجي بليل تفضل تصرخ.

كل ليلة اقول لجوزي أن مدام رنا بتصرخ وفي حاجة مش طبيعية بتحصل في الشقة دي يقولي أنه مش سامع حاجة واني أنا بس اللي بركز مع الجيران بزيادة.

استغليت في يوم أنه أتصل بيا وقال إنه هيطبق في الشغل ومش جاي، وفضلت أراقب حفلة العيد ميلاد من البلكونة وانتظرت أشوف المعازيم هيروحو من عندها الساعة كام.

لكن ملقتش حد خرج نهائي، اللي بيدخل مبيطلعش تاني، أتأكدت أن في حاجة مش طبيعية بتحصل وأن الست دي وراها لغز كبير.

الساعة جت 12 وصوت الصريخ اشتغل من تاني، قررت اني أنزل وأشوف هي ليه بتعمل كده؟

لما نزلت لقيت بردو باب الشقة مفتوح؟ والشقة ضلمة، وقفت ع الباب أخبط واندهلها وانا خايفة "مدام رنا، مدام رنا انتي كويسة؟ أنا سهيلة جارتك"

لكن مكنش في رد، كل اللي سمعاه صوت من بعيد وهي بتعيط وتصرخ، اتشجعت وقولت أنا لازم ادخل اطمن عليها وأعرف يمكن مريضة ومحتاجة مني مساعدة. دخلت الصالة وتابعت الصوت ومشيت وراه، وانا كل خوفي لتطردني وتتعصب عليا من تاني. كان واضح ان الصوت جاي من عند الحمام !

خبط عليها عشان مفتحش الباب مرة واحدة بدون علمها، وفضلت اعلي صوتي واقولها "يا مدام رنا انتي كويسة؟ مينفعش تعيطي في الحمام كده تتلبسي"

ومفيش فايده صوت العياط مستمر مبيقفش، اضطريت اني افتح عليها الباب، والدم وقف في عروقي من هول المنظر اللي شوفته !..

مدام رنا قاعدة في البانيو وهو مليان، وعمالة تقطع في وشها وتغرز ضوافرها فيه وهي بتعيط وتصرخ والبانيو كله سايح دم حواليتها، وعينيها بيضا بتنور زي القطط!

أنا مقدرتش أتحمل المنظر وطلعت أجري وأنا كل شوية أقع من خوفي ورجلي مش شيلاني، وقولت اكيد الست دي شيطانة.

طلعت البيت قفالت على نفسي كويس ودخلت نمت جنب عيالي وانا بترعش من اللي شوفته، وطبعاً مش هقدر أقول واحكي لجوزي اللي حصل واني نزلت من وراه وهو مش موجود.

فضلت قاعدة مرعوبة في بيتي لحد ثاني يوم الساعة 8 لقيت الباب بيخبط!...

فتحت لقيت جوزي رجع وفي أيده طبق حلويات وبيقولي " مدام رنا الساكنة الجديدة عزماني على حفلة عيد ميلادها وبتقولك انزلي شرفيها"  
أنا جسمي انتفض، وكنت فاكرة اني لما شوفتها على هيئتها وهي شيطانة أنها هتخفي ومش هتظهر ثاني، لكن دي ظهرت المرادي لجوزي وكمان عايزاني أنزل!؟!

حاولت اداري خوفي وقولته " لا لا مش هقدر، أنا اصلاً قررت اقطع علاقتي بالجيران كلها"

لقيته مصمم وبيقولي "لأ لازم تنزلي عيب، أنا وعدتها إنك نازلة متصغريش شكلي قدام الناس ميصحش"

مقدرتش اعانده عشان ميشكش في حاجة، ولبست ونزلت وانا بستعيز من الشيطان وبردد أية الكرسي.

كان الوضع طبيعي زي ما شوفته أول مرة، وقفت قدام الباب لحد ما خرجتلي مدام رنا وهي بتتكلم كأنها أول مرة تشوفني وبتقوللي:-

\_ انتي مدام سهيلة مرات استاذ حاتم مش كده؟ أنا بجد سعيدة انك قبلتي دعوتي، اتفضلي اتفضلي.

أنا استعجبت جداً.. هي إزاي مش فكراني؟ وإزاي بتتعرف عليا من جديد وكأن كل اللي حصل ده مجرد أوهام.

دخلت وقعدت جنبي من ثاني تدرش معايا وهي بترحب بيا وبتحكي لي نفس التفاصيل اللي قالتها، لكن المرادي أنا تعمدت أعرف منها تفاصيل اكثر عن جوزها وعن عنوانه وكانت متجوزة فين بظبط قبل ما تنفصل يمكن اقدر أوصل وافهم حاجة .

عرفت أن طليقها ساكن في الحي اللي جنبنا مش بعيد اسمه استاذ حسين وشغال في نقطة قسم الحي وأن سبب انفصالهم أنه بيغير عليها بشكل مفرط بسبب جمالها واهتمامها بنفسها وصحابها الكثير اللي بتخرج معاهم وكمان حرمها من عيالها.

محببتش اقضي وقت أطول من كده قبل ما تتحول عليا من ثاني وتقلب عفرينة واستأذنت أطلع رغم أنها كانت مصممة اقعد معاها وقت أطول من كده.

وخذت بعضي ثاني يوم الصبح وروحت على عنوان جوزها أسأل عليه لحد ما عرفت بيته  
ومعرفش ليه نظرات الناس كانت مستغربة وأنا بسأل عن أستاذ حسين بالشكل ده!؟

طلعت العمارة وخبطت على شقته، لحد ما فتحت واحدة ست كبيرة في السن بعكاز قولتلها "السلام  
عليكم يا حجة، استاذ حسين موجود؟"

لقيت الست مستغربة اوي وبتقولي "عايزاه في اي؟"

قولتلها أمر شخصي ضروري وياريت لو تندهولي عشان معنديش وقت قبل ما جوزي يرجع من  
الشغل .

استقبلتني وقالتلي ادخل نتكلم جوه، دخلت وقعدنا لقتها جيالي صورة عليها شريط حداد وبتقولي  
"اهو ده حسين إبني، انتي عايزاه في اي بقا؟"

أنا اتصدمت، يعني اصلا حسين ميت هو كمان؟ أنا كنت شكيت أنه هو اللي قتل مراته وكنت جاية  
عشان اكشفه على حقيقته، لكن دلوقتي مبقتش عارفة اقول أي لوالدته اللي قاعدة قدامي !

دردشت معاه وقولتلها أنه كان زميل ليا في العمل وحاولت استدرجها عشان اعرف مات ازاي  
واتصدمت لما قالتلي " بعد ما طلق مراته بفترة، راح يصلحها يوم عيد ميلادها لقوه مقتول في  
شقته معاه، منها لله كانت ست مش كويسة ضيعته وضيعت نفسها ومش بعيد تكون قتلته عشان  
تاخذ حريتها وتمشي على حل شعرها"

دماغي وقفت ومبقتش فاهمة حاجة، يعني هما الاتنين ماتوا مقتولين؟ طب مين اللي قتل الثاني؟ وليه  
حصل ده وهما منفصلين كمان.

واحنا قاعدين خرج طفل حوالي عشر سنين، عيونه مدمعة من الواضح أنه كان واقف بيسمعنا من  
بعيد وقالها "متقوليش كده يا تيتا، ماما ماتت معاه، ومحدث يعرف مين اللي قتلهم"

فهمت أن الولد ده يبقى ابن مدام رنا، ولقيت الست الكبيرة زعقلته وقالتله "خش اوضتك اي طلحك،  
طالع زي امك عنيد ومحدث بيسلم من لسانك" وعلى قد ما الولد صعب عليا لكن قدرت بردو حزن  
الست الكبيرة على أبنها، خصوصا أن نص كلامها صح وأن مدام رنا باين عليها ست متفتحة  
وحياتها غامضة.

خلصت قعدتي معاه ورجعت بيتي وقررت إنني مش هنزل الشقة دي ثاني نهائي مهما حصل،  
وكفايا اللي شوفته وعرفته لحد دلوقتي.

جوزي رجع من الشغل ولقيته بيكرر نفس الموضوع.. معاه طبق حلويات وبيقولي " مدام رنا الساكنة الجديدة عزماني على حفلة عيد ميلادها وبتقولك انزلي شرفيها"؟؟!

حتى جوزي بيعيد نفس المشهد وهو مش فاكرا أنه ااتكرر، ومصمم اني انزلها وكان في حاجة ضروري لازم اشوفها عشان أخلص وارتاح م اللي بيحصل ده كله.

خدت بعضي ونزلت وأنا المرادي عارفة أني هشوف حاجات لأول مرة هشوفها في حياتي ومن الضروري اني اشوفها عشان هي ترتاح وتنساني.

فضلت قاعدة وهي جنبي بتحكي لي على جوزها وعلى طلاقها وقد اي هو كان بيحبها وبتحبه بس غيرته كانت السبب في طلاقهم وقد اي وحشها عيالها المحرومة منهم .

فضلت مكملة عشان أشوف اي اللي هيحصل لما جوزها يجي وفعلا بعد أقل من ساعة لقيت نفس الرجل اللي شوفت صورته عند الست الكبيرة دخل من الباب ومدام رنا وشها اتقلب اول ما شافتها وسابنتي وراحت ووقت معاه.

كان باين عليه أنه بيلومها وبيحاول يصلحها وهي رافضة، لحد ما صوتها بدأ يعلى وهي بتقوله "أطلع بره بقولك"

المعازيم بدأوا ياخدوا بالهم وكله بقا بيتفرج عليهم، وفجأة استاذ حسين اتعصب وبقا يزيق فيهم ويقولهم " دول اللي يطلعوا بره، دول اللي خربوا حياتنا والمفروض هما اللي يطلعوا مش أنا" كل المعازيم طلعت تجري واطردوا إلا أنا، فضلت واقفه مكاني وكأنهم مش شايفني ولا واخدين بالهم من وجودي.

حسين قفل الباب ومسك مدام رنا من شعرها وهو بيقولها "خلاص غرورك عماكي ومبقتيش شايفة غير نفسك وبس، لكن لو المرادي هسيبك مش هسيبك سليمة وفرحانة بنفسك من تاني"

وخدها من شعرها وهي عمالة تصرخ وتحاول تفك نفسها منه بصعوبة، ودخل الحمام. أنا دخلت وراهم بعد ما أتأكدت انهم مش شايفني وان اللي بيحصل قدامي ده مجرد مشهد من حادثة قديمة.

لقيته مسك مقص من على الحوض وقام فاتحه وبقا يشوه في وشها وهي تصرخ وتنزف بين ايديه، لحد ما عافت وزقته ع البانيو وقع جواه ووقع منه المقص في الأرض قامت مسكاه هي وقعدت تغز فيه بهيسترية ووشها بينقط دم من كتر الجروح، ودخلت قعدت جنبه شغلت الماية وبدأت تعيط وهي بتشد جلد وشها المتقطع وبتتحول لنفس الهيئة اللي شوفتها فيها أول مرة.

أنا دلوقتي عرفت أن مدام رنا مظلومة ومش هي القاتلة زي ما قالت الست الكبيرة، وعرفت ليه اختارتني مدام رنا اني اشهد على حادثتهم لأنني ست فضولية بطبعي ومحتاجة مني اوصل الحقيقة لعيالها، اللي بتقول عكسها جدتهم.

بشاعة المنظر خلّنتي لأول مرة أفقد الوعي ومفوقش غير في البيت وجوزي جنبي مرعوب عليا، سألته أي اللي حصل قالي أن الجيران لقوني فاقدة الوعي ع السلم وطلعوني هنا .

قولته "أنا كنت في العيد ميلاد، عند مدام رنا الساكنة الجديدة و"..

قالي "حبّتي الساكنة الجديدة إسمها مدام ريم، مفيش حد إسمه رنا هنا وهي اللي طلعتك بنفسها مع الجيران كتر خيرها وقالت لما نطمّن عليكي، هتعزمك على عيد ميلادها قريب وتتعرف عليكي"

**تـمـت**

## بيت الرعب

بيت الرعب ده مستحيل أدخله، ده بيحصل جواه كوارث أنتوا بتهزروا؟

ده كان رأيي لما صحابي صمموا أننا نغامر وندخل بيت الرعب سواء، وكانوا مصممين جداً لأن صاحب الملاهي قال أننا نقدر نكتشف حقايق جوه خاصة بحياتنا الشخصية مش مجرد لعبة عادية !

كان راجل مُريب والمكان كله أصلاً مش طبيعي. التراب اللي على الألعاب وصوت الصرير اللي بيطلع من كل لعبة بيدل أن المكان ده مشغلش من سنين طويلة.

نسيت اعرفكوا بنفسي.. أنا أمل من القاهرة 27 سنة . مبعملش حاجة في حياتي غير أني بمشي ورا أفكار صحابي الجنونية على الرغم من أني أكثر واحدة فيهم جبانة وبتترعب من خيالها، إلا إني كنت بحب اغامر واعمل زيهم.

إحنا خمسة صحاب (زينب وكريم وأحمد وأيمن وأنا) نعرف بعض من أيام الجامعة، وكانت علاقتنا قريبة أوي ومقابلتنا شبه يومية .

كريم بيحب زينب بشكل جنوني من أيام الدراسة، لكن هي مقدرتش تشوفه غير أخ ليها ورفضته، وبعد مدة كبيرة اتخطبت لأيمن صاحب كريم المقرب.

إحنا وقتها افكرنا أن علاقتنا هنتفكك بسبب خطوبة زينب لأيمن وكريم خلاص هيبعد عننا، خصوصاً أن كلنا كنا شايفين أن أيمن مناسب ليها أكثر وشجعناها أنها تاخذ الخطوة .

لكن كريم كان أعقل منا وقال إن حُبه ليها كان مجرد وهم ومراقة قديمة وانتهت. مقدرتش اصدق مشاعره بسهولة وطول الوقت كنت بحس في عينه نظرات قلق وتوتر لما بيشوف زينب ويحاول يخفيها.

كريم وأيمن كانوا صحاب مقربين جداً بحكم جيران ويعرفوا بعض من قبل الجامعة، واعتقدنا أن يمكن الحدث ده هيمر لأجل صحوبيتهم القوية، لكن مش ده اللي حصل.

في يوم قالنا أيمن أن في كافيهِ معزول في مكان زراعي على طريق الشرقية فتح جديد والناس بتروح هناك عشان تستجم وتريح أعصابها وسط جو ريفي بعيد عن التكدسات والزحمة.

كانت فكرة جديدة وحلوة وكلنا عندنا مشاكل ومحتاجين لحاجة زي دي فعلاً نصفي فيها أفكارنا.

أيمن أتصل بيا وقال أكلم باقي الشلة وأشوف رأيهم، ولما كلمت أحمد أعتذر وقال إنه مسافر ومش هيقدر يجي معانا، لكن الباقي وافق على طول وقررنا نطلع إحنا الأربعة.

خدنا أيمن ثاني يوم في عربيته كنت راكية أنا وكريم ورا وهو وزينب قدام وفي قمة سعادتنا أن أخيراً حددنا يوم وخرجنا.

وصلنا المكان على اللوكيشن وبالفعل كان مكان مختلف ومبهر، و دي أول تجربة ليا وسط مكان ريفي بسيط بالشكل ده.

يومها حبيت اتمشى وسط الأراضي واستكشفت المكان من فضولي وكريم جه معايا حرجاً أنه ميقعدش مع أثنين مخطوبين لوحده يعني ويسيبهم شوية لوحدهم.

أنا فضولي خدني واستغليت أنها فرصة إننا لوحدها وقولت اخليه يفضفض شوية باللي جواه وسألته "لسه في مشاعر جواك تجاه زينب؟"

لقيته ارتبك كده وعينه بتهرب مني في كل مكان وهو بيقولي "إطلاقاً" كانت الإجابة في عينه قبل ما يرد.

فقولته "طب وليه كل ما بتشوفها بحسك متوتر وقلقان من حاجة"

جاوبني بجملة عجيبة اوي "خايف عليها منه"! كان يقصد ايمن بكلامه مع أي مش شايفة أن شخصية أيمن فيها اي حاجة تخوف بالعكس، شخص عاقل ومتحكم في انفعالاته وأغلب وقته مبتسم .

فطمنته أنها أكيد مرتاحة وبتحبه وأنا كلنا جنبها مش هنسيبها.

خلصنا قعدتنا وجه الليل علينا وأيمن قال يروحنا من طريق مختصر عشان نروح بشكل أسرع، وفي الطريق وكلنا سرحانيين في الشبايبك وساكتين تماماً العربية عطلت فجأة.

نزل أيمن فتح العربية وعرف أن البنزين خلص منه ومكنش عامل حسابه في بنزين احتياطي .

وقفنا نبص على أي عربية تمر تساعدنا لكن الطريق كان فاضي تماماً وهادي جداً بشكل مُريب. حتى شبكات التليفون كانت واقعة معانا كلنا.

لحد ما كريم قال "طب أنا هروح أدور بنفسي على مكان قريب يمكن ألاقى بنزينة أو حد اسأله وخليك انت يا أيمن معاهم هنا"

وانا فكرت أنني أحاول أشوف شبكة واطلب اوبر ياخدنا أو أي حد من معارفي وقتلهم "طب أنا هتمشى هناك كده يمكن ألاقى شبكة واعمل مكالمة"

مشيت في إتجاه كله أشجار كثير بحاول ألقط اي شبكة على الخط.. وقبل ما أبعد مسافة سمعت أيمن بيندهلي... فرجعت بسرعة فكرته لقي بنزين في العربية والمشكلة اتحلت.. أول ما وصلتلهم لقبته بيقولنا "بصوا هناك كده؟ مش اللي باينة من هناك دي ملاهي بردو؟"

ردت زينب بقلق وقالت "أي اللي يفتح ملاهي في مكان مقطوع وفاضي زي ده"

وبما أننا معندناش حل تاني قررنا نروح نبص عليها يمكن نلاقي حد يساعدنا بدل ما كل واحد يدور في طريق مختلف ويحصلنا حاجة.

دخلنا احنا الأربعة من البوابة الحديد الكبيرة اللي كانت مقفولة من غير أي اقفال وأي حد يقدر يزق الباب ويدخل بسهولة عادي.

كان المكان ضلمة ومفیش أي حاجة تدل أن في حد موجود هنا، أيمن فضل يعلي صوته وينده وهو بيقول "في حد هنا يساعدنا؟ يخوانا ياللي هنا.."

لحد ما سمعنا صوت صرير لأوضة بتنتفتح وخرج وقف قدامها شخص قزم طوله حوالي أقل من متر.

كلنا اتخضينا شوية من هيئته وخروجه المفاجئ من كشك خشب مضلم زي باقي المكان. جه علينا وقالنا "أنتوا مين؟.."

رد كريم عليه وقاله "العربية بتاعتنا عطلت بينا قدامك هنا، تقدر تساعدنا ببزين أو تدلنا على أقرب مكان نشترى منه؟"

وقف القزم يفكر شوية وبعدين قالنا "تعالوا ورايا"

مشينا وراه وأنا مكلبشة في أيد زينب ومرعوبة من المكان وبتلفت حواليا كل ثانية. وكريم وأيمن قدامنا بيتريقوا على خوفنا.

وقف القزم عند خزان كبير ومسك چرکن صغير وقالنا " ده هيكفيكوا للخروج"

بس الخزان كان بطئ جداً وبينزل بنزين بالعافية، فضلنا واقفين جنبه نتلفت على المكان، لحد ما سأله أيمن السؤال اللي كلنا عايزين نعرفه "أنت اي مقعدك في مكان مهجور زي ده لوحدك كده يا حاج؟"

ساب القزم الجيركن من أيده ودخل جوه الكشك الخشب فتح الأنوار كلها، فظهر المكان من حوالينا أكثر.

عبارة عن ملاهي كبيرة مليانة ألعاب وكلها أضواء ملونة، من الواضح أنها كانت ملاهي معروفة واتفقت من مدة.

زينب اتحمست وقالت إن نفسها تجرب لعبة فيهم قبل ما نمشي، وأنا كمان حبيت الفكرة لأنني بحب الملاهي واستغلينا الفرصة وطلبنا منه يشغل لعبة العربيات بعدين جربنا لعبة الطبق الطائر وكنا في غاية السعادة.

وأحنا بنتمشى جوه والقزم ماشي قدامنا بيعرفنا على الألعاب وبيعرضها علينا، وقفنا قدام بيت الرعب!..

أتحمس أيمن وطلب من زينب أنهم يجربوها سوا لكن القزم وقتها قالنا حاجة غريبة أوي "ده مش مجرد بيت رعب، ده بيعكس حقايق شخصيتكوا"

أنا وقتها اعترضت لأنني بخاف من الحاجات دي وقولتلهم "بيت الرعب ده مستحيل أدخله، ده بيحصل جواه كوارث أنتوا بتهزروا؟"

لكن كلام القزم عن الحقايق شجع كريم معاهم وصمموا أنهم يدخلوا ويجربوها. مقدرتش أقف لوحدي بره مع القزم اللي بوقه مبتسم بدون سبب من اول ما دخلنا بشكل مستفز. وقررت أدخل معاهم أهون ما أقف معاه لوحدي.

قبل ما ندخل حذرنا القزم بكلام أغرب وقال "احفظوا شكل بعض كويس واعدادكوا.. يمكن تخرجوا من جوه ناقصين" وضحك ضحكة غريبة أوي من قوتها اترددت في المكان لكن اعتبرناه بيعمل أجواء مرعبة مش أكثر عشان نخاف أكثر قبل ما نبدأ. وخذ مننا التليفونات عشان ممنوع حد يفتح كشاف ويبوظ أجواء اللعبة .

أول ما دخلنا كان ممر طويل والحيطان بتاعته متغلفة بالقماش الأسود اللي عليه رسومات مُخيفة باللون الأحمر وريحة دم فايحة بالمكان!.. ؟ .

خلصنا الممر وظهرلنا خمس ممرات تانية مصفوفين جنب بعض... مسكت في أيد زينب وقولتلها "زينب بالله عليك يلا نرجع كفايا كده، ريحة الدم هنا بشعة والمكان مش مريح"

لكن أيمن خد زينب من أيدها وقالنا "أنا هاخذ زينب واخش الممر ده شوفوا انتوا هتروحوا فين ولا هترجعوا زي العيال الصغيرة"

كان بيص لكريم في اخر كلمة عشان يقلل منه فكريم قاله "لا مش هنرجع يا أيمن متقلتش ومينفعش تاخذ زينب في ممر ضلمة زي ده لوحدا.. أظن أنك متقلهاش على أختك ولا اي؟"

حسيت أن الموضوع بدأ يقلب على خناقة وعركة بينهم فهديت الأمور وقولتلهم "خلاص يا جماعة  
أحنا داخلين نلعب مش نتشاكل.. يا ندخل ممر واحد سوا يا كل واحد يدخل ممر لوحده ونجرب  
والاحسن إننا نطلع كلنا عيال ونرجع ومنلعيش اللعبة الملعونة دي"

فوافقوا إن كل واحد فينا يدخل ممر لوحده ويمكن نتقابل في نهايته زي ما اعتقدنا.. لكن اللي شوفناه  
كان أكبر من توقعنا كلنا"

مشيت لوحدي وانا بترعش في ممر ضيق كله ضلمة بتسند على حيطانه وخايفة يكون في حاجة في  
الأرض أدوس عليها بدون ما أشوفها.

كان ممر طويل اكبر من اللي دخلناه كلنا في البداية.. فضلت ماشية لحد ما ظهرلي ضوء من بعيد  
وده ببيل أنني قربت أخلص الممر واخلص من الرعب اللي حطيت نفسي فيه مع شوية متهورين.

وصلت لنهاية الممر واتصدمت لما لقيت في نهايته حاجز زجاجي شفاف بيص على الملاهي اللي  
شوفناها بره. لكن مكنتش عارفة أفتح الباب وده معناه اني معنديش حل ثاني غير أنني أرجع ثاني  
كل الممر ده زي ما جيت.

حاولت أتحسس الباب يمكن الأقي أي حاجة تفتحولي وأخرج أسرع ما أرجع كل ده.. واتصدمت  
لما لقيت قدامي على الجانب الثاني من الحاجز نسخة مني بنفس تفاصيلي وشكلي وبتعمل نفس  
حركاتي...!؟

بصتلها بصدمة وجسمي كله بيتنفض.. وقفت قدامي وهي بتميل راسها على جنب وبتبتسملي  
بأبتسامة باردة كلها شر.

كنت هلف واجري عشان أهرب منها لكن اتصدمت لما لقيت كريم رايع للمسح دي في الناحية  
الثانية وبيقولها "يلا يا أمل عشان نلعب؟؟"  
انا سمعاهم وشيفاهم وواقفة قدامهم لكن كريم مش شايفني!؟ بقيت أصرخ بأعلى صوتي واقوله  
"كريم أنا هنا.. كريم دي مش أنا دي مسخ وشيطان يا كريم"

لكن محدش كان سامعني.. خدت المسخ كريم ومشيت قدامي وهي بتلف وشها وبتبصلي بشماتة  
كأنها بتقولني "أنتي اللي مسخ محدش هنا هيصدقك" وظهر وراهم زينب وأيمن كمان.. وكان دوري  
هنا مجرد متفرجة أو شاهد على اللي هيحصل.

مكنتش عندي أي خيارات غير أنني أقف واتفرج على اللي هيحصل بصمت واطمن على صحابي  
وأشوف المسخ دي هتعمل فيهم أي وهي مُنتحلة شخصيتي .

وقفوا هما الأربعة عند الطبق الطاير اللي ركبناها من شوية وقالت زينب بصوت أنا سمعاه بوضوح رغم أنهم بعيد عني بمسافة " أنا هركب مع أمل لوحدنا وأنت يا أيمن خد كريم واركب معاه "

بقيت اشاور من ورا الأزاز واقولها "بلاش يا زينب.. بلاش دي مش أنا ارجوكي بصي وراكي أنا هناك "

وكنت عارفة أن من المستحيل حد يسمعني.. ركبت زينب مع المسخ بنفس الطبق اللي بيلف في حركة دائرية ويطلع فوق خالص وينزل وسمعت المسخ بتقولها "وعلى كده بقا يا زينب بتحبي خطيبك؟ ولا كريم بيحي في بالك لسه؟"

فردت زينب رد مستحيل اتخيله وقالتها "بتسألني عشان تطمني طبعاً.. متقلقيش أنا عارفة من بدري أنك بتحبي كريم وشجعتيني اتخطب لأيمن عشان أبعد عنه يمكن يبصلك ويحس بيكي مش كده؟"

إزاي زينب عرفت مشاعري تجاه كريم؟ إزاي كانت حاسة باللي عمري مقولته حتى بيني وبين نفسي؟ ودلوقتي بتواجه المسخ بكل صراحة كده؟

جسمي اترعش ولقيت المسخ قاعدة بتسمعها وعيونها بتلمع وتبسم نفس الابتسامة الباردة اللي واضح ان وراها كارثة كبيرة هتحصل.

قامت زينب وقفت قدام المسخ بقوة وانحنت على ودانها والمسخ قاعدة قدامها بثبات وهدوء وقالتها " متقلقيش... مش هيجبك مفكيش للأسف حاجة تتحب يا أمل "

قلبي بقا بيدق بشدة وانفاسي بتقف.. كلام زينب جارح في حقي لكن كل خوفي من اللي هتعمله فيها المسخ بدلاً عني.. وبالفعل مكملتش ثانيتين ولقيت المسخ وهي قاعدة مسكت رجل زينب وقلبتا بره اللعبة...؟! الطبق كان فوق في السما يعني دلوقتي زينب لو وقعت هكون أنا اللي قتلتها بأيدي؟؟

حطيت أيدي على وشي وانا بصرخ بإسم زينب وجسمي كله بيتفض.. شيلت أيدي واحدة واحدة وانا بتمنى مشوفش المنظر اللي في خيالي..

لقيت زينب بتصرخ ومتعلقة في اللعبة من بره وجسمها كله في الهوا.. والمسخ واقفة بتبصلي وبتضحك؟! كأنها بتقولني جبتلك حقك؟؟

زينب كانت بتستنجد و عمالة تنادي بإسم كريم وأيمن عشان أي حد يلحقها قبل ما تقع. لكن من الواضح أن الاتنين محدش فيهم مركز لها ولا سامعينا..

كريم وأيمن كانوا واقفين في مواجهة بعض هما كمان بتحدي وسامعة كريم بيعاتب أيمن ويقوله "ليه خدتها؟ ليه وأنت عارف أنني بحبها وأنتك مش هتحافظ عليها؟ ذنبا أي تنتقم منها؟"

فهمت أن الكلام على زينب وجاوبه أيمن وقاله بغضب وصوت عالي "ولسه هنتقم منك في كل شئ بتحبه وغالي عليك يا كريم زي ما كسرت بقلب أختي اللي حبتك وفي النهاية قولتلها أنها مجرد أخت ليك ومشاعرك مع واحدة تانية"

حصل مشادة قوية بينهم وكل واحد يحاول يوقع الثاني من اللعبة ويتخلص منه وسط صراخهم اللي واصل السما ...

كريم: مش ذنبي أنها حبتني يا غبي.. أنا حافظتلك عليها ومرضتتش أضحك عليها بشوية كلام ولا اخونك.

أيمن: وهي مش هتحبك وتعمل في نفسها كل ده بدون سبب غير ما تكون شافت منك تصرفات اتعشمت فيها .

فضل الكلام يدور بينهم على أخت أيمن اللي أول مرة أسمع عنها وعن قصتها مع كريم ..

وبدفعة قوية قدر أيمن يطلع كريم بره اللعبة ويعلقه زي زينب بظبط!؟ أنا مبقتش فاهمة هما ليه عملوا كل ده في بعض دلوقتي؟ ليه بينتقموا ويخلصوا على بعض؟ والموضوع كان ممكن ينتهي بأننا نبعد عن بعض ونفك صداقتنا وخلص ..

صحيح احنا صحاب مترابطة قدام الجميع لكن نفس كل شخص فينا شايلة من الثاني وجوانا حجات عمرنا ما فكرنا نلمح بيها حتى.

كنت فاكرة أن دي نهاية كريم وزينب وأنهم خلاص هيقعوا وتنتهي اللعبة لحد كده.. لكن لأ

فجأة ظهر القزم اللي كان بره لكن المرادي على هيئة مهرج وشه كله ألوان وبوقه بعرض وشه وسنانه كبيرة ولابس لابس المهرجين في السيرك.

وقف القزم تحت اللعبة وهو ببشاوري من ورا الزجاج وببشاور حواليه كأنه بيحيي الجمهور ومبسوط بالفقرة اللي اتقدمت.

نزل كل أصحابي من اللعبة ومحدث فيهم وقع ولا حصله شئ.. لكن لقيت الملاهي اتحولت من حواليهم زي ساحة معركة كلها أرض فاضية فيها بس أسوار قصيرة على بُعد مسافات بسيطة .

ومسك القزم سيوف وزعها عليهم وكأنهم هيبارزوا بعض حالاً والمعركة بدأت!...

زينب كانت أكثر واحدة جبانة على عكس ما توقعت وطلعت تجري من المسخ بتاعتي والتانية

بتطاردها وتجري وراها رافعة السيف ل فوق بكل شجاعة وناوية على قتلها .

أما ايمن وكريم وقفوا يتبارزوا بكل شجاعة زي الأعداء اللي مش ناويين يخسروا المعركة وكل واحد منتظر نهاية الثاني .

القرم بقا واقف يسقف ويشجعهم وهو بيضحك بصوت عالي ومتلذذ باللي بيحصل بينهم .. مسكت المسخ شعر زينب بعد محاولتها في السور اللي كانت مستخبية وبتتحمى وراه . وزينب بتصرخ في ايديها وبتحاول تهرب .. رفعت المسخ السيف ولسه هتنزله على رقبتها .. لقيت زينب رفعت سيفها وعرزته في دراع المسخ وهربت منها بسرعة! ..

أنا حسيت بالوجع في دراعي من ورا الزجاج .. قعدت ع الأرض وانا ماسكة دراعي وبصرخ بقهرة ووجع وبقولهم "كفايااااا كفايااا كده أبوس ايديكوا هنموت كلنا"

هربت زينب من المسخ اللي شالت السيف من دراعها بكل برود وكان الألم في المعركة دي ليا مش ليها ومش هياثر عليها بشئ .

في نفس اللحظة سمعت صرخة عالية من كريم اللي لقيته واقع ع الأرض وبيحاول يزحف لورا وأيمن نازل بسيفه على رقبته فصلها نهائي عن جسمه! ..؟

راس كريم اتدحرجت ع الأرض والدم ملئ المكان وجسمه بقا جثة هامدة وعينه بس اللي بترمش في وشه وبيبص ناحيتي! ...!

صرخت ودخلت في نوبة هلع وأنا مش مصدقة اللي بشوفه كل ده .. وأيمن مكتفاش باللي حصل ويس لأ .. لقيته قعد على ركبته ومسك سيفه وشق جسم كريم من بطنه وبقا يدخل أيده ويطلع احتشاه وياكل فيها بنهم! ...

كل ده تحت أصوات ضحك شريرة من القرم اللي صوته بيصدح ويتردد في المكان كله كأن الدم بينعش حواسه وبيسعه أكثر وأكثر .

بقيت اخبط بكل قوتي على الحاجز الزجاجي من الهلع عايزة أدخل واقتل القرم اللي عمل فينا كل ده .. لكن مقدرتش أتحمل منظر أيمن قدامي وهو بياكل في لحم كريم واتحول لوحش بشع زي المستذئبين وعمال يقطع بسنانه في جسم كريم .

دورت بعيني على زينب اللي كانت بتهرب من المسخ لمحتها خارجة من ورا سور بعيد وبتضحك .. اطمنت أنها نجت وبخير لكن لما بصيت على ايديها اتصدمت أنها ماسكة دماغى!؟

زينب فصلت راسي عن جسمي وانتقمت زي أيمن بالظبط .. شعور بالخنقة حصلي فجأة وبقيت

حاسة أن في حد رابط على رقبتني وخانقني جامد ..

طلعت أجري من الممر مكان ما جيت وانا بتمنى أتخلص من اللي حابس أنفاسي وخانقني.

بقيت اتعثّر واقع على الأرض من كتر ما قوتي بدأت تستنزف ومبقتش قادرة أقف على رجلي..  
بقيت ازحف على بره بايدي ورجلي وادوس في دم واشلاء ناس بتظهر تحتني فجأة.

مكنش ممر عادي.. كانت مشرحة وساحة اموات دخلوها ناس كثير من قبلي ويا عالم حصلهم أي تاني.

خلصت الممر بطولع الروح.. مبقتش مصدقة إني رجعت لأول ممر وقدامي الخمس ممرات اللي وقفنا قدامهم من شوية احنا الأربعة.

لكن ملقتش اصحابي؟! مكنش في غيري.. قررت أكمل واهرب يمكن الاقيهم بره ويكونوا سبقوني وكل ده مجرد خيال مش أكثر.

كملت لبره لكن كان الشئ اللي خانقني في رقبتني اتفك ووقفت اتسند على الممر وخرجت.. لقيت القزم قاعد على كرسي قدامي وعمال يضحك بصوت عالي ويشاور عليا ..

كملت هروب لبره الملاهي خالص مكان ما جينا وأنا منهارة من العياط وجسمي كله بيتنفض مش قدرة أتمالك أعصابي ..

سمعت صوت أصحابي جاي من بعيد وهما بيندهوا عليا كلهم..! الصوت كان جاي من ناحية العربية اللي عطلت مننا.

جريت تجاه الصوت لقيتهم كلهم موجودين ومخضوضين عليا ..؟!  
زينب جت عليا بسرعة حضنتني وهي بتقولي "حرام عليك يا أمل أنتي فين كل ده أحنا بقالنا ساعة بندور عليك"

وأيمن بيكمل كلامها وبيقولي "كل دي مكالمة تليفون هتعملها حرام عليك قلوبنا وقعت وفكرنا حصلك حاجة ده كريم راح جاب البنزين وجه وانتي كل ده مرجعتيش"

مكنش قادرة أرد عليهم بأي كلمة.. كنت بيكي وبتعرش في حضن زينب اللي بتقرا عليا قرءان وظهر كريم من ورا العربية وقالنا "طب يجماعة أنا خلصت وحطيت البنزين أهو سيبوا أمل تترتاح شكلها مخضوضة وشافت حاجة مخوفهاها.. دلوقتي يلا نمشي بسرعة من المكان ده!?"

ركب أيمن وزينب قدام زي ما كانوا وركب كريم جنبي في الكنبة اللي ورا.. رجعت راسي لورا

وغمضت عيني أحاول أرتاح وانسى اللي شوفته.. لكن اتفاجئت بهمس كريم جنبي بيقولي " ..أنا  
كمان شوفت اللي حصل" ..

فتحت عيني وبصيت جنبي عشان أتأكد إنني مش بهلوس ثاني.. لقيته ماييل ناحيتي ويهز راسه  
ويقولي "متخافيش، إحنا شوفنا مجرد حقايق..."

كنت هتكلم واسأله أنت شوفت أي؟ وإزاي أيمن وزينب بيقولوا إنني كل ده كنت بعمل مكالمة  
ومرجعتش وأنا كنت معاهم؟ !

لكن شاورلي بعلامة الصمت علشان محدش منهم يسمعنا... فسكت وكملت طريقي لحد ما روحت  
وانا مش قادرة أنسى كلام زينب اللي جرحتني بيه ومنظر أيمن وهو بياكل في كريم زي الحيوانات  
المفترسة.

أول ما طلعت البيت أتصلت بكريم وقولتله "كريم هو أي اللي حصل معاك وتقصد أي بأننا شوفنا  
مجرد حقايق؟"

رد عليا وقالني بعد ماخذ نفس طويل "أنا حصلي زيك بالظبط.. مشيت عشان أجيب البنزين وسمعت  
أيمن بيندهلي عشان شاف ملاهي من بعيد.. لكن ده مكنش أيمن يا أمل.. دول حراس المكان أو  
شياطين انفردوا بينا لأن كل شخص فينا مشي لوحده.. لكن مظهروش لزينب وأيمن عشان هما  
فضلوا سوا.

أنا كنت زيك واقف ورا حاجز زجاجي ومحبوس وبسمع وبشوف حاجات خارجة عن إرادتي.. لحد  
ما قتلني أيمن ولمحتك ورا حاجز زجاجي.. طلعت أجري وهربت ولما خرجت من المكان الملعون  
ده لقيت أيمن وزينب قاعدين بيضحكوا عادي في العربية.. فهمت أنني كنت في رحلة من الحقايق  
ظهرتھالي قوة المكان .

وروحت جبت البنزين ولما شوفتك راجعة بتعيطي ومرعوبة عرفت ان حصلك نفس اللي حصلي  
بالظبط.

كنت خايفة كريم يكون سمع اللي قالته زينب والمسح بناعتي وقولتله "يعني سمعت كل شيء ؟"

رد وقالني "سمعت يا أمل.. وفوقت متأخر"

نزلت الدموع من عيني وقولتله "إحنا مش هينفع نكون صحاب ثاني صح؟"

جاوبني ببساطة وقال "تجمعيتنا من البداية غلط يا أمل.. مفيش حاجة اسمها صحاب بين ولد وبننت  
لكن لأن ده الشائع في جامعتنا فأحنا قلدناهم وخلص.. والنتيجة كانت إنني اتوهمت بحب زينب  
وأخت أيمن اتوهمت بحبي وانتي للأسف حبتيني في صمت واتولدت طغينة جوا كل واحد فينا من

ناحية الثاني.. اللي احنا وصلنا له ده مش صحوبية ولا ترابط.. ده بداية للانتقام زي ما حصل من  
أيمن"

كريم كان معاه حق في كل كلمة قالها وحسيت إنني فوقت بكلامه وإنني محتاجة فعلاً أراجع حساباتي  
ونفسي من جديد .

كنت ناوية أقفل معاه وتكون آخر مقابلة وآخر مكالمة بينا ونرجع علاقات سطحية محدودة مش  
أكثر.. لكن دموعي كانت بتنزّل غصب عني وسط الكلام لأنني هفتقدمهم وحزينة على سري اللي  
خرج ومكنتش ناوية أبوح بيه ابداً ..

وفي نهاية الكلام قالي "أحنا صحيح مش هنكون صحاب تاني يا أمل.. لكن هنكون مخطوبين قريب  
بلغي والدك أن كريم مبيحبش يشرب الشاي بس عايز يقعد معاه"

**تمت**

## لعنة الكتاب

"أياك تقرأ الكتاب ده يا عبدالله، لعنته هتلازمك باقي عمرك"

أنا آخر شخص يتهدد أو يتراجع عن قراره، خصوصاً لو الموضوع يتعلق بكتاب عريق قديم الكل بيحكى ويتحاكى عن خطره والكوارث اللي حصلت بسببه.

مكنتش مقتنع برأي طارق زميلي لما نبهني وقالى أن الكتاب ده اصعب من شمس المعارف، كتاب معروف من قديم الأزل ومع ذلك متوفر بجميع المكتبات كأنه إصدار السنة.

واللي لفت نظري أكثر واكثر أن الكاتب إسمه "عبدالله ناصر" على إسمي...؟؟!

حتى إسم الكتاب عجيب "مملكة ايلدامورا"؟؟ الإسم مش مفهوم ولا حتى المكاتب فاهمين إزاي الكتاب ده بيكون موجود في الارفف رغم عنهم؟؟

كتاب بيتولد زي اللعنة وبقا حديث المحافظة كلها وأي جرائم أو اختفاء بتتقيد ضد مجهول بينسبوها لكتاب "مملكة ايلدامورا".

كان لازم اغامر بنفسي واعرف الكتاب ده بيتكلم عن إيه؟ ولو في طريقة أقدر اتخلص بيها من لعنة الكتاب نهائي حتى لو فيها روجي هعمل ده.

اشتريت الكتاب وخدته ورجعت البيت، أنا عايش لوحدي بعد انفصالي عن زوجتي من شهرين ويعتبر مليش حد أخاف عليه ولا يلاحظ غيابي لو حصلي مكروه.

يعني نقدر نقول كده أنها محاولة انتحارية مني لكن بشياكة حبتين. حطيت الكتاب على الترابيزة وانا براجع نفسي وبقولها:

"هل فعلاً هتقدر تتحمل اللي يجراك؟" ... "طب مش عايز تعتذر لطليقتك قبل ما تموت حتى عشان تقدر تدعيك لو مت؟"

قررت ابعت لـ ملك طليقتي رسالة على الواتساب قبل ما أفتح الكتاب وأكون احدث ضحاياه.

"مساء الخير يا ملك، أنا أسف لو بكلمك بعد المدة دي كلها، أنا ظلمتك يا ملك معايا.. أنا فعلاً اتجوزتك صالونات وحاولت أحبك زي أي زوج طبيعي لكن مقدرتش، صدقيني أنتي تستاهلي

تتحبني وتتشالي فوق الراس وأنا اللي مقدرتش أحس بقيمتك، لو مستغربة ليه انا بقولك ده دلوقتي.. فأعرفي إنها جايز تكون اخر رسالة تشوفها مني لأنني قررت افتح كتاب "مملكة ايلدامورا" اللي قالب البلد واغامر بنفسي.. ورسالة أخيرة نفسي اقولها لك.. حياتي بقت بشعة أوي من بعد غيابك.. سلام يا ملك"

حسيت دلوقتي أي فعلاً مرتاح ومستعد لفتح الكتاب اللي واخذ كل تفكيري في آخر فترة .

فتحت أول صفحة قرأت الإهداء كان غريب أوي ومش مفهوم "اعجبنتي شجاعتك ايها القارئ، ولذلك فلنكن شجاع حتى النهاية"

قرأت صفحتين وأنا حاسس إنه كتاب عادي جداً لا يستحق الضجة اللي بتحصل عليه دي.. رواية بتكلم عن حروب قديمة في مملكة ايلدامورا اللي في عالم موازي من خيال الكاتب.

الستارة كانت بتتحرك بشكل مُريب قدامي كل ما بكمل قراية خلتنني أحس بأجواء مرعبة وأخاف من جوايا.. لكن ده أمر طبيعي لأن في عواصف صعبة من بداية اليوم.

قومت دخلت اوضتي وقولت أكمل قراية لكن مليت ومش لاقى عالم موازي ببسحبنى ولا بيحصل جديد..؟! يعني كل اللي بيتقال ده مجرد تخاريف واشاعات عشان الكتاب يتشهر ويعمل مبيعات؟!.. حركة ذكية جداً من الكاتب وأصحاب المكاتب بجد.

قفلت الكتاب وحطيته جنبي ونمت بعد تفكير طويل في ملك اللي راحتها الرسالة وفي الآخر هتلاقيني عايش عادي محصلش حاجة وشكلي هيكون هباب قدامها.

معرفش فات قد ايه من الوقت، لكن أنا حاسس إنه فات ساعة مش أكثر.. وسمعت صوت حد بيزوم بصوت مكتوب قريب من راسي..؟؟

فتحت عيني وقلبي وقف من أول مشهد..؟؟ جن بشع قاعد فوق راسي؟! منظر مرعب خلاني في لحظة اقع من سريري واتقلب على ضهري بهلع وانا بصرخ من المنظر.

لكن أول ما اتعدلت ولسه ههرب من الاوضة ملقيتوش على السرير؟! خدت انفاسي بصعوبة وانا ببص على الكتاب اللي لقيته مفتوح على صفحة ١٤٠ و عليه.. عليه نقط دم؟!؟

مسكت الكتاب وانا مصدوم، شكل الاساطير اللي بتتنقال عن الكتاب طلعت حقيقية و اترميت في الجحيم خلاص؟؟

مسكت ورقة وقلم بسرعة من الدرج عشان أسجل اللي شوفته ولو جوالي حاجة حد يعرف سر الكتاب ويتأكدوا من طريقة موتي.

لكن اللي بيحصل حالياً عبارة عن موت بالبطيء؟؟ كل كلمة بكتبها بنتمحي لوحدها؟ الحبر بيطيير من الورق زي الدخان.. مفيش كلام راضي يثبت؟؟

مسكت التليفون أعمل تسجيل صوتي لملك طليقتي هي أقرب حد قدامي دلوقتي لكن التليفون جاب شاشة بيضا ومش راضي يفتح أي شيء؟؟

الكتاب بدأ يتهز على الترابيزة وتنقلب الصفح بتاعته بشكل سريع متتالي وكأن في رياح متسلطة عليه هو لوحده.

كان لازم أهرب.. أنا دلوقتي مش شجاع ومش متحمل اللي بيحصل حواليا.. جريت على الباب فتحته لقيت قدامي حيلة؟؟ أنا محبوس في بيتي.. أو... أو أنا أساساً مش في البيت؟؟

جريت فتحت البلكونة ومصدقتش اللي شوفته...!؟ اكيد كل ده كابوس اكيد انا بحلم؟؟ البلكونة بتبص على جحيم ونار من كل مكان؟؟

"ايلدامورا"

الكلمة اترددت فجأة حواليا بصوت شيطاني غليظ بشع.. بقيت أتلفت حواليا وابص في كل مكان وأصرخ بأعلى صوتي "أنا فين.. خرجوني من هنا.. خرجوني"

الكتاب بدأ يتحرق قدام عيني ويطلع دخان كثير قرب يخنقني.. كنت بحاول ابعده على قد ما أقدر عشان مموتش.

الدخان بدأ يتشكل لشبح اسود بيخرج من وسط الدخان وجاي عليا.. صرخت وصرخت وصوتي قرب ينتهي لحد ما فجأة جه صوت جرس الباب..؟؟

الشبح اول ما سمع الصوت هجم عليا سحب روحي مني.. ولقيتني بتحرك غصب عني ورايح أفتح الباب؟؟

"ملك؟ اتفضلي خشي"

بقيت أصرخ من جوايا.. مش أنا اللي بتحرك ومش أنا اللي بكلم ملك.. أنا محبوس دلوقتي جوه جسمي ومش أنا اللي بتصرف وبتحكم في تصرفاتي.

"عبدالله أنت كويس؟ فلقنتني عليك بالرسالة اللي سمعتها منك.. ارجوك يا عبدالله ارمي الكتاب ده ومنفكرش تاني في الموت.. أنا لسه باقية عليك وعيزاك"

كنت بصرخ من جوايا وبقولها "لأ يا ملك.. اهربي ارجوكي ده مش أنا اهربي"

لكن ملك مش سمعاني ولا حاسة بيا.. سامعة فقط الشخص المتحكم فيا وهو بيقولها "وأنا كمان عايزك"

حاولت أمنع الشبح ده واشتته وأصرخ كثير وانا بقوله "سيب ملك تمشي.. ملك لأ ملهاش دعوة بالكتاب"

قفل الباب ورجع قعد قدامها على السفرة وهو باصصلها بجمود وسامعها بتقوله "عبد الله ممكن ننسى اللي فات ونبدأ من جديد.. أنا عارفة أنك محبتنيش لكن العشرة اللي ما بينا أجمل بكثير من أي قصة حب مستنزفة.. أنا معنديش مانع نحاول مرة كمان و"..

بدأ الشبح يخرج من جسمي وأنا بتألم وبصرخ من خروجه جوايا.. وملك بتحاول تفوقني وهي بتصرخ وبتقولي "عبد الله مالك.. عبد الله بتعمل كده ليه"

خرج الدخان وبدأ يتلف قدامنا زي الدوامة وأنا باخد انفاسي وبفوق من سيطرته عليا وانا بقول لملك "أنا فتحت كتاب مملكة ايلدامورا يا ملك.. جيتي ليه.. جيتي ليه حرام عليكي هنتظلمي تاني معايا"

مسكت دراعي وهي بتسندني وبتقولي "مش هسيبك يا عبدالله هموت معاك لو جرالك حاجة مش هسيبك"

ظهر الشبح من وسط الدخان وهو بيبتسم بسخرية وبيقولنا "لا مكان للحب بمملكة ايلدامورا"

وفجأة قامت عاصفة قوية طيرت كل الاخشاب والأثاث في الهواء واندفعت في الحيطان وهي بتتفتت كلها واحنا بنصرخ وماسكين في بعض.

حاولت اترجاه واقوله "ارجوك ملك ملهاش علاقة بالكتاب، ارجوك خليها تمشي واعمل فيا اللي انت عايزه"

ضحك بسخرية اكثر وهو بيقولي "أظن أنك تحبها بشدة أيها الغبي"

بصيت لملك وأنا حقيقي مش قادر احدد التضحية والاندفاع والخوف اللي جوايا دول هل هما فعلاً حب ليها ولا مجرد شهامة لأنها كانت مراتي؟؟

نظرات ملك كان فيها شيء من السعادة رغم الخراب اللي بيدور حولينا وقالتلي "أنت بتحبني يا عبدالله؟"

نسيت كل شيء حواليا وقولتها بتردد وأنا خايف أحكم على مشاعري غلط في لحظة تهور وقولتها "مش عارف.. حقيقي مش عارف.. لكن الحبة اللي انفصلنا فيهم حسيت إنني ناقص.. وأن روحي مش مرتاحة وبعاني عشان انسى وجودك.. مقدرتش اشوف ست أحلى منك ولا لفت انتباهي صوت بنت غيرك.. الأكل طعمه ماسخ أوي زي البلاستيك.. يومي كله عبارة عن تقضية واجب.. يعني لو كل ده بيعبر عن الحب.. يبقى اكيد حبيبتك"

معرفة ازاى قدرت أرتب الكلام وخرج مني بالشكل ده.. ملك كانت بتبكي بشدة.. لكن مش خوف لأ.

كانت بتبكي من فرحتها باللي سمعته مني، نظراتها كانت جميلة ودافية وفيها انتصار اتمنى اعيش حياتي كله اشوف فيها نفس اللمة دي.

وفي لحظة لقيت ملك بتبرق وعيونها بتوسع بشكل مبالغ وخرجت منها صرخة عالية مفاجئة أول ما اتسحبت في الهوا بقوة من جنبي وايديها فلتت من دراعي.

ولقيت شباك البلكونة بيتكسر وبيطير في الهوا زي ملك بالظبط وظهر جحيم النار من كل مكان برا البلكونة وملك بتصرخ والشبح بيحركها وبيوقفها فوق النار!؟؟!

قلبي اتخلع من مكانه وجريت على الشبح وانا بصرخ بكل قوتي وبقوله "ملك لأ.. رجعهااااا بقولك" ..

لكن رغم اني جريت عليه وقعت على الأرض ومقدرتش امسه نهائي، عبارة عن دخان كثير واقف بيضحك على ضعفي وقال "إذا أردت نجاتها، فلتكمل قراءة الكتاب"

وحذف الكتاب عليا، مسكته بسرعة وأنا بكمل قراءة الكتاب اتقلب لوحده واتجمد على صفحة ٢٠٣..؟؟

بصيته بخوف وأنا بتابع ملك وعيني عليها وبقوله "اشمعا الصفحة دي؟ أعمل إيه وتسيبها مش فاهم"

رد وقال "ركز بكل حواسك، نجاتك بين السطور"

مكنتش عارف اركز وانا شايف ملك وسط الجحيم وممكن تموت بسببي وبتصرخ وتبكي وهي بتستنجد بيا ..

حاولت ابعث عيني عنها وأقرأ الصفحة مرة واتنين وتلاتة بتركيز ومش فاهم بردو النجاة فين؟؟

استوقفني سطر معين بيقول "الاغبياء فقط هم من يهربون، أما القوي يأخذ حقه بيده حتى وإن كان ذلك سيتسبب في جحيمه؟؟..."

الشيخ كان يبصلي بنظرات شماتة وبدأ يحرك ملك في الهوا ويستفزني بيها أكثر. مقدرتش اتحمل أكثر من كده وقررت لو هموت وانا بحاول أنقذها فهي تستحق .

جريت عليها ورميت نفسي من البلكونة وانا عارف اني مش هوصلها وهقع في الجحيم وحياتي هتنتهي قبلها، لكن يكفي إني فديتها بروحي ومشوفتش فيها سوء .

لما وقعت اكتشفت إني وقعت على الأرض ورجلي اتكسرت، ولقيت نفسي في نص الشارع وملك واقعة جنبي بتتألم وهي بتضحك وتبكي في نفس الوقت وبتقولي "عبدالله.. نجينا يا عبدالله.. انت انقذتني ورميت نفسك عشاني؟"

أتلقت حواليا وأنا مش مصدق أن فعلاً الكتاب كان يقصد الحل ده؟؟ مش مصدق إني اتخلصت من لعنة مملكة ايلدامورا ومشكلتي كمان اتحلت مع زوجتي اللي اكتشفت مدى حبي ليها خلال الرحلة البسيطة دي.

مملكة ايلدامورا مش لعنة بتأذي اللي بيقرأها، مملكة ايلدامورا بتواجهك بمشاكلك المحبوسة جواك وبتخليك تكتشف اللي مدفون من سنين ومحدث قدر ينبش فيه.

أنا فعلاً حبيت ملك، واكتشفت حبها أكثر لما اتواجهت بضياعها للنهاية، أما الإشاعات اللي بنتقال عن الكتاب، فأكيد هما ناس مقدروش يواجهوا أنفسهم فقابلوا هلاكهم.

ت م ت

## شلة مساطيل

\_كوباية الشاي بتطير يخوانا متهزروش.

الليلة دي تعتبر الفاصل اللي غيرلي مجرى حياتي من بعد اللي حصلني فيها..!؟

اعرفكم بنفسي... أنا إسلام الشاعر.. شاب خدته الدنيا في مليون طريق وجرجرته صُحبة السوء وملقتش اللي ينصحنني في يوم بما إني مُتغرب في بلد تانية وعائش لوحدي مفيش أب يراقب ولا أم تططب .

شقتي عبارة عن زريبة لكل من هب ودب وكل ليلة تتجمع أنا وشلة الفساد عندي ونقضي الليل كله في شرب ومخدرات لحد ما يغم علينا ومنحسش بالدنيا.

لكن جت عليا فترة بقيت بكره نفسي.. وبكره مقابلتهم والليل اللي بقضيه معاهم..

مبقتش عارف لما أرجع لبلدي وأنا مش معايا ولا مليم هقول لأهلي كنت بعمل أي بره؟

ببص لنفسني في المرآة يومياً شكلي بقا بشع وجسمي بقا نحيل من كتر الهباب اللي باخده.. حتى الأذان بقيت أسمعاه وأكمل كلامي وهزاري بدون ما أردد وراه زي ما علمني والدي من صغري.

جالي اكتئاب وبطلت أرد على صحابي ولما يتصلوا بيا بقيت از عقلهم واقولهم "مش عايز اشوف حد فيكوا.. كفايا كده دمرتوا صحتي ومستقبلي.. انتوا شياطين مش صحاب"

لحد الليلة الموعودة اللي فاجئوني فيها ولقيت ثلاثة منهم جايبين واحدة مش كويسة شكلها مرسر ويخبطوا ودخلوا بدون استئذان!؟

أول ما شوفت معاهم الست اللي شكلها مش مضبوط دي ويتاكل لبانة بطريقة الرقاصين اتصدمت ومعرفتش انفعول ولا أتصرف معاهم إزاي!؟

والحقيقة يعني من جوايا قولت لنفسني ليه متكونش آخر مرة لأن وحشني السهر والهلس معاهم ومشربش زيههم وخلاص.

في البداية عملت نفسي مضايق فضلوا يهزروا معايا ويفكوني بحجة "فك وشك بقا عايزين نقضي

ليلة حلوة مع الحنة "

كانوا يقصدوا بالحنة دي الست اللي جايينها واللي من أول ما دخلت راحت ع الاوضة تغير ولا كأنه بيت اهلها وواحدة عليه.

سألت عبده قولتله "جبتها من أنهي داهية دي؟"

رد وقال "مش أنا اللي جبتها يعم أنا مراتي لو قفشتني بكلم بخاخة حتى هتعلقني.. محمود البايظ هو اللي شقها"

لقيت محمود قاعد بفخر أوي وحاطط رجل على التانية وبيقولي "ايوااا أنا.. يابني مفيش حاجة صعبة عليا أنا بتاع المستورد كله"

فرد صاحبنا التالت منتصر.. وده اكثر واحد فينا مسؤول عن الضحك والايهات وقاله "مالك منفوخ علينا كده ليه يعم.. اومال لو مكنتش بكرش وميتة مرتين قبل كده كنت عملت فينا أي.. يجده ده صوت اللبانة جبلي قرحة في معدتي ومستحمل بالعافية"

كلنا ضحكنا ودارينا الضحك لما خرجت علينا الست دي وهي لابسة جلبية خضرا بتلمع وشبشب أزرق ومركبة باروكة صفرا وشكلها زي الزفت... ووقفت سندات بايديها على الباب وهي بتقولنا "كده بدأتو الضحك من غيري"

بصيت لمحمود وانا معدتي مقلوبة من اللي شايفه.. يوم ما يجبلنا واحدة ست تبقى ميتة مرتين.. لأ وصوتها كمان تخين تحسوها راجل متنكر.

قعدوا يحضروا في الشيشة والتسالي والحاجات اللي هيضربوها طول الليل عشان ننسى السحنة اللي قاعدة معنا وادبسننا فيها دي.

كانت الست بتاكل بطريقة وحشة أوي وبتسف أي طبق محطوط ع التراييزة ولا كأنها جاية على مائدة رحمان.

قام منتصر وشغل اغاني ليها وقالها "يعم القطر قومي اعلمي أي جو بدل مانتني قاعدة تحشري كده وممنكيش فايده"

ضحكت ضحكة المفترض أنها خليعة لكن مع طبقة صوتها التخينة فهي ضحكة راجل مرعب مش ست ..

وقالتله " أنا بقا هوريك الفائدة"

وقامت ترقص وياريتها ما اتحركت.. كانت بتعمل تمارين وبتتكهرب مش بترقص وكلهم مييتين على نفسهم من الضحك والشرب خلاص بدأ تأثيره يشتغل ويتسلطوا...

إلا أنا مكنتش شربت حاجة نهائي وقاعد بضحك بس ع اللي بيحصل من الست العجبية دي ..

أول ما خلصت رقص قام عبده وهو عمال يضحك وقالنا "طب يا شباب أنا ندمان دلوقتي إني خونت مراتي وعرفت قيمتها.. هستأذن أنا عشان قرفت"

وبالفعل سابنا كلنا بنضحك ومشى والست قعدت مكانها وهي بتبصلنا بقرف ومضايقه من التمر بتاعهم...

ناولها محمود سيجارة ملفوفة وقالها "خدي يا تيزا روقي ع حالك وفرشي كده لسه السهرة طويلة"

خدت الست منه السيجارة وقعدت تشربها وبدأت تضحك معاهم وتفك.. فلقبت منتصر بيقولي "قوم غيرلنا الفحم يا إسلام شكل السهرة بدأت تحلو"

فأنا رفضت اشارك في أي شئ وقولتله "قوم أنت غيره أنا مش همد ايدي في الحاجات دي تاني"

خد الفحم القديم وقام دخل غاب حبتين وخرج بالفحم الجديد وهو عمال يضحك ويقولنا "الولية القبيحة دخلت ورايا المطبخ" ..

وبعدين بصلها وقالها "الاه.. انتي هنا يا قبيحة مش كنتي جوه يا ولية"

مكنتش فاهم هو بيهلوس بأيه وكلهم بيضحكوا بدون ما يفهموا.. بس انا حسيت بقلق من الأجواء والست لما بتضحك صوتها كان بيتردد في الشقة بصوت تخين وبشع.

حسيت اني فصلت وقولتله "طب يا جماعة كفايا كده.. يلا كل واحد على بيته"

رد محمود وقاله "يعم متهزرش السهرة لسه صباحيبي .. خذلك بس حبيبتين وانت هتتبسط معانا"

وهو بيتكلم لمحت خيال مر ع الحيطه من وراه.. خيال ضخم وواضح لكن مر بسرعه أوي..

اتفضت وقولتله "محمود فوق لنفسك في حاجة غلط بتحصل حوالينا"  
رد منتصر وهو ببشده شعر الولية وخرج في ايده وبيقولها "هو في غلط اكثر من الجثة المركبة اللي قاعدة معانا دي.. اللحق ياض شعرها بلاستيك دي طلعت قرعة"

شدت منه الست الباروكة وقالتله "أوعى كده بهدلتلي الاستايلش بتاعي.. طب أنا هقوم ألبس الجلبية الحمرا واوريك الجثة اللي مش عجبك دي هتعمل اي"

وقامت دخلت الاوضة وهي بتطوح وانا حسيت باعصابي بدأت تنتشد والجو مش عاجبي وقولتلم "أنا هقوم أعمل شاي.. حد هيشرب"

رد منتصر وقالى "أه ونبي يا أس اعملنا كوبايتين احسن بنت المحنطة دي مبوطة الدماغ"

دخلت المطبخ أعمل الشاي وشميت ريحة دخان كثير قريية مني.. فتحت باب الحمام اتصدمت من كمية الدخان اللي فيه!..

قعدت احك وخرجت بسرعة قولت لمنصر "أنت يا زفت رميت الفحم القديم فين"

رد وقالى "في الحمام يعم"

اتصدمت من اللي عمله.. أنه يرمي الفحم وهو مولع في الحمام خصوصاً في وقت متأخر زي ده معناه أن الخيال اللي شوفته مكنش تهيؤات.. ولما منتصر شاف حد معاه في المطبخ مكنش بردو هلوسة!؟

حاولت افوقهم واقولهم أن في حاجات غريبة بتحصل والدخان كثير في الحمام مش طبيعي قام محمود قالى "متكبرش يعم الحوار وتفصلنا الدماغ المتكلفة دي مش عاجبك الجو اركن انت"

وبالفعل خدت ركن ومعايا كوباية الشاي بتاعتي وقعدت اتفرج عليهم من بعيد.. لقيت الست خرجت من الاوضة لابسة جلابيه اعفن من اللي قبلها لونها أحمر وباروكة سودا نازلة على وشها وشكلها زي الزفت.

قعدت جنب منتصر وهي بتقوله "ها أي رأيك كده"

فقعد يضحك وقالها "لا بصراحة أنا كنت بقول عليكى ميتة مرتين قبل كده دلوقتى انتى بقيتى ميتة تلت مرات"

محمود كان يضحك بصوت عالي على اللي بيقوله منتصر، ورفعت الست شعرها من على وشها وعيونها كلها دم وانيايها خرجت من بوقها وقالتله "طب وكده"

أنا اتنفضت من المنظر وكرمشت نفسي في الكرسي اللي عليه.. لكن الغريبة أن منتصر أول ما كشفت الست وشها لطشها بالقلم ومسكها من الباروكة لفها على وشها وقالها "ابو شكلك فصلتيني"



محمود بدأ يفوق لما لقاها جاية عليه وبتشوح بالسكينة ناحيته وهي مسطولة مش متمالكة أعصابها بشكل كافي.. تفادى ضربتها وزقها ع الأرض وهو بيقولها "انتي مجنونة، مش لسه واكله من شوية؟!"

كأنه بيكلم زومبي ومش فاهم أنها اتلبست بسبب الفحم اللي رماه منتصر في الحمام من شوية..

قامت الست فجأة وهي فايقة وبقت تجري وراهم وهما يهربوا منها ويحذفوها بأطبقة الفاكهة ومنتصر ينط ويحاول يجيب كوباية الشاي الطيارة عشان يحذفها بيها..

البيت اتقلب وجت عليا أنا كمان بقينا كلنا نصرخ ونضرب في بعض وصوتنا جايب اخرث الشارع لحد ما الجيران سمعونا وبلغوا الشرطة عن اللي بيحصل في شقتي ..

ولقيت الباب بيخبط والحكومة جت لمتنا كلنا وكتفوا الست وخدونا في البوكس.. ومنتصر كل اللي عليه يقولهم "طب استنوا اجيب كوباية الشاي"

مفاقوش من الهباب اللي شربوه غير في القسم لما عرفوا إننا ضاع مستقبلنا ولبسنا في تهمة مخدرات وبيت مشبوه...؟!  
ودلوقتي أنا بحكيكم حكايتي من السجن اللي فعلاً رباني وعرفني أن صُحبة السوء مهما كانت قعدتهم حلوة ولذيذة فنهايتهم وحشة وبيأخروا مبيقدموش...  
رزقنا الله وإياكم بصُحبة الخير وطريق الصلاح والتعافي.

ت م ت

## تخفيض فنادق

حاسبي يا مي واقفة وراكي، اهربي بسرعة.

-مين دي اللي واقفة ورايا، هات الأكل يا حسام متهزرش.

بس أنا فعلاً مكنتش بهزر المرادي، ومتخيلتش في يوم أن كل ده يحصل خصوصاً في مراتي .

أنا حسام الدين مهندس زراعي وعندي ٣٥ سنة، متجوز من شهرين البنت اللي حلمت بيها طول عمري "مي" .

مي مش بس زوجتي وأقرب الأشخاص لقلبي لأ، هي كمان تبقى بنت خالي اللي كبرت قدام عيني من صغرها .

خالي كان رافض يجوز هالي لأنني طابيش وبتاع مشاكل حبتين، لكن والله اتغيرت عشانها وعشان أوصلها واقدر احافظ عليها.

وزي اي شاب في فترة التجهيزات وبداية الزواج الحالة المادية كانت متأزمة حبتين، لكن كان نفسي أفرح "مي" واخليها تقضي شهر عسل محترم نعيش طول عمرنا فاكرينه.

كلمت صحابي يشوفولي فندق بسعر حنين نقضي فيه شهر العسل وفعلاً لقيت واحد من صحابي باعتلي إعلان ممول لفندق فتح جديد في مارينا وعامل خصم 50% لأوائل الحجوزات.

كنت فاكر أن نصيبي حلو للدرجادي وحجزت أول ما شوفت الإعلان شهر كامل وأنا بدعي لما أروح ملاقيهموش نصب غير الصور ولا يطلبوا فلوس إضافية زي ما بيحصل.

خدت "مي" وسافرنا وهي في قمة سعادتها إنها أخيراً هتغير جو وتشوف الدنيا معايا.

أول ما وصلنا الفندق انبهرت بفخامته وجماله اللي كانوا احلى من الصور بكثير ومن الإعلان .

ماكنتش مصدق أن فعلاً في أسعار مخفضة للدرجادي وكنت منتظر الصدمة تيجي من أي اتجاه في الفندق وانا ببلغ بأسمي وبالحجز بتاعي لكن الحمد لله كل حاجة مشيت زي ما تخيلت وأحسن.

عامل الفندق اللي بيوصلنا للغرفة وشايل الشنط كانت نظراته مش مريحة، كأنه عايز يقول حاجة وخايف أو محرج.

ابتديت أشك أنه بيبص لمراتي أو يعرفها وكنت هنفعل عليه لكن حصلت حاجة غريبة شتت عقلي...؟؟

خرجت ست أجنبية ملفوفة بالفوطة بتجري وتصرخ ومن وراها بيجري راجل اجنبي وبيبرطموا بكلام انجليزي مش مفهوم..؟؟

مي اتخضت ومسكت في دراعي وهي بتقولي "حسام هو في إيه؟".

رد عليها عامل الفندق وقالنا "بعتذر لحضراتكم، هما الأجانب كده مزعجين وألعابهم غريبة مبيعملوش حساب للي حوالاهم".

وصلنا أخيراً الاوضة اللي انبهرت بتنسيقها وجمال الأثاث اللي موجود فيها، فعلاً حاجة تشرف وفندق ناجح هيكونله إسم كبير وهيسمع في مارينا بسبب أسعاره.

مي ماكنتش مصدقة نفسها ودخلت زي الطفلة الصغيرة تجري وفتحت البلكونة اللي كانت بتطل على البحر وهي بتقولي "الله يا حسام بجد دي هايلة... لا لا دي تخبل.. خيلنا نعيش هنا على طول".

كنت بضحك على طفولتها ومن جوايا بقول لنفسي "يااه لو الاوضة دي فعلاً بتاعتنا ونيجي نصيف هنا ببلاش من غير مصاريف وزنقة كلاب".

مي كانت متحمسة بشكل كبير وجريت فتحت الشنط وهي بتخرج هدومها وبتقولي "احنا هننزل البحر دلوقتي صح صح، أنا هاخذ دش على طول وننزل مش هنا" وجريت على الحمام وهي بتكعبل في السجاد وبتضحك.

كنت مبسوط إني قدرت افرحها بالشكل المبهج ده وروحت لميت الهدوم اللي هي بهدلتها على السرير وقولت ارتبهم في الدولار على ما تخلص هي.

فتحت الدولار واتصدمت...؟؟ ريحة بشعة ونتنة هبت من الدولار أول ما فتحته؟؟؟!... إزاي فندق محترم وبالفخامة دي ميعطرش الدولار؟!!

جريت مسكت المعطر وعطرته قبل ما "مي" تخرج وتكتشف اني جايبها في مكان منتن ولا رخيص.

لقيت مي خارجة وعلى راسها فوطة بتنشف شعرها وكنت يادوب خلصت ترتيب الهدوم ولقيتها بتقولي بضحك "حسام بطل حركات الهزار بتاعتك دي والله هزعل منك"

مكنتش فاهم هي تقصد حركات إيه بالظبط وسألتها وانا بضحك زيها "أنهي حركات بالظبط؟".

ردت وقالتلي "بتطفي نور الحمام عليا وترجع تشغله قال يعني أنا كده هخاف بقا من شغل العيال ده"

أنا فعلاً طول عمري مشهور بالمقابل في أي تجمع عائلي لكن مش انا اللي عملت كده؟؟

خطر في بالي أن الفندق جديد واكيد اللبة بتعلق ومحببتش اخوفها ونسبت التهمة لنفسي وانا بقولها "اممم مبتخافيش، شكلي محتاج استخدم أساليب مرعبة أكثر علشان تنفع معاكي".

جهزنا نفسنا ونزلنا البحر اللي ميقفش جمال عن أي شيء شوفناه هنا من وقت ما وصلنا، اينعم عدد السياح كان قليل كده ومفيش غير حوالي اثنين ثلاثة على البحر معانا لكن كان أجمل وعارفين نتحرك بحرية أكثر.

خلصنا لعب وريحت جسمي على الشيزلونج، ولقيت "مي" خارجة من البحر مضايقة وبتقولي "حسام الشامبو اللي ناولتهوني في الحمام ده بجد وحش أوي، يارتتي جبت الشامبو بتاعي".

استوقفني كلمة ناولتهوني دي؟؟ قومت من مكاني وانا مخضوض علشان اسمعها كويس وقولتها "ناولتهولك إزاي مش فاهم؟"

ردت وقالتلي "يا حسام شامبو الفندق اللي ادتهوني في الحمام.. إزاي فندق نضيف كده ودي جودة المنتجات عندهم بجد؟ ده بوظلي شعري ولونه احمر وملزق ومش بيعمل أي رغو لولا أنه فندق محترم كنت قولت ده عصير بطيخ."

بقيت قاعد اسمعلها وانا متنح وسرحان وخايف أخذ منها تفاصيل أكثر، طب اللبة وعديتها لكن مين هيناولها الشامبو في الحمام وانا برتب الدولاب مدخلتش؟؟.

"يا حسام سرحان كده ليه، قوم نطلع طيب شكلك جعان أنا كمان جوعت أوي."

ابتديت أشك أن الفندق ده مش طبيعي، فهو اكيد الاسعار دي مايجيش من وراها غير البلاوي. والست الأجنبية اللي كانت خارجة بتصرخ من الاوضة هي وجوزها كل ده مش من فراغ، فهو أكيد من الغرائب اللي بتحصل هنا.

قومت طلعت مع مي الاوضة وبلغت في الاستقبال أنهم يطلعولنا الغدا على الغرفة. وطلعت وانا بفكر إزاي اطلب من مي إننا ننهي الرحلة دي ونرجع وابقى اعوضلها شهر العسل بعدين؟؟.

طلعت مي اترمت على السرير ودخلت أنا أخذ دش وأنا بتلفت حواليا وخايف حد ينالوني الشامبو زيتها .

لكن الحمد لله محصلش حاجة، سمعت باب الغرفة بيخبط قوت ده اكيد الأكل وصل. خرجت من الحمام وانا بقول لمي "خليكي يا مي أنا هفتح."

استلمت منه ترايبزة الأكل المتحركة وداخل بيها وأنا مبسوط من أجواء الناس الغنية اللي بعيشها دي، مانا بصراحة عمري ما قعدت في فندق طول عمري انا وصحابي بنطلع اي مصيف صد رد عشان نوفر حق السكن .

مي كانت قاعدة على السرير بتصقف بحماس ومنتظراني، لكن ماكنتش لوحدها اللي منتظراني..؟؟!

شبح لست عجوزة تشبه السحرة والدجالين قاعدة ورا مي وبتضحك بشكل بشع وميرقالي وهي بتشاورلي مع مي بنفس الحركات..؟؟!

أول ما شوفتها اتسمرت مكاني وانفاسي اتقطعت.. انقذ مراتي ولا أجري بسرعة..؟؟.

صرخت وانا بقولها "حاسبي يا مي، واقفة وراكي اهربي بسرعة."

لكن كالعادة مي افكرتني بعمل فيها مقلب وقالتلي "هي مين دي اللي واقفه ورايا، هات الأكل يا حسام متهزرش أنا واقعة من الجوع."

في اللحظة دي افكرت أبويا الله يرحمه لما قالي ...:

ملحقتش افكر ولقيت الشبح اللي وراها اتحرك وجاي ناحيتي..؟؟ طلعت أجري وأنا بصرخ وبقول لمي بصوت عالي "الفندق مسكووووون يا مي اهربي."

قابلني عامل الفندق في الطرقة اللي بجري فيها وما صدقت لقيته مسكت فيه وانا بقوله "أنا هبلغ عنكم، الفندق مسكووووون، أنا هوديكووا في داهية."

كان عليه هدوء وبرود غريب ومبتسم وهو بيقولي "يافندم اهدا بس، دي مجرد تهيووات حضرتك لسه طالع من البحر واكيد تعبان ومرهق، تعالى أنا هدخل معاك الاوضة واحل المشكلة."

كنت بالفعل عايز حد يروح يجيب معايا مراتي من جوه اللي مش عارف الست الممسوخة عملت فيها إيه .



كنت محتاج أتأكد أنها مي مراتي فعلاً وحببت اختبرها وسألتها "طب عشان أتأكد أنك مراتي بجد، قوليلي أول مرة قولتيلي بحبك كانت أمته؟؟".

قعدت تصقف بأيديها وهي بتضحك وبتقولي "يابني أنا لحد دلوقتي مقولتهاش أصلاً".

وقتها اتأكدت أنها مي مراتي فعلاً لأنها عمرها ما قالت كلام حلو ولا رومانسي وبتعتبره من المحرمات رغم إني جوزها بردو.

خدت أنفاسي بالعافية وانا بتنهد وبقولها "حرام عليك يا شيخة وقعتي قلبي، ده وقت هزار ده."

ردت وقالتلي "ده حاجة بسيطة من المقابل اللي بتعملها فيا، وعلى فكرة أنا كنت في الاوضة لوحدي أنت كنت بتاخذ دش وبتجيب الأكل ولقيتك صرخت وجريت فعرفت أنك بتعمل مقلب كالعادة فقعدت أكل لوحدي وقولت أنك هترجع بس معرفش أنك هتكبر الموضوع كده وتلغي الرحلة، عشان خاطري يا حسام أنا ملحققتش أفرح خلينا ع الأقل يومين هنا."

دماغي لفت ومبقتش عارف اللي شوفته فوق أنا والعامل ده فعلاً تخاريف ولا هي بتقولي كده عشان تكمل شهر العسل وخلص؟؟.

فضلت تزن عليا وهي بنترجاني وتقولي "عشان خاطري يا حسام ده أول طلب اطلبه منك، أنا أول مرة اكون مبسوفة كده متكسررش بفرحتي عشان شوية هلاوس، بعدين ماهو لو في عفريت كنت أنا أول واحدة هربت لكن أنا مشوفتش حاجة نهائي".

على أي حال مقدرتش از عليها واعتذرت للاستقبال وبلغتهم أي هكمل الحجز خلاص وده كان سوء تفاهم مني.

طلعت الاوضة مع مي وأنا كُلي خوف أشوف الست العفريته دي من ثاني وبدعي كلام مي يطلع صحيح وإني بهلوس من كثر المقابل اللي بعملها مش أكثر.

الاوضة كانت عادية فعلاً ومفيش فيها أي اشباح أو حاجة بتحصل، قعدت اتغديت لأنني مكلتش من الصبح وحسيت إني محتاج أرتاح من اليوم المتعب اللي مریت بيه.

طفينا النور ونمت على جنبي الشمال ومي ورايا قاعدة ماسكة تليفونها كالعادة قبل النوم .

دقايق وحسيت بأيدي بتتحرك على ضهري وحاسس بوجود ضوافر بتخربش بشكل بسيط؟؟

قومت مفزوع وانا برمي الغطا من عليا وبصرخ "رجعت ثاني رجعت".

لقيت مي فاتحة الكشاف وقاعدة على السرير مصدومة وبتقولي "في إيه يا حسام بصور المانكير  
على ضهرك عشان التيشيرت بتاعك ابيض وهيوضح الصورة."

حسيت وقتها فعلاً إني موهوم وبتخضض من أي شيء رغم إني معتاد حركات التفاهة دي من مي لكن  
أنا دلوقتي بربط كل حاجة بتحصيلي بالست الممسوخة اللي شوفتها .

رجعت كملت نوم وأنا ناوي أريح أعصابي وأرجع طبيعي من ثاني عشان أقدر أبسط مي في  
السفرية المنحوسة دي .

ثاني يوم الصبح لسه بفتح عيني من النوم لقيت مي مقربة وشها مني بشكل غريب لدرجة اني  
اتخضضت منها وقولتها "إيه بينتي مقربالي كده ليه."

ردت وقالتلي بأبتسامة "صباح الخير يا حبيبي"

"حبيبك؟؟؟ مي انتي عمرك ما قولتيلي كلمة عدلة، انتي كويسة يابنتي."

كملت كلامها اللي أول مرة أسمعه في حياتي "طبعا حبيبي وجوزي وأقرب ما ليا، هو أنا ليا غيرك  
يا بيبي"

"بيبي؟؟؟"

لا كده فعلاً الموضوع كبير، مي كانت أطف من أي مرة اتكلمت معايا وحاولت تعبرلي عن  
مشاعرها بدون خجل، كنت في قمة سعادتي لأنني حسيت لما ضحيت وبسطها ده خلاها تكون بالركة  
دي معايا .

قومت وأنا مش مصدق نفسي وبقولها "يااه أخيراً يا مي نطقتي، وعشان الكلمتين السكر دول أنا  
هقوم أخذ دش وانزل افسحك أجمل فسحة في حياتك."

وقومت بسرعة بكل حماس وأنا طائر من الفرحة وبدخل الحمام ولقيت اللي بتزعقلي أول ما فتحت  
الباب عليها "حسام قولتلك مليون مرة متهزرش معايا في الحمام أنا بخاف؟؟؟"

وقفت مكاني وأنا مذهول؟؟؟ اومال مين اللي صحتني من النوم برا دي؟؟؟ طب اللي بتزعق طول  
الوقت دي مراتي وعارفها لكن مين بنت الوارمة اللي ضحكت عليا بكلمتين حلويين وخلتني أحبها  
؟؟؟

ققلت الباب على مي وأنا خارج ركبي بتخبط في بعضها، لقيت جنبني ازازة المعطر مسكتها وأنا  
ناوي لو شوفتها ابخ عليها يمكن تموت ولا تغور في داهية.

لكن ملقيتهاش؟.. اختفت .

قعدت على السرير وأنا ماسك راسي من كتر التعب والصداع، أنا خلاص اعصابي هلكت من لعب العفاريه ده وقربت أشك في نفسي .

وفي نفس الوقت مش عايز ازعل مراتي.. بقيت أفكر إزاي أقنعها تغادر الفندق الملعون ده بدون ما تحزن؟؟.

دخلت البلكونه أتصلت ب أسامة صاحبي وقولتله "بقولك إيه يا أسامة أتصل بيا كمان ساعتين وقولي أي خبر بشع عشان عايز أعمل مقلب في مي واصدمها بس ضروري ها متنساش ."

كان ده الحل الوحيد اللي ممكن يقنع مي لما تلاقي خبر بأي مصيبة يخلينا ننزل من السفر.. وانتظرتها تخرج من الحمام من غير ما اوضحلها أي توتر أو خوف على ملامحي .

مي كانت عايزة تنزل البحر لكن كنت بحاول اعطلها واضيع في الوقت عقبال ما أسامة يتصل.. فات ساعة واثنين وثلاثة واسامة مبيتلش؟؟.

مي بدأت تحزن وتحس اني مش عايز أخرجها، مسكت التليفون أشوف هو أتأخر ليه لقيته قاطع شبكة ومش عايز يلقظ؟؟.

كنت مضطر افسحها النهارده لحد ما الشبكة جايز ترجع واسامة ينفذ اللي اتفقنا عليه. نزلنا البحر لكن مكنش عندي شغف للنزول فقعدت على الشيزلونج أتابع مي اللي بتلعب زي العيال في البحر ومبسوطة وبتجمع الصدف.

"الليلة لو مخرجتش، مش هتخرج طول عمرك"

سمعت الجملة دي من ست واقفة جنبني لكن بضرها، قومت اتعدلت وانا بقولها "بتكلميني أنا؟."

لفت وشها وهي بتشيل النضارة السودا اللي متدارية تحتها عينها الفاضية وشكلها بشع وقالتلي "بكلمك انت يا بيبى...؟!."

دي نفس الشيطان اللي بشوفها وبتظهرلي؟؟

جريت الشيطانة على البحر ناحية مي وجريت أنا كمان وراها علشان أنقذ مي قبل ما تغرقها.. كنت بجري بأقصى سرعتي علشان ألحقها واندفعت بكل قوتي على مي اللي وقعت على الرمل وقعدت تعيط وهي بتقولي "انت هزارك بايخ متهزرش معايا تاني.."

للأسف مي مش مستوعبة إنني بعاني وبشوف حاجات مبتظهرش غير ليا وبس .

قعدت اعتذرلها وأنا بقولها اني خايف عليها وأنها أمانة في رقبتني ولازم نسيب الفندق لأنني مش مرتاح واعصابي تعبانة طول مانا موجود هنا .

وكما المتوقع قلبت وشها وسابتني ومشيت قدامي مقموصة ورجعنا الغرفة من تاني..؟!!

وأنا داخل في الاستقبال بنت من العاملين في الفندق وقفتني وقالتلي جملة غريبة أوي "مرات حضرتك بتتصل عليك من بدري نوصلك المكالمة بالغرفة؟"

كنت عارف أن دي كمان لعبة مقرفة من العفاريت وكبرت دماغي منها وطلعت الغرفة ورا مي لقيت تليفوني بيرن بأستمرار؟؟ مي مسكته وهي بتقولي "شوف أسامة بيتصل بيك."

عملت نفسي من بنها وفتحت المايك علشان اخلها تسمع اللي هيتقال يمكن تفك وشها واحنا نازلين من السفر وقولت بصوت مسموع "الووو، ايه يا أسامة حد يتصل بحد في شهر العسل كده."

رد وقال بصوت كله تمثيل "حسام.. البقاء لله يا صاحبي."

مي اتخضت وبرقت وهي عايزة تعرف مين المتوفي وانا في بالي بضحك وبقول "يا بن اللعيبه اهي دي الاخبار ولا بلاش."

وكلت كلامي بأصطناع وأنا عامل نفسي مخضوض وبساله "مين مات يا أسامة مين؟" ..

رد وقال قبل ما يقفل السكة في وشي "مراتك التانية في ذمة الله."

لقيت مي جريت ع المطبخ وهي بتجيب سكينه وأنا مصدوم من غباء أسامة واللي عمله.. أنا كان قصدي يقولي خبر صادم مش خبر يضيعلي مستقبلي .

مي كانت بتجري ورايا بالسكينه بجد في الاوضة مبتهزرش وانا بحاول أفهمها أنه مقلب وسوء تفاهم وهي مصممة تطبخني على العشا .

التليفون رن وانا بهرب منها فوق السرير هددتني وهي بتقولي "هات التليفون وريني.. وريني مين عايز يعزيك في مراتك تاني."

كان مكتوب المتصل "بابا" هددتني وهي بتقولي "رد وافتحلي المايك."

وحطت السكينه في ضهري ووقفت ورايا تسمع اللي هيتقال.. أنا كنت بترعش وعايز اثبتلها أن كل

ده هزار بدل ما تتهور وتعملها بجد ورديت على والدي وانا خايف منه يشترك هو كمان في مقلب أسامة عليا وقولتله "خير يا حج.. حد مات عندك بردو؟".

رد وقاللي الجملة اللي بوظت اعصابي وهو بيزعق بجد "أنت فين يا زفت، حد يسيب مراته ترجع لوحدها من السفر؟ خالك قالب الدنيا وانت مختفي مبتدورش على مراتك ومحدث عارف يوصلك".

مراتي؟؟.. مراتي إزاي؟؟.. اومال مين اللي معايا وحاطة السكينة في ضهري دي؟.

التليفون وقع من ايدي من كتر ما بترعش ولسه بلف ابص ورايا لقيت السكينة واقفة في الهوا لوحدها ووقعت على الأرض؟؟ كان اللي كان ماسكها اختفى لما انكشف سره؟؟

مش عايز أقول إنني اكتشفت مهارتي السريعة في الجري وقتها أكثر من أي وقت تاني ولقيت فجأة الانوار كلها أطفئت؟؟ كنت ناوي انزل أعمل كارثة في الاستقبال قبل ما أمشي لكن لقيت نفسي بجري في فندق كله مهجور ومفيهوش بني ادمين؟؟

خرجت منه وانا مش مصدق الرعب اللي حصل فيا و ركبت أقرب عربية قابلتني على الطريق وهربت من المكان الملعون ده كله ورجعت على بيت والدي .

أول ما طلعت لقيت "مي" قاعدة مستنياني وأول ما شافتني جريت عليا وقعدت تبكي بشكل هيسيتيري .

حاولت أهديها وأعرف هي جت هنا أمته وإزاي من غيري؟ ردت وقالتلي "امبارح لما أنت فتحت الباب عشان تجيب الاكل وقولتلي في عفريت واقف وراكي اهربي وسبتني وجريت أنا شوفتها.. شوفتها يا حسام وكانت جاية عليا وعايزة تأذيني.. طلعت أجري وانادي عليك لكن اكتشفت اننا في فندق مهجور ومفیش غيرنا.. حاولت ادور عليك معرفتش وركبت وجيت على أساس أنك سبقتني، وحاولت اتصل بيك كتير لكن تليفونك كان مقفول ."

يعني ببساطة يومين العسل اللي قضيتهم كانوا في فندق مهجور وفلوسي راحت في الأرض. لكن لو في حاجة عدلة حصلت في الرحلة دي كلها هما الكلمتين الحلوين اللي سمعتهم من شبح مي وقت الصبحية ومنها لله تخفيضات الفنادق .

ت م ت

## جيم روم

طول عمري كنت بتفرج على فيلم "كامب" بتاع الشاب أبو قناع اللي بيقتل صحابه، وكنت متأكدة أنه مجرد ماسك عادي، بس اللي مش عادي هو اللي حصل لي ليلة امبارح واللي ظهر لي كان ابشع بكثير.

اقدملك نفسي الأول  
أنا مروة من اسكندريه وعندى 25 سنة ومنكرش انى بنت طايشة وبحب اغامر دايمًا ومن الصعب حاجة ترعبنى، كنت بتعمد زيارة بيوت الرعب والألعاب الدموية ومكنش في اى انبهار ولا ذرة خوف بتحصلي.

لحد ما ظهر لي إعلان على الفيسبوك لمكان جديد اتفتح فى القاهرة وسط البلد، وتحذيرات كتير أن مش اى حد هيقدر يجربها ولازم يكون فاهم ومدرّب من قبلها.

شدني الإعلان وبعثتهم على رسايل الصفحة وخذت ميعاد في نفس اليوم.

وقررت انى انزل القاهرة صد رد مع صحابي ولما اتصلت بيهم ملقتش ولا حد فيهم فاضي يتهور وينزل معايا، فى نفس الوقت وصلتنى رسالة من البيدج دي بتقولي "أى خايفة تيجي لوحدك؟" فرديت عليهم وقولت "عرفتوا إزاي، انتوا مراقبين التليفون؟" ومجاليش رد منهم نهائي.

معرفةش إزاي هما عرفوا انى مش لاقية حد ينزل معايا، لكن غموضهم ده حمسني اكثر وحسيت أن روح التحدي صحيت جوايا وقررت اروح لوحدى ومعتدش على صحابي.

خدت شنطتي وجمعت فيها احتياجاتي كلها ولبست هدموم مُريحة عشان المشوار ونزلت من غير حتى ما ابص ع الساعة فى ايدي.

ركبت مشروع القاهرة ولما وصلت فتحت لوكيشن المكان اللي خدني عند بيت كبير من الطراز القديم اللي بيتكلموا عنهم في وسط البلد دايمًا.

شكله مكنش مبشر بالخير حتى البوابة بتاعته مش بوابة مكان للألعاب، باب قديم ضخم حسيت اني هدخل تُرب مش جيم روم.

وقفت قدام البوابة شوية مش عارفة المفروض اخبط ع الباب ولا هما قافلين اصلاً وانا اللي جيت بعد ما قفلوا، فطلعت رقم البيديج واتصلت عليهم، محدش رد ع التليفون لكن لقيت الباب الضخم اللي ورايا بدأ يعمل صوت صرير كده كأنه بيتفتح لأول مرة.

حبكة اختيار المكان وشكل المبنى كل ده خلاني متحمسة أكمل وممشيش من هنا غير ما اكتشف كل حاجة عندهم واعرفهم اني خبيرة جيم روم قديمة وصعب حد يرعيني.

دخلت من البوابة ولقيت دخان كثير مش مخليني شايعة تفاصيل المكان، بدأت اتحرك وانا بقولهم باستهزاء "طب مش المفروض يكون في استقبال الأول؟ ولبس الألعاب والحركات دي ولا اي؟ دانته كده مستواكوا هابط ع الآخر" كنت بحاول استفز اي حد من التيم عشان يظهر ويرد عليا.

سمعت صوت البوابة بيتقل من ورايا وبدأ نور احمر يظهر من ورا الدخان، عشان اثبتلهم اني شجاعة سبقت أنا ودخلت ف الدخان وروحت للنور الاحمر ده، لقيته مجرد كرسي عادي وملفوف عليه شوية اضواء حمراء عبيطة.

اتأكدت وقتها أنها روم هبلة ومبتدئة ومعندهم اي إمكانيات للرعب.

قعدت ع الكرسي وانا حاطة رجل على رجل ويقولهم " واحد نعناع طيب دانا جاية من مشوار "

ولقيت اللي بيمدلي أيده من ورايا وماسك كوباية حمرا ولايس ماسك مرعب، ف البداية اتخضيت من سرعة ظهوره ورايا وخفيت خضتي دي بالهزار وخذت منه الكوباية وانا بقوله "لا سرعة الخدمة عندكو عظيمة الحقيقة، وربني كده عصير طماطم ده ولا بطيخ ولا اي"

وخذت كوباية العصير فعلا وشربت اول حبة والصدمة أنه كان دم بجد مش عصير، قعدت استفرغ ورميت الكوباية من ايدي عليه وانا بشتم ف التيم كله ويقولهم أن ده هزار متخلف ومش من حقهم يعملوا حركة زي دي.

الغريبة أن الشخص اللي رميته بالكوباية ده متهزش ولا نطق بأي كلمة، استفزني اكرت وقررت أشيل الماسك من وشه واشوف صاحب السخافة دي مين.

قربت منه وانا بضربه ويقوله اني هبلغ عنهم على حركة زي دي وان حد غيري ممكن يتسمم، بردو منطقتش وفضل ثابت زي مهو ولا كأني بضرب فى حيطه.

جبت اخري وقومت بضوافري وعزم ما عندي جيباه من الماسك اللي لابسه ومتداري فيه وكان الرعب كله لما طلع ف ايدي حته لحم من خده وظهر تحت اللحم ده دم مش وش بني ادم زي ماتخيلت.

ابتديت ارجع لورا وأنا فعلا المرادي اقتنعت أنه مش انسان وأنها مش مجرد لعبة عادية، وخرجت اجري وسط الدخان، لكن مش فاكرة اني ركبت ولا اني خرجت أنا فقدت الوعي، وصحيت على سريري دلوقتي، معرفش مين رجعني البيت واي اللي حصل، ولا ده كان حلم بالأساس، ندهت على والدتي عشان افهم أنا رجعت ازاي وقولتلها "ماما ااا ممكن تديني كوباية مائة"

فتحت الباب ودخلت وخذت الكوباية منها وانا بدعك عيني وقبل ما ابصلها لقيت صوت شيطاني بيقولي " مكمناش اللعبة"

بصيت لقيته نفس الشيطان اللي كان هناك في البيت المهجور، اتنفضت ورجعت لورا لحد ما وقعت من ع السرير وكملت زحف وهو واقف ثابت ووشه بينقط في دم مكان ما شيلت الماسك معرفتش اعمل اي حاجة غير اني اتكور مكاني وخبيبت راسي وانا بصرخ بهيسترية ومش قادرة انطق كلمة على بعضها

لقيت ماما جاية بتجري عليا وهي مخضوضة و بتحضني وبتحاول تهديني وهي بتقولي بفرع"اي اللي حصل، في اي يا مروة"

فضلت اشاورلها مكان الشيطان واقولها "هناك، واقف هناك" بصت حواليتها وهي بتقولي أن مفيش حد مكان ما بشاور وأنه مجرد كابوس بسبب الألعاب الزفت اللي بنزلها مع صحابي، عيني بقت تدور ف الغرفة كلها بدور على اللي شوفته من شوية ملقتش حد، اختفى وكأنه كابوس فعلا زي ما بتقول ماما.

رجعت لسريري وماما اطمنت عليا وخرجت وسابنتي، حاولت انام وارتاح لكن عقلي رافض وضربات قلبي مهديتش، جه ف بالي الرسالة اللي جتلي م البيدج قولت افتح واتأكد هو حقيقة ولا خيال، فتحت ولقيت رسالة منهم بتقول "حضرتك مجتيش ليه ميعاد الحجز؟"

إزاي؟ إزاي مروحتش الحجز اومال أنا روحت فين؟ واي البيت اللي دخلته ده، مقدرتش ارتاح غير ما افهم وبعتلهم قولتلهم "ممكن لو كيشن"

حببت أتأكد اللوكيشن ده هو اللي روحتة ولا لاء، بعتهولي ولقيته مكان تاني خالص غير اللي نزلت فيه، وعشان اقدر أشيل فكرة الرعب واللي حصل قررت اروح تاني لكن المرادي هأخذ صحبتي معايا وعشان لو حصل حاجة محدش يفكرني بهلوس، اتصلت بصحبتني "أسيل" واللي ف البداية رفضت لكن اتحايلت عليها وقولتلها اننا مش هنلعب احنا هنزور المكان بس، ولأنها صاحبة مقربة مني مبتحبش تزعلني وافقت واتفقنا ننزل الصبح في عز النور.

مجاليش نوم طول الليل لحد ما طلع الصبح واتصلت بيها وخذتها وركبنا القاهرة، نزلت المرادي في مكان مختلف ومشيت مع اللوكيشن والشمس كانت شديدة جدا اليوم ده "أسيل" بقت تقولي "مش عارفة اي الجنان بتاعك ده، حد يرمط حد الصبح في الشمس كده"

مقدرتش افهمها السبب اللي أنا جايا عشانه  
عشان متخافش وترجع في كلامها، كملت لحد ما وصلت للمكان، لكن المرادي كان مختلف تمامًا.  
بوابة سودا مرسوم عليها جماجم وشوية ألوان زي باقي الجيم روم اللي بنروحهم بالظبط، اتأكدت  
أن ده المكان الحقيقي وان اللي فات كان عنوان غلط أنا نزلت فيه، أو يمكن كابوس ومنزلتش  
بالأساس

لما اطمنت قوت لصحبتني أن خلاص نقدر نرجع دلوقتي، لكن لقتها اعترضت وقالتلي "يعني بعد  
كل المشوار والسحلة دي نرجع؟ تعالي ندخل نشوف واهو نرتاح شوية "

محببتش ازعلها وخبطت ع الباب عشان ندخل، وأول ما اتفتح لقيت نفس الدخان اللي شوفته أول  
مرة  
تراجعت وقلبي دق وخوفت أدخل وبلف لصحبتني عشان اقولها يلا نمشي من هنا، لقيتها بتزقني  
لجوه وبتقولي "هنكمل لعب" واتحولت لنفس الشيطان اللي شوفته.

وقعت ع الأرض جوه الدخان، وبقيت ازحف ع الأرض بحاول اهرب ومش شايفة اي حاجة، لحد  
ما خبطت في حاجة صلبة، مسكت فيها وقومت لقيته جسم راجل من غير راس، فضلت اصرخ  
أصرخ وانا بجري بعشوائية مش عارفة أنا رايحة فين، لحد ما فقدت الوعي ولقيت نفسي رجعت  
تاني لاوضتي.

خلصت حكايتي بكل تفاصيلها للدكتور النفسي اللي لجأته بعد كل اللي حصلي عشان ملقتش حد  
يصدقني، "أسيل" صحبتي اللي كانت معايا كذبتي وقالت اني مكلمتهاش ومفيش بينا حتى مكالمة  
تثبت ده، وأمي تعبت من كتر هلوستي وصراخي بليل، بقيت اشوفه في كل مكان اروحه، مبقتش  
عارفة اعيش وانام وانا حاسة بوجوده في اوضتي، مكنش في حل غير اني ادور على دكتور ع  
النت يسمعني ويفسرلي اللي بيحصل، وبعد ما اخيرًا خلصت كل اللي شوفته لقيته بيقولي "كان لازم  
تكلمي لعب معايا..."

**تمت**

## دُميتي الملعونة

طول عمري بسمع عن الجن العاشق والعلاقات الناجحة اللي بيخربها، لكن اللي حصلي أنا ومراتي كان أبشع مما تخيلنا.

اعرفكم بنفسي الأول، أنا عمر من القاهرة عندي 28 سنة.

طول عمري كنت طفل مختلف وهواياتي غريبة حبتين، اول هواية ليا هي العرايس اللعبة، أو زي ما بيقولوا عرايس البنات.

لما كانت والدتي بتخيرني في العيد بين المسدس اللعبة ولا البندقية كنت بقولها "لأ يا مامي عايز عروسة".

ورغم اعتراض والداتي وتنمر أصحابي المستمر عليا، مقدرتش أتنازل عن حبي للعرايس، وكنت شايف أن ده شئ طبيعي جدًا اني أحب العرايس حتى لو هي بتتصنف للبنات فقط.

مكنتش اعرف ان كل ده هيحصلي بسببهم! استمرت في شراء العرايس وحبهم لحد ما تميت العشر سنين، هنا والدتي بدأت ترمي كل العرايس بتاعتي وكل يوم اقوم من نومي ألاقي عروسة ناقصة، كانت بتحاول تخفيهم عني بالتدريج علشان ميحصليش اكتئاب زي ما الدكتور بلغها.

لكن أنا كنت اذكي منها وقررت اخبي عروسة منهم تحت سريري، وهي اكثر عروسة بحبها وبحب اتكلم معاها وقريبة مني، العروسة "شوكي" وكانت أكبر عروسة اشتريتها فحياتي.

ولما والدتي لاحظت انها مش موجودة سألتني عليها و قولتلها اني رميتها علشان اتقطعت مني، ووضحتها قد اي أنا مبقتش أحب العرايس ومش فارق معايا علشان اتخلص من التنمر اللي بيتوجهلي يوميًا من كل اللي حواليا.

فضلت العروسة تحت سريري، بخرجها بليل لما كلهم بيناموا واقعد اتكلم معاها وادألعب بيها بعدين ارجعها تاني.

استمر حبي وتعلقي بالعروسة دي لحد ما تميت ال 27 سنة للأسف.

كنت بحكيها كل حاجة فى يومي، وبما اني مليش صحاب دراسة ولا عمل وشخص فى حالي جدًا فهي كانت صديقتي السرية.

وزي اي شاب ف السن ده قابلت نصي الثاني وخطبتها ولقيت اللي تكلمني وتهتم بيا وتشغلي عنها، وبدل ما كنت بطلع العروسة من تحت السرير شبه يوميًا بقيت افكرها كل اسبوع ويمكن اسبوعين .

كنت بحس بأصوات خبط بسيطة من تحت السرير لكن كنت بقول دي تهيوّات، وكنت بفتح ابص عليها الاقيها زي ماهي ف اسيبها مكانها وأكمل نوم.

لحد ما حددت يوم فرحي وجه اليوم اللي هسيب اوضتي للأبد بكل محتوياتها وهمشي، لميت كل الاشياء اللي هحتاجها علشان انقلها بيتي الجديد، وطبعًا مقدرتش اخذ العروسة علشان مراتي متقولش عليا طفل، وكمان أنا مبقنتش محتاجها لأنني لقيت الونس الحقيقي.

خلصنا الفرحة أنا وعروستي وطلعنا بيتنا، دخلت هي الاوضة تبديل هدومها ويدوب خلعت حجابها ولقيتها خارجة بتجري عليا وبتقولي "عمر اللحتي، في حاجة بتتحرك وتخربش في الدولاب" دخلت جري علشان اشوف في اي ملقتش حاجة نهائي، فقولتلها يمكن صوت من الشارع وعلشان الشقة جديدة علينا ف احنا مش هنتأقلم بسهولة.

طمنتها ودخلت تكمل لكن لقتها خرجت تاني وهي وشها جايب ألوان وبتقولي "الصوت تحت السرير، أنا شوفته بيتهمز" وقتها أنا قلفت بجد، ودخلت رفعت المرتبة وأنا قلقان يكون فار لأنني بخاف م القوارض، لكن انصدمت لما لقتها...وقولت بصدمة "شوكي..."

مراتي جت تبص وهي بتسأل "اي شوكي دي؟" مقدرتش أقولها أنها عروستي، وإني كمان مجبتهاش معايا علشان متخافش وتحس بنفس اللي حاسس بيه دلوقتي، فكذبت عليها وقولتلها أنها عروسة أختي الصغيرة وتقريبًا نسيتهها واحنا بنفرش الشقة.

خذت مراتي وقررت ننام في الغرفة الثانية لأنني اتوترت من وجود العروسة. وصحيت الصبح قبلها ودخلت الحمام، لقيت المراية مكتوب عليها حروف بالدم وكان مكتوب كده بالظبط "I O Y" وطبعًا دي اختصار لكلمة. I Love you

قلبي دق وخوفت مراتي تشوف اللي شوفته، مسحت بسرعة المراية ودخلت علشان اشوف العروسة مكانها تحت السرير لكن ملقتهاش.

اختفاءها وترني اكثر وتعب اعصابي، أنا متأكد اني شوفتها امبارح ومتأكد كمان اني مجبتهاش هنا معايا البيت.

لما صحيت مراتي سألتها هي شالت العروسة من مكانها؟ قالتلي انها مشفتهاش وأنها متحركتش من امبارح من الاوضة، لكن بدأت تشك ف اهتمامي بالعروسة، وتوتري اللي واضح عليا من امبارح.

فكرت في حيلة واتصلت بأمي قولتلها أن في فلوس واقعة مني تحت السرير بصيلي عليها، علشان لو لقت العروسة اكيد هتقولي في عروسة تحت سريرك!  
لكن أُمي كمان قالتلي مفيش حاجة تحت السرير، بقيت حاسس اني مهدد بالخطر، اختفاء شوكي بقا شئ مرعب اكثر من ظهورها، والدم اللي شوفته الصبح ع المرايا متأكد أنه منها.

مكنتش اعرف ان هينقلب السحر ع الساحر في يوم وحيي ليها ممكن يقلب بحقيقة معاها.  
حسيت اني هظلم مراتي معايا بسبب سكوتي المستمر وقعدتي لوحدي كثير، فطلبت منها أننا نساfer اسبوع ونقضي شهر العسل بعيد عن البيت.

حجزت في فندق تبع شغلي وطلعنا، لكن ملحقتش اتهدى حتى بأول ليلة.

مراتي دخلت تاخذ دش اول ما وصلنا، ولقيتها بتصرخ ف الحمام، جريت عليها قالتلي أن النور اتفتح واتقل عليها اكثر من مرة!

اتأكدت انها مش هتسبني في اي مكان هروحه، واتحججت لمراتي وقولتلها اكيد الكهربا هي اللي بتعلق وطمنتها وانا هموت م الخوف.

نزلنا ناكل في الفندق تحت وطلعنا علشان نرتاح، مراتي فتحت دولابها علشان تطلع حاجة تلبسها لقت هدومها كلها ملطخة بالدم!

اتخضت وقالتلي أن في حاجة مش طبيعية، وأنها حاسة اني مخبي عليها سر.

مقدرتش اخبي عليها اكثر من كده وحكيتلها، فضلت تعيط وهي بتقولي "حرام عليك، اكيد هي دلوقتي بنتنقم مني"

قولتلها "صدقيني أنا حبتها كصديقة بتسمعي مش اكثر، لكن يوم ما حبيت بجد حبيتك انتي"  
وكأنها قاعدة معنا بتراقبنا والجملة دي أثارت غضبها، ولقينا النور كله بيتهز ف الاوضة وبيفتح ويقفل، والشبابيك كأن عاصفة شديدة حصلت بقت تفتح وتقل بصوت مرعب، خoft على مراتي قبل ما اخاف على نفسي، وقولتلها أخرجي بره وأنا هصلح غطتي واتصرف معاها.

خرجت مراتي وبقيت لوحدي ف الغرفة بواجه كل العصيبة اللي هي فيها، وبقيت اكلمها وانا مش شايفها بقولها بصوت عالي "لو عايزة تأذيني أنا قدامك، هي ملهاش ذنب، يلا تعالي أنا مبخافش

النور كله قفل ولقيت الكرسي الهزاز بيتحرك وييلف ناحيتي وهي قاعدة عليه، لكنها مكنتش مجرد عروسة لعبة، كانت بتتحرك ويتمسح دموعها اللي عبارة عن دم نازل من عينيها وبوقها ميتسم وسایل عليه الدم، كان شكلها مرعب جدًا، لكن تماسكت وبقيت أقولها بخوف "أنا مبقتش عايزك، ارجوكي اختفي من حياتي وسبيني مع اللي بحبها متبوظيش حياتي"

زادت دموعها ولقتها بتشاورلي بأيديها بعلامة الوداع، بعدها رجع النور واستقر كل شئ حواليا، خرجت لمراتي وانا حاسس اني باخد نفسي لأول مرة، وحزنا اوضة تانية نرتاح فيها م اللي حصل، وحكيتهلها أنها ودعتني وأكد مش هترجع تاني.

مر الليل كله بسلام، وصحينا الصبح مبسوطين أننا أخيرًا اتخلصنا من اللعنة بالسرعة دي بدون خسائر، ودخلت مراتي تاخد دش، لكن المرادي مخرجتش تصرخ زي كل مرة، مخرجتش نهائي! اتاخرت كتير في حمامها، خبطت عليها اكثر من مرة واستعجلتها لكن مكانتش بترد، اضطريت افتح وادخل اشوقها بنفسي، ولقيت اسوء منظر شوفته فحياتي كلها.

لقيت مراتي نائمة ف البانيو وغرقانه، والبانيو كله دم وايديها خارجة من البانيو بتشاور على حاجة، لما بصيت عليها لقيت مكتوب .. Bye هنا عرفت أن شوكي مكنتش بتودعني لوحدها، هي قررت تاخذ اللي خدت مكانها معاها.

**تمت**

## حامل المقابر

\_ ابني اتخطف من بطني .

أنا حامل في الشهر التاسع، وطبعاً معروف الوحم ده بيحصل في أول الشهر فقط، لكن أنا وحمي كان مختلف و غريب حبتين .

من بداية حملي وانا نفسي جداً أزور المقابر .

عارفة أنها فكرة مُرعبة لبعض الناس، لكن اللي جرب الوحم هيعرف أنه إحساس لا إرادي من الأمهات .

لما قولت لجوزي "يا كريم أنا نفسي أوي أروح المقابر، مفيش حد نزوره؟".

وقتها كريم قلق عليا ورفض بشكل قاطع، فكان لازم أسمع كلامه واقفل الموضوع علشان ميكيرش.

بس بدأت نفسي تروح بعدها للدم!

أيوا زي ما سمعتوا كده بالطبط، نفسي أشرب دم رغم إني عمري ما عرفت طعمه عامل إزاي.

كريم لما عرف اتهمني بالجنون، وقال إني ابتديت اخرف ومحتاجة دكتور نفسي .

مقدرش يفهم أن ده كمان كان غصب عني، وعلشان مش قادرة اتحكم في إحساسي، بقيت اعض في أيدي لحد ما تجيب دم، لكن أول ما بشوف شكل الدم بخاف وبغسل أيدي بسرعة قبل ما اتجنن بجد .

ابتديت أشك في هوية الطفل اللي في بطني.

وبقيت أسأل نفسي، معقول أكون حامل في مصاص دماء !

طب هل هو من نسل إبليس ومش بشري؟ مهو كل اللي بيحصلي ده فعلاً مش طبيعي .

من وقت ما حملت فيه وجوزي بدأ يزهد من تصرفاتي وأسلوبى وبعد عني، حتى الكلام مبتكلموش رغم أننا قصة حب قديمة .

اتصلت في يوم بواحدة صحبتي معاها ولدين علشان أتأكد هل اللي بيحصلي ده طبيعي ولا مُريب ويستحق الخوف والقلق فعلاً .

وسألتها "يا ريهام هو ممكن تتوحم على أشياء دموية؟ زي الدم والمقابر والحاجات دي؟".

رد ريهام ريحني لما قالتلي "توقعي من الوحم أي حاجة، واياكي متنفذيش أحسن يطلع الواد مشوه ولا مريض".

لما وصلت الشهر التاسع احساسى واشتياقي لزيارة المقابر مَنتهَاش، وخوفت فعلاً ابني يجي تعبان ومريض، وقررت انزل اروح من ورا كريم .

انتظرت لما كريم رجع من شغله على الساعة ستة كده وقولتله إني هروح ازور ماما وارجع على طول .

كذبت لأنى معنديش حيلة تانية .

لكنه رفض وقالى "لا مترجعيش، خليكي الليلة دي هناك علشان مترجعيش متأخر لوحدك" ودي كانت فرصة هائلة بالنسبالي علشان أقدر اقعُد في المقابر براحتي.

الوقت كان ليل خلاص والدنيا بدأت تعتم، لكن مفيش ذرة خوف بنتحرك جوايا، نفس الاشتياق ملازمي وفرحانة أني اخيراً خلاص رايحة للمقابر .

كنت عارفة أن في تُرب على بُعد ساعة من البيت عندي، نزلت في نص الطريق رغم نظرات الناس اللي كانوا أكيد بيقلوا "مجنونة دي ولا ايه، حد ينزل في مكان مقطوع زي ده" لكن مهتمتش.

الترب كانت على طريق عربيات ومفيش بني آدم واحد موجود حرفياً، ده غير عتمة الليل يعني مفيش اسوء من كده أجواء.

دخلت جوا المقابر وفضلت اتعمق وحاسة بارتياح رهيب كأنى في جنينة هواها حلو ونضيف .

تعبت من كتر المشي وابتديت احس بوجع رهيب كأنى بولد!

مسكت بطني وبصيت حواليا لقيتني في نص المقابر ومفيش اى حد اقدر استغيث بيه .

الوجع بيزيد عليا كأنه طلق الولادة!

اتسندت على تربة جنبي وقعدت على الأرض اصرخ واقول "حد يلحقني، أنا بوولد".

من شدة التعب حسيت إني داخلة في اغماء وعيني بدأت تشوش .

لكني لمحت أطياف سودا جاية من بعيد، حمدت ربنا أن في حد سمعني وجاي يلحقني أخيراً .

الخيالات السودا دي اتجمعوا حواليا في دايرة، كانوا ستات لابسين اسود في اسود شكلهم سُكان الاحواش .

ابتديت اهلوس واقولهم "انجدوني، مستشفى.. أبني هيموت ."

كل اللي كنت سمعاه منهم وقتها كلمة واحدة بس بتتردد "ابننا جه، ابننا جه، ابننا جه" مكنوش بني ادمين! كانوا مسوخ، وشوشهم عبارة عن جلد وخالية من الملامح .

حاولت أسند نفسي بنفسي وأقوم من مكاني وانا بعافر بكل قوتي علشان أهرب، لكن مقدرتش، ومحستش بنفسي خالص كأن روجي اتسحبت مني وانا حاسة بنزول الجنين .

فوقت على شمس ضاربة في وشي وحرارة رهيبه في جسمي كله كأنني نايمة جوا فرن، لقيت نفسي نايمة جنب القبر اللي اتسندت عليه امبارح!

اتفزعت، وابتديت اترعش، أنا إزاي نمت ليلة كاملة في المقابر هنا!

طب أنا ولدت بجد ولا كل دي مجرد تخاريف! بحط أيدي على بطني اللي لسه فيها تأثير مكان الألم ملقتش حاجة!

بطني اللي كانت منفوخة قد كده قدامي، بقت فاضية!

قومت زي المجنونة وأنا بسأل "الواد فييين، ابني فييين" وبقيت ادور حواليا، لكن حتى المكان اللي كنت نايمة عليه مفيهوش أثر دم أو ولادة .

خرجت على الطريق برا استغيث بأي عربية وحد يلحقني .

وقفتلي عربية مليانة ركاب، من خوفي وخضتي بقيت اقولهم "ابني، ابني كان في بطني خدوه، سرقوا ابني من بطني." .

ركبوني معاهم وهما فاكروني مجنونة وحاولوا يفهموا مني أنا ساكنة فين بالظبط علشان يرجعوني لأهلي.

افتكرت كريم! اكيد كريم هيفهم ويساعدني نلاقي ابننا .

جريت على البيت بسرعة ومش مهتمة بنظرات الناس عليا .

خبطت الباب كتير لحد ما فتحتي كريم، كان لسه صاحي من النوم، اتصدم من هيئتي وقال "انتي ايه اللي عمل فيكي كده، وكنتي فين."

قعدت اصرخ وانهارت من العياط وقولته "أنا روحت المقابر، وخطفوا ابننا يا كريم، ابننا خدوه وولدت هناك."

كريم حط أيده على راسه بصدمة وزعق فيا وقال "ابوس ايدك كفاياا بقاء، كفايا مصايب وفضايح لحد كده، انتي مش أول واحدة تكون مبتخلفش، حرام عليك تعبتيني ومفيش فايده، ده رزق من ربنا ليه معترضة أنه مش مكتوبلك ولا مكتوبلي."

يعني إيه!! يعني أنا أصلاً كل الشهور دي متوهمة بالحمل؟ يعني أنا مكنتش حامل!.

كانت صدمة بشعة على عقلي أنه يستوعبها، بل رفضت استيعابها ودخلت اوضتي بكل هدوء .

طلعت ببيجامة حلوة وخذت دش ورجعت نضيفة، وخرجت تاني لكريم قولته "هاتلي مانجا، أنا بتوحم على مانجا."

تمت

## لعنة المهندس

قالتلي هعملك عمل يخليك متنامش من كتر تفكيرك فيا، وحاليًا مبقتش بنام خالص من كتر الرعب والخوف اللي بيحصلي .

أنا مهندس أمير عبد السلام، شاب وسيم وعضلاتي مقوية قلبي زي ما بيقولوا.

عايش لوحدي من بعد ما بابا وماما واختي سافروا كندا وقررت اكمل أنا حياتي في مصر لشدة تعلقي بمعيشتي فيها، وياريتني ما قعدت .

في يوم وأنا شغال في موقع جديد استلمته، وطبعاً ليا هبية وكاريزما وسط العمال، ظهرت بنت أقل من العادية، كانت شايلة صنية شاي وبتعزم على العمال، وقتها افتكرتها عاملة زيهم يعني .

ولما قربت ناحيتي علشان تعزم عليا، العظمة خدنتي وعاملتها بتكبر وقولت لها "شكراً شكراً أنا باخد الشاي في المكتب مش هنا ."

اتصدمت لما لقيتها بتزعق وبتقولي "هو حد كلمك أصلاً، ما عنك ما شربت أنا بعزم على عم سيد! تشرب يا عم سيكا؟".

عم سيكا بصلي وضحك وقالها "تسلمي يا استاذة رانيا كلك ذوق ."

وشي أحمر من الغضب وسألت عم سيكا... قصدي عم سيد وقولتله "هي مين البت أم لسان متبري منها دي؟ وازاي تكلمني كده هي مش عارفة أني ممكن اطردها نهائي.".

رد عم سيد وقالني "حلمك يابشمهندس وسع خلقك، دي أستاذة رانيا بنت صاحب القرية، بس هي متواضعة كده ومتحبش تتعالى على اللي أقل منها نهائي.".

حسيت أنه بيلقح عليا لكن عديت الموضوع .

في اليوم ده جالي مشكلة من عامل الحفار أن الأرض اللي بيحفر فيها المسافة اللي حددتها غير صالحة وفيها مشكلة، روحت بنفسي اشوف المشكلة واكتشفت أن في حجر صلب غريب عن كل الأحجار موجود في المكان ده .

لما قربت منه ولمسته حسيت أن عليه نقوش محمية، كأنه قطعة أثرية من زمن قديم، حاجة من الحاجات دي، لكن طبعاً لأنني مش هعطل شغلي طلبت حفار اكبر يشتغل في المكان ويكملوا على أي حال .

رجعت البيت مش طايق نفسي، ضغط شغل، وحتت بت تهزقني قدام الناس والمصيبة إني مش هقدر اشتكيها لا تطردني وتكون الفضيحة أكبر .

ولأني أمير عبد السلام، أكيد مش هسيب حقي بالسهولة دي .

تاني يوم رجعت شغلي في القرية وانتظرتها لما ظهرت، وشاورتلها وقولت بابتسامة "لو سمحتي ممكن كوباية شاي؟"

هي طبعا توقعت اني بجر كلام معاها، وما صدقت وحت ناولتني كوباية، أول ما دوقتها رغم أنها كانت حلوة إلا إني رميت الكوباية وقولتلها "إيه القرف ده، حد يحط سكر كثير كده."

كنت قاصد اخرجها، وتقريباً كده نجحت، بعد ما بصتلني من فوق لتحت بدون ولا كلمة ومشيت .

ورغم إني حسيت بالانتصار عليها، لكن الشعور ده اختفى في خلال دقائق وابتديت أحس بالذنب، هي في النهاية بردو بنت ليها قيمتها ومكانتها قصاد العمال .

طلعت مكتبي وفضلت قاعد متابع الباب يمكن تمر من قصادي، مسكت الأوراق أقلب فيها بفرغ ولقيتها واقفة قصادي جوا المكتب وبتقولي "انت غلبان أوي!."

اتصدمت من وجودها المفاجئ، دي ظهرت في لمح البصر جوا المكتب إزاي كده، حاولت أداري خوفي وقولتلها "نعم؟ بتقولي حاجة."

كررت كلامها وقالت "بقولك أنت غلبان أوي، فإكر أن الموضوع بينا انتهى وللاسف فتحت على نفسك بوابة مهيبة، أصل أنا باخد حقي بطريقة مختلفة خالص."

ضحكت على طفولتها اللي بتتكلم بيها وقولتلها "كان نفسي أخاف صدقيني، لكن تهديدك موتني ضحك مش خوف."

الشرارة كانت بتخرج من عيونها، وقربت وقالتلي "صدقني أنت من الليلا دي مش هتعرف يعني إيه نوم ."

ومشيت من قدامي.. لأ دي اختفت!

مش فاهم، بس مجرد ما رمشت عيوني هي اختفت، خرجت ادور عليها في الطريقة ملقيتهاش، كإني كنت بتوهم، أو يمكن هي دخلت مكتب جانبي بسرعة، اكيد خافت مني بردو مانا هيبية .

رجعت البيت بفكر في كلامها وقد إيه تهديداتها كلها عبيطة زيتها وبقول لنفسي "اتحدفت عليا من انهى داهية دي"، لكن أول ما فتحت باب الشقة اتزحقت في صابون محطوط على الأرض !

إيه اللي جاب صابون هنا! اتعصبت جداً وضهري وجعني، لكن اكيد ده مش في اعتبار الانتقام بتاعها ولا فكرت فيها وقتها .

خلعت هدومي ودخلت أخذ دش ومعايا البشكير بتاعي علقتة على شماعة الباب من جوا، فتحت الدش ونزلت الرغوة من على شعري لعيوني والدش قطع !

مشيت أيدي على الدش لقيته مقفول! مين اللي قفله وازاي معرفش ...!

فتحته وكملت لكن اتقفل عليا اكر من مرة، شكيت أنه بيعلق ولا باظ وكان اسوء دش اخده في حياتي لما سمعت باب الحمام بيخبط عليا؟! !

انا عايش لوحدي في الشقة، قولت بصوت عالي "ميينين ."

مفيش رد.

بدور بأيدي على البشكير علشان أخرج بيه لكن ده كمان اختفى! فعلاً اللي بيحصل مش طبيعي وأول مرة يجوالي في حياتي .

خرجت اتسحب وجريت على اوضتي ولأول مرة أكون حاسس بكمية الرعب دي .

اتدفت في سريري وقولت امسك تليفوني شوية قبل النوم، لكن كان في حرارة غريبة في الغرفة برغم اني واخذ دش والجو شتا .

صهد كأن في نار شغالة في الاوضة جنبي !

ابتديت افكر كلام البنبت واللي قائلته، معقول يكون بجد؟ طب هي عملتلي عمل ولا سحرتني ولا إيه بالظبط!

مقدرتش أنام من شدة التفكير، لكن قولت هريح عيوني واغمضهم جايز ارتاح ولو ساعتين، لكن تقريبا عدم ارتياحي ده كله بسبب الجوع، مانا مكلتش من أول اليوم على الفطار .

قومت طلعت وجبة جاهزة من التلاجة دخلتها الميكروويف على خمس دقائق، وخرجت شغلت الشاشة جبت فيلم حلو أسهر عليه .

صوت الميكروويف اشتغل، علامة على أنه انتهى .

دخلت علشان اطلع الوجبة من جواه، لكن لقيته فاضي! يعني أنا مدخلتش أكل ؟ .

اتعصبت بشكل مبالغ وقولت أنا هخرج أنام خلاص، وانا في طريقي لاوضتي لفت انتباهي أن الشاشة مقفولة !

كل شيء بعمله، حد بيعاندني وبيعمل عكسه .

أتأكدت أن اللي بيحصل ده كله مش تخاريف ومش جوع، ده جن معايا في الشقة، وجن غنت ومكشوف كمان.

مكنش قدامي حل غير أني اغطي وشي زي العيال الصغيرة وانام لحد ما الليلة دي تعدي على خير .

والحمد لله عدت، وصحيت الصبح جريت على شغلي علشان اعتذر لبنت صاحب القرية، اللي أول ما شوفتها قولتلها "انسة رانيا لو سمحتي ممكن كلمة ."

قالتلي "نعم؟ عايز شاي تاني؟".

اعتذرتلها وقولتلها "أنا اسف جدا على اللي حصل، انتي لما جيتي المكتب امبارح كان مفروض اكون لطيف معاكي عن كده انا فعلاً ندمان."

البنت بصلتي بأستعجاب كده وقالتلي "أنا روحتك المكتب؟ وانا إيه يطلعني مكاتب أصلاً أنا متحركتش من هنا!"

لحد دلوقتي أنا مش فاهم حاجة! اومال مين البنت اللي ظهرتلي في المكتب دي؟ وليه كل اللي بيحصلي ده! لو عندكم انتم تفسير ياريت تفهموني، دي كانت كل حكايتي .

**تمت**

## أبي القاتل

بتكلم مين في اوضتك يا سليم؟

-بكلم مروان يا ماما .

كانت كارثة وصدمة مش قادرة اعبر عنها لما لاحظت أن سليم أبني اللي عنده خمس سنين بيكلم نفسه في اوضته وصوته عالي.

في البداية كنت فاكرة سليم بيكلم الألعاب بتاعته كالعادة، لحد ما سمعته في مرة وأنا في المطبخ جنب اوضته بيقول "انت بتنزف دم، استنى هجبلك مناديل من برا."

وبالفعل خرج قدامي يجيب علبة المناديل ورجع، حسيت أن الموضوع مش مجرد ألعاب بيعمل معاهم نقاش وبيتسلى زي باقي الأطفال لأ .

الموضوع أكبر وأخطر من كده بكثير .

أنا منة عبد الواحد، متزوجة من سبع سنين، ومعنديش اولاد غير سليم بس اللي ربنا رزقني بيه بعد سنة وشوية من جوازي .

جوزي محاسب في بنك وشخص خلوق عوضني عن قسوة والدي اللي عانيت منها طول عمري، والحمد لله ربنا نجاني من جبروته عليا وحاجات كتير عمري ما هسامحه فيها حتى لو مات .

كنت فاكرة إني خلاص ارتحت وحياتي استقرت بعيد عن بابا، لحد ما سليم فاجئني بإسم مروان!

مروان أخويا الوحيد اللي مات عمره عشر سنين في سريره وعلى رقبتة علامات زرقا غريبة كأنه مخنوق!

وده من أكبر الأسباب اللي خلنتي كل ليلة بتمر عليا بدعي فيها على بابا أنه يدوق من اللي عمله فينا، رغم أنه أنكر وقتها قتل مروان وكان ببيكي، لكني مشوفتش دموعه دي غير أنها دموع تماسيح .

وحاليًا بابا عنده كانسر وفي آخر أيامه على فراش الموت زي ما قالتلي ماما، لكن لاجل مروان كان

مستحيل أسامح وقلبي يحن أو حتى ادعيه بالشفا بيني وبين نفسي .

جايز كان ممكن اسامحه لو الموضوع مجرد قسوته عليا وضربه واهانته، لكن إزاي كان ممكن أسامح وهو السبب في موت أقرب الأشخاص ليا؟

جسمي تلج لما سمعت إسم مروان من سليم أبني اللي المفروض أنه ميعرفش أي حاجة عنه، ولا عمري حكيت عن موضوع مروان قدامه أبدًا .

قعدت قصاده ومسكت ايديه علشان أتأكد من اللي سمعته وقولتله "سليم يا حبيبي أنت قولت بتلعب مع مين؟".

رد وهو بيشاورلي ناحية مكتبه وقال "مروان يا ماما، خاف منك واستخبي أهو".

بصيت ناحية المكتب بخوف، مش شايفة حاجة خالص، لكن ..

لكن لاحظت أن الورد البلاستيك اللي على المكتب بيتهز!؟ كأن حد حركه بالغلط، أو جايز أنا اللي بقنع نفسي بتخاريف قديمة ومجرد الهوا بس اللي حركه .

مروان كان بيظهرلي بعد ما مات في أحلامي وفي أركان اوضتي، وبيفضل واقف باصصلي بصمت وعيونه كلها دموع وحزن، وبوقه متخيط بشكل عشوائي مرعب .

كان بيظهر في الأيام اللي بتخانق فيها مع بابا، كأنه بيواسيني، لكنه اختفى من سنين ومظرهش من ثاني مطلقًا.

حاولت اقنع نفسي أن سليم سمع الإسم من أي مكان وبيخلق صاحب وهمي من العدم زي بقية الأطفال اللي في عمره، وتخطيت الأمر .

طول الليل بتقلب جنب جوزي ومش قادرة أوقف تفكير في مروان وذكرياتنا القديمة اللي ساكنة جوايا.

لسه فاكرة آخر أيامه لما كان بيقولي "أنا عندي الحل في أن بابا يتغير، أنا هقدر أعمل ده" كان عنده أمل أنه يغير في بابا ويفوقه، لكن محاولاته انتهت بموته .

قطع تفكيري صوت حاجة بتلعب في المطبخ، شكيت أن سليم قام من نوم وخوفت بوقع حاجة عليه وجريت دخلت المطبخ اللي كان ضلمة ومفيهوش حد!

كنت لسه هدخل اطمن على سليم في اوضته لكن لفت نظري الطبق والمعلقة اللي محطوطين في

الأرض رغم إنني مشطوبة المطبخ قبل النوم.

فتحت النور ومسكت الطبق من الأرض واتصدمت من شكل المعلقة... دي دي دي...؟!!

دي معلقة مروان اللي كنا بنتخانق عليها زمان سوا وخذتها معايا في بيتي حطيتها في النيش كذكرة منه، إيه اللي خرجها؟!!

مروان عايز يقولي أنه موجود هنا ومش وهم!

وعلشان أتأكد جريت على أوضة سليم أشوفه هو اللي عمل كده ولا فعلاً نايم ومخرجش .

ولقيت سليم في سابع نومة .

قلبي كان واجعني ومش قادرة أفهم اللي بيحصل حواليا دلوقتي، واللي فرعني أكثر واكثر وقتها لما رن تليفون الأرضي في الصلاة برا.

خرجت رجلي مش شيلاني ومش فاهمة مين ممكن يتصل في وقت متأخر زي ده .

كانت أمي .

صوتها كان ببيكي بحرقه وهي بتقولي "يا منة ابوكي خلاص بيموت يابنتي، بالله عليك راجعي نفسك وتعالى قوليله سامحتك، بالله عليك يا بنتي أنتي عمرك ما كنتي جاحدة كده، ولو كان وحش معاكي أو قتل اخوكي بصحيح ربك اللي بيحاسب عباده مش احنا."

قلبي اتحرق وأنا بفتكر حادثة مروان وشكله الفظيع اللي كان فيه على سريره لما مات، إزاي بتطلب مني اسامحه وإزاي علشان بيموت لازم اريحه؟ طب وهو مفكرش في راحتنا ليه؟! ليه مستكفاش بجبروته وقسوته وبس، ليه قتل مروان!...

السؤال اللي طول عمري ملقتش إجابة عليه غير إنكار من الكل، وكنت واثقة أن مروان شاف سر أو حاجة لوالدي وعلشان كده أتخلص منه .

عرفت ليه دلوقتي مروان بدأ يظهر لسليم أبني وبيثبتلي أنه حواليا في البيت، مروان بيقولي متسامحيش في حقي وبينبهني مضعفش .

غصب عني انفعلت على امي وقولتها "متجلبش سيرة الإنسان ده تاني، وخدي بالك اللي بتطلبه ده من المستحيالات وحتى لو مات أنا هفضل ادعي عليه ومش مسامحة."

وقفلت معاها وأنا في قمة غضبي .

وفي نفس اللحظة اللي قفلت فيها رن التليفون ثاني، كنت عارفة أن أمي مش هتسكت ومش هتسيبني في حالي وهتفضل تحاول معايا، رفعت السماعة وأنا بصرخ وبقولها "عايزة مني ايه، كفايا بقا سبوني في حالي."

لكن اللي رد عليا مش امي .

مروان اللي رد عليا بصوته اللي عمري ما نسيته وقال "أنا منتظرك."

جسمي انتفض وحسيت بكهربا بتسري في كل حته مني، وقولتله زي المجنونة "مروان؟ مروان أنت فين؟ مروان رد عليا يا مروان."

لكن مفيش رد، السكة اتقفلت.

أتلقت حواليا بدور عليه في كل الأركان وأنا مش مستوعبة اللي قاله وفضلت اكرر كلامه "أنا منتظرك؟ منتظرنى فين رد عليا؟ قصدك إني هموت! طب بابا هيموتني! مروان منتظرنى فين يا مروان."

خرج جمال جوزي على صوتي وهو بيقولي "منة خير في ايه مالك؟".

ارتبكت وحاولت أداري اللي حساه لكن مقدرتش، اترميت في حضنه وفضلت أبكي وجسمي بيترعش وهو مش فاهم مالي .

اضطريت اكذب عليه وقولتله أن بابا تعبان شوية بس وإني خايفة عليه .

جمال ميعرفش أي حاجة عن عقدي مع والدي ولا ذكريات الماضي اللي حبساها جوايا، ولا يعرف أني لما بقوله رايحة زيارة لاهلي إني بقابل ماما في الشارع مش في البيت .

هديت بصعوبة ودخلت نمت جنبه ومفيش حاجة بتتردد في دماغي وبتاكل في عقلي غير كلمة مروان "أنا منتظرك" "أنا منتظرك" "أنا منتظرك".

ثاني يوم الصبح صحيت على صوت سليم بيصحيني وبيقولي بخوف "ماما قومي ياماما، تيتا بتعيط عيزاكي."

صحيت مفزوعة وخرجت جريت رديت على ماما اللي صوتها كان منهار وهي بتقولي "ابوكي مات يا منة، مات خلاص تعالي ألحقيني."

قلبي اتوجع رغم الكره اللي شيلاه جوايا، حسيت بحاجة اتكسرت في أعمق نقطة فيا، كاني كنت بحبه ومش حاسة، أو يمكن صوت أمي وقهرتها هو اللي تعبني.

معرفش إزاي خدت سليم وجريت روح بيت ماما اللي مدخلتوش من سنين ووصلت في اقل من نص ساعة.

ماما كانت في أوضة بابا وقاعدة تبكي بصوت عالي، خليت سليم ينتظرني في الصالون برا ودخلت لوحدي ورجلي مش شيلاني.

مش قادرة أوصف مدى الوجع اللي حسيته وانا شايفة والدي في أضعف حالاته دلوقتي، قلبي كان بيتعصر .

"سامحيه يابنتي أبوس إيدك، سامحيه ابوكي خلاص هيقابل وجه كريم."

قالتلي امي الكلام ده من بين دموعها، ولقيت نفسي بقربله وعيني مش شايفة غير جثة أخويا قدامي كأن المشهد بيتكرر دلوقتي .

لمست بأيدي وشه وأنا بقوله "الله يسامحك ويغفرلك يا بابا، كان نفسي ترحمنا وتحس بينا قبل فوات الأوان، أنا كنت "...

لسه هكمل كلامي لقيت رموش بابا بتتحرك!

قلبي وقف وعيني قربت تخرج من مكانها وأنا بقول لماما "هو عايش؟ مامتش؟ انتي بتضحكي عليا؟".

لقيتها بتقولي "حرام عليك يابنتي ابوكي حسه في الدنيا، انا فكرتك جاية ومسامحة خلاص، طب إيه اللي جابك".

بعدت عنه وأنا مشمئزة من أيدي اللي لمستة، وحاولت امسك اعصابي بصعوبة علشان سليم ميسمعنيش لو صرخت فيهم، وقولتها "مش انتي اللي اتصلتني بيا قولتلي ابوكي مات، انتي عايزة تجنيني".

أمي أنكرت أن ده حصل وقالت إنها مكلمتنيش من ساعة آخر مكالمة امبارح!

خرجت بعصبية من الاوضة علشان أخذ سليم وامشي لكن ملقتش سليم في الصالون...؟

"سليم.. يا سليم انت فين رد عليا."

عقلي قرب على مرحلة الجنون لما سليم اختفى، وخرجت امي تدور عليه معايا وهي بتحاول تهديني، وسمعنا صوت حاجة بتتكسر جاي من أوضة مروان!..

أوضة مروان اللي مقفولة من يوم وفاته ومحدث دخلها .

فتحت الباب ونبضات قلبي بتتسارع زي الحرب جوايا، وكل خوفي أشوف سليم في نفس جريمة مروان .

لكني لقيته قاعد على مكتب مروان بيلعب في الادراج .

اتفزعت وجريت عليه وأنا بسأله "انت إيه دخلك هنا، أنا مش قولتلك خليك في الصالون."

أمي خدت سليم في حضنها لانه خاف من نبرة صوتي وقالتي "براحة على الواد بينتي حرام عليكي الواد بيترعش، متخافش يا حبيبي متخافش، بس إيه اللي دخلك الاوضة دي كلها تراب ومقفولة."

رد سليم باللي وقع قلوبنا وقال "مروان قالي أدخل، وفتحتي الدرج ده."

ماما بصتلي بخوف وهي مش فاهمة اللي بيحصل، لكن تقريبا بدأت أفهم .

مروان اللي جابني هنا، ومروان برودو اللي استدرج سليم لأوضته علشان يوريني حاجة محتاج يكشفها .

قربت وبصيت في الدرج اللي كان موجود فيه كتاب قديم من جلد غريب أسود ومش مكتوب عليه أي أسماء .

فتحته لقيته كله طلاس وكلام مش مفهوم، وجواه منديل مكتوب عليه بالدم "مش بابا."

بصيت لماما وأنا عقلي خلاص بيطير مني وسألتها "إيه الكتاب ده يا ماما، واياه اللي جابه مكتب مروان هنا."

ماما صدمتها كانت أكبر مني وقالتي "الكتاب ده كان في مكتبة ابوكي زمان، لكن إيه اللي جابه هنا؟ ده اختفى من بدري من المكتبة ."

وهنا افتكرت أخر ليلة بيني وبين مروان لما كان بيقولي "أنا عندي الحل في أن بابا يتغير، أنا هقدر أعمل ده."

مروان كان قصده أنه هيجضر جني من الكتاب اللي سرقه من مكتبة بابا على أساس يطلب منه أن بابا يتغير ويكون حنين علينا، وبطفولته وجهله اتأذى من الكتاب والشئ اللي حضره .

يعني بابا فعلاً مقتلش مروان، ومظلوم!

جريت على أوضة بابا بسرعة علشان أقوله اني مسمحاه، وآسفة اني ظلمته واني وهمت نفسي بسبب قسوته علينا، لكن كان فات الأوان خلاص .

بابا مات قبل ما يسمعها .

وعيشت بدعليه كل ليلة ربنا يرحمه ويغفر له ويسامحني على جهلي، ويسامحه على جفاء قلبه.

**ت م ت**

## فستان الفرح

"فستان فرحي كله دم يا ماما، أنا مش فاهمة حاجة"

أنا أسماء منصور، والنهاردة ليلة زفافي .

قبل ما أدخل في تفاصيل من حكايتي عايزة أقول لكل بنت أو حتى شاب لو بتعمل التصرفات اللي هقولها دي، فلازم تشوف حل قبل فوات الأوان .

أنا واحدة بتعشق القعدة لوحدها في الاوضة طول الوقت، والتجمعات بتكون مزعجة جدًا بالنسبالي وبهرب منها بكل الأشكال .

أحلامي غريبة وأغلبها يقوم نسيهاها، لكن أثرها على جسمي مبيتنسيش، زي العلامات الزرقا اللي يقوم الاقيها فيا .

الصداع مش مجرد تعب بيتردد عليا من وقت للتاني زي بقية الناس لأ، الصداع ده رفيق ملازمي بشكل يومي والمسكن بالنسبالي زي الأرواح اللي باخده بعد كل أكلة زي الحلويات .

والابشع من ده كله هو مدة تواجدي في الحمام، اللي بتزيد عن ساعة وشوية ويعتبر المكان المفضل اللي بفصل فيه عن دوشة البيت والطلبات .

كل دي تصرفات اعتدت عليها وكنت فاكرة أنها مجرد أشياء طبيعية أغلبنا بيعملها، لكني مكنتش أعرف أن في جن متملك مني هو اللي بيعمل فيا كل ده .

اتخطبت كثير وكل شخص مكنتش بيطبق أسلوب المتقلب اللي أنا ذات نفسي مبحسش بيه ولا بفهم سببه الحقيقي، كل اللي بحس بيه اني فجأة مش طايقة اللي قدامي وصوته مزعج وكل شيء منه ثقيل على قلبي، وكالعادة الخطوبة مبتكلمش شهور وبتتفرکش بينا .

لحد ما اتخطبت للشيخ أدهم .

شاب عنده ثلاثة وتلاتين سنة ظهرلي من العدم زي حبل النجاة في وسط المحيط .

شاب خلوق وداعي إسلامي اتقدملي صالونات، لكن من بداية دخوله لحياتي وأنا التعب بقا مضاعف عندي، لدرجة ...

لدرجة أني بشوف احلام بشعة حتى وأنا صاحبة!

عملت معاه مشاكل كتير وقولتله يخرج من حياتي واني محبتوش ومش هحبه، وكل مرة كان بيستقبل كلامي بأنه يقرا لي قرآن كأنه عارف اللي فيا!

خطوبتنا كانت عبارة عن ست شهور، وفجأة لقيت نفسي قدامي شهر واحد بس واتجوز أدهم .

المفترض بنت في مكاني عانت كتير أن محدش استحملها ولا قدر يترجم شخصيتها أنها تفرح بالعوض، لكن أنا الأذى اللي بتعرضله كل ليلة معني من الفرحة .

بدأت شخصيتي تكون اسوء وبطلت أرد عليه كل ما يتصل، وافضل نايمة أبكي كأني مغصوبة عليه رغم أن جوايا شئ بيقولي إني لو ضيعته مني مش هعوضه تاني.

وفي ليلة لقيت أدهم باعتلي رسالة صوتية قبل الفجر، حطيت سماعتي في وداني واوضتي ضلمة كالعادة والبيت كله نايم وقولت أشوفه باعتلي إيه .

جسمي كله اتنفض لما لقيته بيقراً اية قرآنية ويبردها كأنه بيخاطب شخص ما جوايا، والشخص ده بيصرخ وبيعذبني أنا معاه .

ابتديت احس بتشنجات وان جسمي بيفور وبيغلي، ومش قادرة ارمي السماعة من وداني ولا افصل صوت التليفون .

فضلت أبكي لحد ما خلصت التسجيل الصوتي وبعته وأنا تعبانة قولتله "منك لله ليه بتعمل فيا كده، أنا اتعذبت بسبب كلامك دلوقتي."

رد وقال "أسماء متخافيش، هنتعب شوية لكن والله ما هسيبه يسيطر عليك وينتصر عليا وياخدك مني."

كلام أدهم طول الوقت كان غامض، كأنه بيتكلم عن جن عاشق وبينافسوا بعض عليا .

تاني يوم صحيت الصبح جسمي مدغدغ ومتكسر مليون حنة كأني خدت علكة قبل النوم، لولا صوت زعيق امي كنت نمت يومين .

أمي كانت بتصحيني وبتقولي "قومي يا هانم، قووومي جهازك كله باظ من الركنة والاهمال، نطلعه شقتك إزاي دلوقتي."

قومت فركت عيني وأنا مش فارقلي اللي بتقوله لأنني كده كده بتهرب من الجواز وسألته "ماله جهازك حصل إيه؟"

ردت وقالتلي "دخلت أوضة جهازك انضفها دلوقتي علشان الناس هتيجي تشيله بكرا، لقيت الكراتين كلها متحاوطة بالسوس والصراصير الصغيرة والنمل، وشكلهم كمان دخلوا جوا الكراتين، الناس يقولوا علينا إيه دلوقتي؟ خارجة من بيت معفن ولا جايبلك حاجات مستعملة."

مجاش في بالي وقتها غير اللي حصلي ليلة امبارح بسبب أدهم، واتصلت بيه قدامها قولتله "بقولك إيه يا أدهم، أنا مش جاهزة للجواز دلوقتي، انت من طريق وأنا من طريق وربنا يوفقك في حياتك." وقلقت في وشه قبل ما يجاوبني .

أمي وقفت مذهولة وهي بتقوللي "انتى اتجننتى رسمى خلاص، أنا هكلم ابوكى يشوفك صرفة دي مش تصرفات ناس عاقلين."

ايوا أنا بهرب من الجواز وخايفة، لكن محدش فاهم إنى بلاقى راحتى واستقراري في الوحدة .

وفي نفس اليوم جالي أدهم البيت زيارة مفاجئة، خرجتله بعد محاولات كتير من أمي وسابونا لوحدنا في أوضة الصالون .

كنت حاسة أن جسمي كله سخن ودمي كأنه نار بتمشي في عروقي، وده بيحصلني كل ما بشوف أدهم عمومًا .

بدأ هو كلام لما لاحظ أن جسمي بيتنفض وقاعدة بفرك في أيدي بتوتر وقالى "أسماء ساعديني، أنا جنبك هنا علشان أصلح بلاش تكوني عليا معاه."

انفعلت غصب عني وقولتله "بلاش شغل الشيوخ والجهل ده بقاء، انت بتتكلم على مين بالطبط، أنا كويسة ومفيش أي حاجة، كل الحكاية إنى مش عايزاك ياخي هو الحب والقبول بالعافية."

كنت متأكدة أن بعد كلامي هيقوم ويسيبني ويمشي، لكنه فضل موجود وابتسم إبتسامة بتقل من غضبي بشكل لا إرادي وقالى "بس انا عايزك، ولو محبتنيش دلوقتي لسبب أنتى ذات نفسك مش فهماه، فهتجيبني بعدين لما اللي عليكي بيعد عنك ويسيبك في حالك، وصدقيني ده مش شغل شيوخ زي ما بتقولى ولا أنا بحاول أعمل جامد قدامك، بس يا أسماء أنتى متأكدة أنك مأذية من شيء خفي وخايفة تعترف في بيه بدل ما يظهرلك ولا تسوء الأمور، ومستعد دلوقتي اشركك كل الحاجات الغريبة اللي بتحسي بيها وبتنفذها بدون ما تحسي علشان تصدقيني."

الصداع بياكل في دماغي وعيني بتزغلل كل ما بحاول أركز في كلامه، قاومت نفسي وخليته يحكيلي عن التصرفات دي وأثرها والأذى اللي ممكن تعمله في الإنسان .

ورغم أن مخالفة هوايا كانت صعبة عليا، إلا أنني بصعوبة قولته "حاضر يا أدهم، هسمع كلامك وتعالجني ونتجوز، بس لو حصل اي تصرفات مني متحاسبنيش عليها."

واتجوزنا ...

ليلة زفافنا كانت أبشع ليلة تمر عليا في حياتي، من بداية ما صحيت من نومي وافتح الدولاب علشان أحضر فستان الفرحة اللي فجأة لقيته كله غرقان دم وندعت لماما وأنا بصرخ وبقولها "ماما ألحقيني، فستان فرحة كله دم يا ماما."

ماما اتصدمت من المنظر وفضلت تستعيز من الشيطان، وهي بتقولني "اللي بيحصل ده مش طبيعي بينتي ابدأ، انتي حد عاملك عمل ولا إيه لازم نتصرف."

اتصلت بأدهم علشان أقوله أن اعصابي خلاص هلكت ومش هكمل ولا اتجوز، وأول ما رد عليا لقيته بيقلني "أنا جايلك في الطريق أهو، ومعايا فستان جديد، متخافيش أنا كنت عارف أن ده هيجصل."

ادهم بيعرف حاجات غريبة!

وصل سلمني الفستان وقالني "هنزل أنا علشان ألحق اجهاز للفرحة، اياكي تضعفي وتتراجعي يا أسماء اياكي."

خلص الفرحة وانتهت الدوشة اللي كنت بتمنى كل لحظة اني اخلص منها واروح على بيتي .

رجلي مكنتش شيلاني وانا داخلة الشقة مع أدهم، وهو كل اللي بيعمله أنه بيضطرب عليا وبيقولني "متخافيش، خلاص قربنا نخلص من الكابوس ده."

أدهم دخل الحمام وأنا بدلت هدومي ومحيت كل المكياج اللي اتحملته بالعافية على بشرتي طول اليوم، وابتديت أحس بإعاء شديد والدنيا بتلف بيا قدام المرايا، ووقعت محستش بحاجة .

مفوقتش غير على شعاع الشمس اللي داخل من بين شيش الشباك، لقيت أدهم نايم جنبي وبيعمل صوت شخير ضعيف، افكرت أنه في نوم عميق ولما قربت منه علشان اعدل راسه جايز نايم غلط ومش عارف يتنفس، لقيت رقبته بتنزف دم!!؟

ادهم مدبوح جنبي وبيطلع في الروح.

لما صرخت وجريت على السلم وأنا بلطم وبموت من القهرة وفي حالة عصبية شديدة، الجيران استدعوا اهلي وأهله كانوا فاكرين إنني قتلته وحصلت كوارث غير طبيعية، لحد ما خرجت نتيجة

التشريح اللي أثبتت أنه متدبحش بألة حادة لأ، أدهم اتدبح بحوافر حيوان..!

أترميت في مستشفى الأمراض العقلية اللي مش عارفة إزاي أهلي سابوني فيها .

أوضة ضلمة مفيهاش غير سرير وشباك متأمّن بأسيخ الحديد كأنهم عارفين إني لو لقيت فرصة للموت والانتحار مش هتردد لحظة فيها .

ضميت رجلي على صدري وأنا بترعش ومش مصدقة اللي وصلتلها، وبفتكر أدهم وعزيمته في إنه يعالجني ونهايته المفجعة اللي كانت من نصيبه .

\_انا السبب يا أدهم، أنا السبب في اللي جراللك يا حبيبي، صدقني أنا حبيتك ومحبتش غيرك لكن كنت برفضك في كل مرة خوفاً عليك مش منك .

كلام بقوله وأنا في أشد حالاتي انهيار، عارفة أنه مش سامعني ولا ده هيرجع حاجة في اللي فات، لحد ما لقيت اوكرة باب الاوضة بتتحرك!...

كانت ماما!...

ماما واقفة قدام باب اوضتي في المستشفى وبتقولي "يلا يا أسماء علشان فرحك، يلا يا حبيبتي هنتأخر."

بقيت أهز راسي يمين وشمال وانا بصرخ وبقولها "مستحيل، مستحيل، فرحي هو السبب في موت أدهم، ابعدوا عني بقا كفايا، كفايا."

روحي اتسحبت مني وانفاسي اتوقفت، ولقيت نفسي بفوق من نومي شرقانة زي الغريق اللي بقاله مدة في عرض البحر .

والدتي كانت واقفة وفي ايديها فستان فرحي وهي بتردد "اسم الله عليكي يابنتي مالك، بقالى ساعة بصحكي ايه اللي جراللك.. قومي يلا الناس على وصول."

قومت زي المجنونة بصرخ في امي وبقولها "مش هتجوز، أنا مش هتجوز، سبوني في حالي" وقلت باب الاوضة عليا بالمفتاح ومهتمش لخبط اهلي وصدمتهم وخوفهم من الفضيحة .

كان عندي الفضيحة أهون من اللي ممكن يحصل في أدهم واللي شوفته في كابوسي .

وبعد حوالي ساعتين لقيت باب اوضتي بيخبط وصوته جاي من برا وهو بيقولي "افتحي يا أسماء أنا أدهم، افتحي هنتكلم ومفيش فرح ولا حاجة بس افتحي ."

فتحت له الباب وأنا جسمي بيتنفض، لقيته لابس البدلة ووشه حزين، كنت عارفة أن اللي بعمله دلوقتي ده أكبر غلط في حقه وحق نفسي، لكني مش هسمح لنفسي أعيش الكابوس من تاني وأضحى بيه .

دخل أدهم اوضتي وقفل الباب، وقعد على الكرسي اللي قدام سريري وقال بكل هدوء "ها شوقتي إيه احكي لي".

محدث غيره بيفهم سبب تصرفاتي الغريبة والمُفاجئة، دموعي سبقتني وقولته "قتلك يا أدهم، صحيت تاني يوم لقيتك جنبي مدبوح، مش هينفع يا أدهم صدقتني مش هينفع نتجوز أنا مش هتحمل ده فيك، أرجوك متعاندش واسمع كلامي وابعده عني أنا شر ليك مش خير."

كنت معتقدة أنه هيتخض لما يسمع اللي هقوله، لكن على عكس المتوقع لقيته بيضحك ويقول "طب بدمتك انتي طفلة للدرجادي يعني؟ طب إيه رأيك إن الدم في الحلم يفسده؟ يعني انتي دلوقتي اكبر مغفلة أنا شوقتها في التاريخ."

كان عندي المعلومة دي وسمعتها اكثر من مرة في تفسير الأحلام، حسيت اني فعلاً كبرت الموضوع وادبيلته اكبر من حجمه، وقدر بسهولة يقنعني أقوم أجهز وكان محصلش حاجة نهائي، ولقيت نفسي كالعادة بمشي ورا كلامه وبطبعه كأني مُغيبية ومعنديش إرادة للرفض .

لازمي الفلق طول الفرح ومقدرتش ابتنسم حتى في وشوش المعازيم، لحد ما خلص اليوم وروحنا البيت!....

نفس الغصة في قلبي ونفس الشعور اللي حسيته مع بداية دخولي للشقة، أدهم نظراته كانت بتطمني من وقت للتاني كأننا داخلين حرب مش بداية جديدة .

ادهم كان بيتجهز علشان يدخل ياخذ دش، حسيت أن التكرار بيحصل بنفس التفاصيل، وقفت قصاده ومنعته وقولته "لأ يا ادهم متدخلش، علشان خاطري خليك معايا الليلة دي ومتسبنيش."

ولأنه عارف كل مخاوفي وحاسس بيا، سمع كلامي بدون ما يناقشني، وفضل جنبي لحد ما نمت مسابنيش .

فوقت على شعاع الشمس اللي داخل من شباك الاوضة وصوت انفاس أدهم العالية جنبي...!!؟

كنت ببص عليه وأنا متأكدة من نفس المشهد اللي بينعاد من كابوسي، أدهم بينزف من رقبته ومدبوح!..

انفاسي وقفت وأنا مش مصدقة وبكذب عيوني من اللي شيفاه، خرجت من الأوضة زي المجنونة  
وانا بقوله "الأ.. لأ.. اللي بيحصل ده مستحيل.. أدهم.. أدهم رد عليا."

اعصابي انهارت وبقيت أصرخ وانا بتسند على الحيطان وبيعد عنه بخوف، كنت بدور على أقرب  
شباك أو بلكونة علشان ارمي روحي واخلص من حياتي .

واتصدمت لما لقيت أدهم خارج من الحمام مخضوض وبيجري على صوتي وهو بيقولي "اسماء،  
مالك يا بابا أهدي أهدي أنا كويس والله حقك عليا استغلّيت انك نايمة وقومت اخذ دش."

كنت عاملة زي الطفلة الصغيرة اللي ماسكة في أمها وبتترعب لو اتسابت دقيقة واحدة .

لما هديت وحكيت لادهم قالي "الشيطان ده عايز يوهمك لحد ما تأذي نفسك وتفقد حياتك بارادتك،  
متصدقيش إلا عيبه يا أسماء وخليكي اقوى منه."

دخل الليل علينا وانا حرفياً طول اليوم ميعملش حاجة غير إني بمشي ورا أدهم في الشقة كل ما  
يدخل مكان ارواح وراه علشان أتأكد أنه كويس ومش هيجصله حاجة .

كان قاعد قدامي بيتفرج على الشاشة وانا قاعدة مثبتة عيني وبتفرج عليه هو .

لقيته بببصلي وبيضحك، وقالي "طب بدل مانتي قاعدة مبطلقالي زي الأصنام كده، ما تعملي  
الأجواء بتاعت المتجوزين اللي بنشوفها على النت دي وتقومي بعملينا فشار وتيجي تنفري  
معايا."

حسيت بحرج لأنني فعلاً زي العيلة الصغيرة اللي مش عارفة تتصرف في حياتها الجديدة، وسمعت  
كلامه ودخلت المطبخ اعمل الفشار .

كنت واقفة بتلفت حواليا وكل شوية أخرج ابص على أدهم واتأكد أنه قاعد مكانه، وفي كل مرة  
بيشوفني فيها بخرج راسي من المطبخ بيقعد ببصلي ويشاورلي ويضحك وبيقولي "والله موجود،  
متحرقيش الفشار بس."

ابتديت أحس بأمان أكثر، وبقيت أتحرك بحرية وبدون خوف .

خرجت زي اللي جاية من معركة وفي ايدي الفشار وانا بقول لادهم "عملتلك احسن فشار ممكن  
تاكله في حياتك."

لكن أدهم كان ثابت ومركز في الفيلم بطريقة غريبة!...

قعدت جنبه وبصيت على الفيلم لكن كانت مجرد اعلانات عادية شغالة .

رجعت بصيت عليه وانا بقوله "أدهم مش هتاكل فشار؟ انت مبتردش ليه."

ثابت زي التماثيل وملامحه جامدة بشكل مُريب .

بقيت اهزه جامد في جسمه واقوله بخوف " أدهم رد عليا.. أدهم متهزرش معايا كده أنت عارف اني بخاف.. يا أدهم."

لكن مفيش رد.

بعدت عنه بخوف وقولت اجيب مائة ارميها على وشه يمكن بيهزر وبيختبر قوة ثباتي .

لسه هدخل المطبخ شوفت خيال اسود بيشبه أدهم في كل تفاصيله، حتى ملامحه وهدومه، واقف في الضلعة بيضحك وبيشاورلي .

عيني بتتنقل بين أدهم اللي ثابت قدامي، وبين اللي واقفي في المطبخ .

مش عارفة اصدق مين واعمل إيه .

عيني راحت تجاه البلكونة من ثاني، عايزة أجري وارمي نفسي ارحم من العذاب ده كله .

لكن كلام أدهم اللي نيهني بيه منعني، غضبت وبقيت ازعق للشبح واقوله "انت ضعيف وجبان.. أنا عمري ما هصدقك ولا اخاف منك.. انت اللي خايف مني دلوقتي.. مش هتقدر تاخذ ثقتي ولا تتملك من عقلي ثاني."

ملامح الشبح كانت بتزيد توهج كأنه بيولع وبيغضب من كلامي .

قربت من أدهم اللي قاعد ثابت مكانه ومسكت في أيده وخببت وشي فيه، وابتديت اقول أية الكرسي اللي افكرتها بصعوبة .

جسمي كله بيترعش وكل خوفي يكون اختياري غلط المرادي وإني بدل ما اثق في جوزي، أكون وثقت في الشيطان واتحاميت فيه .

حسيت بأيد بتمشي على راسي وبتطبطب عليا.

اتفزعت وبصيت لادهم اللي رجع يتحرك ورجعته ابتسامته وقال "شوفتي لما بنتقي فيا بتكوني

حلوة إزاي وكل الخوف بينتهي."

بصيت تجاه المطبخ ملقنتش الشبح، خلاص اختفى وعرف أنه مش هيقدر يوهمني من تاني، شاورت لادهم وقولته "كان واقف هنا، شيهك بالظبط وكان بيشاورلي، وانت.. انت كنت زي الصنم يا ادهم مبتحركش ومبتردش عليا."

رد ادهم وقال "حتى ده كان وهم زيه بالظبط، أنتي اللي خرجتي من المطبخ بتكلميني ومش قادرة تشوفي إني برد عليك، كأنك رافضة تسمعيني وتشوفيني.. كل محاولاتني إني اهديكي واقرا عليك مكننتش بقوة أنك قرיתי لنفسك ووثقتي أنك الأقوى في المعركة مش الطرف الضعيف، دلوقتي بس اقدر اقولك أنه انتهى، وانه مش هيفكر يقرب من بنت قوية زيك، هيشوفله دلوقتي بنت ضعيفة تمشي وراه بدون ما تعافر وتنفذ طلباته وهي مش حاسة."

صحيح الحياة بتهدى الجميع أضواء في نهاية النفق، لكن مش كلنا بنقدر نمشيلها في الإتجاه الصحيح .

ودلوقتي بس أقدر أقول أن الضعف كله ضعف نفوس، مش سيطرة شيطان وأتباعه، وعلشان كده محتاجين نقوي نفوسنا ونرويها بالإيمان بالله أكثر من كده شوية .

ولو مكننتش بتفهم معنى القرآن غذاء النفس في البداية، فأتمنى تكون فهمتها دلوقتي ووصلت .

**ت**

## معشوقي السفلي

تتجوزيني؟!!

غريبة جدًا على أي بنت لو في يوم قاعدة في مكان عام ودخل عليها شاب متعرفوش ونزل على ركبته زي ما بنشوف في أفلام هوليوود وببطلب منها الجواز .

ودي كانت حكايتي مع الجن العاشق .

اعرفكوا بنفسي... أنا منى محمد عمري سبعة وتلاتين سنة وعلى مشارف الأربعينات .

أنا البنت اللي كله بيحلف بجمالها وأخلاقها من أول نظرة، لكن بردو أنا البنت اللي مفيش راجل اتقدم لها على مر شبابها ولا بص في وشها رغم مميزاتها .

مستغربوش .

أنا بردو كنت مستغربة اللي بيحصل في البداية، من أيام ما كنت لسه في ثانوي واللي جوالي فيها .

لما كان عندي سناشر سنة في مدرستي الثانوية كنت متفوقة جدًا ومن البنات المعروفين بذكائهم وسرعة بديهم .

وده كان سبب في أن بنات كثير يكرهوني لمجرد إنني بطلع الأولى وبركز على مستقبلتي وبعيدة عن مشاكلهم مع الولاد والعبث اللي بيحصل في المرحلة دي.

في يوم واحدة من صحابي كان يوم ميلادها ولقيتها جاية بتهاديني بقطعة كيكه وبتفرق على باقي البنات من باب مشاركة الفرحة .

اليوم ده كان غريب من بدايته لنهايته .

مجرد ما كنت الكيكه حسيت بمعدتي بتقطع رغم أن باقي البنات محصلهمش حاجة!

جريت نزلت الحمام وده كان توقيت المدرسة كلها فاضية وكل فصل مقفول على طلابه وأنا لوحدي اللي بجري في الطرقة وبتألم .

دخلت الحمام تقيأت كل اللي في معدتي وحسيت الدنيا بتلف بيا وغيامة سودا بتسيطر على الحمام وبدأت أفقد الوعي .

كنت بحاول أسند نفسي ومقعش في الحمام علشان متلبسش وبقيت انادي بصوت خفيف وأشاور  
بأيدي "حد يلحقني".

وفجأة ظهر ظل أسود مش قادرة أحدد هويته على باب الحمام، معرفش كان راجل ولا ست لكن  
كان ظل قصير وتخين .

اعتقدت أنها ست وبقيت اشاور لها وعيني عليها سحابة سودا وبقولها "ألحقيني، ألحقيني".

جريت الست عليا وسندتني وهي بتأخذني على أوضة ضلمة ونيمتني على السرير، اعتقدت وقتها  
إني في غرفة التمريض بتاعت المدرسة .

مكنتش أعرف إني في عالم ثاني!...

بعد شوية ابتديت افوق وقعدت على السرير وبدأت الغيامة السودا تتلاشى وتتضح الرؤية ولقيت  
نفسى في غرفة كلها إضاءة حمرا وشخص لابس بلطو واقف على حوض ومديني ضهره .

قلبي اتقبض لما لقيت نفسى في أوضة مقفولة مع دكتور لوحدي .

قومت بسرعة وأنا بقوله "شكرًا يا دكتور أنا كويسة دلوقتي هطلع الفصل".

مردش عليا ولا حتى بص تجاهي، فتحت الباب واتصدمت من كمية النار اللي حرارتها لفحت وشي  
وخلتني اصرخ واقفل الباب ثاني بسرعة.

من خوفي جريت على الدكتور مسكت فيه وانا بقوله "المدرسة بتولع، نار برابرا كثير يا دكتور  
شوف".

لف الدكتور وشه وكان عبارة عن جلد أحمر محروق وسايح على بعضه وقالى "متخافيش، أنتي هنا  
في بيتك".

أول ما شوفته فضلت أصرخ بهستيرية وأنا بمسك أي حاجة بتجي قدامي وبحدפה ناحيته بقوة وهو  
واقف مبتسم وبيضحك ومفيش حاجة بتأثر فيه ولا بتمسه .

بدأ يقرب ناحيتي وفي أيده حاجة غريبة تشبه قلب الإنسان وهو بيقولى "متخافيش يا منى، دانا اللي  
بحميكي من شر البني ادمين علشان بحبك".

وشاور على القلب اللي في أيده ورفعته ل فوق وهو بيقولى "شايفة اللي في أيدي ده؟ ده ببقى قلب

الشاب اللي بي فكر فيكي دلوقتي وهيحاول يكلمك على باب المدرسة، بس يحرام مش هيلحق.. أصل عربية هتدهسه قدامك."

قلبي كان هيقف من الرعب وانفاسي ضاقت، ولقيتني بهرب وبجري على الباب بفتحه وبرمي نفسي في النار بإرادتي، وقومت بصرخ على السرير وحواليا دكاترة المدرسة بيهدونني وبيقروا عليا قرءان.

بصيت حواليا بخوف وأنا بسألهم "أنا فين؟ حصل إيه."

ردت الدكتوراة وهي بتمسح على راسي بأيدها وبتقولي "حمدلله على سلامتكم يا ست منى خضتينا عليك، البنات لقوكي واقعة في الحمام وفاقدة الوعي وكلهم خايفين عليك برا."

كنت حاسة بألم شديد بينخر في دماغي كأني فوقت من غيبوبة طويلة مش مجرد ساعة أو أقل.

الدكتوراة ادتني برشامة وقالتلي أن ضغطي واطي وتقريباً كلت حاجة مسكرة بدون فطار وده اللي عمل فيا كده .

لما هديت وارتحت لقيت صحابي منتظريني برا العيادة ودي كانت أول مرة احس فيها أن عندي صحاب بيجبونني وخايفين عليا .

خلص اليوم الدراسي وقررت أروح مع صحابي علشان يسندوني لحد ما أركب لأنني حاسة بعدم توازن وإني لسه مفوقتش بشكل كافي .

على باب المدرسة حصل اللي خوفت منه .

مدرستي كانت بممر طويل بيوصلنا على بداية الشارع اللي كله عربيات .

مجرد ما خرجنا من الممر ووقفنا علشان ننتظر الاتوبيس، لمحت شاب على الناحية الثانية واقف ببيص عليا أنا وصحابي بتركيز.

محطتش في بالي شيء وقولت أنه مجرد شاب مراهق عادي ببيص على البنات وخلص .

لكنه فجأة مر الطريق وكانت رجله بتعرج فيمشي براحة حبتين، وجت عربية سريعة من العدم فتكت الشاب لاشلاء لدرجة أن دمه جه على وشي ولمسني.

كل اللي كان في الشارع اتفرع وفضلنا نصرخ أنا وصحابي من المنظر البشع اللي شووفناه.

وافتكرت الكابوس...؟!!

رجعت البيت منهاره وبكي وهدومي عليها دم الشاب، أمي انفزعت من منظري وقعدت حكيتها كل اللي جوالي .

ملفتش نظر والدتي غير إني وقعت في الحمام واعتقدت إني اتمسيت من الجن .

ولأن أمي ست بسيطة ومش متعلمة، ثاني يوم لقيتها جايبة حوالي سبع ستات شكلهم غريب البيت وعملوا مبخرة ولايسين جلايب بيضا ولبسوني جلابية زيهم .

تقريبًا ده اللي اسمه زار .

حاجة كده بيعملوها على اعتقاد أنهم بيطردها الجن من جسم الإنسان.

طاوعتهم على الهبل اللي بيحصل وقتها جايز أمي بثافتها القديمة يكون ده الحل اللي هيبعدني عن أي خوف وكوابيس ثانية .

الصالة كلها كانت دخان وبيدقوا أطول بأيديهم وبيلففوني حوالين المبخرة وبيغنوا أغاني مش مفهومة .

حسيت إني اتخنقت ودوخت من كتر اللف وابتديت أحاول أهرب واستنجد بماما، لكنهم كانوا بيمنعوني وبيزقوني أمشي بالعافية وماما واقفة بعيد تبكي ومبتحركش .

تعبت وبدأت أصرخ واقولهم "سبوني، أنا تعبت، سبوني كفايااا ."

مسكنتني واحدة ست عفية وكنتف أيدي ورا ضهري وبقت تزقني أدور بالعافية حوالين البخور وجت ست غيرها ماسكة فرخة سودا ودبحتها في وشي والدم غرقني!...

كانت أبشع الليالي اللي مريت بيها في حياتي .

وقعت على الأرض وجالي تشنجات عصبية من اللي عملوه فيا، لحد ما غيببت عن الواقع .

ولما فوقت لقيت ماما جنبي وبتعيط عليا والستات بيقولولها "ألف حمد لله على سلامة الحلوة، نستأذن احنا بقا ."

وبكده المفروض أنهم عاجوني .

حاولت اتعافى من دوامة الأحداث المروعة اللي دخلت فيها فجأة وابتديت ارجع لدراستي وأركز ثاني في حياتي .

وبطلت ادخل حمام المدرسة نهائي وأكون حريصة في خطواتي وماكلش أي شيء من برا أو من صحابي .

ورغم استقرار حياتي ونجاحي في الثانوية وفي الجامعة كمان، كنت قربت أنسى اللي حصل ويتمحي من جوايا خلاص .

لحد ما وصلت لسن الأربعة وعشرين سنة وبدأت أركز أن كل اللي حواليا بيتخطبوا وبيتجوزوا، وأنا بس اللي باقية!

كلام ماما في البداية مكنش بيأثر فيا وكنت بقولها أنا لسه صغيرة وبدرس ومش فاضية، لكن لما خلصت الجامعة اكتشفت أن في شيء غلط فعلاً .

حتى لو متخطبتش على الأقل يتقدملي حد واحد بس!

ابتديت افتكر الجملة اللي سمعتها في كابوسي القديم من الجن إنه بينتقم في أي حد بيحاول يتقربلي زي الشاب اللي مات قدام عيني .

سنة ورا سنة لما وصل عمري ثلاثين سنة والحال كما هو مفيش تغيير .

ابتديت أسأل صحابي والموضوع يآثر عليا بشكل كبير "أنا ليه مفيش راجل بيحبني ولا بيتقدملي زيكو؟".

بنات كتير بعدت عني وخافوا إني احسدهم، وابتدت شخصيتي تتغير من إنسانة واثقة في نفسها لانسانة بتحقد على كل اللي حوالياها .

ليه أنا اللي ملعونة؟ وعملت إيه علشان يكون ده نصيبي في الدنيا .

في عيد ميلادي الثلاثين بالتحديد آخر يوم في شهر سبتمبر، قررت مخرجش من اوضتي ولا حد يشوف ضعفي وعيوني الملتهبة من كتر البكى .

وقفت قدام المرايا ومررت أيدي على ملامحي اللي ظهر عليها بداية تجاعيد بسيطة وأنا حاسة بحسرة على نفسي رهيبة .

مش قادرة ألاقى فيا شيء ناقص يخليني وحشة في عيون الناس للدرجادي، شعري بني طويل

وناعم، عيوني عسلي فاتح ورموشي كثيفة وجمالي كله طبيعي بدون نقطة ميكب زي اللي بيعملوه البنات.

يمكن العيب في المكياج؟

شئ جوايا همسلي ليه مكونش زي البنات فعلاً واعمل اللي بيعملوه في ملامحهم؟ يمكن ده اللي يجذب ليهم الشباب .

وعلشان ارضي ضميري في ليلة عيد ميلادي طلعت كل مكياج ماما من الإدراج وشغلت جنبني اغاني وقعدت ألون في ملامحي اللي بقا شكلها مرعب بعد الروج الاحمر والكحل اللي نازل من عيوني زي الشياطين .

اشمئزيت من نفسي وحطيت راسي ع التسريحة وفضلت أبكي أكثر واكثر، كل شئ بفشل فيه كالعادة ومفيش فائدة في ازمتي خلاص.

فجأة حسيت بأنفاس دافية جنب وداني وريحة نتنة ظهرت من العدم، ويد بتملس على شعري براحة!..

اتفزعت وبصيت لقبته...؟؟

نفس الجن القصير اللي شوفته زمان في كابوسي، واقف جنبني وبيهمسلي "متعيطيش يا منى، أنا هنا جنبك علشان نحتفل سوا."

وقعت بكرسي التسريحة على ضهري من الخضة ونور الأوضة اتقفل فجأة، وصرخت بعلو صوتي "مااااااااا، يمااااااااا، حد سامعني."

قومت اتسحب على الضوء اللي داخل من تحت الباب وشغلت النور من تاني لقبيت الاوضة فارغة!..

مفيش جن، مفيش عفاريت .

اوضتي كانت في نهاية الطريقة، خرجت علشان أشوف مين صاحي في البيت يهديني واقوله ع اللي حصل حالاً .

ومجرد ما خرجت في الصالون اللي كان ضلمة لقبيت أجسام لخيالات سودا واقفين ورا الترابيزة!؟!

شغلت النور بسرعة لقبتهم بابا وماما واقفين زي الأصنام وقدامهم تورتة على الترابيزة .

مشاعري ارتبكت، ضحكت شوية بفرحة وانا فكراهم بيعملولي مفاجأة عيد ميلادي .

لكنهم مبيغش ولا بيتحركوا وشوشهم جامدة زي تماثيل الشمع .

مكش في صوت في الشقة ظاهر غير صوت ساعة الحائط اللي لفتت نظري أن الساعة فيها ثلاثة والفجر على مشارف خلاص!..

عيد ميلاد إيه ده اللي الفجرية؟

وقفت قدام أهلي وبقولهم بأستغراب " هو انتوا بتعملوا إيه دلوقتي؟".

محدث فيهم رد عليا وكانوا ثابتين زي ماهما !

ابتديت ألق واشك في البيت كله، هزيت بأيدي بابا وقع اتكسر!؟!

طلعوا تماثيل فعلاً.

رجعت لورا زي المجنونة وانا بهز راسي يمين وشمال وبقولهم "مستحيل، مستحيل.. يماماااا..  
يباباااا.. حد يرد عليا حرام عليكموا أنا هموت."

فجأة جرس الباب رن بصوت عالي.

جريت جايز حد ينجدي، لقيت شاب طويل لابس تيشرت اسود عليه لوجو، وفي أيده علبة هدايا  
مربعة باللون الاحمر وبيقولي "دي شقة أنسة منى محمد؟"

عدلت من صوتي وقولتله بصعوبة وانا بخفي خوفي "ايوا مطبوط."

رد وقالني "الهدية دي مبعوتة بإسم حضرتك، ممكن امضاء الاستلام .

مضيت واستلمت منه العلبة اللي كانت ثقيلة وقعدت على الأرض فتحتها ولقيت فيها اللي قضى على  
اعصابي .

قلب بني ادم مغروس فيه سكينه وورقة ملفوفة بفيونكة ستان!..

فتحت الورقة وأنا ببعد العلبة عني بخوف وقرأت اللي مكتوب فيها "وده آخر قلب بشري وقع في  
حباك وكان غبي وفكر يعترفلك في عيد ميلادك، اطمني أنا هفضل احميكي ومش هتكوني لحد

غيري، امضاء معشوقك السفلي."

معشوقي السفلي؟؟!..!

ناهيكم عن حالة الصرع اللي جتلي وقتها والتشنجات العصبية اللي قام البيت كله من النوم على صوتي وصراخي .

وكالعادة اختفت العلبة والورقة والتماثيل والتورنات وكل شيء .

ولأني عارفة أن محدش هيصدقني لو حكيت وهيعتبروا كل اللي بقوله حالة نفسية بسبب "العنوسة" محكتش لحد حاجة .

فكرت أروح لمعالج روحاني يعالجني من الجن العاشق اللي دمرني ووقف حالي، لكن خوفت!..!

وقررت أحل مشكلتي بنفسني.

قرأت كتب كتير عن الجن العاشق وأسبابه ومنهم اللي بيأكد وجوده واللي بينفيه .

احترت واتشنت اكثر واكثر .

وفي ليلة حصلت مشكلة كبيرة بيني وبين والدتي وقالتي "مانتي لو فالحة زي البنات مكنش ده بقا حالك".

جايز تكون الجملة دي كلنا بنسمعها عادي من أهالينا، لكن أنا حسيت بنار بتقيد جوايا وغل غريب مخليني عايزة... عايزة أقتلها .

اقتل أمي.

تمالكت اعصابي والشيطان المسيطر عليا ودخلت اوضتي بغضب قفلت الباب بقوة وفضلت اقطع في الهدوم والملايات وأطلع غضبي في أي حاجة بتيجي قدامي .

هلكت .

وقعدت على السرير بهزيمة حطيت أيدي على راسي بمنع نفسي من البكى، وبتنفس بصعوبة.. وافتكرته .

افتكرت الجن اللي كان السبب في خراب حياتي كلها ولقيتني بكلم نفسي بصوت ومسموع وبقوله

"أظهر.. أظهر يا جبان أنا مبهتتش خايفة منك خلاص، أظهر لو بتحبني فعلاً ومستعد تواجهني."

نور الأوضة بدأ يتهز وقلبي يدق بشدة، لكني مضطرة اتماسك وادعي القوة وكملت كلامي "أنا مش خايفة، أظهر بدون ما تستخبر ورا الضلمة ولا تعمل طفوسك اللي مبهتتش تفرق معايا خلاص."

حسيت بقوة وعاصفة بتدور في الاوضة برغم إني معنديش شبابيك، غمضت عيني من شدة الهوا وسمعت همسه بيقولي "أنا مش جبان، أنا بحبك."

فتحت عيني وكانت تقريباً دي أول مرة أشوفه بوضوح كده بدون ضلمة ولا إضاءة حمرا .

كان ابشع من كل مرة شوفته فيها.

سنانة كبيرة ومثلثة زي انياب الكلاب ولونهم اصفر، وبوقه العريض اللي قرب يوصل لودانه، غير شعره اللي شبيه محروق وموجود منه كام شعراية متوزعين على راسه الكبيرة .

جلد وشه سايح ومتقطع وظاهر منه بقع سودا ودمامل صغيرة .

حاولت مبصش لوشه كتير علشان افضل شجاعة للنهاية وبصيت على جسمه اللي كان مليون بشكل غريب وايداه كلها شعر وضوافر سودا حادة .

استجمعت شجاعتي وقولتله "وانا عمري ما هحك، ولا هكون ليك، أخرج من حياتي بقا أنا حتى مش قادرة ابص لشكلك البشع."

حسيت بصوته ببيكي أو متحشرج وبيقولي "لو مشكلتك في شكلي أنا ممكن اتحول في أي هيئة تحبها، لكن أنا تعمدت اظهرلك زي مانا علشان مخدعكيش، البشر خداعين يا منى ومش هيحبوكي قدي، أنتي جوهره محتاجة تتصان مش تتهان مع أشباه الرجال اللي وقتها شكله مش هيداوي جراك."

معرفش ليه حسيت لوهلة إني بتكلم مع نفسي، وأن كلامه منطقي ونفس الأسباب اللي كنت بقولها في سري من باب المواساة لتأخير الزواج هو بيقولها دلوقتي .

غضبي قل شوية ولقبتني بيكي من قلبي وبتوسل إليه وبقوله "أرجوك أنا حياتي باظت، أرجوك سبني في حالي وخليني أجرب بنفسي وأشوف نصيبي ."

دخلت في دوامة من البكى والألم وحسيت بأنفاسه بتقرب مني، ارتعشت من الخوف وسمعت همسه بيقولي "متعيطيش يا منى، دموعك بتحرقني، أنا هلبي طلبك لكن خليكي متأكدة لو حد فكر بس في أديتك أنا همنعه ومش هظهرلك تاني بشكلي البشع اللي مضايقتك."

مر على اليوم ده سبع سنين كمان وفعلاً جني العاشق اختفى وبدأ ناس يتقدمولي، لكن كلهم حالات غير مناسبة وده نظرًا لكبر سني .

اللي مطلق واللي معاه أطفال واللي مستواه المادي أقل كثير مني واللي عايز يخطب تلت سنين ويكون نفسه الأول .

مكنتش حزينة وقتها أن مفيش شخص مناسب جالي، بالعكس؛ كنت في أشد لحظات حياتي سعادة إنني رجعت مرغوبة وطبيعية زي أي بنت .

وفي عيد ميلادي السبعة وتلاتين حصلتلي أجمل مفاجأة من صحاب العمل اللي عرفنا بعض من فترة قصيرة وفاجئوني بأحتفال بسيط في كافييه بنقعد فيه بعد الشغل .

مش بس دي المفاجأة اللي حصلتلي، لأ.

دخل شاب وسيم المكان ولقيته وقف على مسافة بسيطة مني ومبتسم وبينزل على ركبته وبينقلملي قدام الناس كلها!..

كانت أول مرة أشوفه فيها .

حسيت بمشاعر مضطربة، بين إنني أفرح أو استعجب الموقف، لقيت صحابي بيسقفوا وفرحانين بيا وبيشجعوني أقبل .

اعتقدت وقتها أنه تبعهم، وللأسف هما كمان اعتبروه تبعي وفي قصة حب خفيها عنهم .

وقبلت .

اتخطبنا خمس شهور وكانت أجمل أيام حياتي وياه، مشوفتش منه غير كل حب وحنية وأدب .

اكتشفت أنه يتيم أب وأم وكان متابعتي فترة من خلال الشغل لأنه شغال جنبي، وقدر يوصلني سوشيال ويعرف اني سنجل وانتظر اليوم المناسب علشان يعترفلي بحبه .

هو اسمه غريب حبتين... اسمه غسان غسان غسان .

وده مش تكرر لأ، هو ده اسمه الثلاثي فعلاً في البطاقة .

ولما أخيرًا تمت على خير واتجوزنا في لمح البصر، حياتي اتبدلت للأحسن للدرجة اللي مكنتش

مصدقة فيها أن بعد اللي شوفته من جني العاشق ممكن اعيش واتبسط زي البنات .

الحاجة الوحيدة السيئة اللي قابلتها في جوازي إني من أول ليلة ونومي اتشقلب .

بنام طول النهار، وبسهر طول الليل، وغسان هكذا .

تلت شهور على نفس الحال مفيش تغيير، وفي ليلة ظبط المنبه على الساعة واحدة الظهر وغصبت على نفسي أقوم بدري .

غسان كان في شغله، صحيت ودماعي هتفجر من قلة النوم والصداع .

دخلت غسلت وشي وسمعت جرس الباب بيرن!

اعتقدت أن غسان رجع بدري، جريت أفتح لقيت الست شكرية جارتنا بتقولي "أخيراً فتحتي يا منى، قلقتيني عليكى يحببتي."

ابتسمت وقولتها "أنا كويسة يحببتي والله، قلقة ليه بس."

ردت وقالتلي كلام غريب أوي "يا منى يا حبيبتي مش انتي بس اللي أهلك ماتوا، بس متعمليش في نفسك كده وتختفي بالايام أنا زي أمك والله يرحمها كانت موصياني عليكى."

صداع بينشر أكثر وأكثر في دماغي .

قفلت الباب في وشها من الصدمة وفضلت تخبط جامد من برا وهي بتقولي "يا منى يابنتي حرام عليكى كفيافي حزن."

عقلي رافض يستوعب اللي بتقوله الست الخرفانة دي، أكيد دي ست كبيرة وبتهلوس .

لكن...

لكن ست شكرية جارة والدتي فعلاً، وأنا متجوزة من تلت شهور في بيت تاني؟؟!

بصيت حواليا بتشكك، عيني مزغللة ودوامة بتدور بيا .

دي نفس ألوان الحيطان بتاعت شقة أهلي!؟

نفس الصالون نفس الاخشاب وكل شيء، حتى هدومي .

أنا لابسة بيجامة قديمة من بتوعي زمان، مش روب ستان زي ما كنت فاكرة .

قعدت ع الأرض بستوعب إني كل ده عايشة في هلاوس وتخاريف؟! طب.. طب وغسان؟

صوت الدش اشتغل في الحمام كأن حد معايا في الشقة، قومت وقفت في الطرقة وأنا بقول "مين؟ مين جوا؟؟ أنت مين."

خرج غسان وهو بيتنشف بالفوطة وبيقولي "أنا يحببتي مالك؟."

رجعت بضهري وانا بقوله "مستحيل.. مستحيل.. انت هلاوس مش حقيقة.. أنت مين!!"

بدأت هيئته تتحول لنفس الجني اللي اعتقدت إني انتهيت منه للأبد وقالني "لأ يا منى أنا مش هلاوس، انتي اللي طلبتي تعيشي قصة حب مع واحد وسيم وطلبتي إني ارجع اعيش معاكي بعد وحدتك وقتل أهلك.. أحنا متجوزين."

أنا اللي صنعت الوهم بنفسي، وأنا اللي قررت أعيش جوا كومة أفكارني .

وبدل ما الجن كان موقفلي حياتي لمدة زمنية معينة، أنا وقفته للأبد .

استوقفتني كلمة قتل أهلك مش موتهم.

وافتكرت كويس دلوقتي مدى اكتئابني بعد موت بابا وماما.

ماما اللي قتلتها يوم ما الغضب سيطر عليا، ولما بابا شاف الكارثة اللي عملتها قدام عينه قام وقتل نفسه بنفس السكينة.. واتقفلت القضية أن زوج قتل مراته وقتل نفسه بدون أسباب.

وعيشت أنا في هلاكي، اللي استحقه.

كان كابوس مرعب.. لكنه ف النهاية إتفك

**تمت**

## بنت بلاستيك

-مين البنت المرعبة اللي واقفة ورا الشباك دي يا ميار؟؟

قومت أشوف من الشباك منة بنتكلم على إيه بالظبط، ولما شوفتها ضحكت بسخرية وقولتها "دي تسنيم"

ردت منة وقالتلي "أيو مين يعني، دي شكلها مرعب أوي شبه العرايس البلاستيك بالظبط"

رجعت مكاني على السرير فردت جسمي وأنا بحذرهما من فضولها وبقولها "ما بلاااااش".

لكن فضولها كان أقوى منها وقالتلي "بالله عليك أحكي بدل الملل ده"

حببت أروي فضولها وجبتلها الحكاية من البداية خالص وأنا بقولها:

-دي ياستي تبقى تسنيم.

وهي فعلاً بلاستيك مش بني ادمة زينا.

دي حكايتها غريبة أوي جايز متصدقنيش وتطلعي تجري بعد ما تسمعي اللي هقوله بس افتكري إني حذرتك وقولتك بلاش.

وللأسف فضلت منة مصممة على رأيها بحماس وهي بتقولي "أحكي بقا يا ميار شوقتي أكرت أنا بحب الحاجات دي اصلاً"

كملت كلامي وأنا متأكدة أنها في النهاية هنتصرع وتهرب، لكن هي اللي طلبت .

-بصي ياستي...

من حوالي خمستاشر سنة كده كان في جار ساكن قدامنا بتاع عرايس وملابس تنكرية .

كان متجوز ومعاها بنت صغيرة سبع سنين وبيته عبارة عن مصنع ملابس تنكرية حرفياً .

كان مشهور في الشارع وكلنا عارفينه وبنأجر منه الملابس دي لو في حفلات أعياد ميلاد وكده .

لحد ما في فترة معينة كده بدأنا نسمع أصوات صراخ عالية وغريبة جاية من الشقة دي .

الجيران كل يوم بليل ومنهم أهلي يجروا على شقته يلاقوه عرقان وبيبكي وهو بيقولهم "العرايس

بتتحرك.. بيتحركوا وصحيوا"

لكن مراته كانت بتقولهم أن أعصابه تعبانه من ضغط الشغل وهي كتر خيرها بتحاول تعالجه.

لكن الموضوع فضل مستمر لدرجة أن محدش بقا يطلع يطمئن عليه لما يصرخ واعتبروه مجنون .

وفي يوم الشباك ده كان مفتوح على آخره وأنا قاعدة مكاني على السرير كده، كنت طفلة وقتها طبعاً.

لقيت شباك شقة جارنا بتاع العرايس ده مفتوح وشوفت مراته وهي بتلبس بدلة تنكرية بتاعت ميكى ماوس ولبست تسنيم بنتها بدلة عروسة لونها أبيض كده مش فاكهة إسمها.

المهم شكلهم كانوا ناسيين الشباك مفتوح وأنا شوفت كل ده بالصدفة.. وقفوا جنب باب الشقة منتظرين الراجل يطلع وتقريباً بيحتفلوا بيه.

الراجل أول ما فتح الشقة بالمفتاح ودخل جريت عليه مراته وبنته يحضنوه ويتلططوا لكن الراجل جتله هيسستيريا غريبة وبقا يصرخ ويضرب في العروستين بغباء.

ومسك العروسة البيضاء اللي هي بنته تسنيم وحدها من البلكونة ..؟؟

كل ده قدام عيني حرفياً، شافني واقفة بتفرج على اللي بيحصل وكان الوقت متأخر ومحدش صاحي في الشارع ولا حد شاف الكارثة دي غيري.

مراته شالت ميكى ماوس من عليها وفضلت تصرخ على بنتها صحت الجيران كلهم والبنت ماتت بالفعل.

وجت الحكومة خدت الراجل بتاع العرايس ده لكن طلعهوشهادة معاملة أطفال لأنه فعلاً اتجنن بعد ما استوعب أنه قتل بنته بايده بسبب الهلاوس.

استوقفنتي منة وسألنتني سؤال مهم قطع كلامي "لحظة بس.. أنتي بتقولي البنت ماتت خلاص أو مال مين اللي في الشباك دي مش فاهمة بردو."

كنت عارفة أن فضولها تجاه البنت مش هينتهي وكملت كلامي وأنا بقولها:

-مانتي هتفهمي دلوقتي ..

الراجل بعد ما خرج من السجن حصلت مشاكل أكبر واكتشفوا جثتين كمان في نفس العمارة لطفلتين



"أنا فعلا مخوفتش وطلعت خبط على طنط وفاء فتحتلي وهي بتتكلم تقريبا في التليفون وسمعتها بتقوله "لحظة واحدة يا بهاء جبالك.. حد بيخبط" ... لكن ... لكن بهاء ده اسم بابايا أنا؟؟".

مشكتش في حاجة وقتها واندفعت مرة واحدة أول ما شوفتها وقولتها "أنا شوفتك وانتي بتخوفيه.. انتي السبب.. انتي اللي بتقتلهم وهفرج العمارة عليكي."

كنت غبية ومتهورة لأبعد الحدود، الست وفاء حطت أيدها على بوقي وخافت من الفضيحة وسحبتني جوه شقتها بالعافية .

لكن مش الصدمة الحقيقية في اللي عملته فيا، الصدمة كانت في بابا اللي خرج من الاوضة على صوتي وهو بيقولي "مش قولتك متكلميش، ليه جيتي ليه."

يعني بابا كان شريك في كل الجرائم اللي حصلت وهو اللي حرصها إنها تجنن جوزها علشان لو اكتشف خيانتها محدش يصدقه ويقولوا ده مجنون.

وقتلوني.. قتلوني يا منة وروحي فضلت متعلقة مع تسنيم هنا.. وتسنيم ظهرتك دلوقتي إشارة إني احكيك حكايتنا.

كنت عارفة أن منة أول ما هتسمع أخر جملة هتطلع تجري وتصرخ، منة أصلا مش صحبتي دانا اتعرفت عليها من اسبوع واحد بس .

لكن.. لكن منة مصرختش ولا عملت حاجة، ولقيتها بتقولي "يا حبيبي يا تسنيم، للدرجادي منسينيش؟".

استغربت من كلامها وقولتها "انتي كنتي تعرفيها؟ ومش خايفة مني لأنني طلعت روح ومقتولة؟".

ردت وقالتلي "تسنيم دي صاحبة عمري، وانا أبقي زينب صحبتها اللي في العمارة، من ضمن البنيتين اللي ماتوا."

**ت**

## رسالة إنتحار

حاولت كتير أمنع نفسي من اللي هعمله ده لكن للأسف مقدرتش.  
قبل أي حاجة ويمكن تكون دي آخر كتاباتي أحب اعرفكم بيا:

-أنا شهيرة عبد الحميد، الكاتبة اللي اغلبكم أشاد بموهبتها في كتابة حكايات الرعب .

لكن الحقيقة أنا مش كاتبة...

أنا شخص مكتئب يهرب من قوقعة أفكاره وحياته اللي تشبه الدفن بالحيا.

أنا يا سادة بكتب الكلمتين دول دلوقتي علشان الناس تعرف قصتي، وجايز تفكروني بدعوة صادقة طيبة في يوم ومحدث يظلمني "مش هيبقى دنيا وأخرة."

وأنا صغيرة في مدرسة الابتدائي اللي كان أسمها "أبو بكر الصديق" كان في بيت مهجور قدام مدرستي دايمًا المعلمين بيحذرونا منه .

لكني كنت طفلة شقية بشكل مبالغ، و حياة الجحيم اللي أنا فيها دلوقتي هي بسبب الشقاوة دي.

كنت وقتها في سنة رابعة ابتدائي، أنا فاكرة كويس كل التفاصيل. كل يوم كنت ابص من شباك الفصل وأفضل مركزة على البيت المهجور .

في نفس التوقيت ده كنت متأثرة جدًا بكارتون علاء الدين والمصباح والسجادة السحرية، فكنت بتخيل نفسي وأنا باصة على البيت المرعب ده إنني لو دخلته هلاقي المصباح ويطلعي جن يحقلي كل احلامي.

احلامي وقتها كانت بريئة، أعتقد كان أكبر احلامي وقتها أني اشتري علبة جبنه وأكلها كلها لوحدي بالمعلقة، أو ماما تبطل تضربني لما تشوفني بسف السكر من وراها .

الفكرة فضلت تكبر وتترسخ جوايا لحد ما لمحت في يوم ضل بيشاورلي من بعيد جوا البيت..!؟!

قلبي اتقبض ورجعت قعدت مكاني على الديسك وأنا بترعش ومحكيئتس لحد اللي شوفته نهائي.

فضلت طول الليل بفكر في الضل اللي شوفته، أنا متأكدة اني شوفت يد حد كان بيلوحلي بيها كأنه بيقولي تعالي!؟!

تاني يوم وانا رايحة المدرسة الساعة سبعة الصبح وقفت قدام باب المدرسة ابص على البيت من بعيد .

شوفت بعيني يد سودا بتخرج من الشباك وبتقفل نص الضلقة واختفت؟؟ شاورت لصحبتني اللي كانت عمالة تشدني علشان ندخل المدرسة ومنتاخرش وقولتلها:

-هدير بصي؟ الشباك اتقفل.

بصت وقالتي:

-شهيره هقول للميس أنك بتبصي على البيت ده، عشان هي قالت مينفعش نبص عليه أو نروح ناحيته.

كنت عارفة أن محدش من صحابي هيطاوعني على الكارثة اللي في دماغي أعملها .

وحسيت وقتها إني لازم أعتمد على نفسي واعمل ده في السر لوحدي.

دخلت المدرسة وانتظرت لحد ما جت الفسحة علشان اقف اتشعبط على الشباك و أراقبه بتركيز.

لكن... لكن مظهرش حاجة تاني للأسف رغم اني فضلت واقفة طول مدة الفسحة لحد ما انتهت.

لما رجعت البيت سمعت بابا وماما بيتخانقوا في اوضتهم على مصاريف البيت والدروس وصوتهم كان عالي جداً المرادي، لدرجة أن ماما نزلت وسابت البيت .

وقتها انهارت من البكاء كأني طفلة بتحس أن أمها بعدت عنها وبتعتقد أنها مش راجعة .

مجاش في بالي وقتها غير البيت المهجور اللي شوفته؟؟؟ قولت لنفسني ليه مدخلش ويمكن ألاقي كنز يحل كل المشاكل دي وماما ترجع البيت لما اجيبها فلوس كتير؟؟!

الفكرة فضلت تكبر جوايا لدرجة أنني منمتش الليل كله. عقلي كان مأكدلي إن البيوت القديمة دي فيها كنوز زي أفلام الكارتون فمكتش عندي ذرة خوف.

تاني يوم نزلت المدرسة وأنا ناوية أوصل لحلمي ومحددة هدفي "هدخل البيت المهجور."

وأنا في الطريق قرب المدرسة قابلتني صحبتي هدير ودي كانت اسوء حاجة حصلت وقتها، مكتش عايزة حد يعطلني ولا يكشف تأخيري عن دخول المدرسة.

كانت مصممة ندخل المدرسة سوا لكني ادعيت اني نسيت كشكول الواجب في البيت ولازم أرجع احييه، ويأما اتأخر ومرجعش، يأما هرجع متأخر ساعة .

أول ما هدير سابنتي واثأكدت أنها دخلت المدرسة خلاص، اتسحبت وأنا بعمل نفسي بتمشى جنب سور البيت علشان محدش يلمحني وأنا بدخل.

بوابة البيت كانت حديد وقصيرة ومقولة بسلسلة حديد واسعة ويادوب المكان المفتوح بسبب السلسلة ده قدرت اتسحب وأدخل منه نظراً لحجمي الضعيف.

كنت حاسة بحجر اتشال من على قلبي أول ما قدرت ادخل واتدارى في البوابة جوا وخلاص مفيش حد من اللي برا هيقدر يشوفني.

كان في المدخل قدامي أربع سلالم كبار وقدامهم باب شقة متوارب وكله عنكبوت وتراب .

دخلت بشويش وأنا بتسحب وقلنت الباب ورايا علشان محدش يشوفني من شبابيك المدرسة اللي بتكشف البيت بسهولة.

كان بيت غريب.. لوحات كتير متعلقة على الحيطان كأنه معرض صور، وأغلبها لصور حيوانات .

ده غير تماثيل الحيوانات المتحنطة في كل مكان، ذنب متحنط جنب الكرسي وراس غزال تقريباً متعلقة في الحيطه.

اللي يشوفهم يقول أنها صاحيين، أو.. أو فيهم الروح.

كل ده مكنش مبهر وغريب قد التمثال اللي لقينته متغطي بملاية بيضا مدفونة من كتر التراب.

كنت هتجنن وأعرف إيه التمثال الطويل أوي ده، وشديت الملاية من عليه مرة واحدة والتراب كله هب في وشي.

حطيت ايدي على وشي وقعدت اكح بعيد عن التراب لحد ما هديت و قدرت أفتح عيني وشوفتها؟؟

تمثال لواحدة ست، لكن... هي مش ست .

هو تمثال لجسم ست لكن براس طفلة من سني تقريباً؟؟

وقفت تتحت للمنظر وأنا بسأل نفسي هي دي حقيقية زي الحيوانات المتحنطة فعلاً؟؟ ولا معمولة من الجبس بس؟؟

حسيت أن الوقت هيتأخر عليا ولازم اشوف المصباح أو الفلوس وأخرج بسرعة علشان ميعاد المدرسة .

لقت نظري الذهب الكثير اللي لابساه التمثال؟؟..

ابتسمت أول ما استوعبت أن الكنز قدامي بالفعل ومش محتاجة ادور عليه خلاص .

قربت منها ولسه بلمس بأيدي الذهب أيدي اتسلعت كأني لمست حلة على النار .

صرخت غصب عني لأنني اتألمت من اللسعة، وقولت جايز لأنه ذهب سحري فحرارته تكون غريبة كده.

قومت تاني لكن المرادي مسكت في أيدي الملاية كحاجز علشان متلشعش، وأول ما الملاية لمست الذهب ولعت في أيدي؟؟

وقعت على الأرض وأنا بصرخ وبيبعد عن النار اللي مسكت في الملاية فجأة بدون سبب وخايفة لاتمسك فيا.

وأنا برجع بضهري خبطت في رجل شخص؟؟

بيبص ورايا لقيت المرادي جسم طفلة، لكن براس واحدة ست كبيرة ومتخيطة خياطة واضحة وبشعة كأنها متلصمة؟؟

قلبي كان هيقف وجريت استخبي في التمثال وهي واقفة على الباب بتبصلي بغضب وقالتلي:

-مروحتيش مدرستك ليه؟؟ كده هنتعاقبي.

سمعت صوت طفلة بيرد عليها وبيقولها:

-حرام يا ماما سببها تمشي دي بتترعش.

بصيت فوقيا ناحية الصوت لقيت راس الطفلة اللي فوق التمثال باصة عليا لتحت وبتبتسملي..؟؟.

اتفزعت وفضلت أصرخ، مكننتش عارفة اهرب واروح فين؟؟ تمثال راس الطفلة ف الصالة، وتمثال راس الست الكبيرة وقفالي على الباب؟؟

قربت الست الكبيرة دي ناحيتي وأنا كل ده واقفة في ركن جنب الحيطه مش قادرة اتحرك يمين أو شمال منهم.

مسكنتني من شعري وأنا بصرخ بأعلى صوتي وقلبي خلاص هيقف من كتر الخوف والرهبه،  
وقالتلي:

-لو جيتي هنا ثاني، هعمل فيكي زي ما اتعمل فينا.

وأول ما سابت شعري من أيديها طلعت أجري بأقصى سرعتي برا البيت لحد ما خرجت منه  
خالص.

أنا نجيت؟؟

مكنتش مصدقة نفسي إني خرجت منه، قعدت قدام البيت أول ما لقيت نفسي في الشارع وانهارت  
من العياط .

ولما الناس اتلموا عليا ولاحظوا وجود طفلة برا المدرسة مقدرتش اقولهم إني دخلت البيت .

لكن أنا لحد دلوقتي بعاني من الحادثة دي، مش لأنها حصلت لأ.

لأنهم لسه بيظهرولي.. لسه بشوف الطفلة اللي بجسم انثى، والست الكبيرة اللي على جسم طفلة؟؟!

بيظهرولي في كل مكان.. في أحلامي.. وفي بيتي.. وفي الشوارع الضلمة وكل ركن ضلمة.

رسالة الانتحار دي أنا بكتبها بدموعي، لأنني مش قادرة اكمل حياتي واعييش طبيعية زي باقي  
البنات.

لكن مجرد ما خلصت الرسالة وبطبقتها علشان اسببها على مكتبي، عمر اخويا فتح الباب فجأة ودخل  
وقف قدامي وهو بيقولي:

-صوت عياطك جايب برا.. ايه اللي بيحصل مالك؟؟

لاحظ إني بحاول اداري الورقة اللي في أيدي وبكرمها، وقرب وخذها مني غصب عني.

مكنتش حابة أنه يعرف سري بدري ويلحقتي ولا يتعاطف معايا لأن مفيش حل لأزمتي خلاص .

عمر وقف يقرأ الورقة كلها ولما خلص قالي:

-وايه يعني، مانا كمان شوفتهم وبشوفهم..؟!!

كنت حاسة أنه بيضحك عليا علشان يهون شوية الموقف وسألته بخوف:

-إزاي؟؟ شوفتهم إزاي وأمته؟؟

رد وقال قصة عجيبة أول مرة أسمعها في حياتي منه:

-في مرة وأنا في تالته ابتدائي أنا وصحابي مدخلناش المدرسة وقعدنا نلعب كورة في الشارع اللي ورا البيت ده .

ولما زهقنا من كتر اللعب قررنا نعمل رهان لأقوى وأشجع واحد فينا اللي هيقدر يدخل البيت المهجور ده ويجب منه أي حاجة ويخرج بسرعة.

الرهان كان شوية بلي ودبور لعبة ووقتها دول كانوا رهان قيم طبعًا وانا الدبور بتاعي كان مكسور وعايز أجيّب غيره .

فقررت إنّي أغامر وأدخل بنفسني حتى لو هجيب قشاية وأخرج على طول.

كنت مرعوب وقتها وصحابي وقفولي برا يشجعوني بحماس ودخلت من البوابة الحديد وأنا رجلي بتترعش .

أول ما دخلت أتهدّي أن في خيال هرب بسرعة، قلبي اتقبض وقولت أنا مش هكمل دخول .

كنت بتلقت حواليا علشان أشوف أقرب حاجة مني ممكن أخذها وأخرج، مكنتش في غير لوحات متعلقة وطويلة عليا مش هعرف اطولها .

لكن لقيت زهرية ورد ديكور طويلة على بداية غرفة مقفولة. كانت عبارة عن تراب لكن هتقضي الغرض لو خدت وردة وخرجت.

قربت منها وانا بتلقت حواليا كويس وخايف حد من صحابي يدخل يخضني ولسه بمد أيدي على الشجرة البلاستيك الباب اللي جنبي اتفتح وخرجت منه أيدي طفلة مسكت في أيدي جامد.

كنت فاكرها بنت من المدرسة ودخلت هي كمان، لكن أول ما ظهرت بجسمها وشوفتها قلبي اتلخ من مكانه.

كانت راس ست كبيرة على جسم طفلة صغيرة، زي اللي انتي وصفتيها بالظبط، ومن وراها سمعت صوت بنتها وهي بتقولها:

-سييه يا ماما حرام .

الأتين كان شكلهم أبشع من بعض، وخرجت أجري وأنا ميت من الخوف وبترعش .

وأول ما هربت وخرجت من البيت وحكيت لأصحابي قعدوا يضحكوا ويتريقوا عليا ويوصفوني بالجبان .

وقررت إنني محكيش لحد ثاني طول عمري لأن اكيد محدش هيصدق هلاوس من طفل صغير، رغم... رغم أي بشوفهم لحد دلوقتي وبحلم بيهم كمان.

عارفة يا شهيرة إيه اللي مختلف عني وعنك في حكاية البيت ده؟؟

رديت وسألته:

-إيه هو؟؟

رد وقالني بعد ما قعد على الكرسي اللي قدامي:

-اني بدل ما أهرب طول عمري زي ما هربت وأنا طفل زمان، حاولت أفهم هما ليه بيظهروني وكل ما بشوفهم أنا اللي بروح ناحيتهم وهما اللي بيهربوا مني، لحد ما جمعت منهم شوية كلام لسه بالنسبالي مش مفهوم.

الموضوع ثار فضولي وحسيت أن رهبة الخوف اتشالت من جوايا وقولته:

-كلام إيه اللي جمعته؟؟ أنت كلمتهم بجد؟

ضحك وقالني:

-هقولك ياستي اللي جمعته، رغم أنه سر بس مفيش مشكلة لو نتشارك فيه أنتي زي اختي بردو .

أنا اكثر من مرة حاولت اتكلم معاهم واسألهم هما ليه أرواحهم مازالت موجودة رغم مرور السنين دي كلها؟؟

في مرة البنت الصغيرة شاورتلي على الأرض وهي بتدبب برجلها وبتقولي "هنا، بابا كان هنا."

وفي مرة ثاني الست الكبيرة قالتلي "كان عايز ولد زيك، بيكرهنا كلنا."

كلامهم غريب ومش مترتب، لكن في كل مرة كنت بشوفهم بتعشم أكثر إني أفهم منهم حاجة جديدة بس مفيش فايده، نفس التكرار ونفس الكلمات .

معرفش أنا جبت الشجاعة دي منين وسألته:

-طب يا عمر مفكرتش ولا مرة أنك تروح البيت ده مثلاً وتحاول تسأل حتى الجيران عن اللي حصل في البيت ده زمان وليه أصلاً اتهجر بالشكل ده؟؟

رد وقالني:

-فكرت كثير، لكن الموضوع مكنش واخذ مني الحيز الكبير زي ما أخذ منك، بس بعد رسالة الانتحار اللي شوفتها منك دي أنا مستعد أروح أواجه البيت وأعرفك سره لجل أنك ترتاحي وميعملوش قلق لحياتك بالشكل المفرط ده .

عمر طول عمره مش بس أخويا، هو سندي والبطل اللي متكتبش في رواية ولا اتسجل في التاريخ، لكن اتسجل جوايا كأعظم راجل في الدنيا .

حسيت إني محتاجة أعرف سرهم و أواجه خوفي و اعمل زي عمر وبدل ما أفضل اهرب، اروح لهم أنا بنفسني المرادي...!

وفي لحظة اندفاع قولتله:

-هنروح سوا يا عمر، خدني معاك.

\*\*\*\*\*

ثاني يوم رجع عمر من شغله الساعة سبعة المغرب، كنت مطبطة معاه وقاعدة مستنياه يرجع علشان ننزل ونروح نشوف البيت من بعيد ونسأل عنه زي ما اتفقنا .

أول ما اتصل بيا وقالني أنزلني أنا تحت، نزلت جري وأنا مبسوطه وفي قمة سعادتني أن أخيراً كابوس حياتي اللي بيطاردني هينتهي النهاردة خلاص.

ركبت وراه المكنة وفي أقل من نص ساعة وصلنا عند المدرسة.. مدرسة "أبو بكر الصديق."

الجو كان بدأ يعتم خلاص والليل داخل علينا، المنطقة كانت هادية جداً واتغيرت كثير عن زمان

لدرجة أننا معرفناهاش .

لكن مش شارع المدرسة بس اللي أتغير، ده... ده البيت المهجور كمان اتجدد ومنور وأتغير نهائي عن زمان؟؟.

أنا وعمر بصينا لبعض وأحنا مستغربين حال البيت والتغيير اللي حاصل، سألته:

-هنعمل إيه؟؟ نمشي خلاص كده ولا نسأل المحلات؟

رد وقاله وهو بي فكر:

-لو سألنا المحلات جايز يتشك فينا ويتعلمنا حوار، تعالي ندخل نخبط عادي ونقول أننا جاين نزور أصحابنا اللي ساكنين هنا ونعرف مين الساكن الجديد وسكن امته وكده.

كانت فكرة كويسة إلى حدّ ما، ودخلت معاه وأنا ماسكة في أيده وببص حواليا على البوابة اللي اتجددت واتدهنت باللون الابيض والزرع اللي واضح أنه لسه جديد والمكان كله اتحول كأنه مبني امبارح.

كنت بسأل جوايا وبقول لنفسى "مين مجنون يجدد بيت مهجور كده وسمعتة معروفة في المنطقة كلها؟"

عمر رن الجرس ووقفنا ننتظر حد يفتحنا لحد ما سمعنا صوت شاب بيقول بغضب:

-مين؟؟ مين برا أنا مش هفتح.

رد عمر وقاله:

-السلام عليكم، مش ده بيت.....

ووطى صوته شوية وقال كلمة مش مفهومة علشان الشاب يفتحنا وخلاص .

وبالفعل الشاب فتح الباب، وسمعت عمر أول ما شافه قاله بصدمة:

-محي؟؟...

الولد كمان ردد إسمه وقاله:

-عمر؟

كان واضح أنهم يعرفوا بعض وهما الاتنين قالوا في نفس الوقت:

-انت إيه اللي جابك هنا.

استقبلنا محي ودخلنا البيت نتكلم جوا، لكن مكنش في تماثيل زي اللي شوفناها زمان، كل شيء متغير.

بدأ عمر بالسؤال وقال لمحي:

-هو أنت صاحب البيت ده؟؟ ولا إيه اللي جابك هنا.

رد وقاله:

-لأ أنا مش صاحب البيت، لكن اشتريته وجددته ولسه أول ليلة ليا هنا، لكن أنت إيه اللي جابك هنا اصلاً؟

رد عمر وهو بيبصلي ومش حابب يكسر بفرحة صديقه بعد ما باركله وقاله:

-مبارك عليك.. لكن... لكن يعني الدنيا ضاقت بيك يا محي علشان تشتري هنا؟؟ مانت عارف من زمان أن البيت ده مهجور وسمعته يعني أعوذ بالله.

رد عليه محي وهو بيمسح جبينه من العرق والتوتر بشكل ملحوظ:

-كان لازم اشتريه يا عمر وارتاح، أنا تعبت كثير في حياتي بسبب البيت ده، وجددته وعملت كل ده علشان بس يسيبني في حالي واقدر أعيش.

كلام محي كان شبه واضح بالنسبة لينا، ولقيت نفسي بتدخل في النقاش وبقوله:

-انت كمان شوفتهم؟؟

رد عليا وقال بحرج:

-للاسف.. أه، وبحاول أراضيهم بأي شكل من الأشكال وجددت البيت كله وجبت عمال جايز يكتشفوا حاجة لكن مفيش فايده.

عمر سأله:

-طب إزاي؟ وليه مقولتلش .

رد محي وقاله:

-لو تفكر يا عمر أنا الوحيد اللي كنت واخد ركن يوم ما اتراهننوا على دخول البيت.. أنا الوحيد اللي كنت دخلته قبلك وكنت خايف عليك من اللي شوفته .

لكن خوفت أتكلم وقتها حد يفتن عليا للمدرسين ويتعملي فصل.. علشان كده كتمت جوايا لكن خلاص مبقتش متحمل ظهورهم .

جرس الباب رن وأحنا قاعدين، محي اتوتر وهو بيقول:

-اناااا خلاص تعبت منهم تعبت.

سألته بهدوء:

-طب أفتح شوف مين الأول إيه المشكلة؟

رد وقاله:

-مش هينفع يا أنسة، دانا من أول ما جيت على الحال ده كل شوية الباب يخبط وافتح ملاقيش حد.

عمر قام وقاله:

-هفتح أنا.. مهو أكيد في سر ولازم يظهر الليلة دي لينا كلنا.

قام وفتح الباب وانا واقفة وراه لكن فعلاً مفيش حد، حتى الشارع هادي جداً ومفيش أطفال.

عمر قفل الباب تاني وقالنا:

-اناااا افتكرت حاجة مهمة.

كلنا انتبهنا لكلامه وكمل وقالنا:

-انت يا محي بتقول جددت البيت علشان العمال يكتشفوا لو في حاجة صح؟؟

رد وقاله:

-صح.

فسأل عمر بهدوء:

-يعني التماثيل اختفت من البيت؟

محي أكد كلامه وقاله:

-ايوا فعلاً ملقوش حاجة.

مبقتش فاهمة عمر بيفكر في إيه وقولتله:

-ما توضح قصدك يا عمر، أنا اعصابي باظت.

رد وقاله:

-البنيت الصغيرة لما كانت بتظهرلي كانت بتدبب على الأرض.. معنى كده أن في بدروم أو منزل موجود في أرض البيت هنا ومحدث اكتشفه؟؟!

\*\*\*

فهمنا اللي عمر يقصده وابتدينا كلنا نمشي خطوة خطوة في البيت واحنا بندبب في الأرض وبنحاول نستكشف مكان مُفرغ يظهرلنا أنه مش أرض صلبة وبوابة للنزول.

دخلت أوضة البنيت اللي كان فيها التمثال الكبير زمان ومشيت خطوة خطوة وأنا بدبب بكعب جزمتي البسيط، وأول ما وقفت مكان التمثال بالظبط واللي كان محطوط بداله سجادة عادية... كعب رجلي غرز في الأرض وأنا بصرخ من الخضة.

عمر ومحي جريوا على صوتي وعمر لحقتني بسرعة وبعدي عن المكان وشال السجادة ولقينا بلاطة مكسورة ودي اللي شبكت فيها بجزمتي.

بدأ هو ومحي يشيلوا البلاط من المربع ده وكان بيتشال بسهولة كأنه أتخلع قبل كده .

وبعد ما خلصوا اكتشفنا باب خشبي مردوم تحت البلاط والرملة، شالوه ومن هنا اتفاجئنا كلنا .

سلم حديد بيوصل لمكان سري تحت البيت !!؟!

نزل محي الأول ونزلنا أحنا وراه وفتحنا الكشافات، وبالفعل لقينا التماثيل مرمية على الأرض وسط كراكيب وحاجات كتير متكسرة.

محي قرب من التمثال ونزل على الأرض يلمسه وهو بيقولنا:

-دول متحنطين، مين ممكن يعمل كده في ست وبنتها؟؟

كانت أعصابي بايظة من المنظر ومقدرتش أتحمل قلة الأوكسجين في المكان وطلعنا كلنا من تاني واحنا بنكح من ريحة التراب والكتمة اللي تحت.

أول حاجة فكرنا فيها إننا نطلع نقدم بلاغ في القسم لكن عمر كان له رأي مختلف لما منعنا وقال:

-محي أنت اشتريت البيت ده من مين أصلا؟؟

رد محي وقاله:

-مانا لما سألت في الشارع قالولي أن الحج عبد السلام هو الوريث الوحيد لأصحاب البيت وتقريباً يقرب للست اللي ماتت هنا.

عمر خبط على راسه وقاله:

-ومقولتش ليه كل ده من بدري.. أحنا نروحله دلوقتي ونبلغه باللي شوفناه في البدروم وهو أكيد اللي هيقولنا نعمل إيه بدل ما نتاخذ كلنا في تهمة ملناش يد فيها.

مش عارفة إزاي محي فات عليه معلومة مهمة زي دي وخرجنا نجري وروحنا عن بيت الحج عبد السلام اللي كان ساكن ورا البيت بشارعين في نفس المنطقة .

كان راجل عجوز في السبعينات تقريباً أو ستينات، ببيصلنا بتعجب كده وهو بيقولنا على الباب:

-مين حضراتكوا؟!

جاوبه محي وقاله:

-اناااا محي يا حج عبد السلام، اللي اشتريت منك البيت .

رد وقاله:

-خير يابني؟؟ جاي ترجعه؟

عمر أتدخل وقاله:

-احنا عايزين حضرتك في كلمتين بس بخصوص البيت وهنمشي على طول لو تسمحنا من وقتك خمس دقائق.

رحب بينا ودخلنا قعدنا في بيته البسيط اللي بيفكرني ببيوت أجدادنا زمان الله يرحمهم .

كان واضح أنه عايش لوحده ومفيش حد في البيت معاه وقالنا بقلق:

-خير يا شباب قلقوني.

محي كان على وشك أنه يحكيه عن اللي حصل لكن سبقه عمر وهو بيقول:

-خير بإذن الله، أحنا بس كنا عايزين نعرف من حضرتك يعني اللي حصل في البيت المهجور ده زمان .

نظرات الراجل لينا كانت بتدل أنه غضبان وقالنا:

-يعني انتوا جايين تعلقوني في ساعة زي دي علشان احكيلكوا حدوة البيت القديم؟ ميصحش يعني اللي بتعملوه ده.. دي أسرار بيوت واتقلت من بدري أي فايديتها .

ووجه كلامه بغضب لمحي وهو بيكمل:

-وانت يا أستاذ محي لو عايز ترجع البيت وتاخذ فلوسك مفيش مشكلة لكن متدخلش في أسرار البيوت .

عمر حاول يوضحله الموقف وقاله:

-يا حج عبد السلام أسمعني، احنا اكتشفنا سر في البيت وعايزين نعرف نتصرف إزاي ومفيش حد غيرك يقدر يفيدنا، واكيد حضرتك مترضاش إننا نتحسب ولا يحصلنا مصيبة ملناش يد فيها.

الراجل قام من مكان فجأة وهو بيقولنا بصدمة:



اللي انتهت وانتقلت من سنين بدون ما صاحبها ياخذ جزائه في الدنيا، لكن رجع الحج عبد السلام يكمل كلامه وهو بيقول بفرحة:

-لكن.. لكن ربكم ميرضاش بالظلم أبدًا.. جت أخبار المنطقة بعد ثلاث سنين أن جوزها مات موة بشعة ولقوه متقطع على الطريق في حادثة سير، الحمد لله.

خدنا الحج عبد السلام معنا القسم لانه الشاهد الوحيد على حادثة أخته وبلغنا بوجود الجثث تحت البيت، ورجع كل واحد لحياته الطبيعية الخالية من القلق والهلاوس .

وحقيقي نعمة أنك تدرك أن الحياة الروتينية العادية دي فيها رحمة كبيرة جداً جداً من ربنا محتاجين نشكره عليها طول الوقت، وعلى نعمة اليوم اللي بيمر بسلام بدون كوارث أو مصايب مفاجئة.

تـمـت

## شبح السكن

نجاه أنا مش مرتاحة للشقة دي، قلبي مقبوض من أول ما دخلت فيها ومش قادرة أنام واغمض عيني.

مكنش في إيجار أرخص من كده اجيبه لصحابي ورديت على راوية وأنا متعصبة لأنني تعبت على ما لقيت الشقة دي وقولتلها:

-بقولك إيه يا راوية، أنا مش هلف على شقق تاني الشقة جميلة وواسعة وفيها تلت سراير على قدنا، واللي عايزة تمشي فيكوا براحتها بقا.

أنا بعترف إنني كنت عنيدة ومطاو عتش صحابي وخوفهم، وإنني السبب دلوقتي في ضياعنا بعد ما.....!! بعد ما ظهرتلنا.

الموضوع بدأ لما أنا واثنتين من صحابي قررنا إننا ناخذ سكن منفصل عن سكن البنات اللي بيحصل فيه مشاكل وسلبيات كتير.

وطبعاً كانت الفكرة أساسها من تفكيري أنا لأنني מבحبش الزحمة والحياة اللي فيها حوارات وأشخاص كتير. وشجعت راوية ومريم صحابي المقربين أنهم يستقلوا معايا ونشوف سكن منفصل على قد فلوسنا ونتشارك فيه.

فضلت أبحث عن سكن رخيص حبتين لمدة أسبوعين لحد ما أخيراً ربنا وفقني ولقيت راجل سمسار كويس جداً رشلي شقة في عمارة شعبية وقالي أنها رخيصة لكن أهم حاجة مختلطش بالجيران ولا أتكلم مع حد.

قولت أكيد في سكان مش كويسين وعشان كده سمعة العمارة دي مش ولا بد، لكن مش مهم .  
إحنا كده هنكون في حالنا ومحدث هيسمعنا صوت.

خدت مريم وراوية السكن الجديد ونقلنا حاجتنا فيها. مريم أول ما شافت الشقة كانت مبهوره "إزاي شقة حلوة ومفروشة وواسعة كده بالإيجار ده؟ حقيقي تحفة"

ده كان رأي مريم في الشقة، لكن راوية من وقت ما دخلت البيت وهي مبلمة ومصدومة وبتتلفت حواليا زي المخطوفين .

راوية عموماً أكثر بنت جبانة أنا شوفتها في حياتي وبتخاف من خيالها فكان طبيعي تكون دي ردة فعلها الأولى في المكان الجديد ومحطتش في دماغي.

من أول ليلة و راوية زميلتي بدأت تصيح أنها خايفة وقلبها مقبوض ومش قادرة تنام، رغم أننا نقلنا التلت سراير في أوضة واحدة ومفيش أي خوف.

لكن مريم كانت أول واحدة تنام فينا ومريحة دماغها، والحق يتقال أنا كمان قلبي كان مقبوض من العمارة كلها وهدوءها الغريب!!..

الساعة كانت حوالي ٢ بليل وأنا مازلت صاحية عشان أطمئن راوية أنها تنام ومتقلقش.. ووسط الهدوء والجو المتأخر ده .. جرس الباب رن ...!؟

راوية اتنفضت وهي بتبرقلي كأنني أنا اللي عملت الصوت مش الباب وقالتلي "مين؟ مين بيخبط يا نجاة؟ أنتي منتظرة حد من البنات جايلنا؟"

شاورتلها تهذا وقومت صحيت مريم أشوفها يمكن عارفة مين اللي على الباب..؟

"مريم.. مريم قومي في حد بيخبط أنتي منتظرة حد...؟"

فاقت مريم وبصتلي بنص عين وقالتلي " لأ محدش يعرف العنوان أصلاً، بعدين مصحيانى عشان الباب بيخبط ما تفتحوا وتعرفوا بنفسكوا"

طلبت منها تقوم تفتح معايا الباب لأنني فعلاً اتوترت والجرس صوته مستمر وكان في مصيبة بتحصل..؟؟

قامت مريم معايا وهي بتتأفف وراوية ماسكة في ضهري وهي عمالة تقول "أعوذ بالله من الشيطان الرجيم، الجن مش بيرن الجرس يا نجاة صح؟ أكيد مش جن صح صح؟"

راوية كانت موتراني أكثر من الجرس نفسه ومصعدالي أجواء الرعب اللي بتحصل جوايا. مريم قالت بصوت عالي "مين؟"

رد صوت شاب من ورا الباب بيقولها "أنا هشام، جار حضرتك اللي فوق"

كان أسلوبه محترم وصوته مش مرعب، فتحت مريم الباب وأنا وراوية واقفين نبص من جنب الباب عليهم .

"خير يافندم؟ في حد يخبط في وقت متأخر زي ده؟"

مريم كانت حادة وقوية في أسلوبها وأحنا زي الفراخ المدارية وراها، رد الشاب وقالها "بعتر على

تأخير الوقت بس بنتي تعبانة ونازل أجيبها دكتور، ممكن حد منكوا يطلع يقعد معاها لحد ما أرجع ؟"

أحنا الثلاثة بقيتا نبص لبعض وافتكرت كلمة السمسار لما قالي "بلاش تتعاملي مع السكان". وبصراحة خوفت يكون بيستدرجنا بحجة بنته وقولته "لو فعلاً بنت حضرتك تعبانة تقدر تجيبها لنا هنا لحد ما ترجع، لكن ميصحش ندخل شقتك في وقت زي ده"

رد وقالي بتوتر "حاضر حاضر، شكراً جداً هطلع اجيبها واجي حالاً"

قفلنا الباب وقعدنا ننتظره ينزل ويجيب البنت لكن مر أكثر من ساعة ومنزلش، أتأكدت وقتها أن الشاب ده غرضه غير شريف وكان عايز يستدرجنا فقط.

دخلنا نمنا الليلة دي وانفقنا إننا منخطلنش ومنصدقش أي شخص في العمارة الغربية دي ونعيش في حالنا.

تاني يوم كان اجازة ومفيش ورانا دراسة ومشاوير، صحيت الصبح بدور على فطار لكن اكتشفت أننا نسينا نجيب شوية أكل زيادة معانا.

طلبت من راوية ومريم إننا ننزل نجيب شوية مشتريات لزوم الأسبوع بدل ما نحتاج ننزل كل يوم.

وأحنا بنلبس رن جرس الباب من تاني.. شكينا أن الشاب رجع تاني يضايقنا ومش هنخلص من الحكاية دي.

خرجت مريم بعصبية وهي بتستحلفه وبتقول "أقسم بالله لو طلع هو لهزقه وافرج عليه العمارة كلها"

خرجنا كلنا منفعلين فتحنا الباب لقينا ست مليانة بشوشة كده شايلة على دماغها صنية أكل وبتقولنا "صباح الخير يا قمرات، أنا أم حسين اللي في الدور التاني تحتكوا.. معلش بقا لو بخبط عليكوا بدري كده بس أنا سمعت أن الشقة سكنت لطالبات وقولت اقدملكوا زيارة بسيطة كده.. أنا زي والدتكوا متخافوش"

وبصراحة دي الحاجة الوحيدة العدلة اللي حصلت من وقت ما جينا. شكرناها وقبلنا منها الزيارة اللي كانت عبارة عن صنية مليانة بخيرات الله.. فراخ ورقاق وطواجن ملوخية وأكل يكفي أسبوع حرفياً.

قررنا إننا نوفر الفلوس اللي معانا وننزل نشترى حاجات بسيطة زي صابون موعين وشامبوا وحاجات شخصية ونكتفي بصنية الأكل دي تكفينا كام يوم.

معرفش ليه لما خلصنا وأحنا راجعين على باب العمارة في طفلة أول ما شافتنا طلعت تجري وهي بتصرخ وتقول لوالدتها " عفاريت تاني يا ماما عفاريت كتير "

أنا وصحابي بصينا لبعض نظرات استعجاب كده؟؟ للدرجادي شكلنا وحش أحنا الثلاثة مثلاً؟ ولا عشان لابسين أسود فوصفتنا بالعفاريت؟؟..

على أي حال ده كان موقف عابر بسيط مركزناش فيه. طلعت شوية فاكهة من الشنط اللي معنا وقولت أخطب على جارتنا أم حسين أهاديها بحاجة بسيطة زي ما عملت معنا .

راوية ومريم سبقوني على فوق ووقفت أنا خبطت على باب الجارة أكثر من مرة لكن... لكن مكنتش في أي أصوات ولا حاجة تدل أن في ساكن موجود هنا؟؟

قولت لنفسى "معقول لحقت تخرج؟" ومفیش لحظات وسمعت مريم بتندهلي من السلم بعصبية وتقول "يا نجااة.. اطلعي يا ست هانم"

ماكنتش فاهمة إيه اللي بيحصل وطلعت أجري أشوف مالها بتزعلي كده ليه لقيتها بتقولى "اتفضلي يا هانم اتفضلي.. شوفي بعينك"

وبتساورلي على صنية الاكل اللي بصيت عليها لقيتها فاضية والاطباق اللي عليها كأنها مغسولة؟؟

بصيتلهم وأنا بقولهم بتشتتت "أنا مش فاهمة حاجة، هي الصنية دي مش كانت مليانة قبل ما ننزل؟"

ردت راوية وقالت بخوف "الشقة دي أكيد فيها عفاريت أكيد"

لكن مريم انفعلت وقالتلها "عفريت إيه انتي كمان اللي جاي عشان ياكل ده، الشقة دي فيها حرامي معاه المفتاح ومش بعيد يكون الواد هشام اللي نزلنا بليل بحجة أن بنته عيانة ومحدث شاف وشه، أنا هطلع اهزقه بنفسى وهغير الكالون عشان لو فكر يجي ناحيتنا تاني مش هسيبه غير في القسم"

ومدتناش فرصة وطلعت تجري على فوق واحنا بنجري وراها بنحاول نمنعها لكن فجأة مريم اتسمرت مكانها قدام باب الشقة اللي فوق؟؟

باب الشقة عبارة عن فحم أسود كأنها ولعت من زمان..!! فضلت تبصلي وهي بتقولى "دي شقة مهجورة يا نجاة؟؟ اومال.. اومال مين اللي خبط علينا امبارح ومين اللي.. اللي سرق الأكل؟؟"

راوية صرخت وطلعت تجري على تحت وهي بتقولنا "أنا هاخذ هدومي وهمشي.. دي عمارة مش طبيعية أنا مش هقعد دقيقة تاني"

وقفت مع مريم على السلم وأنا بقولها بندم "أحنا شكلنا لازم كلنا نمشي فعلاً.. كل اللي بيحصل ده مش طبيعي وممكن تكون عمارة ملبوسة.. يلا يا مريم ننزل نلم هدمنا ونمشي حقك عليا أنا اللي عملت فيكوا كده واسترخصتها عشان الإيجار"

وأحنا بتكلم سمعنا صوت صراخ راوية جاي من الشقة تحت؟؟.. نزلنا جري عليها لقيناها واقعة على الأرض جنب النيش ومكرمشة رجلها وهي عمالة تصرخ وتقول "شوفتهاااا.. شوفتهاااا.. في المطبخ.. بتاكل الصينية"

مكناش فاهمين منها شئ.. حاولت أهديها وقومت أنا ومريم مكان ما بتشاور راوية على المطبخ واتصدمنا لما لقينا صنية الاكل رجعت زي ما كانت؟؟!

الأكل رجع زي ما هو بنفس الدخان اللي خارج منه كأنه معمول طازة والست لسه مطلعاه؟؟

جرينا على راوية تاني وسألتها "أنتي شوفتي إيه يا راوية اتكلمي شوفتي إيه"

فضلت تبكي بحرقة وجسمها كله بيتنفض وهي بتقول " شوفتهاااا.. لابسة أسود وكلها محروقة ومتفحمة.. واقفة بتاكل في الصينية بوشها زي الحيوانات، وبصتلي.. بصتلي يا نجاة ووشها محروق وعينيها كلها دم"

الوصف اللي قالته راوية كان كفيـل يرعبنا ويدب الخوف في قلوبنا.. مريم بصتلي بغضب لأنها عارفة أن أنا السبب في كل اللي بيحصل وقالتلي "قومي يا نجاة لمي حاجتنا كلها.. أحنا هنمشي دلوقتي"

قومت بسرعة لميت هدمنا والحاجة اللي جينا بيها.. وفي أقل من نص ساعة كنت خلصت وخذنا الشنط ونزلنا بسرعة من البيت المريب ده.

أول ما خرجنا لمحتنا نفس الطفلة اللي في البيت اللي جنبنا وفضلت تصرخ ودخلت بيتها جري وهي بتقول نفس الكلمة "عفاريت تاني.. عفاريت تانيبيبي"

المرادي مقدرتش أمنع نفسي وسبت الشنط على الأرض وجريت وراها دخلت بيتها لقيت والدتها وست كبيرة تقريباً جدتها قاعدين في حوش البيت من جوه وبيصولي بخوف؟؟!

سألت الأم وقولتها "هي بنتك كل ما بتشوفنا داخلين أو خارجين من البيت ده بتصرخ كده ليه؟ وليه بتقول علينا شياطين"

ردت عليا الست الكبيرة وقالتلي "اعذريها يابنتي أصل البيت ده ولع من زمان والشارع كله عارف

حكايته حتى الأطفال اللي محضروش الحادثة، بس بنحظرهم ميتعاملوش مع أي شخص يخرج منه"

مريم وراوية جم وقفوا ورايا وسمعوا الكلام، فمريم سألت "حكاية إيه بالظبط؟ وإزاي البيت ده ولع والسمسار اجر هولنا"

الست الكبيرة بصت لبنتها بخوف وهما مبرقين لبعض وقالتلي "السمسار ده صاحب العمارة نفسه، اللي ساكن في الدور الأرضي ولع معاهم"

"طب.. طب ليه ولع ليه؟ ومين عمل فيهم كده"

راوية قالت الكلام ده وهي بتتشحتف وبتمحي دموعها، فجاوبتها الست بكلام صعب لما قالت:

-العلم عند الله يابنتي، كل اللي نعرفه أن كان في بنت متغربة زيكوا كده جت أجرت الشقة اللي في الدور الثالث، وكان في شاب مش كويس عازب في الدور الرابع طمع فيها. ولما حاول يستدرجها وصرخت واستنجدت بالجيران، الست أم حسين اللي في الدور الثاني سابت أنبوبة الغاز مفتوحة وطلعت تجري تحوش وتدافع عنها مع باقي الجيران .

وفجأة البيت كله اتسرب غاز والانبوبة انفجرت ولعت في العمارة كلها، ومن وقتها والعمارة دي مهجورة محدش بيدخلها والشارع كله بيخاف يجي جنبها بسبب أصوات الصريخ اللي بتخرج منها كل يوم بليل.

ومن بعد اللي سمعناه عن العمارة أنا وصحابي رجعنا السكن الأساسي اللي كنا فيه، وعرفنا أن اللمة والزحمة مهما كانت مليانة بالمشاكل إلا إنها ارحم بكتير من العزلة اللي ممكن تتسبب في هلاكنا.

**ت**

## أم البنات

عمر ك سمعت عن سحر مربوط على فم الطير؟ وكلما طار الطير ذهب عقل المسحور معه؟؟  
طب تعالى يا صديقي احكيك عن فتحة جارتنا اللي قتلت عيالها بسبب السحر وإزاي اكتشفنا السر.

فتحة يا سيدي دي ست غلبانة فاتحة بقالة صغيرة من شباك شقتها اللي في الدور الأرضي. ست طيبة جداً وعلى قد حالها جوزها سابها بتلت عيال أصغرهم طفل يدوب عنده تلت سنين وبنين توام ست سنين.

ولأننا في العمارة كلنا عارفين قصتها وعارفين قد أي جوزها راجل نذل صاحب كاس وسيجارة وقد أيه فتحة كانت بتعاني معاه محدش فينا أستغرب لما فجأة جوزها اختفى وطفش وسابها بالعيال في رقتها.

على قد ما قدرنا كل واحد كان بيطلع اللي يقدر عليه ويساعد فتحة لحد ما جابت شوية كانتين أطفال وفتحت شباك بيتها تسترزق من الشارع.

لكن الحدث اللي قلب الشارع كله لما في يوم سمعنا صرخ بصوت عالي وناس كتير واقفين قدام باب العمارة منهارين ومش مصدقين اللي شايفينه.

بنت من بنات فتحة مشنوقة على باب العمارة وهدومها متقطعة وباين على جسمها علامات تعذيب بشعة على طفلة في سنها.

مكانتش مجرد علامات حفر بالسكين لأ.. كان وشها سايح من النار كأن حد كان بيرسم لوحة عليها وبيشكلها على مزاجه من أول وجديد.

فتحة من بعد الحادثة ومحدش بقا عارف يكلمها ولا يهون عليها بأي شكل.. مهو اللي شافته في بنتها مكنش قليل بردو أن أي أم تتحمله.

أنا ساكن في الدور الأول وللأسف ممكن اغيب بالاسابيع عن البيت بحكم شغلي، لكن في مرة عملت مشكلة كبيرة مع مديري وسبت الشغل في وقت متأخر ورجعت البيت.

وأنا داخل الحوش سمعت صوت بكى مكتوم جاي من شقة فتحة.. كأن في طفل بيتعذب لكن حد مانعه يصرخ فاللي ظاهر منه عبارة عن أنين خفيف.

كنت محرج أخبط على فتحة في وقت زي ده لاتفهمني غلط.. مانا راجل غريب بردو ومش من

حقي.

طلعت فوق لقيت أمي صاحية بالصدفة.. قولتها "ماتنزلي يا حجة كده تخبطي على فتحية عشان كنت سامع صوت غريب من شقتها وخايف يكون حد فيهم تعبان ولا حاجة.. وأديني موجود بالمرّة يمكن محتاجة مساعدة"

أمي ست طيبة أول ما قولتها لبست خمارها ونزلت تظمن عليها.. مفيش خمس دقائق ولقيتها طالعة وشها جايب ألوان ومخضوضة بشكل غريب!..

حاولت أفهم منها مالها لكن مقاتلتش غير "أعوذ بالله.. أعوذ بالله متهوبش ناحيتها تاني دي مش طبيعية.. دي اتجننت خلاص"

الفضول أشتغل جوايا أكثر للأسف ولقيت نفسي مش عارف أبطل تفكير في فتحية وعيالها وقعدت افكر في جثة بنتها اللي شوفتها بعيني متعلقة على الباب بشكل غريب والقضية اللي أتأيدت ضد مجهول.

كل اللي بيحصل ده مش طبيعي وفي حاجة كبيرة بتحصل لازم حد يلحق يتدخل قبل ما تضخم أكثر واكثر.

نزلت تاني يوم عملت نفسي بشتري منها حلويات لعيال الشارع وقولتها "قوليلي يا فتحية مفيش أخبار عن جوزك؟"

عين فتحية كانت عبارة عن سواد شبه المدمنين وطول الوقت رابطة طرحة سودا لورا ولا بسه عباية وقاعدة ثابتة مبتتحركش يدوب بتناول الحاجة وتاخذ فلوسها وخلاص.

لكن ردت عليا رد عجيب أوي بلا مبالاة كده وقالتلي "هتلاقيه رجع لمراته الاولانية.. مهو خسيس وكل ما بيزهق بيحب يبذل فينا"

الحقيقة دي المرة الأولى اللي عرفت فيها أن جوزها متجوز عليها.. أو خليني أقول.. فتحية هي اللي اتجوزته لأنها قالت مراته الاولانية.

حببت اتأكد وسألتها "هو سلطان جوزك كان متجوز قبل ما يتجوزك؟ طب ليه مع أن حالته المادية متدلش يعني أنه فاتح بيتين"

ضحكت بجنب بوقها بأستهزاء كده وقالتلي "بيتين ههه بيتين أه.. لا هو اصلاً مش فاتح ولا بيت.. هو بياخدنا الأول يضحك علينا وبعدين يرمينا أحنا للزمن بقا نفتح البيت ونربي العيال ونعمل كل حاجة بنفسنا. بيختها مراته الاولانية والله ربنا نجدها أنه مخلفتش منه وعشان كده اتجوزني قال

يعني راجل أوي وقد مسؤولية العيال"

خدني الفضول أوي لدرجة كبيرة وقولت ليه محاولش أصلح بينهم أهو يمكن ربنا يهديه ويلين قلبه لما يعرف أنه فقد بنت من بناته.

تاني يوم قولت لفتحية تديني عنوان جوزها بحجة أن القسم طلب حضوره في قضية بنتها عشان في أخبار جديدة ظهرت.

وروحت على عنوان مراته الاولانية زي ما قالتلي فتحية إني هلاقيه هناك.. مجرد ما وصلت وابتديت أسأل عن بيت سلطان كان في نظرات عجيبة كده وهمز ولمز كأنهم خايفين يعترفوا.

يمكن عشان هييتي تدل إني ظابط حبتين ففكروني جاي له في قضية ولا مشكلة. لحد ما طفل شاورلي على البيت ولقيته.

خبط على الشباك ففتحلي الشيش ست مليانة كده وشكلها ميظمنش. ضحككتلي وهي بتقولي "زبون جديد؟"

فطاوعتها وقولت لها "أه"

غمزتلي وقالتلي "ليك صنفك ولا تحب تجرب معايا الجديد؟"

مكنتش عارف أرد عليها واختار إيه فكلمت هي كلامها بأستهزاء وقالتلي "خلاص خلاص شكلك خفيف.. وريني معاك كام"

دلوقتي فهمت هي بتتكلم على أيه بالظبط.. وقلعت نضارتي وقولت لها بجدية عشان تخاف مني "أنا جاي لجوزك سلطان هو فين"

ضحكت الست ضحكة خليعة وقالتلي "هيهيهيهي جوزي؟ فين جوزي ده؟ روح شوفه يخويا في بيت السنيورة اللي اتجوزها عليا ومتجيش هنا تاني بدل ما ارفع بالصوت واقول أنك جاي تتهجم عليا"

رديت وقولت لها "بس أنا لسه جاي من بيته التاني وبقاله كام شهر مُتغيب ومراته قالتلي إنه تقريبًا رجلك.. هيروح فين يعني؟"

ضحكت بشماتة وقالتلي "وأنا ايش عرفني يخويا روح شوف بقا قتلته ولا بلعته مهني رد سجود ومشبوها زييه"

كده الموضوع أكبر مما توقعت.. غياب سلطان وموت بنته والأصوات اللي بتحصل في بيت فتحية

كل دي علامات استفهام مش مفهومة..!؟

بقيت ماشي بحاول أربط الأحداث ببعضها واقول لنفسي "معقول سلطان اللي قتل بنته؟ طب يمكن حصل مشكلة كبيرة بينه وبين فتحية واكتشف أن العيال دول مش عياله مثلاً فبدأ يصطادهم وهو هربان وينتقم فيهم؟"

أفكار كثير غريبة وسيناريوهات أكثر معقدة ملهاش تحليل منطقي غير أني أحاول استدرج بنت فتحية في يوم وأحاول أخذ منها شوية معلومات جايز تقع بكلام يكشفني جزء من الحقيقة.

حببت اليوم ده إنني أسهر مع صحابي على القهوة واضيع شوية وقت عشان أرجع متأخر وأشوف هل هسمع أصوات في شقة فتحية تاني ولا كانت مجرد صدفة وأنا اللي مكبر الموضوع.

فضلت سهران برا لقرب الفجر ورجعت اتسحب في المدخل. الحوش عندنا كان عبارة عن شقة فتحية على اليمين وفي الوش السلم وتحت السلم بالظبط في فتحة نص شباك في الأرض كده بيدخلنا على منور العمارة.

وقفت على أول سلمتين كده أسمع كويس الأصوات بس مكش ظاهر غير صوت لغوشة عادي.. حد بيحرك أو بيتحرك.

لكن لحظة لحظة... لوهلة حسيت أن صوت الكركبة ده جاي من فتحة المنور تحت السلم مش من بيت فتحية.

نزلت اتسحب وأنا حريص جداً جداً على خطواتي أنها متسمعش.. ونزلت على ركيبي عشان أشوف اللي عمري ما توقعته.

فتحية معلقة بنتها في حديد المنور بحبل مربوط في بطنها.. ورابطة بوقها بقماشة والبنت تقريباً فاقدة الوعي وعماله تنط وتتشعلق في جسم البنت وهي بتضحك كأنها بتحاول تفصل جسمها من الداخل عن بعضه بطريقة متكشفش بيها؟؟

مكنتش مصدق اللي بشوفه بعيني ودخلت بسرعة من الفتحة الصغيرة وأنا بصرخ بأعلى صوتي على البنت لاتكون ماتت وبقولها "بتعملي إيه في بنتك يا مجنونة.. أنتي مش طبيعية"

توقعت أنها هتهاجمني وتحاول تقتلني أنا كمان لكن فتحية أول ما شافنتي اتسمرت مكانها وهي تبص على بنتها المتعلقة بذهول كأنها مش هي اللي عملت فيها كده وفقدت الوعي فجأة..؟؟

نذهت من المنور على الجيران بصوت عالي وأنا بفك البنت الصغيرة وبحاول ألحقها... نزلوا الجيران ومنهم أمي اللي اتفرعوا على صوتي وخرجنا فتحية والبنت اللي الحمد لله كان لسه فيها

نفس ومماتتش.

دخلنا شقة فتحية الستات كانوا يحاولوا يفوقوها أثناء ما كنت بحكيلهم على كل اللي شوفته واللي كانت بتعمله في بنتها .

أول ما فاقت فضلت تدور على بنتها زي المجنونة وتقولنا "هي فين.. بنتي فين؟ ماتت بردو؟ هي كمان ماتت خلاص؟"

ردت أمي بعصبية وقالتلها "عيزاها ليه يا فتحية.. عايزة تموتيتها زي ماموتي أختها؟ حرام عليك عملتني ليه كده في عيالك يا شيخة"

الست قعدت مكانها بصدمة وهي بتقول "أنا؟ أنا قتلت أختها؟ أنا اقتل عيالي؟ إزاي دانا عايشة عشانهم"

مكش داخل عليا التمثيل اللي هي بتعمله بعد ما كشفتها بنفسي وفجأة لقينا واحدة من الجيران اللي معانا في الشقة بتصرخ بصوت عالي؟؟!

جرينا كلنا عليها واكتشفنا سر بشع في بيت فتحية.. سلطان مقتول ومتجمد في الديب فريزر!!

فتحية قاتلة جوزها ومجمداه في تلاجة المشاريب اللي في الاوضة اللي بتشتغل منها على الشارع.

خدناها على القسم سلمناها بتهمة القتل وتعذيب الأطفال والحكومة نزلت عاينت المكان وخذوا جثة سلطان وأمي تولت مسؤولية العيال الصغيرة وخدناهم عندنا.

كنت فاكّر أن القصة لحد هنا انتهت واللغز اتحل خلاص.. لكن في يوم صحيت من نومي لقيت أمي قاعدة في الصالة وجنبها قفص فيه حمامة ومنهارة من العياط.

قربت وسألتها "في أيه يا أمي؟ مالك؟ وأيه الحمامة دي جنبتيها منين؟"

ردت وقالتلي آخر حاجة كنت أتوقعها "أنا سمعت حاجة بتلغوش في المنور يابني.. خوفت ونزلت أشوف اللي بيحصل لقيت الحمامة دي .

دي مش حمامة عادية دي سحر معمول بذهاب العقل لفتحية.. فتحية لما قتلت جوزها وعذبت بنتها وأنت شوفتها بعينك دي مكانتش فتحية في وعيها .

الطير ده كل ما بيعلى في السما بالسحر اللي مربوط عليه كل ما عقل المسحور طار معاه.. وعشان كده بتتصرف تصرفات شيطانية.

فاكر يابني لما خلتنى أنزل اطمن عليها بليل وطلعت خايفة ومر عوبة.. عارف أنا شوفت أيه وقتها؟

ردبت وقولتلها "شوفتي ايه؟"

كملت كلامها وهي بتبكي بحرقة "شوفت شيطان يابني.. فتحية فتحتلي الباب وهي عمالة تقطع في شعرها وعينيها مقلوبة كلها بيضا. وقتها أنا ظلمتها وقولت دي بتحضر أعمال وست مش كويسة.

لكن أنا اكتشفت دلوقتي أن فتحية هي اللي مسحورة وانظلمت.

السحر يابني قادر يخليك في نظر اللي حواليك الجاني مش المجني عليك.

قادر يكره الناس فيك وفي أفعالك، ويخليك تأذي أقرب ما ليك وأنت مش في وعيك.

السحر مبيتعملش بالموت وبس.. السحر ممكن يتعملك بأنك تخرب حياتك بأيديك وأنت مش واعي.

\*\*

ودي كانت حكاية فتحية اللي قتلت عيالها والسحر دمرها وخرب بيتها.. واظن كلكوا متوقعين دلوقتي مين اللي عملها السحر!؟

**تت**

## شبح ليلة الزفاف

لو في شخص أتأذى من الأعمال السفلية مش هيكون قدي.. والصدمة الأكبر لما عرفت مين اللي عملهولي..؟!

أقدم لكم نفسي الأول.. أنا رحمة عمري 20 سنة من قرية بسيطة في محافظة البحيرة..

الحمد لله سمعتي وسمعة أهلي طيبة وسط الناس وكلهم عارفين أننا ناس غلابة وفي حالنا ومش بتوع اختلاط ولا مشاكل.

الحكاية بدأت لما اتقدملي شاب من قرية مجاورة لنا.. اللي عرفته أنه سأل عليا وجالي على السمعة زي ما سمعت.

لكن أول مرة جه أتقدم حصل حاجة غريبة اوي!..

قالنا أن والدته متوفية.. وبعد ما اتخطبنا والأمور مشيت بخير وتمام.. بلغني قبل كتب الكتاب بكام يوم واعترفلي أن والدته عايشة وعايزة تحضر كتب الكتاب معاه.

حاولت اعرف ليه كذب من البداية وقال إنها متوفية لكن رفض يقول أي أسباب واكتفى بأنها ظروف شخصية هعرفها بعدين.

والحقيقة كان شخص محترم جداً جداً واحترمت رغبته في الكتمان ومضغطش عليه وقولت أكيد هعرف في يوم من نفسي.. ويارتني ما عرفت!!..

يوم كتب كتابنا أول ما شوفت والدته حسيت بغضب مرسوم على وشها.. من الناس اللي بترسم عيونها بكحل كتير والنظرة في عيونها ترهب روحك.

لكن للأسف حسيت إنني ظلمتها لما قدمتلي سلسلة ذهب هدية قدام أهلي وشرفتني.

كان يوم سعيد وخفيف وروحت بيتي مع زوجي وأنا في قمة سعادتي ومعرفش أنني رايحة للجحيم برجلي...؟!

دخلت الحمام وبعد ما خلصت بصيت لنفسي في المرايا عشان اتأكد أن شكلي حلو ومضبوط.. كنت مبتسمة وفرحانة لكن اللي قدامي في المراية مكنتش تبتسم... مكنتش أنا بالاساس.. كانت لوحة ثابتة وجامعة مبتحركش معايا.؟؟

قلبي اتخلع لما شوفتها قام النور فصل لمدة ثانية واحدة ورجع تاني بسرعة ..

فتحت الباب عشان أنادي على طاهر واقوله أن في حاجة غلط بتحصل.. فسمعتة بيتكلم في التلفون ومشغول ...

اطمنت وقولت دي أكيد هלוسة وتوتر من اليوم مش أكثر.. وخرجت وأنا بتسحب وبدخل الغرفة اللي جنب الحمام عشان أبدل ملابسي..

وأنا خارجة من الاوضة سمعت طاهر ببيضحك وفي صوت ست معاه..؟؟!

استعجبت وقولت مين جالنا في توقيت زي ده؟ وخرجت اتسحب في الطريقة من غير ما حد يشوفني اشوف مين الرخم اللي جالنا....

واتصدمت لما شوفتها.. دي أنا ؟ !

نسخة مني بنفس ملابسي وكل شيء وقاعدة جنب جوزي وبيضحكوا ويهزروا سوا؟؟

وقفت مكاني في صدمة ومش قادرة انطق ولا اصرخ كأن حد سلب مني الصوت والحركة..

لقيتها بتبصلي وهي بتضحك بجنب عنيتها بنظرة شماتة وشر ونص إبتسامة باردة كلها غموض...

قامت من جنبه وهي بتقوله " هجيب حاجة واجيلك على طول"

وقامت جت ناحيتي وهي عيونها بتقلب أسود ووشها بيتحول لهيئة بشعة ودخلت في جسمي واختفت!..

مقدرتش اتحرك ولا صوتي يطلع غير ما الشبح دي دخلت جوايا وحسيت روعي انتفضت ورجعتها الحياة من تاني.

"مالك يا رحمة.. واقفة كده ليه ما تيجي"

الجملة دي سمعتها من طاهر لما لقاني واقفة في نص الطريقة مبتحركش ولا عارفة أقوله أي؟؟

حركت رجلي بالعافية وروحت قعدت جنبه وأنا بترعش ونفسي أقوله على اللي شوفته لكن خوفت يقلق مني ويقول عليا ملبوسة ولا مشعوذة خصوصاً أن أغلب بلدنا مشهورين بالأعمال.

حاولت أفتح أي نقاش عشان اداري خوفي وتوترتي وقولتله "طاهر أنت ليه قولتلي والدتك متوفية؟

مع أنها كانت لطيفة جداً النهاردة وباين عليها فرحانة بيك وبتحبك"

رد بأختصار رد غريب اوي وحاد وقال "رحمة لو عايزة تعيشي معايا في هدوء.. خليكي في حالك ومتنكشيش في تفاصيل حياتي اللي فاتت لو سمحتي"

حسيت أني اتخرجت من أسلوبه وغيّرت الموضوع على طول.. ومرت الليلة بدون ما تظهر الشبح تاني ولا يحصل أي شئ غريب.

مر أسبوع كامل بدون أحداث مرعبة وده أكدلي أن كل اللي شوفته في أول ليلة كان مجرد توتر وخيالات من عقلي الباطن بسبب الخوف.

لحد ما نزل طاهر شغله وسابني أول ليلة اقعد فيها لوحدي في الشقة...؟!

طاهر كان المفروض يخلص شغله على الساعة عشرة ليل.. فخلصت حاجة بيتي كانت الساعة جت تمانية قولت أخذ دش وارتاح ساعة على ما يرجع..

دخلت الحمام وسبت الباب مفتوح لأنني مش متأقلمة على هدوء البيت..

حسيت وأنا مغمضة عيني اني بشوف صور بشعة لمعيز مخلوق شعرهم وجلدهم ظاهر ومسخ لحيوانات شكلها غريب وجالي شعور أن الكائنات دي هتلمسني دلوقتي حالاً..

فتحت عيني رغم أن عليها شامبو وأنا باخد نفسي بسرعة وبترعش من الخوف... بصيت في المرآة شوفتها.

نفس الشبح المستنسخة مني بتبتسملي ببرود رغم ان وشي ثابت...

خرجت من الحمام بسرعة وأنا بتلفت حواليا.. ليه بيحصلي كل ده؟ ولية بقيت بهلوس طول الوقت بشياطين وحيوانات وحاجات عمري ما فكرت فيها بالأساس.

دخلت قعدت على سريري وجسمي بيتنفض.. اتصلت على طاهر عشان استأذنه انزل زيارة لأهلي وأهرب شوية م اللي بيحصلي لكن تليفونه كان مقفول.

فضلت ابكي من الخوف وقلة الحيلة.. ولسه ساعة ونص على ما طاهر يرجع من شغله.. ومعرفش إزاي غلبنى النوم وكأن روجي اتسحبت في عالم تاني غصب عني.

لقيت نفسي في ممر وحواليا نار شديدة صهدها بيحرقني... طلعت أجري بسرعة عشان اتخلص من الحرارة اللي حواليا لحد ما ظهر قدامي فجأة واحدة لابسة أسود وشعرها مقلوب قدامها وبتمشي

على أطرافها الاربعة!!..

خبطت فيها غصب عني وانا بجري وصحبت في نفس اللحظة وانا بشهق من النوم زي الغرقان.

لكن... لكن لقيتها واقفة قدام التسريحة...؟!

ست شعرها اسود وتقبل، جسمها مقلوب بشكل مرعب وواقفة على أيدها ورجلها زي الحيوانات بالظبط..

عيني كانت قربت تخرج من مكانها و أنفاسي مش قادرة اخدها من كمية الرهبة..

صوت صراخ يبعلى حواليا وهي واقفة ثابتة قدامي.. بقيت اضرب نفسي بالقلم يمكن افوق من الكابوس ده كمان.. لكن مبفوقش.. صوت همس في وداني لواحدة بتقولي "دي حقيقية مش كابوس يا رحمة"

بلعت ريقى بالعافية ولقيت الشبح اللي قدامي نطت فجأة من مكانها وهبشت رجلي بضوافرها الحادة.

صرخت بأعلى صوتي وفقدت الوعي في لحظتها.

محسنتش بأي شيء غير وطاهر واتنين من عمامه بيفوقوني وعلى وشوشهم علامات الخوف!!..

أول ما فوقت صرخت وانا بتلقت حواليا وبدور عليها ويقول لطاهر اللي متأكدة أنه مش هيصدقني "كانت هنا.. كانت واقفة عند التسريحة يا طاهر.. عفريته بشعة يا طاهر والله شوقتها وأذنتي أنا مش بكذب ولا بيتهيا لي"

رد طاهر وقال "انتي مبيتهيا الكيش يا رحمة اطمني.. أنا دخلت لقيت رجلكي بتنزف دم وفي تلطخ اثار دم على وشك.. في حد فعلاً أنيكي وانا مش هسيبك غير ما أعرف مين بيعمل فيكي كده"

بصيت على رجلي اللي من خوفي نسيت الألم فيها..

لقيتها ملفوفة بشاش ابيض.. اترميت في حضن طاهر وأنا بيكي بحرقه وخوف م اللي جوالي وطلبت منه يكلم والدي يجي عشان اطمن بوجوده معايا هو كمان.

وفعلاً أتصل طاهر بوالدي وجالي في نفس الليلة متأخر.. حكيتله اللي حصل وقال لي أنه بكره هيكلم عم صالح يكشف عليا ويعرف اللي فيا.

عم صالح ده شيخ الجامع في منطقتنا وراجل مبروك الناس كلها بتثق فيه ومبياخدش أجر على عمله وصاحب والدي من زمان.

تاني يوم العصرية كان وصل الشيخ صالح وقالى "أحكي يابنتي كل اللي حصل من البداية بكل التفاصيل"

قولتله اللي حصلي من ليلة الزفاف لحد الشيخ اللي غرزت ضوافرها فيا وكل شئ بالتفصيل.

فضل يقرأ حاجات بصوت هامس طول مانا بتكلم وببيص ورايا على باب الشقة!..

بعد ما خلصت لقيته بيقول لطاهر " البيت ده بيت عيلة؟"

رد طاهر وقاله "مفيش غير اعمامي الاتنين بس اللي قاعدين هنا"..

هز الشيخ صالح راسه ومسك سبخته وهو يبسبح بسرعة فيها وباصص في الأرض وبيهز رأسه.. أنا وطاهر ووالدي بقينا نبص لبعض وخايفين من صوته وحركته...

قام الشيخ صالح فجأة وقال "تمام تمام.. شكراً لمساعدتكم"

وقرب مني فجأة كتفني ورفع رقبتى وقطعلي السلسلة وانا بصرخ في أيده وطاهر ببشده فيه بيعدده عني بالقوة.

كان الموقف بشع وصدمة متخيلتهاش.. طاهر زقه بعيد عني وهو يبصرخ فيه وبيقوله "اي اللي بتعمله ده.. انت مش طبيعي انت دجال زيهم"

رد الشيخ صالح وهو بيمسح عرقه وبيقوله "الله يسامحك يابني.. بس السلسلة اللي في رقبة مراتك دي لو مكنتش سحبتها في لحظة بسرعة زي ما عمل .. مراتك كانت ممكن تتشنق دلوقتي قدام عينك ولا كنت هتقدر تحميها منهم"

بعدين بص ناحيتي وقالى "مين اللي اداكي اللعنة دي في رقبتك بينتي؟"

أنا برقت وجسمي كله بيتنفض وقولتله بخوف "ليه.. ليه اتشنق ليه.. دي.. دي سلسلة حماتي اللي ادتهاني"

بص الشيخ صالح لطاهر وقاله "وانت ليه مقاطع امك يابني؟؟"

معرفش إزاي الشيخ صالح عرف أن طاهر مقاطع أمه رغم أني محكيتش حاجة.. لقيت طاهر قعد

وحط أيده على راسه وقاله "عشان دجالة"

دلوقتي فهمت ليه طاهر كان بيتعصب لما بفتح سيرة والدته وليه قالي في البداية أنها ميتة.. هز الشيخ صالح دماغه بأسف وقاله "طب وليه عملت عمل زي ده لمراتك؟"

اتكلم طاهر وهو صوته كله حزن وقال "عشان مش راضية عن جوازتي من رحمة.. وكانت عايزاني اتجوز "نادية" بنت أختها وأنا رفضت أخذ حد من عيلتها"

كان قلبي بيتعصر من اللي بسمعه لأول مرة.. ومش عارفة المفروض أواسيه ولا أطلق وأبعد عنه وعن كل الشر ده..!؟

هون عليه الشيخ صالح وقاله "عموماً اطمن.. اللي على مراتك اتفك خلاص.. لكن الدور والباقي على اللي مدفون في الحوش تحت وحسيت بيه وأنا طالع"

محدث كان فاهم يقصد اي بكلامه ده؟ لحد ما طلب الشيخ صالح إننا ننزل حوش البيت تحت عشان في حاجة مدفونة لسه مطلعتش.. لكن اللي مدفون ده مكنش ليا!..

طاهر حفر مكان ما شاورله الشيخ ولقى بالفعل عروسة كلها دبابيس ملفوفة في قماشة مقطعة ومكتوب عليها "الموت لفرحة..."

طاهر اتصدم وهو بيقول "فرحة؟؟ فرحة بنت عمي أنا؟؟"

وطلع يجري على فوق بسرعة واحنا وراه وقعد يخبط على بيت عمه بقوة عشان يطمن على فرحة اللي عندها ١٧ سنة.. لقيناها نائمة على سريرها وأبوها وأمها حواليتها ببيكوا من منظرها..

فرحة كانت شبه جالها حالة من الجفاف وععضها بارز منها ومبتحركش.. بتبصلنا وبترمش وبتبص للشيخ صالح كأنها بتقوله "انقذني..."

طاهر مبقاش مصدق اللي هو شايفه وزعق في عمه وقاله "إزاي فرحة تكون بالشكل ده ومتقوليش يا عمي.. ليه خبيبت عليا واحنا في بيت واحد ليه"

رد عليه عمه واللي كنت تاني مرة بشوفه فيها من بعد ما طلعتي وأنا فاقدة الوعي وقاله "محبنتش اكسر فرحتك يابني.. أنت عريس وميصحش اقولك أن قبل فرحك بأسبوع بت عمك وقعت في الحمام وواحدة علقه موت من العدم"

كلنا دُهلنا من اللي سمعناه.. الشيخ صالح قال لابوها "هاتلي شربة مائة بسرعة يا حاج وتكون من الحنفية"

قام الرجل من جنب بنته وجاب كوباية مائة للشيخ.. قعد الشيخ جنب البنت وحط أيده على راسها  
وبقا يوشوش الكوباية ويقرأ عليها كلام مش مسموع...

جسم الشيخ صالح كان بيترج كأنه مش متحمل يلمس دماغ فرحة اللي كانت مغمضة عينيها وبتتهز  
هي كمان.

كانت أول مرة في حياتي أشوف مشاهد صعبة زي دي.. مسكت في أيد طاهر اللي كان ببيكي على  
بنت عمه وخبيت وشي في كتفه وأنا بطبطب عليه وبمنع نفسي مشوفش اللي بيحصل.

سمعت الشيخ صالح بيقول لفرحة "قومي يا فرحة اشربي الكوباية دي واوعي تخافي.. كل اللي  
واقفين حواليكى دول سراب محدش يقدر يمسك وكلام ربنا محاطك"

بصيت على فرحة لقيت الشيخ بيسندها وبيحطلها مخدة ورا ضهرها وبدأت تشرب فرحة والدموع  
بتجري على وشها وعمالة تبص حواليتها بخوف ورهبة.

أول ما خلصت فرحة الكوباية ابتسمت للشيخ كده وبدأت الروح تترد فيها من تاني وبطلت تبص  
حواليها كأنهم اخنفوا خلاص ودلوقتي مرتاحة ومطمنة..

والد فرحة حاول يبوس يد الشيخ صالح على اللي عمله مع بنته لكن الشيخ منعه وقاله "متشكرنيش  
أنا يا حج.. اشكر ربك أنه جابني في الوقت المناسب وادعي أقدر أساعد فرحة لحد ما تقوم  
بالسلامة"

سألت الشيخ صالح وقولتله "هي كده فرحة مش خفت خلاص يا شيخنا؟!"

رد وقالى "لأ يا بنتي.. انتي كان معمورك مجرد عمل خفيف كده على السلسلة عشان تطلقى وتسيبي  
بيتك ومترتاحيش.. لكن اللي على فرحة مش هين.. فرحة عملها مش موجود في البيت هنا ولسه  
مبطلش.. عمل قوي وشديد معمولها على عظمة لوح العجل المحرم استخدامها"

كنت حزينة جداً من الكلام اللي سمعته عن عمل فرحة.. ليه بنت صغيرة وبريئة كده يتعمل فيها كل  
ده؟؟!

ابو فرحة بقا بيكي ويقول "ليه بنتي يحصلها كده ليه.. دي مسكينة مبتخرجش من البيت يا شيخنا  
ولا تعرف حد"

طاهر قعد جنبه يواسيه وهو بيقوله "استهدى بالله يا عمي فرحة هتكون بخير وبإذن الله شيخ صالح  
مش هيسبنا.. صح يا شيخ؟ مش فرحة هتكون كويسة؟"

رد الشيخ وقاله "بإذن الله هتكون كويسة اطمنوا مفيش مستحيل على رب المستحيلات.. بس أنا عايز فرحة تحكيلى دلوقتي هي شافت أي وحصلها أي بظبط عشان أقدر اساعدها"

رد ابو فرحة وقاله "ازاي بس يا شيخنا.. زي مانت شايف دي بتبص علينا بالعافية"

لكن الصدمة اللي حصلت وقتها أن فرحة رفعت أيدها بشويش واطكلمت بصوت ضعيف جداً جداً وهي بتقول للشيخ "هتكلم."

أبوها وأمها سجدوا ع الأرض قدامنا وهما مش مصدقين أن صوت بنتهم رجع بعد كل ده.. وقعدنا كلنا حولين السرير نسمع صوتها اللي خارج بتعب وهي بتقول:-

\_أول حاجة حصلت خالص كانت قبل فرح طاهر بشهر.. لما لقيت الباب بيخبط وابويا وامي كانوا في الأرض وأنا هنا لوحدي.

فتحت الباب لقيتها طنط صفيه أم طاهر.. كانت جاية وكلها غضب ودخلت بدون استئذان وقالتلي "أهلا بالعروسة.. أهلا باللي خطفت ابني"

أنا مفهمتش كلامها وقولتها "عروسة مين أنتي بتكلميني أنا يا طنط؟؟"

ردت وقالتلي والغضب ماليها "بلاش وش البراءة ده مش هيخش عليا.. بقا أبني يخطبك من ورايا وتداروا كمان ع الخبر وفكراني مش هعرف"

وقتها عرفت انها افكرت أن طاهر خطبني أنا وجالها اخبار غلط وقولتها "يا طنط طاهر ده اخويا اتخطبله إزاي؟؟ ثم طاهر خطب بنت من قرية جنبنا مش من بنات القرية بتاعتنا خالص وأسالي ماما لما تيجي"

مسكتني فجأة من شعري لدرجة اني حسيت بيه بيتقطع في ايديها وقالتلي بتحذير "مش صفيه اللي يضحك عليها يا فرحة الندامة"

وزقتني على الأرض ومشيت.. وقتها أنا محبتش أبلغ اهلي باللي حصل عشان ميحصلش مشاكل لظاهر ولا فرحته تتكسر وقولت موقف وانتهى.

لحد بعدها بيومين بقيت أحس بسكاكين بتتغز في كل مكان في جسمي بليل.. كأن في حد عمال يدخل دبابيس في جسمي ومش شيفاه.

وقتها افكرت إنني خدت برد عادي وأنه مجرد تعب بسيط وقولت لوالدي ميلغش طاهر أني تعبانة

عشان ميأجلش فرحه وينشغل بمشاكلنا كالعادة.

شهيتي اتقلت مبقتش قادرة اكل والماية والأكل بينزلوا معدتي زي النار اللي بتاكل في كل حنة فيا..

وقبل فرح طاهر بأسبوع كنت بحاول افوق من التعب عشان اقدر احضر معاه كتب الكتاب.. دخلت الحمام اخد دش وانا بتسند وبقاوم تعبي..

دخلت ايدي بتحسس مكان النور لقيت اللي سحبني بالقوة والباب اتقفل عليا فجأة.. أنا مدخلتس الحمام بارادتي وقتها.. أنا حد حبسني جواه واترميت على الأرض.

ولقيت دخان اسود كتير بيلف حولين نفسه وخرجت منه واحدة ست بشعة بوقها كبير جداً عبارة عن سواد زي البلياتشو.. وعيونها مقلوبة برا وشها وكلها بياض بس..

هجمت عليا واللمسة منها بتكوي جسمي من كتر السخونة...

فضلت ترفعني من الأرض وتهبني تاني لحد ما فقدت الوعي مبقتش حاسة بحاجة.. ولما اهلي فوقوني بعد مدة بقيت شيفاهم في كل مكان..

حتى واهلي جنبني أنا شيفاهم... ستات لابسين اسود ومغطين وشوشهم وواقفين في كل زوايا الاوضة كأنهم منتظرين موتي.

محستش بطعم الماية حلو غير من كوبايتك يا شيخ.. هي الوحيدة اللي متعبتنيش وانا بشربها دلوقتي..

طاهر كان حاطط أيده على راسه وهو بيسمع فرحة وبيبيكي بحسرة عليها... أول ما خلصت فرحة قام بعصبية وقال "أنا سكت للست دي كتير.. كفايا اوي كده انا هروحها وانتقملك منها يا فرحة"

الشيخ صالح مسكه بالعافية من على الباب بعد معافرات كتير وهو بيقوله "أمك يا طاهر.. مهما حصل امك فوووق للي بتقوله واستغفر ربك يابني"

رد طاهر بقلة حيلة وهو متكفف ومش عارف يعمل اي وقاله "طب اعمل اي قولي؟ اسيب ناس بتموت بسببها واسكت؟ دي كانت هتقتل مراتي وبنت عمي وأي حد قريب مني يا شيخنا"

رد الشيخ صالح وقاله "مش انت اللي هتعمل يا طاهر أنت في الأول والآخر ابنها.. وديني بيتها وربنا ينصرني عليها"

مقدرتش اسيب طاهر لوحده وصممت انزل معاه.. روحت أنا وطاهر والشيخ صالح لبيت الست

صفية اللي مكنش على مسافة بعيدة من بيتنا.

وصلنا بيت صفية اللي كنت اول مرة أشوفه.. بيت قديم دور أرضي عبارة عن ممر مرعب حيطانه متكسرة وفي نهايته باب الشقة.

وقف طاهر يخبط عليها جامد لحد ما فتحت.. اول ما شافت طاهر ابتسمت وفرحت لحد ما شافتني أنا والشيخ صالح وراه ووشها اتقلب وقالتنا "اتفضلوا"

دخلنا قعدنا في أوضة مكركة شبه شقق الدجالين بالظبط نفس الترابيزة الكبيرة اللي في النص عليها البخور وكرسي كبير قعدت هي عليه واحنا قدامها على باقي الكراسي.

بدأ الشيخ صالح معاها الحديث بالحسنى وقالها "يا ست صفية أنا جايلك وقاصد الخير.. وكلنا معرضين للخطأ وانتى ست سمحة وأكيد هتفهمني كلامي"

تعابير وش الست صفية مكنش مبشر بالخير نهائي.. رفعت حاجبها بشر وقالتله "أه وبعدين؟ ناوي تديني درس في الأخلاق ولا في الدين؟ مهو يمكن أنا رقاصة ومش واخدة بالي وابني جايبك لحد هنا عشان تأدبني"

طاهر كان هينفعل عليها لكن الشيخ شاورله بالصمت.. وكمل كلامه "حاشا لله يا ست صفية انتى ست الكل وست الاخلاق والادب كله.. لكن أذية بنات الناس مش بالساهل.. رحمة مرات إبنك دي ممكن تكون خير وعوض ليكي عن أي حاجة شوفتيها زمان.. وحتى فرحة البنات المسكينة اللي عملتيها عمل بالموت دي بردو ملهاش ذنب في شئ.. ده حتى ربك قال بسم الله الرحمن الرحيم"....

وقبل ما ينطق بالقرءان قامت الست صفية فجأة وهي بتزعق بصوت عالي و بتقوله "اطلعوا برابا وإلا هأذيكوا كلكوا"

انفعل الشيخ صالح هو كمان وقالها "القوة مفيش أكثر منها يا ست صفية.. متستقويش بالكام جن اللي حواليكى.. أحنا محفوظين بقوى الجبار اللي لا قوة تعلى على قوته"

قلبت الست صفية الترابيزة بالبخور علينا والاوضة اتقلبت دخان كلها وهي بتصرخ وبتقوله "اطلع برا بقولك.. اطلعوا برابا بيتي وإلا هحرقكوا"

الشيخ صالح صرخ فيا أنا وطاهر وقالنا "اطلعوا برابا.. ومهما حصل محدش يدخل هنا نهائي"

طاهر خدني وخرجنا وقفنا في الممر برا واحنا سامعين صوت الشيخ صالح بيقراً قرءان بصوت عالي وصريخ كثير حواليه.

كان يجي في بعض الآيات ويصرخ وهو بيرددها كأنها بتأذيه أو بترمييه بالنار وهو بيتألم ومش قادر يسيطر عليها.

فضل صوت الصراخ والدببة على الباب مستمر لاكثر من عشر دقائق لدرجة أن الناس في الشارع سمعوا الصوت واطلموا علينا ببسألوا عن اللي بيحصل..!؟

كنت ماسكة طاهر بالعافية وبمنعه من الدخول زي ما نبهنا الشيخ صالح وهو كل اللي بيقوله "هتقتله.. مش هيقدر عليها.. الرجل هيموت بسببي"

لكن مسبتوش يدخل ولا يفتح الباب تاني.. لحد ما الاصوات انتهت ومبقاش في صوت بيظهر...!؟

مرت دقيقة والثانية وبدأ الباب يتفتح بشويش وقلبي بيتنفض لاتخرجلنا صفيه الدجالة...

وظهرت بالفعل صفيه وقفت قدامنا.. كل اللي اتملوا من الشارع طلغوا يجروا على برا.. ووقفت أنا وطاهر نبصلها ونبص لبعض بخوف..!؟

كنت منتظرة الشيخ صالح يظهر من وراها وتكون مجرد جسم مسلوب الإرادة.. لكن مالت صفيه جنب الباب كأنها بتجيب حاجة من الأرض جوه.. وظهرت تاني وهي ماسكة راس الشيخ صالح في أيدها وبتضحك..!؟

انتصرت صفيه على الشيخ صالح.. طاهر متحملش المنظر وجري عليها عشان يضربها رفعته في الهوا اتعلق.. جريت على طاهر ألحقه لقيت اللي بيخنقني من رقبتي وبيرفعني في الهوا..

بقيت افلفص واضرب برجلي في الهوا م اللي ماسكني ومش قادرة اصرخ ولا أتنفس بسببه.. وفي دقيقتين سمعت صوت بيهمسي "رحمة فوقي يا رحمة.. رحمة انتي شيفاني؟ انتي كويسة"

صحيت مفزوعة وانا ببرقله ومش مصدقة أن كل ده مجرد كابوس.. إزاي طاهر قدامي؟ إزاي أنا في سريري وبيتي؟؟

بصيت على رجلي ملقشش أي علامات ولا حاجة حصلت.. سألت طاهر "هو أي اللي حصل؟"

رد وقال "مفيش.. أنا رجعت من الشغل لقيتك مبتفتحيش.. كسرت الباب أنا وعمي عليك لقيتك فاقدة الوعي في اوضتك هنا.. ولما جيتك الدكتور قالي ده أمر طبيعي خصوصًا أنه أول حمل"

\_أول حمل؟؟؟؟!!

"مبروك يا حبيبتي.. انتي حامل"

حسيت بأختناق وتوهة وصداع رهيب.. إزاي كل دي أو هام؟! طب نفترض أن كل ده حلم.. طب واللي جرافي في الحمام وشيح ليلة زفافي.؟؟

طاهر كان سعيد جداً بخبر الحمل، مقدرتش اكسر فرحته واقوله ع اللي حصل ده كله وقولت أنا معرف بنفسي هل ده حقيقي ولا فعلاً هلوسة حمل.  
تاني يوم نزلت الصيدلية اللي جنب البيت قولت أشتري شوية حاجات نقصاني.

وبالصدفة بقول للدكتورة "لو تقدرني تكتبيلي شوية فيتمينات كويسة للحمل ياريت"

فردت وقالتلي "والدكتور بتاعك مكتبلكيش ليه طيب"

فجاوبتها بدون تركيز "لا مهو جالي كشف في البيت امبارح واكتشف إنني حامل في أسبوع بس لأنني لسه عروسة جديدة"

بصتلي بصة عجيبة كأنها فكراني كدابة أو مجنونة وقالتلي "حبيبتي الدكتور اكتشف حملك إزاي وهو بيكشف عليك في البيت؟؟ وكمان حامل في أسبوع بس؟ ده حتى السونار ميوضحش الحمل.. ده دكتور حمار اكيد واللي يؤكد حملك هو الإختبار المنزلي أو تحليل المعمل مش كشف عشوائي"

كلامها خلاني ألتفت فعلاً للموضوع اللي مركزتش فيه.. ورجعت البيت وانا بالي مشغول وبفكر في مليون حاجة ومنتظرة رجوع طاهر من الشغل عشان أسأله عن الدكتور ده...

وانا قاعدة سمعت صوت جاي من الحمام.. صوت طفل رضيع بيكي!...

في البداية اعتقدت أن الصوت جاي من المنور وجايز نسيت شباك الحمام مفتوح.. لكني أول ما دخلت الصوت اختفى ووقف فجأة.

وأول ما أخرج يرجع الصوت يشتغل تاني كأنه بيزاولني وشايف حركتي!..!!

فضلت واقفة في الطريقة أسمع صوته ودخلت مرة واحدة للحمام لقيتها قدامي!..  
ايوا هي نفس الشبح.. هي اللي كانت قاعدة مع طاهر ليلة زفافي بدالي.

وشها كان لازق في وشي وشلت حركتي كالعادة مش قادرة اهرب ولا أصرخ منها.

كانت بتبصلي بكره وغل وانفاسها زي النار بتنفخ في وشي. ابتسمت وكشفت عن سنانها اللي كلها دم وريحة بشعة خارجة منها.

وعيونها بيضا مقلوبة لبرا ثابتين مبترمش بيهم حتى.. وبصوت فحيح بشع همست بيه جنب ودني  
وقالتي "سيبي البيت.. قبل موتك مايكون على أيدي"

وفي ثواني كانت اختفت أول ما صوت الباب خبط... خدت انفاسي بالعافية وصلبت طولتي وروحت  
أفتح الباب لظاهر اللي أخيراً رجع من شغله.

قعدت معاه وانا بحاول أجمع نفسي ومقلقوش عليا وسألته "قولي يا طاهر هو الدكتور اللي كشف  
عليا ده عيادته فين عشان أتابع معاه؟"

رد وقالني "والله ما أعرف يا رحمة"

استعجبت رده وقولته "يعني أي؟ او مال أنت جبتة منين يومها؟؟"

جاوبني بشكل خلى جسمي كله يترعش وقالني "بالصدفة كان موجود تحت عند عمي عشان بيكشف  
على فرحة بنت عمي عشان تعبانة شوية وندهناله يكشف عليك لما لقينك فاقدة الوعي كده"

لحظة لحظة.. فرحة؟؟ يعني كل اللي كنت بحلم بيه ده مكنش حلم؟ وبنت عمه أسمها فرحة وكمان  
تعبانة؟!

حسيت بدوخة وتعب مفاجئ لكني تماسكت وحببت اتأكد لأخر لحظة من شكوكي وقولته "أي رأيك  
يا حبيبي لو البيبي طلع بنت نسميه صفية؟ أنا بحب الاسم ده أوي"

حسيت أن طاهر اتنفض وعيونه برزت وقالني "اشمعنا الاسم ده.. في حد جالك هنا؟؟"

رديت سؤاله بسؤال وقولته "لأ اشمعنا؟ ماله أسم صفية مش عاجبك ولا أي"

بص في الأرض بحزن وهو بيقولي "لأ بالعكس.. ده أحب الأسماء على قلبي.. لأنه يبقى أسم  
امي.."

لحد هنا أنا تأكدت أن اللي حصل في الكابوس أو الحلم الطويل ده مش عبث ولا كركبة أفكار..  
والشبح اللي بيظهرلي ده متسلط عليا من الست صفية عشان اسيب أبناها.

طلبت من طاهر إننا ننزل لعمه عشان نطمئن على بنت عمه واتعرف عليهم.. وكل غرضي أشوف  
فرحة اللي شوفتها في حلمي في الحقيقة لعل تكون عايزة تقولي شيء.

ونزلنا قعدنا معاهم كانوا ناس بسيطة وباين الحزن على وشوشهم.. استأذنتهم أدخل ابص على فرحة  
وأسلم عليها.

أول ما دخلت شوقتها مستغربتني أنني مش أول مرة اشوقها وإنني عارفة شكلها هو هو اللي شوقته في الحلم بنفس ملابسها وروضتها وكل التفاصيل.

قعدت جنبها وأنا بطبطب على شعرها ويقولها "أنا رحمة.. مرات طاهر ابن عمك.. على فكرة أنا عارفة أنك تعبانة وبتشوفي حاجات وحشة وهما دلوقتي حواليني لابسين الاسود.. أنا هساعدك يا فرحة"

كانت عينها بارزة ووشها عدمان من كتر الجفاف وجلدها اصفر بشكل واضح.

رمشت بجفونها فحسيت أنها بتشاوري اقربلها اكرت.

وطيت وشي ليها عشان اسمع عايزة تقول أي عن قرب وهمستي "الدكتور..."

كنت متأكدة أن الدكتور اللي بيعالج فرحة ده بيأذيها مش بييفيدها ويمكن ميكونش بشري بالأساس وشيطان.. عشان كده قدر يعرف إنني حامل بدون مجهود.

خرجت من الاوضة وقعدت مع أهل فرحة وقولتلهم أن فرحة مدام متحسننتش بالدكتور يبقى يلزمها شيخ يكشف عليها.. وكان ضروري اكلم الشيخ صالح عشان يقدر يساعدني ويحل الأزمة اللي واقعين فيها دي قبل ما فرحة تموت من العمل اللي مربوطة بيه.

اتصلت بوالدي وقولتله يجيب الشيخ صالح ويجولي بكره لأنني تعبانة ويحصل حاجات مش مريحة.

وتاني يوم فعلاً لقيت والدي بيخبط ومعاها الشيخ صالح وطاهر كان اجازة اليوم ده وموجود.

قعدت مع الشيخ صالح قدام طاهر ووالدي وحكيته كل شيء بالتفصيل و الكابوس اللي شوقته وعرفت فيه أن بنت عمه تعبانه وهي بالفعل طلعت مريضة بنفس اللي حصل.

وبلغت الشيخ أنه مات في نهاية الحلم واني خايفة عليه يتدخل لكن عيزاه يعالج فرحة ويساعدها.

طاهر كان مصدوم م اللي حكيتة وقاعد باصلي وهو مذهول ومبينطقش.. رد الشيخ صالح وقال "خير يابنتي.. كله خير.. أنتي شوقتي رؤية لحدث شنيع كان ممكن يحصل.. وعشان كده لازم نتصرف مع الست صافية لكن بطريقة مختلفة وبأقصى سرعة"

ردت وسألته "إزاي؟ يعني نعمل أي؟"

رد وقال "أنتي تتصلي على حماتك من تليفون جوزك دلوقتى.. وتقوليلها ألقيني إبنك بيموت تعالي بسرعة احنا في شقة عمه تحت واقفلي على طول"

قلبي دق وخوفت.. إزاي هواجه الست صفية ولو عرفت إني كدابة وبستدرجها ممكن تنتقم مني.

كنت خايفة وطلبت منه يحاول يعالج فرحة الأول بطريقته ولو العلاج مجابش نتيجة نبقى نجيب الست صفية ونعمل كده.. لكنه كان مستعجلني بشكل غريب ورافض اي تأجيل فمكنش في حل غير أني اسمع كلامه وامشي وراه.. وبالفعل عملت زي ما قالي.

وخذنا الشيخ صالح ونزلنا لشقة فرحة تحت.. طلب الشيخ من طاهر أنه يدخل ينام في أوضة عمه ويعمل نفسه مريض وتعبان وميتحركش ولا يرمش بعينه.

وبعد أقل من ساعة خبط الباب علينا.. كلنا اتنفضنا خوفاً منها ومن اللي ممكن يحصلنا.

دخلت الست صفية وهي هتتجن وبتقول بغضب "فين أبني.. فين طاهر عملتوا فيه أي؟"

استقبلها الشيخ صالح وقالها "إبنك في الاوضة هنا يا حجة اتفضلي."

وخدها ودخلها الاوضة اللي نايم فيها طاهر.. قعدت جنبه بلهفة وهي عمالة تهز فيه وتقوله "طاهر يابني.. طاهر أنت سامعني.. عملوا فيك أي يا ضنايا"

كنت واقفة على الباب وشايفة كل حاجة بعيني وخايفة الأحداث تتقلب علينا زي الحلم.. كنت مستعجبة أوي أداء طاهر في التمثيل وهو مثبت عينه في السقف ومخشب جسمه مبيتحركش.

رد الشيخ صالح وقالها "منهم لله ولاد الحرام.. معموله عمل سفلي أسود.. وبحاول أعالجه ومش قادر من قوة الحارس عليا.. تقدرني تساعديني ياست صفية؟"

بدأت الست صفية تبكي وتترعش وهي بتقلب في طاهر وتقوله "مين عمل فيك كده يا حبيبي.. ليه يعملوا في أبني كده ليه.. أنا مقدرش أساعد في فك اعمال مبعرفش مبعرفش.. أبوس إيدك أتصرف يا شيخ أبني هيضيع"

ابتسم الشيخ صالح وقالها "طب تعالي معايا هوريكي حاجة في الاوضة الثانية"

وخذ الست صفية فتحتها باب أوضة فرحة اللي بتموت مكانها وقالها "طب وفرحة اللي ضيعتها وهي ملهاش ذنب في حاجة.. مش بردو حاجة تحزن؟"

قام طاهر ودخل الاوضة وراهم وقالها "لو قلبك لسه فيه انسانيه وحب يا أمي فكي اللي على

فرحة.. انتي جربتي من شوية يعني أي أم تتفجع في ضناها.. متكسريش عمي ومراته في بنتهم ومناذيش اللي حوالكي وكفايا كده"

كمل على كلامه الشيخ صالح وقالها "أنتي متحملتيش تشوفي إبنك بالشكل ده كام دقيقة بس.. بالك بقا باللي بقالها أيام وبتموت كل يوم ومحدث عارف يلحقها ولا يعالجها؟"

عرفت الست صفة أن كل اللي بيحصل ده مجرد لعبة اتعملت عليها.. ولقيتها بتبص ناحيتي بغضب وبتقولي "انتى السبب فى كل ده.. أنتى اللى قويتى ابنى عليا وخذتية منى ومبقاش محتاجلى"

حسيت أن السلسلة اللى فى رقبتي بدأت تلسعني وكأنها بتسخن على نار هادية وهتكويني.

غضب الست صفة بدأ يسيطر ع المكان وهي بتشاور عليا بغضب وعيونها بدأت تتحول علينا كلنا.. صرخت وانا بحاول أشد السلسلة من رقبتي اخلعها ومش عارفة.

طاهر حاول يقربلي منعه وهي كل اللي عليها بتقوله "همو"تها.. همو"تها"

صرخت واستغاثت بالشيخ صالح اللي كان قاعد على كرسي فى الاوضة ومبيتحركش ولا بيحاول يتدخل كأنه خاف منها وباعني هو كمان.

كانت السلسلة بدأت تسيح جلد رقبتي وحاسة بوجع لا يحتمل.. نطقت من بين صرخاتي بالعافية وقولتها "حفيدك.. هتموتي حفيدك فى بطني"

مجرد ما الست صفة سمعت الجملة دي ملامحها رجعت من تاني.. حتى النار اللى كانت فى السلسلة فجأة اختفت وقربت منى وقالتلى "أنتى حامل؟"

خذت انفاسي وطاهر جري عليا سندنى قبل ما اقع وقالها "ايوا حامل.. اومال الدكتور اللى من الجن تبعك ده مقالكيش.. حرام عليكى كنتى هتموتيتها.. الله يسامحك يا أمى"

لقيتها فجأة بتمد أيدها ناحية بطني وعايزة تلمسني كأنها عايزة تتأكد انى مش بضحك عليها.. طاهر وقف قدامي عشان يمنعها عني ويحميني.

لكن أنا قولتله "سيبها يا طاهر متخافش.. الست صفة ليها جوايا أمانة ومن حقها تلمسها"

تراجع طاهر ووقف جنبى وهو قابض على أيدي وخايف تأذيني.. أول ما لمست بطني بايديها قعدت تبكي وانهارت من البكى.. وبقت تقولي "حقك عليا.. حقك عليا أنا مكنتش أعرف.. نسلهم خبيث ملعون محدش قالى عشان اتخلص منك.. أنا مش هأذيكى ابدأ.. والله ما هأذيكى تانى يابنتى حقك عليا.. سامحني يا طاهر سامحني يابنى أنا جاهلة والجهل عمى قلبي غصب عني"

دلوقتي عرفت ليه الشيخ صالح جاب الست صفية لحد هنا وغير الخطة اللي كانت في الحلم..  
مكنتش مصدقة ان بالسهولة دي الأمر هيمشي بسلام وهدوء.

\_طب وبنتي يا ست صفية.. فرحة اللي ملهاش ذنب دي هتفكي عملها؟

دي كانت جملة ابو فرحة اللي بيقولها وهو بيتوسل الست صفية وخايف منها.. لكن ردت وقالتله  
"حقك عليا يابو فرحة.. سامحوني كلكوا.. أنا هروح بيتي وهبطل كل الأعمال اللي عملتها في  
حياتي.. وحتى لو فيها موتي أنا مش هرجع للأذية تاني خلاص"

وفتحت الباب ونزلت بسرعة وهي بتبكي وبتردد "أنا فوقت خلاص.. أنا فوقت.. حفيدي جاي"

كان باين عليها الفرحة وأنها أول مرة تشوف الحياة بشكل تاني لدرجة انها مش مصدقة..

قعدت جنب الكرسي اللي قاعد عليه الشيخ صالح ويقوله "أنا بجد بشكرك.. لولاك مكنتش هعرف  
أتصرف ولا كانت فرحة هتكون بخير"

لكن مكنش بيرد عليا..؟! كان قاعد باصص لتحت ومبيتكلمش وعلى الوضع ده من بدري  
مبيتحركش.

كنت فكراه بيقراً قرءان وبيساعدنا لكن أول ما طاهر لمس لقي جسمه متخشب والدم هربان منه..  
الشيخ صالح توفى رغم اختلاف الأحداث.

توفى لأنني شوفت رؤية نهايتها موته.. وعشان كده طلب يساعدنا بسرعة لانه حاسس بنهايته.

من بعدها كل شئ انتهى، وفرحة رجعتها صحتها والست صفية بقت تتردد على بيتنا من وقت  
للتاني تجييلي ملابس واحتياجات للحفيد اللي جاي.

ولما البيبي وصل بالسلامة وطلع ولد سميناه "صالح".

**ت**  
**م**  
**ت**

## شارع عفريت العمدة

الضلمة كانت مالية الدنيا، كنت راجع البيت بليل زي عادتي، بس المرادي اخترت أعدي من شارع كنت بحبه أنا وصحاب أيام الطفولة .

شارع كنا بنسميه "شارع عفريت العمدة"، عشان كان كله أشجار عالية وضلمة بتخوف غير الحكاية اليها اللي قالوا أن كان في عمدة زمان اتقتل فيه. مفيش لمبة كانت بنتور في الشارع ده غير لمبة عمود مكسورة في آخره .

كنا بنحب نعمل سباق عجل في الشارع ده، وبنحس إنه عالم ثاني بعيد عن الناس الكبيرة بنقدر نعمل فيه كل اللي نحبه.

المهم في يوم كنت راجع متأخر من شغلي ومخنوق، بس عاندت أعدي من الشارع ده، كنت عايز أواجه الخوف اللي بيخنقني كل ما أفكر أعدي منه لوحدي ومش معقول بقيت شحط كده ومازلت جبان وبصدق خرافات قديمة اتقالت.

دخلت منه بالفعل وأنا ماشي حسيت زي ما يكون حد بيجري ورايا.. خطوات سريعة وقريبة لفيت بسرعة لقيت الشارع فاضي !

قولت لنفسي: "يا بني ده خيالك.. أكيد مفيش حاجة متبقاش جبان ."

كملت مشي، بس المرادي بخطوات أسرع قال يعني بعمل رياضة ومش خايف، وقلبي بيدق زي الطبل البلدي جوايا.. فجأة حسيت ثاني بالخطوات دي.. بتجري ورايا لكن المرادي خطواتها مسموعة.. وبتقرب !

قررت مبقاش غبي وابص ورايا من ثاني لأنني اكيد مش هلاقي حاجة.. بصيت بطرف عيني على جنب الشارع، كان في عربية قديمة مركونة ولما بصيت في مرايتها.. شفت واحد في ضهري ظاهر خياله بس وبيحاول يخنقني !

صرخت.. بس ما طلعتش مني صوت.. حسيت إنني مخنوق فعلاً.. رجلي مبقتش شايلاني وبقيت أفك في الجرافة عشان أخذ نفسي اللي اتخنق .

مستحلمتش الاختناق ووقعت ع الأرض مش حاسس بحاجة.. ضلمة فقط اللي شايفها !

لما فوقت وفتحت عيني، لقيت نفسي قدام باب المستشفى اللي في أول الشارع؟! واقع ع الأرض والشارع فاضي وضلمة وراسي بتفرقع من كتر الوجع والدوخة، حطيت إيدي على راسي ولقيت

دم بين صوابي كثير.. عرفت أن دماغي مفتوحة وبتنزف..

جريت للمستشفى جري وانا بكتم الدم في نافوخي، لقيت رجل كبير قاعد في البوابة من جوه أول ما شافني أبتسم ابتسامة مريية مفهتهاش وشاورلي أدخل!..

حكيت للناس اللي في الاستقبال اللي حصلي وانا مذعور وبترعش، قالولي أهدى وأحكي اللي حصل بالتفصيل ولما كشفوا قالوا إن عندي شرخ في الجمجمة نتيجة ضربي بآلة حادة على دماغي من ورا!..

لكن أنا شوفت حد بيخنقني مش بيضربني! واغم عليا بدون ما احس بأي ضربات!؟

حجزوني كام يوم في المستشفى مابين أدوية وعلاجات وعمليات وعناية مركزة ..

كانت بتزعاني مرضة بشوشة وخلوقة إسمها "إلهام" .. اينعم كانت احيانا بتنفعل بدون اسباب وتتصرف بشكل عجيب لكن كانت بترجع تعتذر واشوفها تقف ورا الازاز بتبصلي وعيونها كلها دموع ..

كان واضح انها تعبانة نفسياً أو عندها مشاكل وضغوطات.. فكنت بتحمل أفعالها واتغاضى عنها واعتبرتها زي أختي...

محببتش أبلغ حد من أهلي إني في مستشفى وقولتلهم أني طلعت سفرية مع صحابي عشان ميقلقوش.. ولما حالتي اتحسننت وقدرت اخرج.. كانت لسه مشيتي خفيفة وجسمي تقيل وحاسس نفسي متبجح وعرفت أخويا باللي حصلي وفضل يقول:-

"لازم نروح للشرطة يا أحمد، مين اللي عمل فيك كده؟!"

قلتله: " قبل ما نروح للشرطة، تعالى معايا مكان ما فوقت، عند باب المستشفى الخلفي، عايز اشوف حاجة هناك كده واتأكد من حاجة ."

كان في بالي أدور على أقرب سوبر ماركت فاتحة وارجع الكاميرات وأشوف اللي حصلي بالتفصيل..

رحنا الشارع تاني لكن المرادي معايا محمود أخويا مش لوحدي. بس المفاجأة كانت إن الباب اللي كنت فاكر إني دخلت منه للمستشفى كان متغطي بالصدأ والغبار والشجر مغطيه كأنه مهجور؟؟ .. مكان شكله يخوف مش مريح وصوت الهوا كأنه صريخ!...

محمود بصلي باستغراب وقاللي: " أنت متأكد إنك كنت هنا يا أحمد؟ الدنيا شتا والباب باين عليه

مقفول من زمن الزمن !"

مكنتش فاهم إزاي المكان اتغير بالسرعة دي وقولته: " أيوه أنا متأكد.. أنا فاكِر كويس.. أنا دخلت من الباب ده ..والله العظيم إني داخل من الباب ده أنا مش مجنون وقعدت اسبوع كمان جوه المستشفى مكنتش مسافر .!"

لفينا ودخلنا المستشفى من الباب الرئيسي وطلبت أشوف مدير المستشفى .

كان راجل خمسيني محترم ووافق يقابلني على طول.. حكيتله كل حاجة حصلت معايا.

سمعني للآخر، وبعدين قالني: " يا أحمد يا بني، أنا عارف إنك اتعرضت لحادثة وحالتك باين صعبة، لكن الباب اللي بتقول عليه ده مقفول من ٢٥ سنة ..

ده كان باب المشرحة زمان، وكان أهالي الموتى بيشتكوا من صريخ بيطلع منه ليل ف قفلناه، وبقينا نخرج الجثامين من الباب الرئيسي."

حسيت بالرعب بيتمكن مني، أنا دخلت المستشفى منين ساعتها؟..  
طب مين اللي شفته في المراية وكان بيخنفني؟ وإيه حكاية الباب ده مع المشرحة؟

أسئلة كتير كانت بتدور في دماغي من غير إجابة !  
فطلبت من المدير يشوفلي إسمي في السجل عندهم عشان اتأكد اني مش مجنون وأني قعدت في المستشفى دي أسبوع ...

كلم الريسبشن وخذ إسمي بالكامل لكن حتى إسمي مش متسجل عندهم ؟ !

إزاي؟! طب والعمليات والعلاج والعناية مين عالجني وانا كنت فين كل ده مُتغيب ومع مين؟

محمود افنكر أن الخبطة على راسي مأثرة عليا وختنتي بهلوس ومبقاش مصدقني.. بقيت شخص انفعالي وبتعصب من اقل موقف ..

رجعت شغلي ويومي الطبيعي وكل يوم برجع للشارع ده لليل واقف قدامه من بعيد وأحاول افنكر وافهم أي اللي حصلي بالظبط...! لكن مكنش في جديد بيحصل.

وفي مرة وأنا واقف قدام باب المشرحة بدخن ورايح جاي قدامها، لقيت راجل كبير قاعد على قهوة في وش الشارع..

كنت أول مرة اشوف حد قاعد ع القهوة دي خصوصًا في وقت متأخر كده.. روحته قعدت معاه

وسألته " :يا عم الحاج.. هو الباب ده كان بيحصل عنده حاجة غريبة زمان؟ ".

رد عليا الراجل بصوت مبوح وهو عمال يكح وقاله " :يااااه ياابني ده باب العجايب كله.. ده في مرة زمان كان في ممرضة طيبة ومحترمة زيك كده اسمها "إلهام" تخيل لقوا نص جسمها متعلق ع البوابة بليل؟ من يومها وروحها بتظهر في الشارع وفي ناس كتير شافوها وقالوا إنها ساعدتهم واختفت.. وبلاوي كتير أبشع من دي ياما هنشوف من شارع عفريت العمدة"

إلهام دي تبقى نفس الممرضة اللي كانت معايا طول رحلة العلاج؟! يعني اللي شوفته كان حقيقة مش هلوسة وفعلاً إلهام موجودة وانا دخلت من باب المشرحة مش تخيلات !

من يوم ما عرفت بكلام الراجل الكبير ده وانا قررت أبطل اعدي من شارع عفريت العمدة خالص.. بس مفيش فايده.. بقيت اشوف إلهام في كل مكان حتى في شغلي!؟

كانت بتظهر من بعيد وتبصلي بنفس النظرة اللي كنت بشوفها وهي واقفة برا الأوضة وعيونها كلها دموع وحزن.

بقيت بخاف من ضلي، كل ما أغمض عيني ألقى وش "إلهام" قدامي.. عينيها واسعة، ووشها شاحب، وبتحاول تخنقني في احلامي، زي ما يكون اللي حصلي في الشارع ده هي السبب فيه!؟

حاولت أنسى، أكيد دي تهيؤات، بس الخوف سيطر عليا لدرجة إنني مبقتش عارف أنام ...

كل ما أحاول أنام ألقى الباب بيخبط، أقوم جري عشان افتح، ما ألاقيش حد، أرجع تاني ألقى حاجة بتشدني من هدومي لورا وأفعال غريبة مش سيباني...

وفي مرة وأنا قاعد في البيت، سمعت صوت خطوات بره الباب زي ما يكون حد بيسحب في حاجة ثقيلة على الأرض، قربت من الباب واحدة واحدة على أطراف رجلي، قلبي بيدق بسرعة..

بصيت من العين السحرية لقيت "إلهام" لابسة لبس الممرضات قديم ملطخ بالدم، وخيال اسود بيسحبها ع الأرض وبيمشي بصعوبة..وماسك سكينه في أيده بتنزف منها الدم..!؟

أفيت ضهري للباب وانا باخد نفسي بصعوبة ومصدوم من اللي بيحصل برا... لكن اتصدمت لما لقيت الخيال الاسود ده واقف في نهاية الصالة وبيبصلي !..

صرخت وأنا بجري على أوضتي وقفلت على نفسي بالمفتاح. فضلت أخبط على وشي عشان أصحى من الكابوس ده.. بس للأسف أنا مكنتش بحلم!..

"إلهام" بقت جزء من حياتي خلاص ولعنة شارع عفريت العمدة ما بتفارقنيش أبداً وهفضل عايش

زي المجنون اللي بيظهر له حاجات مش فاهمها!...

قررت بيني وبين نفسي إنني لازم أواجه "إلهام"، ماينفعلش أفضل أهرب منها طول عمري وروحت  
لشيخ صالح ناس حكولي عنه..

حكيتله كل حاجة من أول ما دخلت الشارع الملعون لحد ما شوفتها مقتولة قدام باب شقتي وضل  
بيسحبها .

الشيخ سمعني بصبر، وبعدين قالني: "يابني، "إلهام" دي روح مظلومة.. واضح أن الشارع ده فيه  
روح شريرة بتأذي اللي بيدخله.. لكن إلهام بتنقذ الضحايا منه زي ما جابتك عند باب المستشفى  
وعالجتك..

وواضح أنها ماتت مقتولة من نفس الروح دي وماخدتش حقها، وهنفضل تظهر لكل اللي بيقترب من  
مكان موتها.. لعل حد يفهم اللي بتعمله...

بس أنا هقولك تعمل ايه جايز يكون بالنسباليها مقابل حلو ومنتظراه من اللي بتساعدهم ..

روح لها المستشفى وأقرأ لها قرآن وادعيلها بالرحمة، ويمكن ربنا يسكن روحها وترتاح أنت كمان  
معاها ."

كان تفسير الشيخ منطقي وطمني.. فعلاً نظرات إلهام مبتدلش أنها روح مؤذية وانا اللي اسأت الظن  
فيها ..

روحت المستشفى تاني يوم، لكن المرادي مكنتش خايف، كنت حاسس بالشفقة والتعاطف على  
"إلهام ."

وقفت على باب المشرحة الخلفي اللي كان نص جسمها متعلق عليه زمان زي ما الراجل قالني..  
وفتحت القرآن وبدأت أقرأ بصوت عالي.. كنت بدعيلها من كل قلبي كأنها أختي أن ربنا يطمئن  
روحها ويرحمها ويبدلها خير...

وفجأة حسيت بحاجة باردة لمست كتفي لفيت بسرعة ولقيت "إلهام" واقفة قدامي، بس المرادي كانت  
مختلفة ومش مخيفة، وشها مكنش مرعب زي الأول.. كان بشوش وفي عينها دمعة واحدة نزلت  
على خدها الشاحب، اتكلمت معايا بصوت مبوح وقالتلي:- "شكراً.. أنا مبقتش عايزة حاجة تاني  
خلاص ."

واختفت "إلهام" من قدامي وحسيت بوزن كبير اتشال من على صدري.. خرجت المرادي من شارع العمدة وأنا حاسس بالراحة لأول مرة من يوم الحادث.

شارع عفريت العمدة رجع ثاني زي زمان، مجرد شارع مهجور بعدي من قدامه وأتذكر ذكريات طفولتي مع صحابي وذكرى "إلهام" اللي علمتني أن المعدن الطيب والاثر هيفضل موجود جوانا مهما اتظلمنا.. وان المسامح كريم والرحمة مفتاح للنجاة مش الغرق..

أيوا أنا مقدرتش اساعد روح إلهام وانتقم من الروح اللي عملت فيها كده.. لكن قدرت اقدم لها اللي في مقدرتي.. وأكد هيجي بعدي اللي أقوى مني هيقدر يساعدها زي ما ساعدتني...

**تمت**

## علاء والجثة

الأنفاس البشعة اللي بحس بيها قريبة مني واليد المشعرة زي جسم الحيوانات اللي بتتحسس رجلي كل ما بنام وأقوم مفزوع منها يومياً كل دي تصرفات مش عادية خلّتني أنسى النوم وأشك في كل اللي حواليا...

أنا علاء طالب كلية الطب اللي اتحط في أصعب الظروف وأنا مش عارف عملت أي لكل ده؟!!

هحكيلكم الموضوع بدأ معايا إزاي، وأي اللي اكتشفته في النهاية مدفون في هدومي وبسببه حصلي كل ده..؟!!

من فترة طلب دكتور المادة من كل مجموعة فينا أننا نجيب جثة قديمة من أي مدفون ونشتغل ونفحص جزء معين بعد التحليل واتوزع على كل مجموعة المهام الخاصة اللي هنقوم بيها..

ولأن علاقاتي محدودة والشاب ابو نضارة اللي لا بيحب الهزار ولا الإختلاط انضميت لشلة شباب فقط ودفعت معاهم المبلغ اللي هيشترروا بيه الجثة المتحللة ويخلصوا هما كل شيء مع نفسهم ولما يستلموها هعملهم أنا الفحص نيابة عنهم وبكده نكون قسمنا المهام بشكل جيد...

بعد يومين كلمني واحد من المجموعة وقال "علاء احنا حضرنا الجثة واشتريناها وواقفين على الفحص بتاعك هنتيجي أمته؟"

كنت سعيد إننا تقريبا أول مجموعة تنجز بالشكل ده وهنقدم الفحص أول ناس وبلغته اننا نقدر نتقابل في نفس اليوم ويحددولي مكان .

فبلغني أنهم متجمعين في بيت صاحبهم وخذت العنوان منه وروحت برجلي لبداية الجحيم...

خذت البلطو بتاعي ولبست نضارتي وجهزت شنطتي اللي فيها ادوات الفحص اللي هستخدمها والورق اللي هسجل عليه النتائج...

أول ما وصلت الشباب رحبوا بيا وسط كلمات الهزار اللي بسمعها كتير منهم ( الدكتور وصل \_ العبقرى الفصيح هينقذنا \_ يعم أي النضارة دي كلها )

وهكذا الهزار السخيف اللي اعتادته لأنهم مبيتقبلوش اختلاف شخصياتنا ويا أكون روش طحن زيهم يا هكون ع المسرح طول الوقت...

كنت ببئسملهم نص إبتسامه لأنني اكيد مش هفتح معاهم نقاش وجاي عشان اخلص مهمة دراسية معينة ومن بعدها كالعادة هرجع لحالي ووحدتي المعتادة...

لبست البالطو وجراب اليد المطاطي وسألتهم "فين الجثة اللي هشتغل عليها؟"

ضحك منهم واحد إسمه شريف كأني قولت نكتة وقال "الجثة مريحة شوية جوه ع السرير خش صحيحها بس متقلقهاش"

تغاضيت عن كلامه ولقيتهم كلهم قاعدين ومنتظرين مني ادخل الاوضة لوحدي اخلص بدون ما حتى يشوفوا الفحص بيتعمل ازاوي ويتعلموا، فقصدت اغلس عليهم زي ما بيعملوا وقولت لهم "طيب اكيد أنا مش هدخل لوحدي لأن الدكتور ممكن يسأل حد فيكوا عن الفحص، فبعد اذنكوا تعالوا واقفوا بس اسمعوا وشوفوا هعمل اي"

قاموا كلهم مجبورين على أمرهم ودخلوا معايا الاوضة اللي لقيت فيها ملاية ملفوفة ومحطوبة ع السرير ...

فتحتها بحذر وانا من جوايا خايف لكن وجودهم حواليا هون شوية عليا الموضوع ..

كانت عبارة عن هيكل متحلل لكن لسه مترابط في بعضه متفكش اجزاءه وده معناه انها مش جثة قديمة اوي ...

كان الفحص المطلوب مننا على جزء الصدر العلوي فأبتديت اشرح لهم أسامي كل جزء ونتيجتها بعد التحليل وهما مركزين معايا ومندمجين وبدأوا يتفاعلوا ويساءلوا أكثر وكأنهم فعلا ما صدقوا يلاقوا حد يشرح لهم عملي بطريقة مبسطة .

وبعد ما انتهيت شكروني على مجهودي وحسيت الأجواء بينا بقت ألطف واحسن من شوية وبدأ شريف يقلب في الجثة ويهزر لكن حذرتة وقولتله "بلاش هزار في الحاجات دي يا شريف عشان فعلاً ممكن تتأذي"

خلصت وخرجنا من الاوضة وطلبت من شريف يقلب الجثة ويرجعوها مكانها وكنت ناوي إني اروح لكن صمموا اني اقعد اشرب معاهم كوباية شاي وفتح صفحة صداقة جديدة بينا ..

قلعت البالطو وحطيته ورايا ع الكرسي وقعدنا نتعرف على بعض وأعرف مشاكل كل واحد فيهم من ناحية المواد والجامعة والأشياء اللي بتعوقهم وعرضت عليهم اني ممكن افيدهم بالمخصات اللي بعملها لنفسي يقدروا يطبعوها ويراجعوها لو شايفين أن شرحي بسيط زي ما قالوا ...

شوية وخرج شريف من الاوضة قعد جنبي وسألني سؤال غريب حبتين وقال " هي الجثث دي بجد

ممكن تطلعنا ارواحها لو عملنا حاجة غلط؟ وهل مثلاً لو مدفنتهاش النهاردة ممكن تصحى وكده؟"

مكنتش فاهم هو عمل أي بالظبط جوه لكن قولتله "من الأفضل تدفنها النهاردة لأننا منعرفش عواقب اللي هيحصل"

وخلصنا قعدتنا وقالوا إنهم هيدفنها بليل واستأذنت أنا روحت بيتي عشان أقابل مصيري اللي منتظرني...

كعادتي كل ليلة بحب أنام وانا ماسك التليفون لحد ما اروح في النوم، لكن الليلة دي أنا كنت تعبان ومنمتش كويس وأول مرجعت رميت الشنطة ع الكرسي اللي قدام السرير وبدلت هدومي ونمت نوم عميق ..

اول ما غيبت في النوم حسيت بريحة كريهة وكان في حد بيتنفس في وشي، بقيت اتقلب يمكن دي ريحة جاية من الشباك... لحد ما حسيت بكف يد كبير مشعر زي الحيوانات ملمسه خشن بيتحسس رجلي وضوافره بتغررز فيا..!؟

قومت منفوض من النوم كانت الدنيا ضلمة.. اتحسست رجلي حسيت أن في شئ بيؤلمني فعلاً؟

فتحت كشاف التليفون واتصدمت لما لقيت رجلي متخربشة وعليها اثار لضوافر حادة ..

يعني اللي حسيت بيه ده مكنش حلم ولا تخاريف.. والريحة والنفس ده شخص مش مجرد هوا من الشباك..

قومت فتحت نور الغرفة وانا بتلقت حواليا ومش فاهم ليه بيحصلي كده؟ اتصلت على شريف كانت حوالي الساعة ٢ بليل وقولتله "شريف معلش لو بتصل متأخر.. بس دفتنوا الجثة ولا لسه؟"

كان صوته بينهج شوية ومرهق وقال "اه الحمد لله لسه دافينها أهو وكله تمام"

فسمعت واحد من باقي الشلة بيقوله "قوله ع اللي حصل "

فخدني فضولي وقولتله "حصل اي بظبط؟"

فرد شريف وقال "يعم محصلش حاجة دي شوية عيال جبانة قال بيتهيأهم أن الجثة اتحركت واحنا شايلنها!؟"

أنا كنت عارف أن طبيعي تحريك جثة من مكانها شئ مش هين واكيد له عواقبه، لكن ارتحت نفسياً ع الأقل هي ارتاحت دلوقتي ويمكن نفس توقيت اللي الجثة خوفت فيه الشلة وهما بيدفنها حبت ترعيني لأنني كنت مشترك معاهم"

حاولت اني اتغاضى عن اللي حصل واريح أعصابي لكن كل ما كنت بحاول كنت بسمع همس  
وطقطقة في الغرفة جاي من مكان مش قادر احده لحد ما قررت أنزل اشم هوا شوية يمكن  
اعصابي ترتاح ولما يطلع عليا الصبح احاول تاني ...

كان في دكة خشبية كده قدام البيت وجنانين صغيرة اتمشيت شوية وأنا حاطط الهاند فري بسمع  
الشيخ مشاري راشد في سورة الشعراء ..

كانت الأجواء هادية ومفيش أشخاص نهائي بالشوارع وده من الأوقات اللي بحب انزل فيها لكوني  
شخص اعتاد الوحدة...

قعدت أرتاح شوية على دكة خشبية ولمحت ضل بيتحرك بين الأشجار وانعكاس ضله ظاهر ع  
الأرض كأنه شخص بيعاقر ويحاول يتحرر من قيود ...

في البداية اعتقدت أنه مجرد كلب مثلا واتعلق بشئ ومش عارف يمشي لكن بدأ يظهر صوت أنثوي  
ضعيف اوي بيقول "ممكن حد يساعدي"

قلبي دق بسرعة مجرد ما تخيلت أن في بنت في الوقت ده وممكن يكون حد أذاها أو مربوطة في  
مكان ...

مشيت ناحية الضل وأنا بفكر في اللي هشوفه وكل ما اقرب الصوت يوضح أكثر "حد يساعدي..حد  
سامعني"

وبالفعل شوفتها.. بنت عشرينية رجليها مدفونة في طين الأرض وبتحاول تسلك نفسها ..

مبقتش فاهم بنت زي دي أي ينزلها في التوقيت ده ومين ممكن يعمل فيها حركة زي دي ويدفن  
رجلها بالشكل العجيب ده!؟

كان عندي اسألة كتير وفضول تجاهها قطعتم وهي بتقولني "الحمد لله انك جيت..ممكن تساعدي  
وترجلي رجلي؟"

قربت منها وانا بتلقت حواليا قلقان حد يشوفني و يفهم إنني بأذيها ولا بعمل شئ ...

قعدت على ركبي وانا بحاول افهم منها "أي اللي عمل فيكي كده؟"

"ساعدي ارجوك..رجلي بتألمني جداً"

دي كانت إجابتها ولاني شخص حريص جداً في إني اتعامل مع اي بنت كنت متوتر ومش عارف المفروض اساعدها إزاي وانا مقدرش ألمس رجلها أصلاً ...

فقولتلها بارتباك " طب ينفع تنتظري لحظة بس اشوف أي سيدة تساعدك لاني مش عارف اعمل اي؟"

ردت بخوف وقالتلي "ارجوك متسبنيش.. طب هات دراعك وهحاول أشد نفسي"

حسيت انها فكرة كويسة إلى حد ما وقدمت ليها دراعي وانا قافل كف أيدي كويس وهي مسكت بايديها الاتنين وحاولت تقوم وتسحب نفسها لكن اتألمت وتمحملتش وقعدت تبكي!...

مكنش في أي وسيلة غير اني أشيل الطين اللي بيحيط رجلها

بقيت بحفر بأيدي وبشيل الزرع والطين في الأرض بصعوبة وكل اللي في بالي مش قادر اتخطاه هي إزاي رجلها اتدفنت بالشكل الصعب ده؟!!

قالقت افتح معاها نقاش لنفهمني غلط وبحس اني كل ما بحفر الطين بيزيد مش بيقل!؟

ولما يأست قولتلها "طب أنا حرفياً مش عارف اساعدك ولا اتصرف ولازم حد من اللي بيتابعوا الجنين هنا هما اللي يتصرفوا..يأما تتحملي وتشديها بالقوة"

فردت عليا بجملة غريبة جدا وقالتلي "لو أنا اتحملت انت هتتحمل؟"

مكنتش فاهم أنا مالي وشجعتها عشان متخافش وانا نييتي مفيهاش اي شكوك وقولتلها "حاولي بس ومتقلقيش هتخرج بسهولة"

وبعدت عنها خطوتين عشان تقدر تتحرك براحتها ولقت بكل سهولة بتخرج رجلها من الطين كأنها مكنتش محبوسة ولا حاجة.. والابشع لما شوفت رجلها...مكنتش رجل بني ادمين كانت رجل ضخمة وكلها شعر كثيف زي الحيوانات...ده نفس الشئ اللي حسيت أنه بيلمسني وانا نايم؟!!

بصتلها وانا مفزوع وقلبي هيتخلع من مكانه وهي بكل هدوء قامت وقففت ونفضت هدومها وقبل ما تمشي قالتلي "رجلي لسه مرجعتليش..هستناك ترجعها"؟!...!

اتسمرت مكاني من الصدمة.. ميقتش فاهم حاجة!

أنا مخدثش شئ من الجثة عشان ارجعه وليه بتظهرلي أنا رغم أنها اتدفنت؟!!

طلعت البيت وأنا قلبي مقبوض من اللي بيحصلي وقولت هطبق للصبح لحد ما أروح الجامعة وافهم

من الشباب أي اللي بيحصل بظبط..

كان البيت عندي كله نايم فدخلت اوضتي ريحت جسمي ع السرير قولت أشغل وقتي واقلب ع السوشيال في أي شئ لحد ما الصبح يطلع ...

شغلت محاضرة متسجلة للشيخ حازم شومان واندمجت معاه ونسيت كل شئ تقريباً وفجأة لقيت محتوى الفيديو اتغير والشاشة قلبت اسود وظهر منها عين فقط بتبصلي وبتربش!؟

رميت التليفون تلقائي ولسه هتحرك لقيتها في وشي.. مقربة مني ومش ظاهر منها غير عيون لونها ابيض مبرقالي وبتقولي "إياك تنسى"

سنانها ظهرت وهي بتتكلم وانفاسها كانت بشعة لقربها مني.. رجعت بزهرى بسرعة وقعت الناحية الثانية من السرير بصيت لقيتها اخفتت في لحظة ...

الموضوع ميتسكتش عليه وشكله أكبر مما أتخيل... خرجت في الصلاة شغلت الشاشة وفضلت قاعد بتمنى الليلة الصعبة دي تمر عليا بسلام ..

صحيت والدتي على صوت الشاشة وخرجت قالتلي "أي يا علاء الصوت ده واي اللي مصحك لحد دلوقتي؟"

مكنش ينفع اقولها حاجة وقولتلها "معلش يا ماما سهران شوية مش جايلي نوم"

سابتني ودخلت الحمام وبعد دقيقتين لقيت والدتي خارجة من الاوضة تاني وبتقولي "أي يا علاء الصوت ده؟ وأي اللي مصحك لحد دلوقتي؟"

قلبي اتقبض والدم وقف في عروقي؟ هي إزاي خرجت تاني والمشهد بيتكرر قدام عيني؟ طب ومين اللي دخلت الحمام دي!؟

رديت عليها نفس الرد بس وانا بتكلم بالعافية وصوتي متقطع من الخوف "معلش يا ماما سهران شوية.. مش جايلي نوم"

ردت وقالتي "ماشى يحبيبي بس وطى الصوت شوية عشان ابوك ميصحاش.. عايز حاجة؟"

هزيت دماغي بعلامة الرفض ورجعت هي الاوضة من تاني.. عيني بقت ع الحمام ومبقاش عندي ثقة في أي حد حتى أهل بيتي ...

سمعت صوت باب الحمام بيتفتح وبتخرج منه أمي اللي بتمشي على رجلين حيوانات...!؟ هي نفس

اللي شوفتها تحت في الجنينة ..

وقفت على باب أوضة ماما وقالتلي "اياك تنسى"  
ودخلت الاوضة وعيونها كلها شر!..

أنا بقيت خايف على أهلي مش على نفسي وبس.. واضح انها مش هتسبني وأنها قدرت تعمل كل ده  
في يوم واحد يبقى اكيد اللي جاي مش خير ...

قعدت مفتح عيني ومركز كويس أوي مع باب أوضة والدتي مستعد لأي حاجة تحصل من تاني..  
ومعرفش إزاي وسط كل التركيز ده انا غيببت في النوم بدون ما أشعر...!

فضلت احلم بكوابيس وبأني ماشي في مقابر ولقيت تربة مفتوحة.. شئ جوايا قالي أدخل فيها وفعلاً  
دخلت لقيت جثة ملفوفة بالقماش الأبيض محطوطة على سرير شبه سراير المستشفى ..

وقفت قدام الجثة وأنا بجهاز نفسي إني اشيلها عشان اوديها لدكتور الجامعة زي ما طلب ...

قامت الجثة اتحركت قعدت قدامي وبدأت تفك نفسها من القماش وخرجلي وش معزة أول ما شوفته  
اتنفضت من نومي وصحيت ..

اتفاجئت أن مر وقت كبير والضهر أذن.. قومت صليت وأنا بستعيز من الشيطان ولبست هدومي  
جريت ع الجامعة قابلت واحد من الشلة وقالي الباقي متجمع في الكافتيريا ...

روح للشباب قعدت معاهم وسألتهم "انتوا متأكدين انكوا دفنتوا الجثة كلها امبارح منسيتوش اي  
جزء ع السرير؟"

جاوبني شريف وقالي "ايوا يعم أنا اللي قافل عليها وعارف"

رد واحد تاني وقالي "أنا بردو حاسس أن في شئ غلط.. امبارح واحنا بندفنها الجثة اتحركت وكلنا  
حسينا بالحركة وكان دخولها القبر صعب جداً كأنها رافضة تدخل!؟"

فحكيتلهم اللي حصل معايا من ليلة امبارح من أول الخرابيش اللي كانت في رجلي لحد الكابوس  
اللي شوفته براس المعزة..

طلبت منهم إننا نروح بيت صاحبنا دلوقتي وندور فيه على أي اجزاء وقعت مننا يمكن في شئ  
نسيوه ومخدوش بالهم.

واتحركنا كلنا في نفس الوقت لأن كلامي قلتهم وخافوا يحصلهم نفس اللي حصلي ..

طلعنا البيت قلبنا الاوضة كلها كانت فاضية ومفيهاش اي عظام.. نزل شريف يبص تحت السرير  
وسمعناه بيصرخ بفزع مرة واحدة.

كلنا سحبناه وقومناه من الأرض فضل يترعش ويقول "شوفتها.. شوفتها.. براس معزة.. شوفتها  
زيك يا علاء"

فضلنا نهدي فيه والموضوع بقا فعلاً فوق طاقتنا كلنا.. محدش فيهم خد اي عضم من الجثة  
ومحتارين نفس الحيرة.

اقترحت عليهم إننا نرجع القبر ونتأكد بنفسنا لكن واحد منهم اعترض وقال "انت عارف التربى  
بياخد مننا كام عشان يفتح؟ بعدين أنا مش هروح هناك تاني لو عايزين تروحوا مع نفسكوا"

وبدأ الجميع يتراجع ويقولوا احنا كمان مش رايعين.. اختلفت معاهم وبدأ صوتنا يعلى عن العادي  
وفي وسط المناقشات والشد ما بيننا سمعنا صوت كركبة جاي من الاوضة!..

كلهم بدل ما كانوا بيتخانقوا مسكوا في بعض وبقوا يستخبوا ورا ضهري ..  
خرجت من الاوضة قدامنا الجثة الملفوفة ووقفت جنب الحيطه ثابتة .  
أعتقد إنني مكنتش سامع حتى صوت انفاس أصحابي اللي كانوا بيتخانقوا من شوية وأنا زيهم..

كلنا بنبص لبعض ومنتظرين مصيرنا اللي أكيد هيكون أبشع مما نتخيل..

خرجت الجثة دراعها اللي عبارة عن هيكل عظمي من القماش وتقريباً كانت بتشاور عليا..؟!  
تخيلت أن أصحابي هيحموني ويدافعوا عني لقيتهم بيزقوني عليها وبيقولولها "ملناش دعوة هو  
السبب"

اللي شوفته ليلة امبارح كان كافي يخليني متصدمش من ظهور الجثة قد مانا مصدوم من ردة فعلهم  
وندالتهم وانا بدور على مصلحتهم معايا ...

خدت خطوتين يمين وبعدت عن صحابي ومازالت بتشاور في نفس المكان واللي كان واقف ورايا  
شريف وقتها...؟!

بدأت صوابع اليد تتحرك وهي بتشاور على شريف كأنها بتقوله تعالى ...

ونفس الندالة متعجبتهاش لما زقوا شريف ع الجثة وقع قدامها ومسكوا كلهم في بعض ومنهم اللي  
بدأ يدخل في نوبة ضحك من كتر الخوف ...

شريف بقا يزحف ويرجع لورا وهو بيقولها "والله كنت بهزر.. أنا مقصدش اكسرها هي طلعت في

أيدي لوحدها"

انتبهت لاعتراف شريف وقعدت جنبه قولته "هي اي دي اللي اتكسرت؟"  
رد وقال "رجلها... رجلها في صباح طلع في أيدي وأنا بمسكها"

سألته بخوف وقولته "وفين الصباح ده وديته فين؟"

بدأت الجثة تتحرك ناحيتنا بخطوات بطيئة وهو بيصرخ وبيقولي "في البالطو بتاعك... كنت بهزر  
وقولت اخضك ونسيته.. والله كنت بهزر"

خطوات الجثة ناحيتنا وهي بتتحرك براحة اربكتنا كلنا وبقوا يصرخوا بصوت عالي ويزقوا في  
بعض ومش قادرين يوصلوا للباب ..

مسكت الشنطة بتاعتي بسرعة وطلعت منها البالطو ولقيت فعلاً عضماية صغيرة في الجيب مسكتها  
وانا بغمض عيني وبناولها ليد الجثة الممدودة قدامها.

أول ما خدتها مني وقفت ودخلت أيدها جوه الكفن ولفت ظهرها ودخلت الاوضة تاني..!؟

كله وقف حركة وصوت لحد ما اختفت من قدامنا واتسحبت بصيت ع الاوضة ملقتهاش.. خدت  
اللي كانت عايزاه واختفت ...

أول ما خدنا كلنا أنفاسنا وارتاحنا من الموقف البشع ده قولتهم "بس ازاي كل اللي حصل ده عشان  
صباح؟ دي كانت بتقولي رجعلي رجليا؟!"

رد شريف بهزار كعادته وقال "مانت عارف الحريم دايمًا بيكبروا المواضيع"

رجع صوت الكركبة يشتغل تاني في الاوضة وكأن الكلام ازعجها كلنا طلعلنا نجري بره الشقة  
واحنا بنضحك ع اللي جرالنا واللي شوفناه..

تاني يوم قدمنا البحث للجامعة وكنا مبسوطين أن بعد كل التعب ده قدرنا ننجز أول مجموعة  
واتصدنا من الدكتور لما قال "البحث كان مطلوب على جثة راجل مش ست"

ت م ت

## فتاة المصعد

بعد قطع النور في كل الأماكن بالساعة والاثنين جتلي اسوء حكاية حصلت في الاسانسير وللأسف صاحبة الحكاية بتتعالج نفسياً لحد دلوقتي وبتحذركوا من اللي حصلها...

انتوا عارفين اني مبفتحش مسدجات البيدج بتاعتي بس الرسايل اللي شوفتها المرادي كانت تستحق انقلهاالكوا بنفس اللي اتحكالي.. البنبت بعتالي وبتقولي:

\_انا عارفة انك يمكن متشوفيش رسايلي.. بس أنا عايزة اتكلم مع حد ويسمعني ولو ربنا أراد وشوفتي الرسايل دي وانا لسه عايشة هاخذ بنصيحتك وهكون سعيدة أوي اني اتكلمت معاكي.

أنا يا شهيرة ساكنة في عمارة ليها اتنين اسانسير في مكان شعبي عادي مش مستوى ولا حاجة بس العمارة جديدة وكبيرة وبابا شافلنا شقة في الدور الأخير بسعر كويس وخدناها ونقلنا فيها جديد.

كان في حوالي شقتين كمان اللي ساكنين في العمارة وباقي العمارة لسه متباعثش رغم أن الشقق سعرها قليل مش غالي.

كانت الأمور طبيعية جداً في الشقة ومفيش حاجة مخيفة بتحصل بس بليل كنت بسمع قط قدام شقتنا بيمشي في الممر ويفضل يموء بطريقة بشعة اوي كأنه عايز يتكلم زي البني ادمين...!

أنا عارفة أن في ققط كتير كده وحاولت اتغاضى عن الموضوع ومركزش معاه لحد ما في يوم اتعرضلي وهجم عليا على السلم انتي متخيلة؟؟

كنت نازلة يومها متأخر شوية اخذ من صحبتي حاجة ضرورية وكانت الساعة حوالي ١٢ أول ما خرجت من باب الشقة ورايحة للاسانسير لقيت القط ده بيهجم عليا زي المسعور ومسك في رجلي ..

بقيت أصرخ وادبب على الأرض عشان يسييني ويبعد عني ودخلت جريت على الشقة تاني وانا منهارة من العياط والخضة.

ده كان أول موقف يحصلي قبل الكوارث اللي هحكيها لك بقا..

في مرة دخلت حوش العمارة لقيت ست عجوزة لابسة أسود وضهرها محني وماسكة عكاز.. فمن باب الادب وقفت وقولتها " اساعدك في حاجة يا امي؟"

لقيتها عدلت ضهرها عادي ووقفت وبصتلي وعيونها شبه كلها سواد... قلبي اتقبض بس محبتش

احرجها وقالتلي "منتظرة مارينا"

وأنا بمعرفتي عن السكان كنت عارفة أن العيلتين اللي ساكنين مسلمين مفيش فيهم حد مسيحي فقولتها "بس هنا مفيش ساكنة اسمها مارينا.. اكيد حضرتك دخلتي عمارة غلط"

دبت عكازها في الأرض وبرقتلي وصوتها بدأ يقلب على رجولي وكررت كلامها وهي بتقولني "بقولك منتظرة مارينا"

أنا وقتها مقدرتش أتمالك اعصابي من صوتها اللي أتغير فجأة وطلعت أجري بسرعة ركبت الاسانسير وطلعت البيت حكيت لوالدتي وقالتلي بلاش اقف تاني مع جيران عشان ميحصلش مشاكل.

والدتي مفهمتش قصدي ومحببتش اقلقها معايا اكثر من كده لحد ما جه اليوم الموعد... ..

خرجت مع صحابي في يوم والوقت خدني والمواصلات كانت زحمة اليوم ده فرجعت البيت حوالي الساعة ١٢ بليل..

والدتي كانت كل دقيقة تتصل بيا وتستعجلني وتقولني أن بابا غضبان وبيزعق على تاخيري بره كل ده

دخلت البيت وانا بجري ودوست ع الاسانسير عشان ينزل.. وسمعت صوت القط اللي بيموء ده نازل من فوق.. ركبت بسرعة قبل ما يهجم عليا عشان أهرب منه وميعطلنيش اكثر من كده... ومخدتش بالي من اللي كان مستنيني جوه الاسانسير...

أول ما الباب قفل عليا يدوب باخد نفسي وبقول الحمد لله وبدوس على الزرار لقيت ورايا في المرآة بنت في سن ال ١٥ سنة كده لابسة فستان ابيض مبقع وكله دم... وشعرها نازل على وشها وفاردة ايديها قدامها ...

اول ما لمحتها تلقائي صرخت وانا بلف وشي ناحيتها وبايدي بحاول أدوس على الزراير عشان اوقف الاسانسير واهرب ومكنش بيقف... بل بالعكس حسيته بيطلع وبينزل بيا ومبيقفش ..

قعدت ع الأرض مكاني وانا بقولها "انتي مين.. انتي مين... أنا معملتش حاجة"

ردت عليا وياريبتها ما ردت وقالتلي "أنا مارينا.. اللي دفتوها وبنيتوا العمارة على جثتها"

النور قطع نهائي وانا دخلت في نوبة صراخ لحد ما فقدت الوعي لكن ما زال كلامها متذكراه ..

فوقت لقيت نفسي على سرير ووالدتي ووالدي حواليا يقولولي أن النور قطع وسمعوني بصرخ في الاسانسير ولما فتحوا عليا لقوني فاقدة الوعي ..

سألتهم مكنش في بنت معايا ؟ قالولي لا بس كان في ورقة واقعة من شنطتك حطيناهالك تاني مكانها ...

أول ما سابوني اهلي وخرجوا من الاوضة جريت فتحت الشنطة ومسكن الورقة قلبتها في أيدي... الورقة دي مش بتاعتي ومعرفهاش وشكلها غريب...

فتحتها واتصدمت م اللي مكتوب جواها بنقط الدم "أحذري من مارينا"

مبقتش فاهمة مين البنت دي بظبط وليه قالت إن جنتها مدفونة تحت العمارة؟!!

شوية وأنا قاعدة بفكر سمعت تاني القط اللي بيموء بالأصوات العجيبة.. ركزت معاه شوية وأنا حساه بيقول "ماوووينا"

هو أكيد يقصد مارينا ؟ معقول دي روحها وبتطوف في العمارة؟ ولا شيطان ولا حد من اللي قتلوها ؟

دماغي راحت لمليون سيناريو وفكرة.. بقيت خايفة أقول لماما على اللي شوفته لتعرضني على شيوخ ويدخلوني في سكة ملبوسة وعليها جن والحوارات دي.

وأنا متأكدة من اللي شوفته بعيني.. أنا مبهلوسش.. والورقة اللي في أيدي تثبت كلامي.

فضلت يومين في البيت خايفة أنزل تاني ومش مستعدة لأي رعب يحصل معايا..

وفي اليوم الثالث اتصلت بيا صاحبتني اللي لاحظت غيابي وكانت مصممة إننا ننزل نقعد بره ونتقابل لكن مقدرتش وقولتها لو عايزة تقعد معايا تجيلي البيت لأنني تعبانة.

فوافقت وقالتلي طب ساعتين وهجيك... بصيت في الساعة لقيتها ٣ العصر.. خرجت لوالدتي ابغها أن في ضيفة جاية بس للأسف كانت والدتي تعبانة شوية وقالتلي "طب انزلي هاتي الطلبات دي عشان تضايفي بيها صحبتك عيب"

بالأساس أنا عزمت صحبتي في البيت عشان مخرجش من بيتي لكن اتورط اني أنزل غصب عني.. وفضلت اشجع نفسي إننا الصبح وعادي يعني اكيد مش هيحصل حاجة في نور ربنا كده.

وفعلاً جهزت نفسي وقررت انزل السلم مركبش الاسانسير تاني.. ورغم أن الموضوع كان مهلك

حبتين بس كان أمان ليا اكثر ومكنتش حاسة بخوف.. غير أني مسمعتش صوت القط ولا ظهرلي ودي احسن حاجة حصلت.

اشتريت الطلبات من جنب البيت وانا راجعة لقيت في الحوش راجل في سن الأربعين كده واقف مع بنت وجوزها شكلهم صغيرين ومتجوزين جداد وبيقولهم "والله ما هتلاقوا اسعار أقل من كده وشوفوا بره هتتأكدوا.. احنا بنبيع برخص التراب عشان مسافرين بس"

عرفت وقتها أنه صاحب العمارة.. عملت نفسي مشغولة في الاكياس لحد ما الناس مشيت وجريت بسرعة على الراجل ده وقولتله "لو سمحت لو سمحت"

رد وقال "ايوا؟" قولتله "هو حضرتك صاحب العمارة صح؟"

مدانيش إجابة محددة وقال "خير؟"

حبيت اخدعه عشان ياخد ويدي معايا في الكلام وقولتله "أنا بنت عم فاروق اللي في التاسع.. لسه شاربين جديد بردو ولما قولت لأصحابي على سعر الشقة انبهروا و في اكثر من بنت مخطوبين وبيدوروا على شقق عايزين يشتروا منك.. فسمعت انك مستعجل في البيع وأنا ممكن اساعدك"

حسيت أنه فرح ووافق بسرعة فقولتله طب هات رقمك عشان اخلي صحابي بيعتولك... وبرغم اني حسيت نظراته ليا مكنتش كويسة بس كملت في الموضوع لأنني مينفعش أسكت عليه.

طلعت البيت وجتلي صديقتي قعدنا سوا وحكيتهلها جزء من اللي حصل وطلبت منها تتصل من عندها برقم صاحب البيت وتفوله أنها عايزة شقة وهتيجي قريب تشوفها عشان يصدقني وميشكش فيا.

لما صحبتي اتصلت بالراجل ده صوته كان مبسوط أول ما عرف أنها زبونة تبغي وقالها "هي لحقت تبغك.. تنوري يا استاذة انتي والبيه بتاعك في اي وقت"

جت الساعة ١٠ وصحبتني استأذنت عشان تروح وكان من باب الأدب اني انزلها على أول الشارع واطمن عليها.. فنزلت معاها وانا كل تفكيري هعمل اي مع صاحب العمارة وإزاي هستدرجه في الكلام!..

وانا راجعة طلعت بردو على السلم.. أول دور كان فاضي.. ثاني دور هكذا.. ثالث دور كان ضلمة شوية واللمبة مقفولة.. رابع دور شوفتها...؟؟

كانت واقفة في ممر الدور الرابع ومش شايفة منها غير فستانها الأبيض المهترئ وفي أيدها دبوب صغير.. قلبي اتنفض أول ما شوفتها..



كان حابب يظهر لي قد اي هو الكل في الكل والمسيطر الاول والاخير وانا حبيت أعمل نفسي مصدقاه وانبهر بكلامه عشان اقدر اجيب باقي الحكاية اللي خايفين منها.

لحد ما طلب مني نتقابل في شقة من الشقق اللي فاضية في العمارة وهو يحكي لي كل حاجة!؟...

كان مستحيل توصل للدرجادي وفضلت أحاول أفتح كلام تاني واغير مجرى الحديث لكن فشلت وهو كل تصميمه "تعالى بس نشرب كوبايتين شاي وانا احكيك عن عيال الدهشوري"

قفلت معاه وأنا عقلي بيقول "ليه لأ؟ ليه مقابلوش وافتح تسجيل لاعترافه ولو حصل اي شيء احضر معايا حاجة ادافع بيها عن نفسي ولو صرخت اهلي واللي في العمارة هيسمعوني والموضوع هينتهي.. لكن هكون خدت حق مارينا"

كنت عارفة أنني لو استشرت اهلي أو حد من صحابي هيمنعوني بشكل قاطع بس انا اكثر واحدة عارفة دلوقتي أن في روح بنتعذب وراح حقها.. وتقريباً مظهرتش لغيري لأن مفيش حد في العمارة اشتكى.

ظبط معاه ميعاد على تاني يوم وقومت حضرت بخاخة فيها خل ولمون وشطة حامية كتير لأنني عارفة أنني لو قدرت ابخ منها في وشه هقدر أهرب ومش هيقدر يفتح عينه.

وخذت معايا سكبينة صغيرة احتياطي جايز احتاجها وخبيتها في شرابي الطويل.

كذبت على والدتي وقولتها اني نازلة لصحابي ونزلت المرادي في الاسانسير ووقفت في الدور الرابع زي ما الراجل اتفق معايا.

مجرد ما نزلت لقينته واقف قدام باب الشقة اللي هندخلها وبيشاورلي بحماس وضحكته مرسومة على وشه بشعة زيه.

رسمت البسمة على وشي بالعافية وانا من جوايا مشمئزة وبتترعش من الموقف وبتلقت حواليا أشوف حد شايفني ولا لأ.

دخلت معاه الشقة اللي كانت كلها فاضية وجواها كرسين بس وترابيزة عليها غلاية شاي وشوية برطمانات معفنة فيها سكر وخلافه.

سحبت الكرسي بتاعي بعيد شوية عنه وقولتله يعمل شاي بحيث خلال الوقت ده يكون حكالي اللي حصل ومكنتش نسيت طبعاً إنني أفتح مسجل صوتي عشان أسجل كل اعترافاته.

خلص الشاي وسحب الكرسي بتاعه وقعد قدامي واحنا بنشرب وفتحت أنا الكلام الأول بعد ما لقيته بيتغازل فيا وبمدى اعجابه بقوة شخصيتي..

فقولته "ها قولي بقا أي حكاية المشكلة القديمة اللي حصلت دي؟ واهو يا سيدي يمكن افيدك بحركة ذكية تنفعك وتخليك تاخذ فلوس كثير من ورا عيلة الدهشوري وبالنص بردو"

كان متجاوب معايا وهو مبسوط وبيقولي "ياااه كمان خايفة على مصلحتي دانتي طلعتي داهية كبيرة.. بس عجبتيني أنا بحب البنات اللي بنفكر بعقلها زيك كده وفي مصلحتها"

وبدأ يحكي لي وهو بيقول:

\_ يستي مفيش.. العمارة دي ايام الحج دهشوري كانت قديمة حبتين وكان مأجر فيها شقة عقد قديم اللي هو ٥٩ سنة ده لست من زمان عايشة فيها وجوزها ميت ومعها بت كده صغيرة.. بس كانوا مسيحين.

ردت في بالي مارينا اول ما اتكلم على طول وبقيت منصتة لكلامه بكل حواسي وعايزة افهم اللي حصل وقولته "ها بعدين كمل"

\_ بعدين يستي هما كانوا عايزين يجددوا العمارة والست دي رافضة تاخذ قرشين وتخرج وبنتها كان لسانها طويل كده قال اي هددتهم بالقط بتاعها وخالته فعلاً يتهم على واحد من عيال الدهشوري والقط عضه..

من وقتها وكلهم اتجننوا بقا ازاى حته بت مفعوسة تعمل فيهم كده؟ وقامت الدنيا حريقة ومشاكل لحد ما وأحنا بنتخانق معاهم في مرة والبيت بتدافع عن أمها قدام باب الشقة فأبن الدهشوري اللي اتعض ده مسك البت رماها من بير السلم.. وامها اول ما شافت المنظر نزلت وراها وقعت هي كمان ماتوا فوق بعض.. مكش في غير القط اللي هجم علينا ينتقم لصاحبته واتقتل هو كمان بنفس الليلة.

طبعا محدش شاف الحادثة لأن هما كانوا اخر سكان في البيت القديم.. والمشكلة إننا منعرفش اي قرابب أو ناس للست دي وبنتها ومحدش جه سأل عليهم.

فبنينا البيت على كده والقصة اتقلت بس ولاد الدهشوري بقا خايفين ليظهر قرابب الناس دي ويكتشفوا الحقيقة"

جسمي اتشل وانا بسمع كلامه ومبقتش عارفة أزاى في ناس وصل بيهم الجحود للدرجادي؟

السمسار خلس كلامه ولقيته بيقرب مني وهو بيغير الكلام وبيتكلم في حاجات تانية.. المشكلة اني



## سينما الجحيم

\_ألحقيني بنتك ماتت.\_

دي كانت الجملة اللي نزلت على قلبي زي الجمر، ومن وقتها وأنا عايشة جسد بس من غير روح.

الحكاية بدأت وأنا عندي ٢٧ سنة لما كنت في آخر سنة ليا فالجامعة .

كان ليا صاحبة عزيزة إسمها تغريد بقضي وياها كل اوقاتي جوه الجامعة لحد ما نروح بيوتنا.

وفي يوم اغلب الدكاترة في الجامعة محضروش لأن الجو كان كله عواصف ومطر، بس إحنا كطلاب جامعيين التزمنا بمواعيدنا وحضرنا.

وقتها قولت لتغريد نروح المرادي بدري وخلص، فخرجنا من الجامعة ومكنش في مواصلات والجو صعب وكله أتربة.

فضلنا نمشي لحد ما لقينا الدنيا بتشتي علينا جامد ورغم أننا الصبح لكن الشمس كانت مخفية وسط السحاب الأسود والغيوم وتحس نفسك على مشارف الليل خلاص.

وقفنا نتدارى في مدخل عمارة كبيرة لحد ما الدنيا تهدى شوية عشان نقدر نمشي ولقيت تغريد بتقولى " صبا بصي قدامك الناحية الثانية كده؟"

بصيت كويس ملقتش حاجة مُلفتة للنظر عادي عماير كبيرة قدامها شوية محلات مفيش جديد!

فقولتلها "ابص على اي بظبط؟"

لقيتها بتقولى بحماس وهي سعيدة "بينتي بصي مش اللي هناك دي سينما؟"

فخذت بالي من اليافاطة الكبيرة اللي مركزتش معاها وقولتلها "ايوا فعلاً، مالها؟"

فأقترحت عليا بحماس إننا ندخل أي فيلم فيها واهو منها خروجة ومنها يكون الجو اتحسن واتعدل شوية.

بعد إلحاح منها وافقت إننا ندخل وعدينا الطريق بسرعة ودخلنا، كانت قاعة سينما نظيفة ومرتبة والطاقم كله محترم وبيرحب باللي بيدخل.

وقفنا نختار فيلم ندخله لحد ما تغريد صممت أنها تدخل فيلم اجنبي "تشاكي".

ولأن مش فارقلي اختيار الفيلم على قد ما فارقلي إني أرتاح شوية وافقتها ودخلنا انفرجنا على الفيلم اللي بنسبالي مشوقتش أغلبه لأنني كنت بغمض عيني واسرح لخيالي وأحلامي اللي نفسي احققها.

خلصنا الفيلم وكان الجو اعتدل إلي حدّ ما وخرجنا مبسوطين وكل واحدة ركبت مواصلة لبيتها.

أول ما طلعت قعدت مع أهلي اللي لقتهم منتظرين رجوعي عشان يفاتحوني في موضوع مهم بخصوص عريس متقدملي؟!!

مين ده؟ وشافني فين؟ ويعني اي مستعجل ع الجواز أنا لسه مخلصتتش تعليمي! فجأة كده ظهر من العدم والكل موافق عليه ومرحب!

دي كانت الاسألة اللي فضلنا نتناقش فيها طول اليوم وسط أهلي، لحد ما حسيت أن كلهم متفقين عليا ومفيش مفر وهتقلب بخناقة، ودخلت اوضتي أهرب شوية من زحمة أفكاري.

كان باب الاوضة مفتوح ونور بسيط اللي شغال في الطرقة، سمعت صوت طقطقة حصلت في الباب ببص ناحيته شوفت خيال قصير لشخص بيمر قدام الغرفة وفي أيده سكين رافعها لفوق وبيعدي ببطء!!

قومت خرجت بسرعة لأهلي وانا بسألهم حد دخلي جوه دلوقتي؟ كلهم قالوا أنهم متحركوش بالأساس ومحدث دخل جوه غيري!

دخلت تاني لكن المرادي وأنا متأكدة أن اللي شوفته ده يا مقلب من اخواتي الصغيرين كالعادة، يا مشهد تخاريف من عقلي الباطن لأنني اتفرجت على فيلم تشاكي.

تاني يوم نزلت الجامعة وقابلت تغريد حكيتها عن اللي حصل وفضلت تضحك وهي بتقولي "مكنتش أعرف أنك جبانة كده "

الموضوع ضايقتني شوية وحسيت أنها سخرت مني رغم أن الموقف مكنش سهل عليا واكيد لو حصلها مكنتش هتضحك وقتها.

خلصنا محاضرة طويلة مملة مسمعتش فيها ولا كلمة بسبب موضوع العريس اللي اهلي كلموني فيه، لحد ما الدكتور خلص وخرج وكل الطلاب خرجوا وراه.

مفوقتش من أفكار غير على صوت تغريد اللي بتزقني في كتفي وبتقولي "يا صبااا انتي يابنتي

فين يلاا لمي حاجتك عشان نمشي"

مكنتش قادرة اتكلم ولا أمشي معاها اليوم ده وقولتلها " معلىش يا تغريد أمشي انتي وانا هحصلك"

خرجت هي وبدأت أنا اجمع حاجتي عشان أمشي، لكن لقيت صوت حد داخل تاني، في بالي افكرتها تغريد رجعت في كلامها وجاية تعتذرلي.

لكن اتصدمت لما لقيت شخص قزم مُقنع، ماسك في أيده سكينه وبيطلع الدرج وجاي ناحيتي!؟

في البداية فضلت استوعب يمكن مجرد تهيووات مني لكن مبيخنفيش وبيقرب أكثر وأكثر.

صرخت وطلعت أجري بره وأنا بتلقت حواليا ومش مصدقة اللي شوفته بعيني.

رجعت البيت وانا اعصابي مدمرة ومش متحملة اي كلام أو سؤال، لكن كالعادة والدتي مسابتنيش في حالي وفتحت موضوع العريس ده تاني وهي مصممة وبتلح عليا.

ومن تعب اعصابي قولتلها "اللي تشوفيه يا ماما"

كنت محتاجة أهرب وارتاح م اللي حصلي واللي مبقنتش فاهمة هو ليه بيظهرلي وانا حتى متابعتش الفيلم ولا خوفت منه!

مر شهر واتنين بدون ما يحصلي اي حدث جديد فيه اي خوف أو مشاهد مرعبة زي اللي حصلت، لحد ما اتجوزت أول ما خلصت امتحاناتي علي طول.

جوزي كان عمله مستقر في الاردن من زمان رغم أنه مصري الجنسية، ولما طلب مني أسافر معاه رفضت لاني حملت في أول سنة جواز وكنت محتاجة اعيش جنب اهلي الفترة دي.

طول فترة حملي كان بيجيلي خيالات كثير إنني هموت وانا بولد، أو مثلاً الجنين هينزل كائن غريب مش بشري.

او يمكن ينزل ميت أو خارق؟! افكار كثير غريبة ومش فاهمة ليه كنت بفكر فيها!

علاقتي بتغريد انتهت بعد الجامعة مباشرة لكن ربنا عوضني بصديقة جديدة كانت ساكنة قدامي في نفس دور العمارة.

كانت عروسة جديدة بردو اسمها رؤى وبتقضى اغلب وقتها معايا لأنني قاعدة لوحدي وبتستغل الوقت اللي جوزها بيكون في الشغل وبتجيلي.

فضلت تحكيلي عن حياتها قبل الزواج وأن كان ليها جن عاشق أخرلها أمر الجواز ومكنش عايزها تعيش مع راجل تاني غيره، وأنها اتخلصت منه بالعافية بعد ما تابعت مع شيخ روحاني كبير ومشهور وموثوق فيه.

خدني فضولي وحكيئها على اللي حصلي يوم السينما وفي الجامعة قبل ما اتجوز ولقيتها بتقترح عليا شئ غريب جداً وهي بتقولي "بقولك أي المعالج ده ممكن يكشف عليك من خلال صورتك، أي رأيك لو نبعثله صورة محجبة متخافيش وهو يقولنا لو عليك حاجة لأن الموضوع ده مش طبيعي!"

عجبتني الفكرة خصوصاً اني مقدرتش اتخطى اللي حصل زمان واهي مجرد صورة مش هيحصل حاجة لو عرفت هيقول اي عني وخلص.

بعثت رأي فويس على الواتساب حكيت فيه كل اللي قولتها بالتفصيل، وبعثت صورتي وانتظرنا نشوف هيرد ويقولنا اي؟!!

ممرش ساعتين ولقيته رد عليها بفويس وهو بيقولنا "السلام عليكم ورحمة الله وبركاته، صديقتك ليها جن عاشق لكن من نوع مختلف غير اللي كان عليك، جن حاول يتقربلها لما عرف أنها على مشارف الزواج، ولما تزوجت بالفعل قرر أنه يختفي حفاظاً على كرامته لكن مش هيتركها تتهنى بحياتها، خليها تحذر وتخلي بالها كويس أوي؟!!"

وعلى قد ما كلامه كان مرعب بالنسبالي لكن اعتبرته مجرد تنجيم عادي من واحد بيقتي لأنه حتى مشافنيش عشان يتأكد من كل اللي قاله.

محصليش أي حاجة غريبة إطلاقاً من وقتها لحد ما أتأكدت أن الراجل ده مجرد واحد كذاب بياكل عيش وبيجمعه قرشين من شوية الجهلاء اللي بيصدقوه.

ربنا كرمني وانجبت بنوثة سمتها "لانا" عوضتني عن كل شيء ونسنتني كل حاجة حصلت في حياتي، وبعد مرور شهرين من ولادتها بدأت انزل اجهز اوراق السفر عشان اروح لجوزي اللي منتظرني هناك في الاردن.

لكن استمرار نزولي بيها خلاها تتعب مني، وكان ناقصلي اخر ورقة بس والباسبور يكون جاهز.

فقررت اني اسببها عند رؤى اليوم ده وانزل بدري اخلص ورقي وارجع على طول، وياريتني ما سببها لحظة واحدة بعيدة عني.

مجرد ما وصلت مشواري لقيت تليفوني بيرن ومكتوب رؤى! معقول لحقت تزهد بالسرعة دي؟

طلعته ورديت عليها وسمعت ابشع جملة سمعتها في حياتي "بنتك ماتت يا صبا ألحيني"

رجلي مكانتش شيلاني، وعقلي رافض يصدق اللي سمعته، اكيد رؤى بتهزر، اكيد ده محصلش وهيطلع مقلب أو هي نايمه بزيادة، ابوا اكيد نايمه هي نومها ثقيل من التعب مش اكثر.

"لانا مماتتش صح؟ لانا عايشة وانت بيتهيا لك مش كده؟"

دي كانت أول جملة قولتها لما لقيت رؤى بفتحلي الباب وهي منهارة في البكاء.

غصب عني زقيتها بكل قوتي وقعت على الأرض ودخلت جريت على بنتي اللي كانت محطوة على الركنه مبتتحركش.

فضلت احركها وانا بطبطب عليها براحة ويقولها "لانا قومي، احنا خلاص هنسافر لبابا.. بابا مشتاق اوي يشوفك وبيقول انك شبهي، يلا قومي عشان خاطري عايزين نسافر سوا"

لكن لانا مكنتش بتردد، ولا حتى بتتنفس.. بقيت أسمع دقات قلبها أحاول استشعر اي حياة فيها لكن كانت انتهت.

انتهت مجرد ما سبتها ساعة واحدة من يوم ولادتها، ساعة واحدة ضيعتني وضيعتها مني، مكنتش قادرة أسمع اي شئ حواليا ولا اركز فيه، غير جملة رؤى اللي واقعة ع الأرض وهي بتردد "مش هيسيبك، مش هيسيبك"

تت

## شيطان العيد

\_يا ماما الخروف أي دخله اوضتي، منظر القرون رعبني في الضلمة حرام عليكوا.

\_خروف اي يا حبيتي ما ابوكي دبحه م الصبح؟

لحظة واحدة؟ خروف اي اللي ادبح؟ اومال اللي شوفته في بلكونة اوضتي ده أي ؟

اقدملكم نفسي، أنا هدير.. طول عمري فحالي ومكنش عندي أي مشاكل من اي نوع خصوصاً حوارات الجن والشياطين اللي بسمع عنهم دايماً من صحابي وبستعجب هما ليه بيحصلهم كل ده؟! وأنا اقصى شئ مرعب حصل معايا لما دوست على ديل قطة والسلم كان ضلمة.

كنت بتعمد أعمل كل الأشياء الخطر بحرية زي إنني اسيب باب الحمام مفتوح، أو أخذ دش ف وقت متأخر واقف اغني قدام المرايا، واحيانا اقع اضحك بصوت عالي بدون سيب، كنت مقتنعة جداً أن كل اللي بسمعه ده مجرد خرافات وتهيؤات من صحابي عقلهم الباطن اللي بيرسمه ليهم ومفيش حاجة إسمها عفريت وشيطان ومس وعاشق والكلام ده.

لحد من أسبوع لما بابا دخل البيت علينا وهو معاه خروف كبير صوته مزعج وقرر أنه يربطه في حمام الضيوف لحد ما يدبحه أول يوم العيد.

أول ليلة معرفتش أنام من صوت الخروف العالي في الشقة وقومت بليل على صوته متعصبية ومن عصبيتي اديتله بالقلم؟! بعدها وقفت استوعب اللي أنا عملته وقعدت أضحك على صدمة الخروف مني وصوت مأماته اللي وقف فجأة.

لما حكيت لصحابي ف الجروب اللي عملته قعدوا يضحكوا وقالولي صوريه بالله عليك وانتي بتعملي معاه كده وخذنا الموضوع بهزار ومكنش اعرف اللي هيجصلي منه...!

نفذت اللي صحابي طلبوه وفتحت فيديو ودخلت ضربته بالقلم وقعدت أضحك على نظراته ليا وهو مربوط ومش عارف يطولني.

معرفش ليه لوهلة كده كنت خائفة من نظرات عينه ليا، حسيت أنه فاهم وعايز ينتقم مني، بس مش قادر .

بعدها بيوم حسيت بملل رهيب ومكنش قدامي غيره في البيت وقررت اتسلى عليه وأصاحبه، قعدت اضفر في شعره وأصور لصحابي وأضحك على شكله، وبعدين قررت اني اقص كل الفرو ده زي ما بشوف الحلاقين بيعملوا.

قعدت اقص في شعره بعشوائية وهو بيحاول يستخبي ويهرب مني ويديني ضهره لحد ما لاحظت اني اتغايبت في مرة واتعور وقصيت جلده غلط، صوته بقا عالي جريت جبت بن وكتمت الجرح قبل ما بابا يشوف اللي عملته.

والحقيقة صعب عليا وزعلت من افعالي لما فكرت فيها وقررت مجيش جنبه تاني، لكن هو مسابنيش.

بدأت تحصلي هلاوس وحاجات غريبة اول مرة تحصلي، أول ما حطيت راسي على المخدة بليل وحاولت أنام سمعت صوت جاي من تحت المرتبة بيزوم كده مممممممممممممممم زي الشياطين.

كان الصوت مرعب وواضح جداً لدرجة تمنعني أشك أن دي مجرد هلاوس من عقلي الباطن.

ويادوب قدرت اغلب خوفي وروحت في النوم لقيت الباب بيتفتح ببطء وبيعمل صوت، قعدت مكاني وفضلت اقول "ماما؟ مين فتح الباب؟" محدش رد عليا وكان الوقت متأخر وكل البيت نايم.

لحد ما ظهرلي قرون طويلة بتدخل من فتحة الباب وراس الخروف بتظهر لكن المرادي عينه كانت حمرا ومنظره بشع.

فضل واقف يبصلي وراسه ثابتة قدام الباب، وجري عليا فجأة بسرعة رهيبة موجه قرونيه ناحيتي عشان يقتلني، أول ما لمسني صحيت من النوم وأنا بصرخ من الكابوس البشع اللي شوفته.

أعصابي تعبت اليوم ده، ومقدرتش أنام. انتظرت لما طلع الصبح عليا ونزلت خرجت مع صحابي عشان انسى اللي حصلي ورجعت البيت بليل.

أول ما دخلت اوضتي وقفت أغير هدومي ولمحت قرون الخروف ورا الستارة، اتصدمت وطلعت أجري على ماما وأنا بقولها بعصبية من خضتي "يا ماما الخروف أي دخله اوضتي، منظر القرون رعيني في الضلمة حرام عليكموا"

\_خروف اي يا حبيتي ما ابوكي دبحه م الصبح؟

العروق وقفت في دمي واتجمدت مكاني، إزاي دبحوه؟ أو مال مين اللي شوفته ورا الستارة ده؟

فسألته " هو انتوا جبنتوا خروف تاني يعني؟"

لقتها بتقولي "ابوكي حلف ما يجيب خرفان تاني البيت بعد ما لقيه متعور وكان قرب يموت في الحمام"

يعني اللي شوفته في اوضتي ده كان مجرد خيال؟ ولا فعلاً روحه جت عشان تنتقم مني بسبب اللي عملته؟

حاولت طول الليل انام بره ف الصلاة عشان خايفة ادخل اوضتي، لكن مقدرتش انام ع الانتريه واضطريت ادخل الاوضة بعد ما قربت اروح في النوم وجبت أخري م السهر.

فتحت تسجيل التليفون جنبي عشان لو حصل اي أصوات اسمعها، أو يمكن أنا اللي بخرف وانا نائمة وعشان كده بحلم بحاجات وحشة.

"ممممممممممممممممممممممممممممممم" صوت الشيطان رجع من تاني، قومت مفزوعة ولعت النور وأنا بتلقت حواليا وبتأكد اني لوحدي في الاوضة.

لكن اعصابي مش متحملة اني اقدر افوق، قومت افتح الباب وقولت أخرج اعمل كوباية قهوة تفوقني شوية وانام الصبح لما البيت يكون فيه حس اقدر اطمن وانام.

مكنتش مصدقة إنني وصلت للدرجة اللي تخليني خايفة من النوم بالشكل ده، أنا اللي طول عمري بسخر من حكاوي صحابي في الرعب بقيت خايفة أنام ومنتظرة البيت يصحى عشان انام؟

وانا بفتح باب الاوضة لقيته مقفول عليا جامد ومبيفتح! فضلت أحاول فيه وانا مش فاهمة دي اول مرة يعمل كده معايا؟

نزلت ابص تحت الباب يمكن في تراب ولا طوبة مانعة أنه يفتح، مجرد ما نزلت على ركبتي نور الاوضة اطفى لوحده!..

ورجع الصوت يظهر من تاني لكن المرادي بوضوح "مممممممممممممممممممممم" بقيت ادور بأيدي على النور بسرعة وانا بصرخ وبنادي على أهلي، لكن من الواضح إن محدش هيسمعني تاني وهيقدر ينفذني منه زي ما هو ملقاش حد ينفذه مني!..

باب البلكونه اتفتح وبدأت الستارة تطير ويدخل منها رياح رهيبه، لحد ما ظهر هو بهيئة مرعبة.

قرونه كانت بتنزف دم ونازل على وشه كله، وعينه شبه الشياطين بتتور أحمر كأنها هتطلع نار تحرقني، بقا يقرب مني وهو بيعمل نفس الصوت "مممممممممممممممممممممم" وبقيت



## إنتقام مؤجل

\_ معقول خايف مني، أنا مش هقتلك، أنا هسلخ جلد وشك بس.

كان ده اليوم التالت ليا وأنا بسمع نفس الصوت بيهمس في وداني عشان أقوم بعدها وأنا بصرخ ومش عارف حتى أهرب في أي إتجاه.

أنا حتى ساكن لوحدي في شقة في الدور الخامس مخاوفي كلها هي إني أتفاجئ بنفسي جثة مرمية ع الأرض وأنا بحاول أهرب في مرة من الصوت اللي مش مفارقني بقاله كام يوم.

جريت بسرعة على المراية.. الحمدلله ده وشي ايوا هو أنا عارف..مفيهوش خدش..وايدي مش مكتفة ولا بوقي متكمم، ومفيش برضو بنت عندها 25 سنة واقفة فوق دماغي وحالفة تسليخ وشي وعلى وشها ابتسامه غريبة تخوفك أكثر.. أنا حقيقي تعبت .

\_ اهلاً وسهلاً أتفضل عيادة دكتور احمد مختار اساعد حضرتك ازاي؟

\_ أهلاً بيكي، محتاج أحجز جلسة النهاردة، أنا أول مرة اروح لدكتور نفسي؛ لمشكلة لازملها حل ضروري هحكيها طبعاً قدام الدكتور .

\_ تمام يافندم، ميعاد حضرتك 5.30.

\*\*\*\*\*

الخوف والرعب لما يبسيطروا على دماغ حد بيقفوه حرفياً إنه يمارس أي نشاط، بقيت بتجنب النوم، الخروج مع صحابي، حتى الوقت طويل جداً مبيخلصش وأنا مستني دوري في الكشف قضيت أغلبه وانا برتب كلامي وبتخيل نفسي بحكي للدكتور الهلاوس اللي بشوفها، وارجع اشوف شكله ونظراته للمجنون اللي قدامه.  
افكار كتيبير وزحمة في دماغي قطعها صوت البننت الريسيشن وهي بتنادي عليا إن دوري جه وأقدر ادخل ..

لحظة\*

البننت دي ابتسمتلي بطريقة قريبة جداً لحد التطابق مع البننت اللي ف الكابوس..!

كل مادا بمسك اعصابي ومتوترش في رد فعلي ..

كملت ناحية الباب ودخلت الأوضة لقيت على المكتب واحدة ست، توتري بيزيد بدون سبب.

\_المفترض إن دي عيادة دكتور احمد مختار، حضرتك مين؟

\_انا الدكتورة منيرة عبد المجيد، وشريكة د. أحمد في العيادة مش عايزة حضرتك تقلق، النهاردة ميعاد متابعتي، جايز السكرتيرة نسيت تفهم حضرتك التقطة دي على اي حال تقدر تكنسل الحجز.

\_ملوش لزوم، بدور على حل مشكلتي مش شخص بعينه .

ابتسمت ابتسامة مريبة جدًا و عنيتها كانت بتلمع بنشوة إنتصار غريبة، كانت نظراتها مبترووحش عني مهما حاولت اتجاهل، رجعت اهدي نفسي وأن الهالوس ابتدت ترافقني وانا صاحي كمان، وأنها اثرت عليا وبقيت أشوف ابتسامات الناس من حواليا بنفس صورة البنت المشووه المرعبة .

طلبت مني أعرف نفسي وسني ولو عندي اي تاريخ مرضي سابق والمعلومات العبيطة دي وهي بتسجل ورا مني الحاجات دي ف ورقة قدامها، ولما خلصت طلبت مني ارتاح ع الشيزلونج واغمض عيني واحكي اللي بيحصلني بأدق التفاصيل .

أنا طاهر 37 سنة عندي بيزنس خاص بيا لسه بستارت أب فيه، بستورد مستحضرات تجميل من شركات كبيرة وابدأ بتوزيعها على محلات البريتي وومن، حياتي في العموم نورمال مفيهاش خوارق يعني أو ما يلفت الانتباه، من اسبوع بالطبط بدأت تحصلي حجات غريبة جدًا اولهم القضية الي اترفعت على واحدة م الشركا .....

\_أنت خايف مني أنا مش هقتنلك، أنا هسلخ وشك بس\*\*\*

صرخت بصوت عالي بمجرد ما سمعت الصوت واتجمدت مكاني مكنتش عارف إيه التصرف الصح اللي اعمله، أنا مش فاهم حتى الصوت ظهرلي منين دلوقتي وليه؟.. لقيت الدكتورة وقفت بتحاول تهديني وانا بتحرك جوه الاوضة بفوضوية شديدة وقمت واقع ع الأرض بدور علي اي شئ ممكن يخبييني .

جسمي بيترعش مني وكأني طفل بيسمع حدوتة عن ابو رجل مسلوخة او أمنا الغولة، بصيت بطرف عيني عشان أتفاجئ بباب الغرفة مفتوح وناس كتبيير بتبصلي مش فاهمين اللي بيحصل .. قامت بعدها الدكتورة وطلبت منهم يتفضلوا، وطبطبت عليا وشدتني عشان اقوم وهي مبتسمة وأنا كل ما بتبتسم خوفي بيزيد.

ثواني وكنت قدرت أصلب طولي، راحت هي ناحية ميني بار صغير وخرجت منه قزازة مية وحباية وطلبت مني اشربها وهبقي كويس عشان أقدر أكمل وأحكي .

\_أشرب دي هبقي أحسن، متخفش.

\_ طيب ممكن طلب.. كنت بطلب وانا محرج م اللي هقوله  
\_ ممكن متبتسميش ليا تاني، انا آسف.

هزت دماغها ومتكلمتش وشاورت ناحية الشيزلونج إني أرجع أرتاح وأكمل .  
وهو ده اللي عملته، شربت الحباية وغمضت عيني وكلمت...

\_ قضية اترفعت على واحدة من الشركات اللي كنت بستورد منهم بنتهمهم بإن منتجاتهم مغشوشة  
سببت آثار تشبه الحروق في الوش نتيجة استخدامهم ومكنش واحدة ولا اتنين م المستخدمين اللي  
اتقدموا ببلاغات بالشكل ده، ورغم ان شركتي بعيدة عن اي خسائر مادية إلا أن ده فعلاً كان غريب  
بالنسبالي ..

معداش الأسبوع ده إلا وأنا بيحصلي الاغرب..!!

بنت مشووه في نص وشها، عيناها على وشك الوقوع منها، وبتفرز صديد وقيح ودم، شعرها  
منكوش وقرعة من ناحية النص المحروق، بتعرج في مشيتها وعلى وشها إبتسامه هادية مخلية  
سنانها المتكسرة باينة بشكل مرعب، معرفش إزاي جسمي بيتفاعل مع الخوف لما بشوفها وهي  
مكتفاني من أيدي ورجلي ومتكتم مش قادر حتى اصرخ..  
الخوف اللي بعيشه من كابوس زي ده أكبر من أي كلام ممكن احكيه، انا محتاج حل أرجوكي، هو  
أنا مجنون؟!!

\_ لأ مش مجنون، مش جايز ده يكون سببه عقلك الباطن بتخيلات قريبة من شئ واقعي في حياتك؟  
يعني شكاي الناس من آثار مستحضر تجميل مغشوش سبب لهم حروق؟ اقصد ان فيه وجه شبه  
بين الأحداث .

\_ لا معتقدش إطلاقاً.

\_ طيب تفكر إن حياتك فيها موقف قدرت تأذي فيه حد نفسيًا أو جسديًا؟!!

\_ برضو لا، حضرتك بتسألني ليه، أنا في طبعي مسالم جدًا .

\_ مجرد سؤال عابر، حبيت أعرف بيه إذا كنت نسيت البنات اللي جاتلك في مرة وأنت على كافييه  
وسط صحابك، وطلبت منك بكسوف تساعدنا بأي مبلغ تقدر عليه عشان تتعالج.  
كانت مغطيه وشها وقدرت أنت بكل بجاجة وتسلط تشده منها ولما صرخت فيك و عيطت صوت  
ضحكك عليها كان أعلى من صوت صراخها، عشان تكتشف أنها كانت بتداري بيه حرق في وشها  
أتعرضتله وهي صغيرة من تعذيب جوز أمها وإهانته ليها.  
طب نسيت لما سخرت منها وطلبت منها تحرق نص وشها التاني عشان يبقوا متشابهين وتبقى مسخ  
زي ما وصفتها وأم وش مسلوخ؟

وسط ما كانت بتحكي مكنتش قادر من الصدمة أظهر أي رد فعل غير أنني أثبت مكاني ومتحركش،  
اللي حكته حصل فعلاً وكأنها كانت موجوده، لكن الموقف ده كان من حوالي سنتين وكنت نسيت  
وعمرى ما ربطت اللي بيحصلى بالموقف ده ...

جسمي بيتقل بشكل غريب مش مساعدي إني أقوم، بدأت أشوف إضاءة الغرفة بتبهت حواليا والدنيا  
بتضلم ووشها بيعتم، ورجعت لنفس الإبتسامة اللي تخوف من ثاني.  
قربت مني وأنا جسمي كله فاقد التحكم فيه وقالتلي:

\_لو أنت كنت نسيت فأنا مبنساش، تخيل أنني طلعت أحسن منك، وأديتك حباية مخدرة عشان  
منتوجعش، مش قولتلك إنت إزاي خايف مني؟  
أنا مش هفتلك أنا ه س ل خ جلد و ش ك بس.

تمت

## قاتل مشترك

صاحبنا مات بسببنا عن طريق الخطأ، وانتقم منا عن بأشع الطرق.  
أقدمكم نفسي أنا ناجي عندي 30 سنة من كفر الشيخ.  
وناجي ده مش مجرد إسمي وبس، هنتأكدوا من معناه لما تسمعوا قصتي.

إحنا مجموعة صحاب من صغرنا ولاد منطقة واحدة (فارس و أنور و عمرو و إبراهيم وأنا  
ناجي)...

طول عمرنا أخوات وأصحاب ومبنفارقش بعض، واللي بتحصله مشكلة بيستغيث بالباقي ينجده.  
لحد ما جه يوم مشؤوم علينا كلنا، لما صحيت من النوم على صوت جرس الباب بصوت مستمر  
مزعج، ولقيت إبراهيم وعمرو بيدخلوا ويقولولي:-

\_ كل ده نوم، قوم ألبس عشان خارجين.  
طاوعتهم ونزلت معاهم القهوة مستنين باقي أصحابنا فارس وأنور يجولنا.

لقيت فارس اتصل بينا وقال أنه عايزنا ع السطح بتاعه ومعاه مشكله ضروري، كلنا اتخضينا  
وجرينا روحنا على سطح بيته زي ما قال.

لقيناه قاعد ببيكي ويترعش وجنبه حاجة كبيرة مغطيها بملاية !  
كلنا اتصدمنا وأتاكدنا أن اللي جنبه دي جثة .  
خوفنا تقرب منها وحاولنا نهديه عشان نفهم هو قتل مين؟ محدش فينا خد باله أن أنور صاحبنا  
مجاش. كلنا اتوترنا من شكل فارس وقعدته جنب الجثة وحالة الذعر اللي هو فيها.

ولما هدي وبدأ يحكي قال:-

\_ انا كنت قاعد زهقان ولقيت أنور أتصل عليا بيقولي متنزلش القهوة وأنه عايزني في موضوع مهم  
بس نكون لوحدنا، ولما وصل خدته وطلعنا السطح عشان محدش يسمعنا زي ما طلب مني، لكن  
لقيته بيطلع مسدس وبيقولي أنه لقاه في بيت ابوه، وسرقه وجالي عشان يبيعه ويخلص منه بدل ما  
أبوه يتهور ويعمل بيه اي مصيبة! أنا أول مرة امسك سلاح فحياتي مانتوا عارفين!  
خدت منه السلاح وابتديت اقلب فيه ومعرفش أن جواه رصاص ولا بيضرب إزاي؟ وفجأة طلعت  
رصاصه مني طايشة غصب عني واللي قدامكم ده أنور صاحبنا.

وبدأ يبكي وينهار من تاني وهو عمال يردد "مكنش قصدي" "مكنتش أعرف" وكلمات كتير زي دي.

كلنا اتصدمنا واتمنينا يكون مقلب من بتوع فارس. عمرو راح يشيل الملاية واتفاجئنا أن كلامه صح، والقَتيل كان صاحبنا "أنور".

محدث فينا كان عارف يتصرف، اللي بدأ يعيط واللي حط أيده على دماغه واللي بقا يحضن أنور ويصرخ. كان أسوء يوم يمر علينا في حياتنا وأول اختبار حقيقي فشلنا فيه.

فكرنا نبلغ الحكومة ونعرفهم أنه كان قتل عن طريق الخطأ، لكن كلنا خوفنا صاحبنا ياخذ إعدام ويزيد عدد الضحايا، فقررنا إننا نتخلص من جثته وندفنه من غير ما حد يعرف. عمرو قال إن ترب العيلة بتاعته قريبة وهيروح يظبط مع ساكن الحوش إنه يفتحله التربة من غير ما حد يعرف ويديله شوية فلوس يسكتوه .

متبقاش غيري أنا وإبراهيم وفارس المنهارم اللي حصل. فكرنا ازاي هننزل السلم والشارع بجثة أنور؟ ومبقيناش عارفين نتصرف. لحد ما رجع عمرو وقال أنا حضرت التربة ويلا بينا؟

عمرو كان اكثر واحد قلبه ميت فينا وكان ثابت متهزش زينا، وزعق فينا كلنا وقال:-

\_ انتوا قاعدين كل ده، يلا اتحركوا خلينا نخلص قبل الصبح ما يطلع علينا ونتكشف.

طلب من فارس ينزل يجيب شنطة سفر من بيته عشان نحط فيها الجثة، وفعلاً نزل وطلع بشنطة سفر كبيرة، لكن الأزمة أن أنور جسمه كان اتخشب خلاص، وكان طويل على الشنطة معرفناش ندخله فيها .

ف اقترح إبراهيم إننا نقسمه على جزئين ونفصل جسمه عشان يدخل ف الشنطة! وبما إنه دكتور تشريح هيقدر يعمل ده بسهولة.. كانت الفكرة مرعبة لكن مقدمناش غيرها .

نزل إبراهيم يجيب الادوات اللي هيشرح بيها جثة أنور، غاب ساعة ورجع وأحنا محلك سر، قاعدين نبص لبعض نظرات "معقول هنعمل كده في صاحبنا؟ "

لكن ولا حد فينا قدر يعترض من الخوف، وبدأ إبراهيم وعمرو يشغلوا ف الجثة قدامنا.

مقدرتش استحمل المنظر وفضلت استفرغ ولقيته بيزعق وبيقولي:-

\_ ايدك معايا يا ناجي أنت وفارس، أنا مش هقدر اخلص بسرعه لوحدي..

قربت وانا ركبي بتخبط في بعضها، صاحب عمري واخويا بينزف وبيتقطع وأحنا السبب!

قربت من الجثة وأنا ببكي وبحط راسي على راس أنور ولسه بقوله حقك عليا يا صاحبي، لقيت فجأة اللي مسكني من رقبتى.... اتحنقت ومبقتش مصدق اللي أنا شايفه.. أنور عينه فتحت ف وشي

وعبارة عن دم مش عين عادية. قام عشان ينتقم منا كلنا ويأخذ حق دمه اللي كلنا غدرنا بيه.

سمعت صوت صراخ عمرو وفارس وإبراهيم لما شافوا الجثة قامت تنتقم وسابوني اتخنق في ايده وهربوا، قبضة أيد أنور كانت قوية للدرجة اللي خلتنني اقطع نفس وافقد الوعي. وبعدها بساعة لما فوقت لقيت نفسي ع السطح لوحدي، والجثة متشرحة و مكانها !

عمرو وفارس وإبراهيم مش موجودين، والصبح قرب يطلع عليا. عرفت انهم دبسوني ف الجريمة وهربوا.

طلعت أجري ع السلم اهرب قبل ما حد يشوفني أنا كمان، لكن مع أول دور نزلته لقيت دراع مرمي والسلم كله دم! خوفت يكون اللي في بالي صح وكملت نزول وانا قلبي هيقف من كتر الرعب، الدور اللي بعده لقيت نص جسم فارس محطوط على باب بيته!

معدتي مستحملتش المنظر وبقيت استفرغ من منظر الدم في كل دور، وكل دور أنزل ألاقي جزء من صحابي مرمي عليه .

يعني اللي شوفته مكنش وهم! وأنور قام وانتقم فعلاً، قولت أنا لازم اهرب من بحر الدم ده واختفي قبل ما حد يشوفني، كملت وهربت لحد ما وصلت البيت ومعرفش أنا نمت ولا فقدت الوعي اول ما وصلت .

صحيت تاني يوم على صوت دب جامد ع الباب، قولت دي اكيد حكومة وجاية تقبض عليا، فتحت الباب وانا مستسلم لنصيبي اللي هشوفه، لقيت عمرو وإبراهيم بيقولي:-  
\_ كل ده نوم؟ قوم ألبس عشان خارجين....!

اليوم بيتعاد! نفس اللي حصل؟ إزاي هما قدامي طب واللي حصل امبارح؟ لبست ونزلت معاهم وانا بطمن نفسي أن كل ده كان مجرد حلم .  
قعدنا ع القهوة وإبراهيم قال:-

\_ انا هتصل بفارس وأنور يحصلونا  
رفضت وقولتلهم لا، احنا نروح لفارس بيته، كنت قاصد امنع الجريمة قبل ما تحصل، كلهم استغربوا من تصميمي وقولتلهم لو مش موافقين هروح أنا لوحدي ومفيش وقت عشان نضيعه .  
خدتهم وروحنا على بيت فارس، خبطت على بيته فتحلي اخوه وقالي فارس فوق السطح مع زميلكوا أنور..!

جريت على فوق بأقصى سرعتي وخلص وصلت، لقيت فارس قاعد قدام أنور وف أيده المسدس بيقلب فيه، صرخت من خوفي عليهم وقولتلهم "فارس" اتخض وداس ع الزناد، ومات أنور للمرة الثانية قدام عيني، لكن المرادي بسببي...

تمت

## عمارة رشدي

كل اسكندرية بتحذر وتخاف من عمارة رشدي الشهيرة بالعفاريه، لكن أنا واخويا وصاحبي قررنا ندخلها، خصوصاً أنها اتعرضت علينا بأقل سعر للإيجار.

وكأي شباب مغتربين بندور على أقل سعر، وافقنا وقولنا أن ربما تكون كل دي اشاعات وتهيوات من أصحاب الحكايات مش أكثر.

اول ما روحنا لقينا البواب مشغل قراءن وأسلوبه متوتر، أخويا سليم قعد يضحك عليه وقالنا "اهو تلاقوا ده أصلا اللي بيطفش السكان."

نسيت اعرفكم بنفسي... أنا سالم شاب 30 سنة مغترب من كفر الشيخ، جيت أنا واخويا سليم اللي عنده 28 سنة وصاحبنا اللي زي أخونا ومبفترقش عن بعض سامح واللي عنده 30 سنة قدي بالظبط.

سليم اخويا كان واخذ الموضوع ضحك وهزار من اول ليلة طلعلنا فيها الشقة، لكن أنا كنت طول الوقت بقرا قراءن في سري و سامح صاحبنا متوتر و عمال يبص يمين وشمال طول ماهو قاعد.

هدوء العمارة كان مريب لكن احنا الثلاثة محسيناش ب ده اول ليلة عشان كنا متجمعين إحنا الثلاثة ومرت اول ليلة عادي جدًا، وكل واحد فينا اطمئن إنها مجرد إشاعات.

وبرغم أن محصلش حاجة لكن لقيت سامح صاحبي داخلي الاوضة الفجرية وبيقولي أنه مش عارف ينام لوحده، فعرضت عليه ينام جنبي، ولما صحيت الصبح بحكي لسليم وسط الهزار وبقوله "سامح جالي زي الطفل بليل مبرق وبيطلب مني ينام جنبي، تخيل الشحط ده كله لسه بيخاف؟" وضحكنا سوا إلا سامح اللي اتنفض وهو بيقولي "مين ده، أنا متحركتش من اوضتي!"

افتكرت أنه بيعمل كده عشان يخوفني ونسيب العمارة ونمشي فقولتله "ماشي يعم اعتبره محصلش" ونزلنا شغلنا إحنا الثلاثة واللي كان كل واحد في شغل بعيد عن الثاني وانفقنا نتقابل في البيت الساعة 8 لما نخلص.

لحسن حظي خلصت شغلي بدري حبتين وقولت ارجع احضر الغدا ليهم بدل ما نشترى من بره، لكن لما رجعت وفتحت الباب لقيت سليم مولع شاشة التلفزيون على أغاني عالية جدًا وعمال يضحك ضحك هيسثيري وبيرقص بجنون!

استغربت أنه موجود بدري كده وسألته "انت اي رجلك بدري؟" لكن مرشد عليا وكمل ضحك وخذ بأيدي وعمال يحاول يرقصني معاه ويضحك!

مكنش جديد عليا جنان اخويا سليم، فسيبته بالعافية ودخلت المطبخ احضر الاكل اللي اشتريته، فات نص ساعة ولقيت الباب بيخبط، فضلت انده على سليم يفتح الباب مكنش بيرد عليا وصوت التلفزيون عالي جداً.

قولت أمري لله وخرجت أفتح لقيت سليم هو اللي ع الباب!  
بقيت زي المجنون ببصله وببص ورايا بدور على اللي كان قاعد معايا ورقصني كل الوقت ده، ملقتش حاجة!  
لقيت سليم دخل وهو بيقولي "أي يابني شوفت عفريت، وأي صوت الشاشة العالي ده كله أنت عامل فرح"  
سألته "أ أنت إزاي؟ أنت مش كنت هنا ورقصنا سوا؟"

قعد يضحك وهو بيقولي "يعني يوم ما يطلعك عفريت، يكون رقاص"

كان بيحاول يخفف عليا صدمتي بالضحك والهزار لحد ما وصل زميلنا سامح ومعاه واحد اول مرة تشوفه، خده ودخل اوضته وخرج قالنا أن ده صاحبه وهيبات معاها النهاردة بس عشان معاها مشكلة وأضطر يجيبه معاها .

رحبنا بزميله وقعدنا احنا الأربعة سوا وصاحبه ساكت طول الوقت باين عليه عنده مشكله كبيرة، أو تقريباً خايف من العمارة بردو.

خلصنا قعدتنا وسامح خده اوضته وقال إنهم هيناموا سوا، وقعدت مع سليم اخويا احكيه اللي حصل اول ما رجعت الشقة والعفريت اللي كان بيرقص ويضحك، مصدقنيش وقالي اكيد هلاوس وتعب من الشغل مش اكثر، بعدين لقينا تليفونه بيرن اول ما سليم بص في تليفونه لقيته شرق وبرق ومش قادر يتكلم، خدت منه التليفون لقيت سامح اللي بيتصل! بيتصل ليه وهو في الاوضة!

مفلقتش الحقيقة قولتله رد يمكن عايزين حاجة م المطبخ ومكسلين يخرجوا، لكن كانت الصدمة أول ما فتحنا ولقينا سامح بيقولنا "معلش يا رجالة مش هقدر ارجع البيت النهاردة خدت ورديتين ف الشغل وهبات هناك "

سليم رمى التليفون ولقيته فوق رجلي وهو بيتترعش وبيقولي "او مال مين اللي في الاوضة دول يسطا؟"

انا كمان رجلي مشالتنيش ولقتني زقيت سليم وقولت يا فكيك، فتحت الباب أجري على السلم وسليم ورايا بيجري ويصوت زي العيال.

لقينا البواب قاعد مكانه ومش مستغرب من فزعنا ولا اتحرك، وقفنا أنا وسليم معاها وقولنا اللي حصل لقيناه بيقولنا بكل برود "ده العادي يا ولدي، اطلعوا شغلوا قرءان وناموا"

سليم رفض يطلع الشقة تاني وانا كمان مقدرتش اطلع وانا عارف أن في عفرتين فى الاوضة، قعدنا ع الرصيف قدام العمارة لحد ما الصبح طلع علينا، وشجعنا بعض نطلع عشان ناخذ هدموم الشغل وندور على شقة إيجار ونمشي من هنا.

طلعنا فتحنا الشقة واتسحبنا براحة وسليم ماسك في ضهري ولا اللي قافش حرامي وعمال يقول "حابس حابس، ابعده يا شيطان" وشوية جُمَل لو ليها فايده ف اكيد هتلبسنا مش هتصرف الشيطان.

ويدوب لسه داخلين اوضتنا ناخذ الهدوم لقينا باب اوضة سامح بيفتح وفي صوت حد بيتحرك، أنا وسليم بقينا نتشقلب على بعض ونصرخ بهيسترية ومش عارفين نخرج م الاوضة نروح على فين، لقينا سامح جاي جري علينا وهو عمال يقولنا "في اي، اي اللي حصل" واحنا كل اللي علينا نصوت ونطلع فوق بعض قدامه.

لقينا صاحبه بيعلي صوته وبيقولنا "الله أكبر، الله أكبر شكلهم اتلبسوا" تتحنا أنا وسليم! عفرت أي ده اللي بيكبر؟ بصينا لبعض بصدمة وبصينا لسامح اللي واقف عمال يردد أية الكرسي وهو خايف مننا، سليم قاله "يعني أنت مش عفرت؟" قلنا "أنا مش فاهم حاجة"

قولته "يابني مش انت امبارح اتصلت على سليم وقولته انك هطبق فى الشغل ومش جاي"! لقيناه أنكر المكالمة وقال إن تلفونه مفيهوش رصيد اساسًا.

لما سليم أتأكد أنه فعلا سامح صاحبنا ومش عفرت قام ناطط عليه وهو بيضربه وبيقوله "يعني أنت مش عفرت، واحنا بايتين فى الشارع من امبارح بسببك يا حلوف." فكيت الخناقة بينهم بالعافية، ولمينا هدمونا كلها وقررنا أننا نسيب الشقة عشان نقدر نثق فى بعض من تاني.

ربنا كرمنا ولقينا شقة قريبة من شغلي المهندس جبهالي، ونقلنا فيها بعد تعب يوم طويل.

واتجمعنا احنا الثلاثة بنحكي سوا اللي حصلنا فى اليومين اللي قعدناهم فى عمارة رشدي وبنضحك، سامح حكالي أنه فعلا اول ليلة مجاش نام جنبي واتصدم وكان حاسس بحاجات مش طبيعية بتحصل، وسليم بقا يقوله قد اي كان خايف من صاحبه الغامض ده أول ما شافه وكان مفكره شيطان، وقعدوا يضحكوا على موقف الشيطان اللي رقص معايا.

ووسط حكاويتنا لقيت تليفوني بيرن برقم مجهول، رديت ولسه بقول مين معايا لقيت اللي بيقولي "سالم أنا سامح، تليفوني فصل من امبارح وروحت البيت ملتكوش انتوا فين...!"

تمت

## ١١:١١

ناس كثير بتربط التاريخ ده بحاجات مهمة بما أنه مميز وكده، لكن أنا بترعب منه ومن كل مواليدي اليوم ده، وده نتيجة معرفة هباب جمعتني بأنسانة غريبة وكل تصرفاتها اغرب من بعض .

اللي يعرفني يعرف أن عندي قناة خاصة للمشاكل النفسية بنحاول نحل فيها على قد ما بنقدر، وجتلي أغرب رسالة من بنت بتقولني "أنا عندي ١٣ سنة ومش حاسة إن ليا حد في الدنيا دي أعيش علشانها وعايزة انتحر."

عمرها قليل جدًا على الأفكار السلبية المتملكة منها ولقيت نفسي بسأل في سري وبقول "إيه يخلي طفلة في السن ده تلجأ للانتحار! طب وفين أهلها وصحابها."

ولأن المشاكل بتجيلي بشكل سري ومش هعرف اوصلها، رديت عليها في القناة وقولتها "ابعتيلي ماسنجر نتكلم بأستفاضة اكثر ومتخافيش أنا هكون أختك الكبيرة وسمعك للنهاية."

فضلت طول اليوم مش عارفة أنام وكل دقيقة بدخل على طلبات المراسلة أشوفها بعتتلي ولا لسه وقلبي موجوع عليها وخايفة تعمل في نفسها حاجة قبل ما أوصلها.

ومفيش ساعتين ولقيت رسالة من حساب جديد بتقولني "أنا صاحبة رسالة الانتحار، بس مش هقدر أكلمك من حسابي الشخصي فعلت ده علشان متعرفيش."

مش مهم عندي أعرفها قد ما مهم إنني أنقذها من شر نفسها وقولتها "ولا يهملك، هنتكلم بالطريقة اللي تحببها، احكي لي اللي مبتعرفيش تقوليه لحد."

غابت حبتين ورجعت قالتلي "النهاردة ١١:١١ عيد ميلادي، وزى كل سنة مفيش حد افتكرني ولا قالي كلمة حلوة لا من صحاب ولا أهل، أنا هفضل مكروهة كده طول عمري."

ولأنها طفلة حاولت اجاري الموضوع على قد عقلها وقولتها "طب إيه رأيك لو اعملك بوست على صفحتي وناس كثير اوي هيصاحبوكي ويحتفلوا بيكي وننسبوا كلنا؟ جايز ده يعوضك حاجة."

ردت وقالتلي زي ما توقعت "موافقة، أنا اسمي رودينا، بس بما أنك هتنزلي بوست عني أنا عايزة اكتب كلمتين يظهرها للناس."

حسيت أن طموحها بسيط أوي وسهل تتراضى بأقل شئ وقولتها "قولي ياغالية كل اللي تحبيه، وانا هاخذ كلامك نسخ وانزله زي ما هو كده، ولو من القاهرة كمان اقبالك ونقعد سوا ونعمل احلى عيد ميلاد على الضيق بحتتين تشيز كيك وعصير قصب."

وهنا أنا كنت بحاول افرحها بكل اللي أقدر عليه علشان أبعد عنها فكرة الانتحار، وكنت حاسة إني ذكية جدًا والحمد لله سيطرت على الموضوع خلاص وانتهى، لحد ما البننت قعدت يجي ساعة تكتب تكتب تكتب لما الموضوع قلقتي، مهو أكيد مش كل ده بتكتب بوست يعني، دي كده بتكتب قصة حياتها .

قولت استعجلها وقولتها "إيه ياعمنا انتي بتكتبي قصة حياتك للنهاية ولا إيه، يلا عايزين نفرح."

ومكديت خبر وبالفعل لقيتها بعثالي رسالة طويلة عريضة، واللي كان مضمونها كذلك:

\_\_اخيراً لقيت حد يسمعي ويعرف قصتي .  
أول حاجة أنا حابة اشكر شهيرة أنها ادتني الفرصة دي، وخلصتني اكتبكم اللي خبيته في قلبي طول عمري .

أنا أسمي رودي، عندي ١٣ سنة بس، طبعاً أنا في نظر كوا طفلة عبيطة ومشاكلها هتكون على قد سنهها، لكن أنا شوفت اللي محدش يشوفه ولا يتحملة .

أنا اتولدت في بيت مافيهوش غير تينا وبس، ولما كنت بسأل فين بابا وماما كانت تينا بتقولي "عند ربنا" ومعرفش أي تفاصيل عنهم ولا حتى إزاي راحوا عند ربنا .

بيت تينا كان غريب أوي طول الليل والنهار ضلمة ومفيش شباك بيتفتح علينا، ولا حتى سمحتلي أروح مدارس زي الأطفال واتعلم، هي اللي كانت بتعلمني كل شيء على قد ما بتقدر .

حتى أكلها كان وحش لكن لأنني طلعت عليه كنت متعودة ومفيش قدامي غيره، لحد ما في يوم نكشت في بدروم البيت بتاعنا وهي نائمة وده المكان اللي كانت بتحذرنني من نزوله طول الوقت .

لكن الفراغ دفعني إني اكتشف أي حاجة جديدة وخلاص، خصوصاً أنه كان يوم عيد ميلادي ومحتاجة أي حاجة جديدة تحسلي .

اتصدمت أن البدروم عبارة عن هدوم حريمي ورجالي مبقيين بالدم الأسود، وكرايب كثير فوق بعضها ومن ضمن الكرايب دي لقيت تليفون .

هو اللي أنا بستخدمه دلوقتي من ورا تينا .

ماكنتش أعرف وقتها هو بيتفتح وبيستخدم إزاي لحد ما فضلت أحول فيه وعرفت أفتح نت واشوف العالم اللي كان محجوب عني .

الناس على النت شكلها غريب، وعندهم من كل حاجة اتنين "عينين وايدين ورجلين" مش شبيهي خالص.

حسيت أن التليفون ده بيوصلني بعالم موازي، واني دخلت في اعوذ بالله يعني عالم النبي ادمين.

عملت حساب وحطيت صورة سرقتها من بشرية وقولت أشوف انتوا بتعملوا ايه في حياتكوا واعرف انا ليه مختلفة عنكوا كده؟ !

ولما اندمجت معاكوا اكتشفت إنكوا كائنات مرعبة رغم جمالكوا، و بتحبوا الشر لبعضكم وكل بنت بتتكلم عن الثانية وبتكلها شر رهيب .

وفي يوم قررت أواجه تيتا واسألها أنا ليه مختلفة كده؟! واعترفها اني شوفت العالم بتاعكوا يمكن تعرفني على نفسي وتقولي انا مين وليه هنا، وليه معنديش أهل .

ودخلت على تيتا اوضتها كانت قاعدة ساكتة كالعادة كأنها تمثال، وقولتها "تيتا هو أنا ممكن اعترفك اعتراف؟".

تيتا كانت عيونها فاضية بس بتشوف كويس، بصت ناحيتي وقالتلي "اتفضلي يا رودى". قولتها وأنا خايفة من ردة فعلها وبتترعش "تيتا أنا قدرت أوصل لعالم البشر، وكرهتهم جداً رغم اعجابي بشكلهم الجميل، بس أنا مش فاهمة هو أنا ليه شكلي مختلف عنهم كده؟! ليه عيني اليمين مقفولة وليه رجلي مش بعرف اقف عليها وبمشي على بطني مش عليهم؟".

قامت تيتا قربت عليا رغم الرعب اللي حسيته، لكن لقبيتها بتحضني وتقوللي "علشان انتي مميزة، ومينفعش تكوني وسطهم يا رودى".

مفهمتش اللي هي تقصده وقولتها "يعني أنا شيطانة ولا بشرية زيهم بس مختلفة ومميزة؟".

ردت وقالتلي بصوت حزين "مستحيل ملاك زيك يكون شيطان، انتي بشرية يا رودى لكن أنا حفظتك من الشياطين كلهم، وعلشان كده انا بحافظ عليكى هنا".

الدموع سبقتني وقولتها "طب احكيلى إزاي بتحافظي عليا وازاي حبساني هنا في عالم أنا مليش حد فيه..".

ومن هنا خدت صدمة حياتي لما تيتا قالتلي "بصي يا رودى، أنا حاولت كثير اسيبك تعيشي من غير

ما تعرفي حاجة جايز يكون ده أحسن ليكي، لكن للأسف انتي كل ما بتكبري اسألتك بتكبر وياكي، ودلوقتي أنا مضطرة احكيك بينتي."

ركزت معاها بكل حواسي وقولتها "احكي يا تيتا ارجوكي، أنا مش هزعل منك صدقيني."

ردت وقالتلي "أول حاجة أنا مش تيتا، أنا مجرد واحدة من عالم الجن كنت ساكنة هنا في بينكوا قبل ما يجي ابوكي ويشترى البيت ويوضبه علشان يتجوز امك فيه، كانوا قصة حب رهيبية وبيعشقا بعض، بس كان عشق من النوع المؤقت اللي انتهى أول ما أمك حملت فيكي وجابت بنت مختلفة ومميزة زيك، وهنا النفور والشيطان دخل بينهم، لا هي بقت عيزاكي ولا هو بقا طابق أن أول خلفه له تكون بالشكل ده.

وللأسف أمك كانت قاسية عليكي بطريقة بشعة وبتدعي عليكي ليل نهار علشان تخلص منك، وحتى كانت بتسيبك من غير أكل ولا شرب وأنا اللي كنت بأكلك .

أمك كانت بنتجنن انتي ازاي عابشة مبتموتيش وهي حبساكي في اوضة البدروم بالايام؟ وكل ما تنزل تلاقيني كويسة وبتلعي، وهنا بدأت تشك انك شيطان مش طفلة .

وسمعتها في يوم بنتفق مع ابوكي أنهم يخلصوا منك ويجيبوا عيل غيرك، ونزلوا البدروم بليل علشان يخلصوا منك، لكن أنا مسمحتلهمش بأدوكي علشان هما اللي شياطين ويستحقوا الموت مش أنتي .

ودي كل القصة، اللي عارفة أنني لما احكيها لك يا رودي هتكرهيني وجايز تفكري في الانتحار، بس يابنتي أنا عملت كده علشان عيزاكي تعيشي بعيد عن الأشرار، العالم مليون ناس كتير شكلهم حلو صحيح، لكن قلوبهم مرعبة .

سمعت كلام جدتي كله للنهاية، وقررت يكون آخر عيد ميلاد ليا، لكن انتي يا شهيرة جيتي قدامي، وقولت قبل ما اموت احكيك حكايتي يمكن غيري تلاقني نصيحة تنفعها .

وعايزة أقول للناس متاخدوش بالمظاهر الخداعة، صحيح أنا شكلي وحش ومش حلوة زيكوا، لكن والله قلبي جميل، وعلى قد جمال قلبي نصيبي كان وحش في كل شيء وده مدفعنيش اكون شريرة أو وحشة لأ، أنا بس عيزاكو تهونني في عيد ميلادي.

**تمت**

## الفهرس

3	إهداء
4	توأم روعي
17	أبو رجل مسلوخة " شالم "
21	صحفي إلا ربع
32	حارس المقبرة
42	كارثة الماضي
51	عروستي سمر
61	خلف الستار
72	سيدة المشرحة
76	الساكنة الجديدة
83	بيت الرعب
94	لعنة الكتاب
100	شلة مساطيل
106	تخفيض فنادق
116	جيم روم
121	دُميتي الملعونة
125	حامل المقابر
129	لعنة المهندس

133	أبي القاتل
140	فستان الفرّح
149	معشوقى السفلى
161	بنت بلاستىك
165	رسالة إنتحار
181	شبح السكن
187	أم البنات
193	شبح ليلة الزفاف
210	شارع عفريت العمدة
216	علاء والجنّة
225	فتاة المصعد
233	سينما الجحيم
238	شيطان العيد
246	قاتل مشترك
249	عمارة رشدى
252	١١:١١